

R III


11182

11182





Ex libris D. Gallo







L A 1 1182 82

# PHARMA- COPEE.

*Qui est la maniere de bien choisir & pre-  
parer les simples, & de bien faire les  
composicions: despartie en trois liures  
par Iaques Silvius Medecin de Paris.*

Faite Françoise par André Caille  
docteur Medecin.



ALRON

POVR LOYS CLOQVEMIN.

1580.

Collection 27 March 1889



A TOVS AMA-  
TEURS DE LA  
PHARMACIE AN-  
DRE CAILLE  
desire Salut & ad-  
uancement.

\* \* \*



*N* ce qui concerne ce-  
ste vie, il n'y a rië que  
les hōmes doyent te-  
nir plus cher, ny plus  
precieux, que la santé:  
Et toutesfois il n'y a rien qu'ils aban-  
dōnent plus legeremēt, Et avec moins  
de consideration: car s'ils sont pressez  
de quelque maladie, le premier qui se  
presentera, se vantant de les pouuoir  
guerir, ils ne feront point de difficulté  
de s'en fier à luy, sans se beaucoup en-

querir, qui & quel, de quel sçauoir, & de quelle prend'homme est celuy qui leur promet telle chose: s'ils veulent seulement faire un habillement, une paire de souliers, ou quelque autre chose qui sera encores de moindre importance, ils seront curieux & diligens de s'enquerir qui est bon ouurier & bien entendu en l'estat: mais quand il est question de leur santé, ils n'en font pas grande enqueste, tellement qu'ils se fieront bien souuent de leur santé, à un homme auquel ils ne voudroyent pas auoir sië une bourse où il y eust seulement cinq sols dedans. Or ceste grande facilité & legereté, est cause que plusieurs se fourrent en l'estat, & se vantent d'estre Medecins & Apoticaire, & cependant ils ne sont rien moins: cela est aussi cause que chacun se voulant faire valoir de sa part, inuente nouuelles sectes, nouvelle façon d'enseigner, & nouvelle façon de faire les

re les compositiōs, lesquelles il faut apres esprouuer aux despens de la vie de tant d'hommes, de sorte que ceste confusion cause vn grand mespris de la medecine, sans qu'il semble qu'il y ait aucune certitude ou arrest en icelle. L'un se dit tenir la medecine des Grecs, l'autre des Arabes, l'autre mesprise & les vns & les autres, & se dit suyure la medecine de Paracelsus. Il y en a des autres qui font vn mesling de tout cela, & ne font estat que des remedes Pyrotiques & Chimiques, qu'ils appellent, c'est a dire, extraicts à force de feu, & cōme par extraction de quinte essence, mais quant aux causes, signes, & accidens des maladies, ils suyuent les Grecs. Mais il me semble que ceux ci n'ont pas grand raison: car desia de long tēps il s'est trouuē des hommes, qui ont promis de faire merueilles par ces remedes: & puis ayant bien soufflé, il n'en est sorti que

de la fumee. Il ne se trouue point d'auteur qui en ait escrit, qui soit de nom : & si quelcun en a escrit, il a usé de mots si obscurs, qu'il semble que son intètion ait esté pluſtost d'obscurcir la matiere, que non pas d'enseigner. Mesme ceux qui se vantent à y entendre quelque chose, ont des mots tous nouueaux, & comme ie croy, inuentez à plaisir pour faire accroire qu'ils sçauēt quelque chose qui est incogneue aux autres. Mais cela mesme est un argumēt suffisant pour faire cognoître qu'il n'y a pas grand'raison en tout cela : car celuy qui a bonne cause, ne doit point craindre qu'elle soit cogneue de chacun, pour en pouuoir iuger. Ils alleguent sur cela qu'ils ne veulent pas enseigner leurs secrets à chacun, soit : mais pour le moins qu'ils monstrēt quels miracles ils ont faits avec leurs remedes, qui leur donne occasion de méſpriser les autres

autres. Quand leurs remedes seront approuuez par tant d'experiences & par tant de gens doctes, cōme les communs, alors ils les pourront vanter, & les preserer aux communs. Je ne nie pas que les remedes tirez par distillation & autrement, ne puissent auoir de grāds effectz: mais pour celail ne faut mespriser les autres, & si faut vser de ceux cy avec iugement & discretion. Je scay bien qu'ausuns ont prins occasion de mespriser les remedes cōmuns à cause, disent-ils, que les Apoticairez ne les composent pas comme il appartient: & c'est la raison que Paracelsus allegue au commencement de sa grāde Chirurgie. Mesme i'ay ouy quelques uns qui alleguent que les simples desquels les remedes cōmuns sont cōposez, ne sont pas bons ny legitimes pour la plussart: & pouriant que cela leur donne occasion de les mespriser. Je suis bien marry que la vertué soit



telle: mais il me semble que la consequence n'est pas bonne pourtant: mais plustost- il faut cōclurre, qu'il faut essayer de faire que les Apoticairez fassent mieux leurs cōpositions, & qu'on recouure de bōs & legitimes simples. Et pourtant plusieurs bōs personnages & doctes ont trauaillé de nostre tēps en ceste matiere, principalement nostre autheur, lequel à colligé en plusieurs bōs autheurs, les marque pour cognoistre les bōs & legitimes simples & les discerner d'avec les faux & sophistiquēz. Il a aussi enseigné le moyē & facon de les bien preparer, & finalement de les bien mesler: de sorte que nous luy pouuōs dōner celos, que c'est luy le premier qui a mis ceste partie de medecine en ordre & methode. Et ne faut pas qu'on estime que ce soyent choses de peu d'importance, veu que l'experience monstre, que vn médicament diuersement preparé, a aussi di-  
 uerses

uerses facultez, comme il est enseigné en plusieurs lieux de cest œuvre, mesme i'ay veu maistrre Pierre Heliot chirurgien bien versé & bien expert, curer de fort grandes inflâuations, non pas seulement és bras ou iambes: mais mesme és mammelles des femmes, & és testicules, & en la verge, avec *Ægyptiac* cuit iusques à auoir consistance d'emplastre, ce qui semble repugner à la vertu de l'*Ægyptiac*, cuit come on a de coustume. Il est donc bien besoïn que les apoticairres y prennēt garde de biē pres, puis que la charge leur en est cōmise: & pourtant sachant que plusieurs ne sont pas beaucoup versē en la langue Latine, qui ne laissent pas pourtant de bien entendre leur estat, & qui sont fort desircux d'appreñdre, ie n'ay pas voulu qu'ils fussent frustrés du proffit de ce labeur: mais le leur ay voulu presenter en leur propre langage, à fin qu'ils y puisēt recenoir profit

Et contentement : vray est qu'aucuns  
 m'ont voulu distraire Et dissuader,  
 alleguans qu'ils ne trouuent pas bon de  
 rendre la medecine si commune, Et  
 que cela la fera mespriser, mais le pro-  
 fit que j'espere qui en reuiendra me  
 seruira de bone excuse, Et d'occasion  
 d'y cōtinuer, avec ce que j'ay l'exēple  
 de M. Iaqués D'alechamps un des  
 plus doctes medecins, Et des plus ex-  
 perts de nostre temps, qui a fait une  
 chirurgie françoise. Je prie donc les  
 lecteurs de prēdre ce labeur gracieu-  
 semēt, avec promesse que si ie cognois  
 qu'il en reuienne profit, ie don-  
 neray quelque autre œuvre  
 autant ou plus neces-  
 saire que ceste-  
 cy. A dieu.

\*\*\*

L'AV-



# L'AVTHEVR AV Lecteur salut.



OMME ceste sen-  
tence a esté fort cõ  
mune entre les an-  
ciens, a sçauoir que  
chacũ doit exercer

l'art qu'il scait, & s'y adonner du  
tout : aussi peut on dire aujour-  
d'huy, & à bon droit, que chacun  
doit premieremēt apprendre l'art  
duquel il pretend se mesler. Si ces  
deux sentences estoient bien ob-  
seruees entre les hommes, on ne  
verroit pas tant de medecins faits  
à la hāste, qui se disent medecins,  
auant qu'auoir cogneu vne seule  
partie de la medecine, ny auoir ia-  
mais

mais apprins à guerir vne leule  
 maladie, par quelque precepteur:  
 au lieu q̃ leur deuoir feroit (& en-  
 cores plus le profit des malades)  
 de iamais n'entreprendre la gue-  
 rison d'aucune maladie, sans l'a-  
 uoir premieremēt apprinse à gue-  
 rir de leurs precepteurs. O que les  
 malades seroyēt heureux, si ceux  
 qui practiquēt auourd'huy la me-  
 decine, auoyēt premieremēt esté  
 instituez par leurs docteurs à co-  
 gnoistre les maladies, à les sçauoir  
 biē guerir, & y obuier, & à preuoir  
 ce qui en peut aduenir: on ne ver-  
 roit pas tant de medecins ignorās  
 faire leur coup d'essay, au despens  
 de la vie de tant de personnes: tāt  
 de medecins dy-ie, qui sont si de-  
 sireux du gain, qu'ils ne regardent  
 point à ce qui est de leur deuoir, ny  
 à ce qui peut blesser leur renōmee:  
 & qui plus est, endommager leur  
 ame

ame & conscience. Mais incontinent qu'ils ont appris quelques preceptes de medecine par cœur, & quelques receptes, les voila medecins : ce leur fera assez qu'ils sachét, que le Catholicó purge vniuersellement toutes les humeurs, sans qu'ils ayent soucy de sçauoir, de quels simples il est composé, combien il y entre de chacun, & quelle faculté ils ont chacū à part soy, & quelle quād ils sont meslez ensemble. Ils sont aussi bestes és autres compositions, & aussi trópeurs. Que pourroit-on trouuer plus dōmageable à vne Republique qu'un tel móstre d'hóme, qui se bauarde d'estre medecin? q̃l crime trouue-on plus digne de reprehension & chastiment? d'où viét que les loix n'ont point establi de peine cōtre tels bourreaux? d'où viét qu'il n'y a pas en eoresvne qui punisse par iustice.

iustice exemplaire ce crime digne  
 de mort ? Depuis d'óc qu'une telle  
 licence est permise, q̄ reste-il plus,  
 sinon que non seulement les Im-  
 primeurs laissent leurs presses: mais  
 toutes autres sortes d'hômes lais-  
 sent leurs mestiers, pour estre faits  
 medecins ? Dieu par sa bonté y vueil  
 le remedier, & y mettre quelque  
 meilleur ordre, touchant au vif la  
 conscience de tels ignorans, afin  
 qu'estans hôteux de l'indignité de  
 leurs malefices, ils se régēt en leur  
 ordre, & se contiennent en leurs  
 bornes. Mais laissons tels affron-  
 teurs & charlatans à part, & venons  
 à la vraye tractatiō de le medeci-  
 ne. Nous voulons d'óc premiere-  
 mēt mōstrer, que la cognoissance  
 de ceste partie de medecine, qui  
 mōstre à bien choisir les simples.  
 à les preparer pour mettre és cō-  
 positions, & à bien faire les com-  
 positions

positions, n'est pas seulement nécessaire à l'apothicaire, mais aussi au medecin. Car si tu as l'apothicaire pour suspect, de sorte q̃ tu vueilles estre present lors qu'il choisira les simples, ou qu'il les preparera, ou qu'il fera la compositiõ, de quoy seruira celà si tu n'y entens riens? mesme quel deshonneur te fera-ce, si ne cognoissant les simples, tu ne fais autre chose q̃ branler les oreilles, comme vn Asne d'Arcadie, à toutes ses demandes? Et mesme biẽ souuẽt l'apothicaire se moquera de toy à son esciẽt, en ta presence, & fera bien, te monstrat des chatõs de Coudrier, pour du Poiure lõg: de la racine du grãd Centaurium, au lieu du Rhapõtique: la racine de nostre Acorus cõmun, qui vient és marais, au lieu de celuy d'Inde, qui est le vray & legitime. Teiles usates seroyẽt au-

cunemen



cunement supportables. Mais de mettre le Napellus des Arabes (qu'aucuns mettēt entre les especes d'Aconit) au lieu de la racine d'Elleboire noir, comme font auourd'huy la pluspart des Apoticaire, cela n'est aucunemēt à supporter: mais cela ne viēt que par la faute & ignorancē tant des medecins q̃ des apoticaire. La faute n'est pas si lourde, & si la tromperie est plus supportable, quād au lieu des deux especes d'Aristolochia ou Sarrasine, aĩçauoir la ronde & la longue, on substitue la Clematiris, pource qu'on la peut recouurer plus facilement. Mais de mettre la Scāmonce crue au lieu de la cuĩte & preparee, ou biē d'en mettre plus grande quantité que l'ordonnance du medecin ne porte, cela ne se doit point souffrir, nō plus que de mettre du laiēt des Titimales, pour de  
la

la Scammonee. Si ie voulois deduire au long telles & semblables fautes, qu'on a accoustumé de cōmettre en la composition des medicamens, il nous faudroit estre bien longs. Mais mettons le cas, qu'il ne soit point necessaire au medecin d'estre si exactement instruit en l'election des simples, ny en la preparation d'iceux, ny en la maniere de les mesler ensemble, & de faire les compositiōs, & que cela soit mis en la charge de l'Apothicaire : si faudra-il toutefois pour cognoistre la faculté de la composition, qu'il sçache toutes ces choses: car si vn mauuais simple seulement peut corrompre toute vne composition, comme nous auons amplement mōstré en nostre traité de la Methode de composer les medicamens, faut-il faire si peu de cas du chois des simples? Pareille-

ment si la maniere & façõ de preparer les simples, peut augmẽter, diminuer, chãger & du tout aneantir, la faculté d'iceux, comme il sera discouru amplement au second liure, quelle faculté pourras-tu attribuer à vne composition, si tu es ignorãt de ces choses? dauantage tu sçais bien que de mesmes matieres, on peut former vn onguẽt, vn cerat, ou vn emplastre, selon la diuersité de la mixtion, parquoy tu ne la dois point mespriser. Sois asseuré & me croy, q̃ celuy qui exerce la medecine, & ignore ces choses, fait bien souuent des choses esloignees de toute raison, & se fait bien souuent mocquer. Je ne m'arreste point à la bestise de ceux qui ayans fait vne grande legende de simples, mettront à la fin, fiat Emplastrũ, ou quelque autre telle chose, & ce-pendãt on ne les sçau

roit

roit reduire en la forme ordōnee: ce qui rend le Medecin suspect d'ignorance vers l'Apoticaire. Et qui plus est, ie puis dire en auoir veu, qui estoient si bestes & si ignorās de ces choses, qui estans en la boutique des Apoticaire, non seulement ne cognoissoyēt pas les simples desquels ils vsoyēt iournellement, mais mesmes ils ne sçauoyēt si les cōpositions, desquelles leurs ordonnances estoient remplies, estoient dures ou molles, ne voila pas vne bestise des plus grandes qu'on sçauroit dire ny pēser, voire des choses les plus necessaires? Le mal est que plusieurs qui ne se souciēt point de remedier à vne telle ignorāce, repunterōt indigne d'un medecin d'aller quelquesfois vers l'Apoticaire, demeurer quelque tēps en sa boutique, pour se prendre garde és cōpositions qui se fe-

ront: laquelle coustume est obseruee de fort long temps en Lâguedoc, & à la mienne volonté qu'elle fust introduite & cōtinuee par deçà, pour le moins de nostre tēps les Medecins cōgnoistroyent de combien lourdes fautes ils font à cause de la mauuaise des compositions, & peut estre que biē souuēt par l'autorité de leur presence, ils destourneroyent les Apoticaire igno- rans & malicieux, de faire leurs mauuaises cōpositions, si par leur sçauoir ils ne le pouuo- yēt faire. Quelque sot calōniateur m'accusera, peut estre, d'auoir traitté ces choses plus ample- ment qu'il n'estoit necessaire. Mais au cōtraire ie dis que ceste matiere requerrait vn plus ample discours, par lequel l'ignorāce estāt bannie, tous les medecins, qui n'en portēt point le nom à faux titre, fussent incitez à s'adōner à l'estude de ces choses:

de sorte que par cy apres il ne fust plus besoin de plainte ou accusation. Dieu vueille q̄ chacū entēde biē l'art duq̄l il se messe, & q̄ les medecins n'ignorēt rien de ce qui est vtile & necessaire pour guerir vistemēt & seurement les maladies. Au reste, il est besoin q̄ le medecin sçache ces choses, nō pas pour entreprēdre ce qui est de l'estat de l'apoticaire (si ce n'est qu'il fut contraint à faute d'apoticaire) mais à fin qu'il puisse nō seulemēt luy aider, quād il fera ses compositions, mais aussi pour presider sur luy: de peur aussi qu'ignorāt ces choses, il ne luy aduiēne q̄ ordōnāt de faire vn emplastre, de quelques simples qu'il aura mis par role, qu'on n'en puisse farcir rien moins: de sorte q̄ pensant faire vn panier, il ne face vne corbeille, comme dit le proverbe. A Dieu Lecteur.



# DE L'OFFICE ET DEVOIR DE l'Apoticaire.



*ENCORES* que l'Apoticaire ait plusieurs choses qui luy sont cōmunes avec le Medecin, comme sont, la prudēce naturelle, l'entiere cognoissance des medicaments, la diligence requise en tout ce qui est de son estat, & la preud'hommeie & fidelité: toutesfois il y a beaucoup de choses qui semblēt luy appartenir particulièrement, qui ont esté autresfois du deuoir des Medecins, à sçauoir lors qu'eux mesmes faisoient leurs compositions: (ce que Galien, en plusieurs lieux de ses escrits, tesmoigne auoir fait luy mesme)

## Du deuoir de l'Apoticaire.

*mesme) nous pouuõs mettre en ce rãg, le choix des medicaments, acquis par raison & grande experience: apres, la maniere & façon de les bien garder: le temps auquel ils sont en vigueur, & qu'ils sont flestris & sans force. Pareillement sçauoir comme il faut user de chacun d'iceux, cõme s'il veut estre cuit, pilé, ou broyé, ou preparé en quelque autre façon, tout seul, ou bien ensemble avec d'autres. Il faut aussi qu'il soit bon Gramairien, à fin qu'il puisse bien entendre, tant les escripts des Anciens, que les ordonnances des medecins. Que si d'auenture il luy semble que le medecin ait mis quelque chose en son ordonnãce, qui soit en trop grande, ou trop petite quantité, ou qui soit mal aisee à prendre, & de mauuais goust: ayant esgard au malade auquel il a affaire, qu'il en aduertisse le medecin, amiablement. Il est aussi requis q'l'apoticaire soit bien expert en l'art*



## Du deuoir de l' Apoticaire.

de biẽ choisir les simples, de les biẽ pre-  
parer, & de bien faire les cõpositions:  
qu'il se cõtente d'un train hõcõste &  
moderẽ, qu'il soit ioyeux, facetieux, &  
diligent, autour des malades : qu'il ne  
soit point auaricieux, ny paillard, ny  
adõné au vin, ny quereleux: lesquelles  
choses luy sont aussi communes avec le  
Medecin, comme Hipocrates l'a fort  
bien enseigné, au liure qu'il a fait de  
l'office du Medecin. Que si l'apoticaire  
est doué de telles graces & dons, tãt  
de l'esprit, que du corps, que externes,  
il n'entreprendra iamais rien sans le  
conseil d'un doctẽ & bien expert me-  
decin, quãd il faudra bailler quelque  
medicamẽt, principalemẽt s'il est de  
grande vertu: non pas mesme de peu  
de vertu, car il ne sçait pas quelle fa-  
culté il peut auoir: & biẽ souuẽt tels re-  
medes, encores qu'ils ne soyent pas de  
grãde force, neantmoins ou à cause de  
la quãtité, ou de la qualité, ou du tẽps  
auquel

## Du deuoir de l'Apoticaire.

auquel ils sont dōnez, sont rēdus dom-  
mageables, & sont occasion de grādes  
& lōgues maladies: ils empeschēt aussi  
la vraye methode & ordre de guerir,  
à cause que le corps estant affoibly &  
extenué par l'usage de tels remedes,  
ne peut porter les autres, qui luy se-  
royent propres & necessaires. Il se gar-  
dera biē aussi de rien faire, ou par a-  
mour, ou par haine, ou par crainte, ou  
par argent, ou par ignorance, qui luy  
puisse estre imputé à faute: Il ne bail-  
lera aussi iamais, ny venins, ny medi-  
camens qui facēt auorter, ny medica-  
mens trop enuieillis, ou sophistiquez  
& falsifiez, & ne mettra aussi iamais  
vn pour autre, mais il prendra conseil  
du medecin bien expert, pour sçauoir  
quel simple, ou quelle cōpositiō, il veut  
qu'on substitue, au lieu de celuy qu'il  
n'a pas. Il se gardera bien aussi d'aug-  
menter la quantité de quelque medi-  
cament violent, cōme aucūns font, à fin

## Du devoir de l'Apoticaire.

qu'à j'ai fait plus grãde euacuation, on estime que leurs cõpositions sont meilleures. Mon desir seroit bien que noz apoticairez se reiglassent à ceste reigle & les medecins aussi à la leur: on ne verroit pas aujour d'huy la medecine tant mesprisee, voire mesme blasmee. Je prie Dieu de bõ cœur, qu'il vueille mettre au cœur, & des medecins & des apoticairez, ceste volõte, qu'ils aimẽt mieux estre à la verité, bõs medecins & apoticairez, que d'estre seulement reputez & estimez tels. Que s'ils ne tiennent cõte d'une telle faueur & grace divine, que Dieu mette au cœur des Roys & Princes de faire punition de tels bourreaux, qui exercent un art avant que l'avoir cognu, lequel est àt bien & fidelement practiqué, est tant utile & salutaire aux hommes, & au contraire tant pernicious, estant practiqué par gens ignorãs. Ainsi soit-il.

L A



*L A*

# MANIERE DE BIEN CHOISIR

LES SIMPLES

MEDICAMENS:

Liure premier.

## CHAPITRE PREMIER.



Ly à quelques moys,  
que i'auois promis de  
mettre en lumiere  
troys liures, traictans  
de la matiere qui tou-  
che la vraye maniere  
de bien faire les com-

positions, maintenant ie veux satisfaire  
à ma promesse: i'ay dōc diuisé ceste ma-  
tiere en trois liures: le premier monstre  
le moyen de bien choisir les simples: le  
second la maniere de les bien preparer:  
& le troisieme la façō de biē les mesler  
ensemble,

ensemble, pour faire les compositions, Quāt au premier point, auquel ie veux trauailler, encores que Mesues aye fort bien enseigné la methode de bien choisir les medicamens laxatifs, laquelle vn lecteur bien versé & de bon iugement, pourroit bien adapter aux autres medicamens: toutesfois il m'a semble bon d'esclarcir vn peu, & amplifier ceste methode, par lieux commūs, qui desia ont esté obseruez par Mesué ( apres Dioscoride & Galien ) mais traictez plus amplement par moy: encores que i'en aye desia touché assez amplement, au commencement de la methode de composer les medicamēs: tu cognoistras neātmoins, si tu lis ces choses attentiuemēt que ce que i'en ay icy traicté, ne sont point redites, ny choses sans profit. Le choix donc ou election des simples medicamens, comme aussi de plusieurs autres choses, se prend, ou de la substance, ou de la quantité, ou de la qualité, ou de l'action, ou du lieu, ou du temps.

Car les vns sont meilleurs estans de substance grosse, les autres de substance subtile: les vns sont meilleurs quand ils ont la substance espesse & massiue, les autres quand ils sont clers & spōgieux:

les

les vns sont plus exquis estās legers, les autres pesans : les vns quand ils sont fraïles & aïsez à rōpre, les autres quād ils sont difficiles & mal-aïsez à rompre & esnier, ou mettre en poudre: on aime mieux les vns quand ils sont gluants & visqueux, les autres quand ils sont liquides & coulās : les vns sont meilleurs aspres & rudes, les autres polis & lissez: finalement nous estimons les vns meilleurs quand ils sont mols, & les autres quand ils sont durs. On à accoustumé de donner ces noms des qualitez tangibles à la substance (laquelle de soy est incomprehensible, & laquelle on ne peut nommer par vn nom propre) à cause que ce sont les premieres qui se presentent à noz sens, & qui premieres enseignent quelle est la substance, apres toutesfois les saveurs, lesquelles on peut aussi nombrer entre les qualitez tangibles, veu que le goust est vne espeece de touchement, comme disent Aristote & Galiē. Mais pour declarer ceste mixtion des elemens plus à plein, il sert de beaucoup, la purité, ou l'impurité, la ressemblance & similitude, que la chose de quoy il est question peut auoir à la substance d'vn foye, à du fer, ou à quel-

que

que autre telle chose, qui nous est bien congneüe. Pareillement si on pouuoit considerer & cognoistre la faute, l'abondance, & la mediocrité de la triple substance, qui est en chacune chose.

Mais pour sçauoir que signifient les noms de ces qualitez tågibles entre les medecins, encores que nous en ayons amplement discouru en nostre liure de la methode de composer les medemens, toutesfois nous ne laisserons pas d'en toucher icy comme en passant.

*παραμυρρις.* Ils appellent donc gros, ce qui difficilement se peut mettre en petites parties: & au contraire, tenue, ou delié, ou subtil, se qui se met aisement en petites & subtiles parties, cōme entre les choses seiches, ce qui se peut facilement reduire en poudre: & entre les choses liquides, ce qui s'espard facilement, & qui s'imbibe soudainemēt en quelque chose; & s'esuanouyt comme soy mesme, comme l'eau de vie, l'huile de tormentine, & l'huile mesme, si on en veut faire comparaison avec l'eau.

*lib. 1. de sat. tuend.* On appelle proprement massif, ce qui à les pores ou petits pertuis qui sont en sa substance, fort estroits & petits. Et au contraire, ils appellent rare, ce qui à plusieurs

plusieurs pertuis en sa substance, & qui sont grands & bien apparens. Vray est que par metaphore & similitude, on appelle massif ce qui est bié vny & amasé, comme sont l'eau & la terre: & rare ce qui est laxé & desparty, comme sont le feu, & l'air: encores que ces elemens soyent vnis & composez de parties de mesme nature, & qu'ils n'ayēt point de ces petits trous.

Pesant s'appelle, ce qui en petite quantité pese beaucoup, soit que nous le pesions à la main, ou à la balâce, cōme sont les choses qui tiennent de la nature de l'eau, ou de la terre, mesmemēt quād elles sont massives: Leger au cōtraire, est ce qui ne pese pas beaucoup, encores qu'il soit en grāde quantité, soit q̄ nous le pesions à la main, ou à la balâce: comme sont les choses qui tiennēt de la nature du feu, ou de l'air, mesmemēt si elles sont rares & spōgieuses. Vray est que Hippocrates appelle l'eau qui est aisee à eschauffer ou refroidir, fort legere, mais vne telle façō de parler ne se doit entēdre propremēt, mais abusiuement, pource que vne telle eau ne charge pas beaucoup les flancs, ny l'estomac, mais passe legerement, à cause de la tenuité  
de



de la substance: qui est aussi cause qu'elle se change bien tost, & se distribue promptement par le corps.

Gluant entre les choses solides, est ce qui est fort mal aise à rompre, à cause de l'abondance de l'humeur, qui lie & assemble les parties terrestres, & qui se plie aisément, comme nous voyons en la gomme, au Saule, es cuirs, es tendons & ligamens, lesquels estans pilez s'eslargissent: & au contraire, fraisle est ce qui s'esmie aisément, & se met en poudre, voire mesme si on le frotte avec les doigts seulement, comme sont l'Amidon, la Ceruse, le Camphre.

Mais es choses humides, on appelle gluant, ce qui est mal aisé à dissoudre, & qui se prend aux autres choses: ou bien ce qui estant tiré avec le doigt, ou avec quelque autre chose, file bien loin sans se rompre, comme sont l'huile, le miel, les graisses, & la flegme.

*Propriété.*

*Lin. 11. de la Methode.*

Quant au deterfif, tant s'en faut qu'il ce prenne aux autres choses, qu'au contraire, il deterge & modifie, ce qui se-  
roit desia prins. Et en vn autre lieu de la  
Methode, Galien oppose a ce qui est  
gluant, ce qui est coulant & liquide, ie  
dis es choses liquides.

Ils appellent aspre, non seulement ce

ce qui est rude & inegal quād on le manie, mais aussi ce qui leiche inegalemēt la bouche, quand on le goustē, qui reserre, & laisse vn humeur terrestre: comme *equale lū-*  
sont les choses rudes & brusques. Au *britum &*  
contraire ils appellent egal, glissant & *lene.*  
doux, entre les choses humides, ce qui corrige l'aspreté de la langue, du gosier, & de la canne du poulmon, soit qu'il face cela en remplissant l'inegalité, ou en mondifiant aucunemēt, & en relaschāt, cōme font les choses douces & grasses.

On appelle mol, ce qui obeit à nostre main, en le maniāt. Et dur ce ā quoy nostre main obeit. Il est plus amplement traicté & de l'vn & de l'autre, au 2.liure de sanit.tuend.& au 5.liu.des Simples, chap.4.

Ce qui est gros, peut estre nōmé terrestre, pierreux, sablonneux, adstringēt, espez, & cru.

Sous le nom de delié ou subtil, on peut comprendre, ce qui est aéré, ignée, cuit, bruslé, amer, acre, transparent.

Ce qui est massif, peut estre dict solidé, amassé, vny: au contraire ce qui est rare, peut estre dict lasche, spongieux, & dissous.

Sous le mot de pesant, on comprend

ce qui est plein, bien tédû, & si tu veux ce qui est massif, ce qui est succulent, en bon point, & bien nourry, au contraire sous le mot de leger, ce qui est vuide, pertuisé, spongieux, ridé, & qui voudra rare, sans suc, maigre, & flectry, ou fené.

Semblablemēt ce qui est gluant, pourra estre dict gras, gômeux, resineux, mucilagineux, visqueux, & qui en coulant se tient tousiours: au cōtraire ce qui est coulant, on le peut dire liquide & sans graisse.

On dict lissé, ou poly, ou doux à manier, ce qui au dehors n'a point de nœuds, ny de poil, ny d'espines, ou mesme qui au dedans est esgal, & en rout & par tout de mesme substance, & semblable. Mais on appelle aspre, ce qui au dehors à force espines, lesquelles sont ou longues, ou courtes, droictes ou courbees en façon d'hameçon, ce qui est velu, ayant de laine, mouisse, & force poil. Ou qui au dedans est inegal à soy-mesme, estant de diuerse subltâce, & qui est grumelleux. On peut dire mol, ce qui est tendre, charnu, plein de suc, spongieux, mucilagineux, gras, humide, visqueux, & qui se plie aisément, comme sont les sermens & le cuir. Au contraire

on peut nommer dur, ce qui est ferme, de nature d'oz, de pierre, ou de bois, ce qui est sans aucun suc, solide, sec, fraisle, roide, qui ne se peut plier, mal aisé à rōpre, & de nature de diamant.

*Du choix des Simples prins de la quantité.*

C H A P. I I.

**Q**UANT à la quantité, d'autāt que elle est double, à sçauoir le nombre ou la multitude, & la grandeur, on peut prendre des marques & de l'une & de l'autre, pour choisir les vns & reietter les autres. Car le nombre singulier, de deux, ou plurier, fait que les racines, tiges, brāches, fueilles, fleurs, fruiets, semences, escorces, & autres parties des plantes, & mesmes les plātes toutes entieres, sont ou meilleures ou pires & moins salutaires: ce que Mesué a bien remarqué, en la plante de la Coloquinte, & en son fruit, & cōme il appert aussi au choix de plusieurs autres simples, tant par ce que nous en auons dict en nostre traitté des simples, qu'en ce premier liure de la Pharmacopee. Mais la grandent s'estéd bien plus au large, non seulement à cause qu'on y à plus d'esgard

en choisissant les simples , mais aussi pource que quelquesfois par la grandeur, on entend la longitude seulement, cōme au dernier aphorisme du 2. liure: quelquesfois la largeur seule, ou la profondeur: d'autres fois on y comprend la longueur & largeur ensemble, ou la longueur & la profondeur & espesleur , ou la largeur & profondeur: & quelquesfois tous les trois ensemble, en laquelle signification, nous le prenōs le plus souuēt. On y peut adiouster aussi, qu'en toutes ces especes il y a de la contrarieté, & que selon plus ou moins le nombre en est infiny, tellement que l'un sera appelé plus long, ou plus court, plus large, ou plus estroit, plus ou moins espez, plus profond, ou plus esleué que l'autre, si on en veut faire comparaison avec celuy qui est mediocre en son espece , & cela vn peu ou beaucoup, plus ou moins. Et entre ces choses contraires, cōme nous auons ia dict, il y a vne mediocrité ou moyé, qui est indiuisible, & vn autre qui se peut diuiser selon plus ou moins.

Ce lieu se peut estendre tellement, qu'on y peut cōprēdre le nom des mesures, qui nous sont cogneuës & familières, comme d'un doigt, lequel peut  
estre

estre petit, grand, moyen, de la grâdeur du pouce, d'une palme, de dix doigts, d'un pied, d'une coudee, & de beaucoup d'autres semblables. Et de la vient que nous disons, qu'il faut choisir cestuy cy, & laisser celuy-la, pource qu'il est gros & enorme, grand, large & estendu, charnu, bien nourry: ou petit, delié, mal nourry, ridé, flectuy, car ces mots se prennent aussi pour la quantité: Semblablement nous disons, qu'il faut prédre ou laisser, celuy qui est de la grandeur du pouce, ou du doigt d'un homme, de la grâdeur de la main, d'une palme, de dix doigts, d'un pied, de demy pied, d'une coudee, de deux, de trois, de quatre, ou de cinq coudees, en laquelle façon de parler, la grandeur se prend proprement, pour la longueur, bien qu'on la puisse aussi prédre pour la largeur & espesseur, parquoy pour plus clere intelligence, nous exprimōs ou l'un ou l'autre, disans il est de la grosseur ou de la longueur du doigt, du pouce, du petit doigt, de l'indice, du coude, d'un baston, de deux ou de trois: ce que nous auons aussi accoustumé de faire en la profondeur, comprenans sous le mot d'espesseur, & l'une & l'autre dimension, à sçauoir la largeur

& profondeur, disans que ce simple, ou celuy la, est bon, quand il est de l'espeſſeur du doigt, du ponce, du coude, d'un baston. On exprime aussi quelquesfois la hauteur, comme Dioscor. dict que le Solanum est de la hauteur des bras esté dus d'un homme, & l'herbe qu'il appelle Phœnix, est de la hauteur de six doigts.

Il en est de mesme aux contraires, à ſçavoir en ceux qui sont courts, estroits, grasles ou deliez, selon plus ou moins, en quoy aussi il se faut exercer. Car en un lieu gras & fertile, les plantes & les animaux viennent plus grâds & mieux nourris, & tels quelquefois sont les meilleurs, & quelquesfois les pires. Comme Galien reiecte la Squille, qui est trop grosse, pour estre venue en un terroir gras: pareillement celle qui est trop mal nourrie & flectrie: au cōtraire il approuue celle qui estant bien nourrie, est de moyenne grosseur.

*Du choix des Simples prins de la qualité.*

C H A P. I I I.

**L**E lieu commun, qui consiste és marques & enseignes, par lesquelles nous

nous approuuons ou reiectons ce simple ou celuy la , prises de la qualité, est bien plus ample. Car nous prenons où reprouuons vn simple à cause qu'il est chaud, froid, humide, ou sec, au cōmencement, au milieu, ou a là fin, du premier, secōd, troisieme, ou quatrieme de gré. Semblablement pource qu'il est d'vne telle faculté seconde ou tierce, d'vne telle saueur, d'vn tel odeur, ou de telle couleur, lesquelles qualitez ensuyuent necessairement les premieres.

Quant à la saueur, ou ils sont sans goust & fades comme l'eau, ou astringens au goust, ou brusques & aspres, ou aigres, ou doux, ou d'vn goust gras, ou salez, & de goust de nitre, ou amers, ou acres (sous lequel mot nous comprenons les corrosifs, & qui brulent la langue, & ceux qui sont caustiques ou bruslans, comme aussi sous le mot de doux, nous entendons ceux qui ont le goust du miel, qui sont de bon & souët goust) ou bien ils ont vn goust meslé & composé de plusieurs de ceux-cy, comme vn goust aigre & doux: ou biē ils ont le goust de quelque chose qui nous est bien congneue, le goust de laquelle encores qu'il soit simple & bien remaqua



ble , nous le pouuons toutesfois exprimer par quelque mot propre : comme nous disons qu'un simple , est meilleur ou pire , quand il est de saueur d'Aloës, ou de poyure. Mais il se faut bien prendre garde, lors qu'on veut essayer les medecaments , en les goustant, qu'on n'en fasse pas l'essay de plusieurs tout à la fois, mesmement quand ils sont acres, aromatiques, amers, ou sa'ez, de peur que le goust des premiers , qui sera demeuré en la bouche, ne te trompe en goustant les seconds, ce que tu pourras aisement euitier, si tu te laues la bouche avec d'eau pure , ou que tu masches vn peu de papier.

Quant à l'odeur , ou elle est souëfue, plaisante , & bonne : ou mal plaisante, puante, & mauuaise, aspre, austere, aigre

*Gal. antiu. de la nature des hom mes,* (car il y à autant de sortes d'odeurs, que de saueurs, lesquelles neantmoins n'ont point de propre nom ) ou bien on dira qu'il à l'odeur de saffran, de bitume , de Cocombre , ou de quelque autre chose bien congneüe, & d'odeur bien remarquable , laquelle n'a point de propre nom, & ne peut estre comprinse en aucune des differences predites. Et pourtant nous disons, que ce simple , ou celui

luy-la, s'ôl bô & exquis, quâd ils sont de l'odeur du vin; ou aromatique: S'éblablement q̄ ce simple pour estre bon, doit estre de bône odeur & plaisante, q̄ cestuy cy doit estre de grâde senteur, & n'ô pas celuy la, qu'il doit sentir la terre, le bouquin, la poix, la resine de pin, le Bitume, qu'il doit estre de mauuaise odeur, ou d'odeur aspre, pour estre bô ou mauuais.

Pareillement nous disons qu'un simple n'a point de couleur remarquable, ou qu'il est de couleur blâche, ou pasle, ou rousse, ou iaune, ou rouge, ou verde, ou liuide, ou noire, ou bien d'une couleur moyenne, comme de couleur blanchastre, rouffastre, iaunastre: ou tirât sur le blanc, sur le pasle, sur le roux, sur le iaune: ou de couleur blanche tirant sur le pasle, de pasle tirant sur le roux, ou de pasle tirant sur le iaune, ou du roux tirant sur le pasle, ou de couleur rouge blanchastre ou tirant sur le blanc, ou de couleur cendree tirant sur le iaune, & semblables: Mais ceste difference des couleurs, se peut mieux discerner & cognoistre en celles qui sont fort diuerfes, que non pas en celles qui ont quelque affinité & conuenance de nature: & quât à nous, suyuant Galien en son pre-

mier liure de Crisibus, nous auons tenu le mesme ordre, en mettant les différences des couleurs que nature mesme a obserué, car comme nous auons mis apres le blanc le passé, aussi est-ce l'ordre de nature, & ainsi des autres. Soubs la couleur blanche on comprend ce qui est de couleur de laiët, de couleur de neige, ce qui est resplendissant & reuisant comme alabastré. Ce qui est passé, peut aussi estre nommé cendré, de couleur plombine, & de couleur de bouys.

On appelle aussi la couleur rousse, couleur de Coing, fauue, reluisante, & couleur de feu.

La couleur iaune, on l'appelle couleur d'or, ou de saffian dissous en eau: le rouge, on le nôme de couleur de Rose, de couleur sanguine, de couleur de grenade, de pourpre, & de vermillon.

La verde couleur, se peut aussi nômer de couleur d'herbe, & entend on l'une par l'autre.

Ce qui est liuide, peut estre nommé violet terry, de couleur enroullée, & quelquesfois de couleur cendree, ou plombine, ou de bouys: car (comme dict Akakia, au commentaire qu'il a fait, sur le liure de Galien, de arte parua) ces

mots sont ambigus, & se peuuent prendre diuerſement.

La couleur noire, peut eſtre dictée, couleur obſcure, tenebreuſe, terretire, de couleur de Bitume, & de couleur de Suye.

*De l'election des Simples priſe de la forme ou figure.*

C H A P. I I I I.

**E**N choiſiſſât les ſimples, on à eſgard à la forme ou figure, & ſ'y arreſte on beaucoup, car on choiſit, ou reiecte on les ſimples, qui ſont de belle forme, ou qui ſont bien façonnez, qui ſont de figure ronde, & comme faiçts au tour, ou de figure triangulaire, c'eſt à dire à trois quarrés, ou quadrangulaire, ou qui à pluſieurs quarrés: qui ſont aigus & pointus, ou qui n'ont point de pointe: qui ſont droitz, ou tortus: qui ont des lignes à trauers, qui ſont ſolides & maſſifs, ou caues dedans, ou ſpongieux, & compoſez de pluſieurs pieces adioutees enſemble: comme auſſi on dit de pluſieurs autres, qu'ils doyent auoir la forme, eſfigie, reſemblâce, & qu'ils doyent eſtre façonnéz à la figure & façon d'un œil de Bœuf, de la teſte d'un Taureau, d'une

corne

corne de Chicure, de la queue d'un Scorpion, en forme de Puce, de l'animal que on dict Ricinus. & en François, Tiquet, des naseaux d'un veau, des pieds d'un poisson nommé Polypus, & en François Cacre de mer, de Couillôs d'un Chie, ou de quelque autre chose, côme quand nous disons qu'ils doyent ressembler aux cheueux, à la langue d'un beuf, à l'oreille d'un Rat, à un Dauphin, à la plume d'un oiseau, auoir peu de nœuds, ou plusieurs, estre fort brachu, ressembler au Ioc, à une Trufe, auoir la racine bulbeuse, composée de plusieurs pieces, de la forme d'un Oignon, d'une pomme, d'une poire, d'un Coing, d'un gland, ou d'une Oliue.

Tu trouueras beaucoup de tels ou semblables exemples, cy apres quand nous traicterons particulièrement du chois des simples, & du chois prins de la similitude ou ressemblance.

Nous auons aussi de coustume d'approuuer ou reietter les simples, pour la conuenance ou difference qu'ils ont entr'eux, & en une mesme espee, comme l'Absinte Pontic, doit ressembler a l'Absinte Xaintôgeois: l'Auronne masle, doit estre different du femelle. Ou bien on prend la conuenance ou difference  
des

des simples de quelcune des qualitez  
sufdictes, en faisant comparaiſon avec  
vne autre eſpece, aſçauoir ou de la ſub-  
ſtāce, ou de la quātité, ou de l'actiō: cō-  
me entre les herbes, on doit prédrel'Ab-  
ſinte ſeriphiū ou Marin, qui ſoit ſembla-  
ble à l'Auronne, & en ſon amertume, &  
en l'agēcemēt des feuilles: ou biē entre  
les plātes en general, la Germandree, &  
le Chamepytis, doyuent reſſembler, l'vn  
au Cheſne, l'autre au Pin. Ou biē on fait  
la comparaiſon entre choſes de diuers  
genre, cōme le bō Aloës doit reſſembler  
au foye, la feuille de mille-pertuis doit  
eſtre pertuiſce cōme vn crible, la feuille  
d'Ortie doit eſtre dételee autour en fa-  
çon de ſcie: l'vn eſt courbé à la façō d'vn  
arc, ou comme vne ancre, ou recourbé  
à la forme d'vn croiſſant de lune, ou à  
plusieurs veines, ou eſt boſſu, ayāt le dos  
eſſezé, fait à la façon d'vn heaume, d'vn  
chapeau, d'vn bonnet, d'vne lance, de la  
pointe d'vne iaueline, d'vn couſteau, d'v-  
ne coignee, d'vn gobellet, d'vn panier,  
d'vn plat, d'vn petit bouclier, d'vn fu-  
ſeau, d'vn pieu, d'vn clou, d'vn pillon,  
d'vn Ionc, de petis feſtus cōme du foin,  
faict en façō de ſermens, qui ne ſe peut  
plier, ayāt plusieurs verges, eſtāt deſpar-  
ty par

ry par plusieurs lignes : ayant deux ou plusieurs verges, croissant en arbre : ayât des petits chapiteaux en forme de testes, en forme de vertoils, de pieds de li&, d'estoiles: le Dictam doit estre couuert d'une bourre ou laine moussuë, les testes du Cardon à cardes sont espineuses, l'un doit auoir la fleur semblable à ceux qui iouënt les comedies ouurans la bouche : l'autre doit auoir la racine avec force nœuds, ou avec deux, ou trois, ou plusieurs nœuds, ou la racine recourbee en façon de trompette, & la tige avec des petites excroissances en façon de bossettes.

Toutes ces choses doyuent estre fort bien remarquees, par celuy qui voudra choisir les simples ainsi qu'il appartient, car chascun à quelque chose de particulier, de ce que nous auons dict, qui seruira pour le cognoistre & choisir entre les autres : Mais ces choses seront plus clairement enseignees & prouuees par exemples, que par paroles.

*De l'election des Simples prins de la situation & du lieu.*

C H A P. V.

P O U R le quatrieme point, le choix des simples se prend de la situation  
ou

ou du lieu ou ils sont creus, non pas seulement en general de la region, comme que le Castorium soit venu de Ponte, le Cumin d'Æthiopie, le Regalisse de Cādie: mais aussi en particulier en chascune region, il importe beaucoup en quel lieu vn simple est né & nourry, ou en lieu chaud, ou froid, ou humide, ou sec, ou temperé, & cōme moyen entre ceux cy: car les plantes chaudes, nourries en lieu chaud, sont beaucoup plus efficaces, & celles qui sont trop humides, sont aucunemēt corrigees, si elles sont nourries en lieu sec. Il y a mesme raison és animaux. Quand ie parle du lieu, i'entens & la situatiō quāt au Climat, & la diuersité d'estre exposé aux vents ou à l'abry. Et pourtant quād nous parlōs d'un lieu chaud, nous y cōprenons celuy qui est à l'abry, ou l'esté dure longuement, qui est situé entre les tropiques, ou biē pres d'iceux, qui est fort exposé au Soleil, qui est biē ouuert du costé de midy, & bien exposé au vēt de midi, & qui a des mōtagnes qui le gardent du costé de Septentrion: tel qu'estoit le lieu duquel Galiē parle, qu'il appelloit Tabize. Mais quand nous parlōs d'un lieu froid, nous entendōs vn lieu orageux, plein de bois, & d'arbre  
auquel



auquel y à force hayes & autres buissons, force chesnes, arbres fruitiers, & bois d'haute fustaye, qui le gardent du Soleil, ou il croist force Moufle, pierreaux, montueux, & obscur, rempli de murailles, arbres, & autres choses: Semblablement vn lieu qui est proche de l'vn ou de l'autre Pole, qui est situé és monts Pirenees ou és Alpes du costé qui regarde le Septentrion, és lieux remplis de neige ou de glace, qui sont arrousez d'eaux procedantes des neiges ou glaces fondvës, qui sont exposez à la bise & aux vents d'Aquilon, qui sont empeschez du Soleil à cause des montaignes.

Nous appellons humide, ce qui vient ou est nourri en l'eau, laquelle peut estre ou douce ou salee, coulante doucement ou rapide & coulante avec impetuositè, ou cōme dormante, ou en estāg: ou en lieux aquatiques, qui neantmoins seichent en estè: ou és lacs: soit qu'vn tel simple vienne avec racine, ou qu'il nage par dessus l'eau sans racine: ou qui vient pres des eaux, & pres des sources & fontaines, pres des ruisseaux & canals, pres des emboucheures des riuieres, parmi les conduicts des eaux qui  
sont

sont és vdiees aquatiques,és lieux gras, és prez,és murailles des puits, & és autres murailles humides : parmi les rochers humides & qui distillent l'eau, & parmi les fossez des villes. Parquoy nous disons qu'une plante nourrie en vne riuiera, ou en la mer, ou en vn pré, en lieu aquatique, est meilleure ou pire, qu'une autre de mesme espee, nourrie en vn autre lieu, selon la diuersité de la nature des plantes, & de la faculté & vertu que nous desirons en icelles.

Vn lieu sec est vn lieu haut & esleué, montueux, ou il y a force cauernes & creux, qui est penchât. plein de rochers, pierreux, difficile à transuerfer, plein de tou, de pierre ponce, où il y a force sable & areine, force argile, force precipices & gros rochers, force petis costaux esleuez, qui est aspre, maigre, sterile, exposé aux vents, & les simples qui y viennent sont dictz venir en lieu sec, cōme aussi ceux qui viennent és sentiers, voyes & chemins publiques, és vieux chemins & vieilles murailles, és vieilles mazures & ruines de maisons, & prez d'icelles, és murailles des maisons & des villes: és creneaux des murailles és mines, ou les toicts soyent vieux ou neufs.

Vray est que plusieurs de ces lieux peuvent bien souuent estre humectez, comme sont les pierres qui sont és riuages, & les coquilles des poissons, sur lesquelles croist la moufle marine.

Le lieu qui est moyen entre ceux cy, est appellé temperé, comme est celuy qui est en region temperée, la saison du printemps, & pour la pluspart la campagne, les lieux plains, gras, fertiles, cultuez, & qui sont remplis de blez, comme de froment, orge, legumes, de vignes & iardins.

On peut aussi entendre par le lieu ou la situation, le voisinage & proximité: car les plantes qui sont venimeuses, & leurs fruiéts aussi, sont moins nuisibles, si plusieurs plantes tirent la mauuaise substance, qui leur est toutesfois familiere, d'un mesme lieu, côme aussi quand il y a plusieurs fruiéts en vne mesme plante. Parquoy à bonne & iuste occasion, Mesues reiette la Tymelea, la Coloquinte, & la Squile, qui viennent seules en vn lieu: & au contraire approuue celles qui viennent plusieurs en vn mesme lieu, & y sont nourries: comme aussi il reiecte le fruié de la Coloquinte, s'il est venu seul, ou en bien petit nombre,

sur

sur vne plante, & approuue celuy qui est venu en grand nombre. Car la raison est toute manifeste, que les bonnes plantes, estans en petit nombre en vn lieu, tirent plus de bon suc, & par consequent sont plus salutaires; ainsi aussi les plantes venimeuses, attirent à elles la mauuaise substance du lieu où elles sont, que si elles sont en petit nombre, elles en tirent dauantage, que s'il y en auoit plusieurs. La situation aussi haute, basse, à dextre, à lenestre, deuant, derriere, apporte quelque difference aux medicamens, comme nous voyons au Myssi, Chalcitis & Sori, lesquels à cause de la diuerse situatiõ sont diuers metaux, ayans diuerse substance & diuerse faculté: & le Tartarum qui est au haut du tonneau, est meilleur que celuy qui est aux costez: La Cadmia botryitis, est meilleure que point d'autre; & la Pompholix meilleure que le Spodium; semblablement quand il y a grande abondance de fruiçts en vne mesme plante, pource qu'ils sont trop serrez & abondans, ils ne peuuent estre ny bien nourris, ny bien cuits, ny bien esuentez: au contraire quãd il y en a peu, car le peu de portees, soit és animaux, fait que le

fruiēt en est mieux nourri, parquoy ils nous sont aussi plus salutaires, si la nourriture en est bonne, & au contraire plus nuisible, si la nourriture en est mauuai su, comme Mesues à fort bien enseigné par l'exemple de la Coloquinte. Pareillement, quelquesfois les parties des plantes qui se traient par terre sont meilleures ou pires, que celles qui sont haut esleuees, & quelquesfois au contraire: quelquesfois aussi la racine qui sera toute ronde, ou bien celle qui sera couchee l'une sur l'autre, ou celles qui seront entortillees les vnes parmi les autres, ou qui auront leurs pieces qui se toucheront, ou qui seront separees, qui seront peu profondes en terre, ou fort profondes, seront meilleures ou pires que les autres. Au reste, d'autant que la faculté ou vertu des medicamens, comme aussi des autres choses, ne procede d'ailleurs que du temperament, & que la faculté produit l'action ou operation, de laquelle s'ensuit l'effect, comme Galien l'enseigne en son liure Des facultez naturelles, & pareillement au liure De l'usage des parties, l'eslection qui se peut prendre de la faculté ou vertu naturelle de chacun, doit estre prinse de l'actiō  
comme

comme estant mieux cogneuë. Nous pouuons donc bien dire que de l'actiõ laquelle procede des premieres, secondes, tierces & quatriesmes qualitez, on peut prendre vn argument pour choisir & eslire les simples, qui est de fort grande consequence. Toutesfois, pource que nous auons discouru assez à plein de toutes ces qualitez au commencement du second liure de nostre Methode de composer les medicamẽs, ie renuoye la le lecteur sans qu'il me semble necessaire d'en traicter icy derechef quelque chose. Que si tu es desirieux de sçauoir toutes ces differences & marques, ou la pluspart, ou pour le moins beaucoup, Dioscoride t'en donnera assez d'exemples, en la description de chacun simple, & apres luy Galien, & les autres qui apres luy ont escrit de la matiere des simples medicamens.

Dauantage, tout ainsi comme ce dequoy nous sommes nourris, nous est propre & familier de toute sa substãce, semblablement les plantes ont leur aliment propre : & de là vient que toutes choses ne viennent pas en tout terroir, non pas seulement à cause qu'il est ou trop chaud, ou trop froid, ou trop humi

de, ou trop sec, ou de quelqu'autre temperature, mal cōuenable à la plāte ou à l'animal, mais pource que la nourriture propre à l'animal ou à la plante, n'y est pas & ceci ne se treuve pas seulement es plantes toutes entieres, mais aussi en leurs parties (cequ'on peut aussi remarquer es animaux, & en leurs parties, & mesmes es corps que la terre produit, comme sont pierres, & mineraux) comme sont les racines, tiges, brāches, summittez, rameaux, reiettons, germes sarmens, prouins, espines queuës, fueilles, fleurs, fruiçts, semences, gousses, chapeaux, calices, cheueleures, espics, bois, escorces, sucs, liqueurs, larmes, gōmes, resines, & choses semblables.

*De l'election des simples prins du temps.*

#### C H A P. V I.

**L**A cinquiesme & derniere chose, qu'il faut considerer en choisissant les simples, c'est le temps, lequel on peut prendre diuersemēt, à sçauoir ou pour l'age du simple : ou pour la saison de l'annee, en laquelle on l'a cuilli & serré : ou pour la dispositiō du temps lors que  
on

on le cuillissoit, asçauoir si elle estoit se-  
reine, ou pluueuse, ou venteuse, ou si  
c'estoit lors que ils estoient en vigueur  
ou qu'ils commençoient à flestrir: ou  
pour l'heure du iour: ou pour le temps  
qu'il a esté gardé, asçauoir s'il y a long  
temps ou non. Nous auôs discouru plus  
amplement, que c'est que le temps si-  
gnifie, au second liure de nostre Me-  
thode.

Car les simples ont vne vertu & tem-  
perature lors qu'ils ne font que nai-  
stre, vne autre lors qu'ils sont desia  
grâds, & vne autre quâd ils cōmencent  
à enuieillir ou qu'ils sont desia vieux:  
comme nous voyons en l'Euphorbe, le-  
quel a biē vne autre temperature quâd  
il est recēt & frez, que non pas quand il  
est enuieilli.

Et mesmes les plâtes chaudes & sei-  
ches, sont beaucoup meilleures si elles  
sont cuillies en temps & saison chaude  
& seiche. Voila pourquoy Galien dit,  
que les plantes cuillies en Italie ne doy-  
uent rien à celles de Candie, prouen-  
qu'elles soyent nourries en temps qui  
ne soit point pluueux, Il faut toutes-  
fois choisir és plâtes, les parties qui sont  
meilleures, & qui ont plus de vertu, voi-



re si on a affaire de leur faculté & vertu: car il aduint quelquefois, que les parties plus foibles, sont les meilleures, tât à cause de la nature de la maladie, que du malade, que de la dispositiō de l'aër. Or les meilleures patties se cognoissēt tant par les marques susdites que par les enseignes que par cy apres serōt deduites particulièrement, en chacun simple. Il faudra aussi obseruer la mesme reigle és animaux & corps produits de la terre, que nous auōs dit des plantes.

Quant au temps qu'illes faut recueillir, voicy quelles sont les parolles de Dioscoride: Il faut, dit-il, sur tout prendre garde que les plantes qu'on veut garder pour l'vsage, soyent recueillies chacune en son temps: car de là vient que les vnes sont de grande vertu & efficace, & les autres n'en ont du tout point ou bien peu. En premier lieu dōc, il faut cuillir les plantes en temps clair & serein: car il importe beaucoup si en les cuillissant, les chaleurs & secheresses, ou les pluyes regnent, comme aussi si le lieu où on les cuillit est lieu de montagnes, haut, exposé aux vents, froid & sec: car entels lieux les plantes sont beaucoup plus efficaces & meilleures: au

contraire,celles qui viennent en la campagne,és lieux arrousez,ombrageux,& autres lieux calmes du vét,s'abattardissent le plus souuent,& sont de moindre vertu,principalement si elles ne sont cuillies en leur temps & saison & qu'elles soyent desia corrompues,ou languissantes de foiblesse. Il faut bien aussi se prendre garde, que plusieurs plantes croissent plus tost ou plus tard,selon la diuersité de la region, & temperature du climat,il y en a mesme qui sont de telle nature,qu'en hyuer germét & fleurissent.Pareillement il faut noter qu'entre les herbes les vnes se peuuent garder long temps avec leur vertu,comme les deux especes d'Ellebore, d'autres apres estre gardées trois ans,ne valent plus rien.Quant aux herbes produisant plusieurs branches,il les faut cueillir lors qu'elles sont en graine, comme sont le Stechas,la Germadrée,l'Aluine,l'Hysope,& les autres semblables. Les fleurs doyuent estre cuillies auant qu'elles tombent d'elles mesmes. Les fruiets quád ils sont meurs,comme aussi les semences,lors qu'elles commencent à seicher,auant qu'elles tombent:le suc des herbes & fueilles doit estre extrait lors

qu'elles commencent à germer & bourgeonner: le laiët & les larmes, se doyuët recueillir lors que la plante est en sa vigueur, coupant la tige, les racines & escorces qu'on veut garder, doyuët estre cuillies lors que les fueilles des herbes commencent à choir: que si elles sont bien nettes, il les faut faire seicher, & les serrer en vn lieu qui ne soit point humide, mais si elles sont pleines de bouë & fange, il les faudra premieremēt bien lauer en eau. Les fleurs & toutes autres choses de bōne odeur, doyuët estre serrées en des coffrets de Tillet, au lieu plus sec de la maison: vray est qu'on les serre quelquesfois en des sachets de papier, les laissant dans leurs gouffes, laquelle façon n'est pas mauuaise mais fort bonne. Quant aux medicamens liquides, il faut que les vaisseaux dans lesquels on les garde, soyent de matiere plus solide, cōme d'argent, de verre, de corne: les pots de terre ne sont pas mauuais aussi, pouruen que ils ne soyent point clers: ceux de bois semblablemēt, principalement de Bouis: les pots faits de Cuyure, sont fort bons à tenir les medicamens liquides, qu'on fait pour les yeux, & tous, autres composez avec vin aigre,

aigre, poix, liquide, & resine de Cedre. Les gresses il les faudra serrer en pots d'estain, ou de plomb blanc, cōme aussi les mouëlles. Voila ce qu'en dit Dioscoride.

Il sera temps de mettre fin à ce que nous auons desia cōmencé, quand nous aurons seullemēt exposé vn passage de Mesué, où il dict, que quelques medicamēs laxatifs produicts en vn climat & terroir cōuenable à leur nature, sont beaucoup meilleurs, mais il ne propose aucun exemple: nous ferōs dōc comparaison des plantes aux animaux: comme donc nous voyōs que les animaux qui sont de nature chaude, ou qui sont de temperature chaude, où d'eage vigoureux, ou subiects à maladies chaudes, se treuuēt beaucoup mieux en vne region froide, en hyuer, en vne maniere de viure qui soit froide pource que cela corrige aucunement l'excessiue chaleur, comme luy estant contraire, & luy seruant de remede, au contraire se treuēt fort mal en esté, en vne regiō chaude, & d'vser de façon de viure qui reschauffe: pareillement les animaux qui sont de nature froide, d'eage froid, &

preschez

pressez de froides maladies, se portent mieux en esté, en vne region chaude, & tenans vn regime & façon de viure qui ait vertu de rechauffer, à cause qu'une telle chaleur corrige aucunemēt la froideur qui excède, mais en hyuer, en vne region froide, & en regime de vie refrigeratif, ils se portent fort mal, à cause que cela augmente l'interperie: semblablement en la temperature trop humide, laquelle se trouue mieux, quand elle est seichée où par la saison, ou par la regiō, ou autrement, comme aussi en la temperature seiche. C'est le mesme és plātes, ausquelles nature à donné ceste faculté, comme aux animaux, d'estre nourries d'une substance qui leur soit propre & familiere, laquelle garde leur naturel si elle est de mesmes nature que la plante, ou bien le chāge, si elle est de diuerse nature: Et de la vient que les plantes qui excèdent, ou en chaleur, ou en froideur, ou en humidité, ou siccité, sont corrigées, estās produictes & nourries en vn terroir & climat contraire à leur nature, de sorte qu'elles sont reduites à quelque téperature & mediocrité, entant qu'il est possible, si ce n'est que nous ayons besoin de celles qui  
sont

sont fort chaudes , ou fort froides , ou fort seiches,ou fort humides,car telles plâtes veullent estre nourries en vn climat & terroir conuenable à leur nature,& par ce moyen leur faculté sera entretenue,voire mesme augmentée. Les animaux qui sont de nature temperée, & comme moyēne entre les extremes, ne sont point si suiects à mutations & alterations , & demandent d'estre conseruez par alimens temperez , ce que Galiē à clairemēt enseignées premiers liures de Sanit. tuend. Semblablement les plantes temperées demandent estre nourries en vn climat,& terroir temperez,& par ce moyen en sont meilleures: si non que pour quelque operation,à laquelle tu pretens,tu voulusses qu'elles fussent ou plus chaudes,ou plus froides, ou plus humides , ou plus seiches , car lors il les faudra prendre en vn climat & terroir contraire à leur nature temperée,comme si tu la veux plus chaude,la faudra prendre en vn lieu chaud, si froide , en lieu froid , si humide , en lieu humide , si seiche en lieu sec , si chaude & seiche , en lieu chaud & sec, car par ce moyen ce qui falloit en la plante est aucunement corrigé: à cause de

se dequoy, Galien en la composition de la Teriaque, demande plusieurs plantes nourries en Candie, & autres medicamēts, au defaut desquelles il veut qu'on prenne de celles d'Italie, pourueu qu'elles ayent esté produites & nourries en lieu & en saison seiche: il ne faut pas toutesfois entendre cecy absoluēment, car les mesmes plantes peuuent bien quelquesfois estre mauuaises, encore qu'on les auroit apportees des Indes, ou d'Æthiopie, bien que ces regions produisent des plantes fort exquises, comme l'Æthiopie produit de bon Cumin, la region des Troglodites de bōne Myrrhe, l'Indie de bon Nard, & de Malobatrū, & plusieurs autres medicamēts, que les Portugalois ont de coustume de nous apporter en grande abondance, en leurs voyages par mer.

Pour donc auoir vne methode pour choisir les simples, il te faudra souuenir des lieux cōmuns que nous auons traitté, & puis les 'mettre en pratique és particuliers, obseruant le mesme ordre que nous auōs tenu traitāt des simples.

Il nous faut donc commencer à traiter de l'election des racines, & quand à celles qui croissent en nos quartiers,  
nous

nous en traicterons seulement en general, comme aussi des autres parties des plantes : mais des racines qui viennent de pays estrange, pource que elles sont plus cheres, à cause dequoy, les marchans estrangers ont de coustume de les sophistiquer : pource aussi qu'elles ne sont pas si frequentes, de façon que les plus habilles mesmes y sont bié souvent trompez, nous en traicterons particulièrement.

*Temps de cuillir les racines.*

C H A P. V I I.

**L**E vray temps de cuillir toutes sortes de racines selõ le dire de Dioscoride, est lors que les fueilles commencent à choir & que le tẽps est beau: Galien toutesfois, Auicena, & Mesues, ne s'accordent pas avec luy en toutes choses, encores qu'ils soyent de son aduis en quelques vnes, comme tu pourras voir cy apres. Il y en a des autres, qui trouuent meilleur, de les tirer auãt qu'elles ayẽt produit ny tige, ny fueille, ny fleur, ny fruiẽt, ny semence, à fin que la vertu de la plante ne soit employee à  
cela



cela: leur raison est, que si on attéd que la fueille commence à choir, elles sont comme les animaux qui ont de nouveau faict leurs petis, c'est là sçauoir à demi morts, & de bien peu de vertu, si ce n'est qu'on en trouue de si vigoureux, que mesme apres que la tige sera seichee, ils soyent encores vertueux, comme nous voyons en la Squille; comme on trouue des animaux si vigoureux, que apres auoir nouvellement faonné, encores sont ils assez forts: vray est qu'on pourra dire, que és plantes qui meurent en hyuer, desquelles toutesfois la vieille racine demeure viuante, pour rebourgeonner au printemps, la ieue ( qui est aux plâtes come le sang aux animaux ) retourne de la tige aux racines, pour le moins en partie, comme, on peut voir és arbres. Quât aux racines qu'on cultiue, & qu'on plante & replante en toutes les saisons de l'annee, à cause qu'elles sont tousiours en force, on les pourra cuillir en toute saison, comme les racines de toutes les herbes des iardins, & qui seruent à la nourriture, ou peu s'en faut: comme pour exemple, la Racine d'Ache, de Bourraches & buglosse, de Blette, de Laituë, d'Endiuie, d'Ozeille,

zeille, de Reffort, de Nauet, de Pastenades, de Giroles, de Carui, de Panets, de Oignons, Pourreaux, Ails: entre lesquelles, on peut aussi mettre plusieurs plantes sauvages, comme la racine de Daucus ou Pastenades sauvages, de Cerfueil, de Caucasus ou Persil sauvage, de vit de Chien, de Serpentine, de Ciclamé ou pain de pourceau, de Periclimenos ou cheuresueil, de Ymbilicus veneris, ou escudes: car ces cinq dernières, comme aussi quelques autres racines bulbeuses. même en esté, les feuilles étant sechées, elles ne laissent pas d'estre pleines, & le plus souvent elles regerment en Automne, à cause de l'abondance de nourriture grosse & grasse: Mais celles que nature produit d'elle même, ou q nous semons & plantons vne fois seulement en leur saison, elles sont pour la plus part bonnes au printemps, ou en Autône, & s'en trouue bié peu qui vailent rien en esté, ou en hyuer. Et même celles que nous auons dict estre bones, en diuerses saisons de l'année, sont beaucoup meilleures, si on les cueillit lors qu'ayans esté plantées en leur saison, elles sont assez grâdes & en leur vigueur: car és autres temps, elles sont quasi

sans vigueur, comme quand par le travail & industrie du iardinier, & à force d'arroser, elles croissent comme par force, en vn temps mal propre, comme sont l'esté, l'automne, & l'hyuer. Parquoy nous auons de coustume de cueillir incontinent au printemps, lors qu'elles ne font que commencer à bourgeonner, pour nous en seruir toute l'année, les racines d'Enula, ou Aulnee, d'Althea, ou Guymauue, d'Iris, ou Glayeul, d'Acorus, de Symphitum, ou Bugle, de Ruscus, ou Housson, d'Asperges, de Persil, d'Ache, de Fenoil, de Bryonia, ou Coleuure, de Cyperus, ou Souchet, de Rubia, ou Garence, de Saxifraga, de Valerienne, d'Eringium, ou Panicaut, de Tormentilla, des deux Piuoines, de Polipode, de Cramen, & de Lis: si toutesfois nous en auons affaire de toutes fraisches, nous les cueillissons biẽ en autre saison, mais quand tout est dit, elles ne sont pas de telle efficace, comme si on en auoit affaire en leur temps & saison.

Il faut aussi donner ordre quand on les tire, de les tirer toutes entieres, & les prendre chascune en vn terroir, & en vn climat, qui soit conuenable à leur nature, ce qu'on peut mieux cognoistre

stre par experience : car lors elles sont bien nourries, & ne sont pas aussi trop grosses, pour avoir trop de nourriture: elles ne sont pas aussi trop mal nourries, maigres, delices, & ridees, à faute de nourriture. Estans arrachees, il les faut bien laver en eau, & oster toutes les petites racines qui sont autour, & en plusieurs il faut oster le cœur qui est dedans, qui est dur comme boys : & celles qui sont trop grosses, il les faut couper en pieces ou rouëllés, & puis les faire seicher au Soleil, au vent, & quelquesfois au feu ( comme il sera dit plus amplement, quand nous parlerons de la maniere de faire seicher les simples, au second liure ) sinon quand nous en aurons affaire de toutes fraisches. On est contraint de les faire seicher au feu, lors principalement que le temps est couuert de nuees, ou qu'on est en hyuer, où bien si on en a affaire des seiches tout promptement. Davantage, il faut regarder tant és racines, que és autres parties des plantes, non seulement le temps propre pour les cueillir, qui est en plusieurs racines la pleine Lune, qui est naturel-

ment fort humide: mais aussi le lieu propre pour les garder, & leur duree : il se faut donc bien garder de les serrer, que elles ne soyent bien seichees, de peur qu'elles ne pourrissent: & de les mettre en lieu humide, ou plein de poussiere, ou trop estouffé.

Quant aux racines, le plus qu'elles se puissent garder sont trois ans, selon Auicenne: & encores faut-il qu'elles soyent de grosse & espesse substance, comme sont les racines de Bryonnia ou Coulouree, de Rhapontic, de Pucedanum, de Meu, & d'Aristolochia ou Sarrafine: car celles qui sont de substance subtile & rare, comme sont les racines de Cabaret, d'Ache, de Persil, de Saxifragia, de Diétam, & de Tormentilla, il les faut changer tous les ans.

Or Auicenne au second Canon, est aussi de l'opiniõ de ceux qui disent que il faut cueillir les racines, lors que la fueille tombe, si est bien Platearius en son traicté d'Aristolochia, toutesfois Saladin dit qu'il y en a quelques vnes, qu'il faut cueillir en autre temps, comme il faut cueillir à la fin du printemps, ou au commencement de l'esté, la racine d'Acorus, & de Gentienne: ou au moys  
d'Aoust,

d'Aoust, auquel temps faut cueillir l'E-  
spine blanche, appelée communement  
Bedegar, le Ruſcus ou Houſſon, la Cou-  
louree, le Souchet, le Glayeul, l'Aunee,  
le Dictam commun, la Pyuoine, la Re-  
galisse, comme aussi en Septembre, le Pe-  
cedanum : en Octobre, le Ciclamen, ou  
Pain de Porceau, qui est bon & recent  
& sec : en Decembre l'Eringium ou Pa-  
nicaut, selon qu'ils disent.

Ils disent aussi qu'on peut garder vn  
an entier avec leur vertu, les racines  
des deux Piuoines.

Deux ans le Meu : le Glayeul, le Sou-  
chet, le grand & petit Dictam.

Trois ans, l'Acorus, la Chelidoine,  
l'Aunee, la Saxifragia, la Valerienne, &  
le Pyrethrum.

Dix ans, le Costus, l'Oenanthe, & le  
Rapontic.

Mais le Daucus, le Cabaret, & plu-  
sieurs autres racines, sont beaucoup  
meilleures fresches que seiches, car es-  
tans gardees, pource qu'elles sont de  
subtile substâce, elles ne se gardent pas  
longuemét qu'elles ne perdent leur ver-  
tu, mesmement en poudre.

Pour auoir des bonnes racines de Ca-  
baret, il les faut choisir grosses, espesses,

d'odeur subtil & penetrant , acres au goust, & quelque peu astringentes.

La racine d'Eringium ou Panicaut, doit estre grande, blanche, tédre, & telle la confire.

La racine du Satyrion, pour faire le Dialatyriô, doit estre pleine & fresche, & non pas ridee & flettrie, ou comme à demy morte.

*Des racines estrangeres.*

C H A P. V I I I.

**Q**UANT aux racines estrâgeres, il les faut choisir côme s'ensuit.

La racine d'Acorus doit ressembler à celle de flambe, ou Glayeul, à sçauoir recourbee, ayant plusieurs nœuds, blanche, acre au goust, & vn peu amere, de bonne odeur, chaude & seiche au troisieme degré, massiue bien nourrie, & nō point vermoluë, telle qu'on a de coustume de l'apporter de Colcos, & de Galatie: laquelle aucuns prennent pour la grande Galanga, à cause qu'elles ont & l'vne & l'autre plusieurs nœuds, & vn goust aromatique: vray est que l'vne est grosse, comme la racine de Glayeul, & l'autre

l'autre de la grosseur du Souchet. Mais l'Acorus commun est tout diuers à cestuy-cy, parquoy il se faut garder d'en vsfer au lieu de l'autre, sinon que l'intention du Medecin fut de refroidir & desseicher. Que si d'auenture il se trouuoit quelque plante de cest Acorus commu, laquelle pour estre nourrie en lieu chaud & sec, tint quelque chose de la nature du vray Acorus, on pourra donner à tous deux le nom d'Acorus, appellant l'vn Acorus d'Inde, & l'autre nostre Acorus commun, qui à vray dire n'est pas de telle vertu que celui d'Inde.

De l'Agaric, il faut prendre la femelle *Diosc.* le, qui est composee de veines longues *Galen.* & droites, qui semble douce du premier *Mesues.* goust, mais apres elle se treuve amere & participante de quelque acrimonie: estant aussi quelque peu astringente: elle est beaucoup plus legere, plus rare, plus molle, plus blanche, plus courte, plus aisée à esmier, & plus fraisle, plus luyfante que le masle, lequel a de longues veines & nerfs quand on le rompt, & si est pesant, massif, dur, noir, ressemblant au bois, long, quelquesfois rond, mais beaucoup plus serré, & plus obscur en toutes les parties, ayant la super-



ficie, non pas serree, mais rare, ce qui ne se treuve pas en la femelle: & si a son siege, qui est cōme sa racine, tousiours humide, & comme à demy pourry. Il vient en celle region de Sarmatie, qu'on appelle Agaric, d'où il a prins son nom: on l'apporte aujourd'huy des Alpes. Au reste ceste superficie, ou comme Mesues l'appelle, la plus haute partie, encores qu'on la puisse prendre pour toute la superficie & apparéece qui est en l'Agaric, toutesfois celle qui est la plus haute, selon que l'Agaric est situé en l'arbre, est tousiours la meilleure, comme Mesues a fort bié remarqué, car elle est plus aëree, & par consequent plus legere, plus rare, veu q̃ la partie aëree est tousiours portee en haut, à cause de sa legereté naturelle, comme au cōtraire ce qui est terrestre & aigueux, tend tousiours en bas. Or soit que la partie la plus haute seule, ou bié que toute la superficie qui est à l'entour soit le meilleur, il se faut bien garder de la ietter là en nettoyant l'Agaric, comme aucuns font. Il ne faut pas aussi prendre le mot de superficie si exactement, qu'on entende la petite peau qui est dessus seulement, comme si elle seule estoit bonne, mais que les parties

parties qui sont au dessus, tant plus elles sont proches de celle peau, tant meilleures elles sont.

La racine de l'Aristolochia, ou Sarrafine Clematite, est fort commune & frequente entre nous, laquelle est fort longue. La racine de la Sarrafine ronde est fort commune au terroir de Nismes, & si est desia fort vulgaire par deçà. Le temps propre pour la cueillir est le tēps de moissons, & apres l'auoir nettooyee de la terre, la faut serrer pour la garder. Et l'vne & l'autre veulent estre cueillies en pleine Lune, comme presque toutes autres racines, selō le dire de quelques vns: car par ce moyē elles sont plus pleines & mieux nourries, & si ne se flestrissent pas si fort en les seichāt, & si on les cueillit en vn autre temps, elles se flestrissent, & perdent la plus part de leur force, les faisant seicher. Il faudra donc choisir & l'vne & l'autre, qui soit bien nourrie, que si elles sont seiches, il faudra prendre celle qui n'aura ses rides gueres profondes, ayant beaucoup de chair, ferme, n'ayant point d'esträge odeur, mais vn goust naïf & naturel, qui ne se mette point en poudre quād on la rompt, qui ne soit point moïsē, ny ver-

molué. Lesquelles marques de bonté sont communes presque à toutes les autres parties des plantes. Celle qu'on apporte de Ponte & de Candie, est meilleure que des autres regions.

*Serapio.* Les meilleures racines de Ben, sont  
*Manard.* celles qu'on apporte d'Armenie, qui sont chaudes, humides, odorantes, & faut prendre celles qui sont rouges, plutôt que les blanches.

Quant aux racines qu'on treuve de nostre temps, tant en Italie qu'en Pro vence, qui ne sont aucunement odorantes, lesquelles on prend pour les racines de Ben, elles ne sont point semblables au Ben d'Armenie, ou pour le moins n'ont pas telle vertu, parquoy il me semble qu'o feroit beaucoup mieux de substituer au lieu du vray Ben, les racines d'Eringium ou Panicaut. Il vient à force Behen rouge, qui a la fueille comme le Lapathum rond, auprès de Bordeaux és lieux aquatiques, & de là on le porte és autres quartiers de Frâce: mais le blanc est beaucoup plus frequent en Pro vence.

La racine de Bryonna, ou Coulource, doit estre de couleur cendree en dehors, tirant sur le blanc au dedans, grande

grande, & entiere, & la doit-on cueillir au commencement du printemps.

Le Calamus aromatique est chaud & sec au second degré, composé de parties aucunement subtiles, de couleur rousse, blanchastre toutesfois au dedans, ayant vne odeur fort bone, ayant force nœuds en façon de Canne, au reste mol, à toucher, lent & gluant à se rompre, & qui volle en esclats quand on le rôpt, & non pas qu'il se rompe en rond comme vn Reffort: sa canne est pleine d'araignes, ayant le goust de Cassé ou Canelle, avec quelque adstriction, & quelque peu de mordacité, mais bien peu, avec amertume: il est aussi glueux au mascher, on l'apporte des Indes, & si est fort subiect à vermouloir. Quant au Calamus des Apoticairez, ce n'est point le vray Calamus, car il n'a pas la forme d'un rouseau ou cane, mais d'une racine, & si n'est pas la racine du Calamus, mais de quelque autre plante: il ne me semble pas qu'on l'apporte des Indes, car on en fait trop bon marché, avec ce qu'on en trouve bien souuent de tout frais. Et à cause de ce, ie l'ay nôbré entre les racines, encores que à meilleur occasion, on le pourroit mettre entre les bois. Le vray Calamus, si on le

le pouuoit recouurer, se garderoit bien trois ans.

La racine du grãd Centaurium, doit *Diosc.* estre acree au goust, tenant de quelque *Galien* astringtion & douceur, vn peu amere toutesfois: de couleur rougeastre, grosse, pesante, massiue, de la longueur enuiron de trois pieds (si elle est entiere) pleine de ius quand elle est fresche: elle croist es lieux gras, & qui sont à l'abry du Soleil, elle vient en abondance en Lycie, Peloponese, & en plusieurs autres regions, elle se peut garder dix ans.

*Ibidem.* Quant à la racine du petit Centaurium, elle ne sert de rien en medecine.

L'excellent Costus a peu d'amertume au goust, participât de quelque astringtion, estant tellemēt acree & chaud, qu'il vlcere la peau estant appliqué: blanc, leger, fort odorant, le recent est le meilleur: estant bien plain, massif, sec, non vermolu ny taré: celui d'Arabie est le meilleur, celui d'Inde tient le secōd lieu, apres lequel vient celui de Syrie, qui est pesant, de couleur de Bouys, d'odeur forte. Celui d'Arabie est auourd'huy fort frequent à Lyon: non pas toutesfois celui duquel les auteurs Arabes seuls ont fait mention, lequel ils ont fait

fait de deux especes, amer & doux. Dioscor fait aussi mention du Costus noir, au chap. du Rapontic.

La racine du *Dracunculus* ou Serpẽ *Mesue*. tine, doit estre cueillie au printẽps, ou au commencement de l'estẽ : qui soit grosse, toute entiere, nourrie en lieu aẽrẽ: ceste racine se treuve en nos quartiers, & aduient peu souuent qu'on l'apporte de pays estrange.

La racine du Dictam, selon Dioscoride, a vertu d'eschauffer: d'autres present plus les fueilles pour eschauffer, lesquelles sont fort odorantes, rondes, petites; fort espesses, couuertes des deux costez d'un certain cottõ espez: il vient en Candie: le temps de le cueillir c'est l'estẽ ou l'automne. Quant à la racine laquelle on met es boutiques au lieu du Dictam, qui est blanche, delicee, à laquelle on a ostẽ le cõur de dedans, n'ayant presque point d'odeur, vn bien peu amere au goust, & n'estant du tout rien, ou biẽ peu chaude, ce sera plustost la racine du Dictam faux, ou de ie ne sçay quelle autre herbe, que non pas du vray Dictã: parquoy on fera beaucoup mieux de n'en vler point, & mettre du Pouliot en son lieu.

*Serapion.* Le *Doronicum* est vne autre petite racine iaunastre au dehors, & blanche au dedans, douce au goust, ressemblant au *Calamus* aromatique, & en couleur & en forme.

*Dioscor.* L'Ellebore blanc produit plusieurs racines, minces, sortans d'une petite teste languette, à la façon des racines d'Oignon. Les meilleures sont celles qui sont blanches, fraïsses, poulpuës, moyennement grandes, & qui ne sont pas pointues comme vn ionc, qui ne tiennent point de poudre quand on les rompt: ayant vne petite mouëlle: qui ne sont pas trop ardantes au goust, & ne font point venir incontinent la salive à la bouche: car celuy qui est tel, à scauoir qui fait venir incontinent la salive à la bouche, estouffe & estrangie la personne. Le meilleur Ellebore, est celuy qui vient és montaignes & lieux aspres de Cyrenne: celuy qui vient en Galatie, Capadoce, & Italie, est beaucoup plus dangereux. Mesmes tiër que tout Ellebore blanc est dangereux, mais les auteurs Grecs ne sont pas de son aduis: il tient aussi que l'Ellebore blanc n'est pas si acere, ny si mordant au goust, ny picque pas si soudain comme

le noir, mais il est plus amer, & se peut garder plus long téps: au reste il est semblable au noir.

Les escorces qu'on prend de ses racines diuisees & miparties, doyuent estre de couleur d'Azarum ou Cabaret, fraisselles, n'estant ny trop grosses ny trop delices, ny trop vieilles, ny trop fraisches, ny trop pesantes, ny trop legeres, & plustost plus legeres q̃ pesantes, & doyuent estre cueillies en esté, selõ q̃ dit Mesues.

L'Ellebore noir à plusieurs racines noires & menues, attachees à vne petite tete en façon d'Oignon, comme le blanc: on se sert principalement de ces racines. Les meilleures sont celles qui sont charnues, pleines, & qui ont petite mouëlle: estant acres & mordantes au goust, comme sont celles qui viennent es mōtagnes & lieux aspres d'Anticyra, Helicon, Parnasus, & en Étolie: Mesues y adioust que pour estre bonnes, il faut qu'elles soyent fraisses, lissees, & non point aspres à manier, plustost legeres que pesantes, de moyenne grosseur, & de moyé aage: il est moins nuisible que le blanc: on le cueillit au printemps, ou en esté.

Pour auoir de bonne escorce de la racine



cine de la petite Esula, il la faut choisir deliée, legere, aisée à rompre, tirant sur le rouge, comme la Casse en canne, six mois apres qu'elle est cueillie, ayant esté prinse en lieu aëré, cueillie au commencement du printemps. Quant à son laict, il le faut amasser sur la fin du printemps.

La Galanga est vne racine rougeâtre, ou laune, ayant plusieurs nœuds, recourbee, pesante, mordante au goust, si qu'estant maschee, la langue & le palais s'en sentent, chaude & seiche au tiers degré, retirant fort au Souchet, & en son odeur & en sa figure: & de la est venu qu'aucuns l'ont appelé Souchet de Babylonne, laquelle a esté incongnüe aux Anciens: mais celle qui est blanche, sans odeur & sans goust, & qui est comme toute en poudre, il la faut laisser, & n'en tenir compte.

La Gentienne, doit estre recognüe par les marques communes seulement: elle croist en grande abondance au mont Iura: & de la on la porte par toute la France: sa racine est en dehors de couleur de Bouys, & au dedans de couleur safranée: fort amere au goust,  
d'où

d'ou est venu qu'on l'a appellee, Aloës françois : elle est dure, vn peu ridee, & difficile à rompre. On en a planté quelques plantes és Iardins de Paris, mais elle n'est pas de telle vertu que l'autre.

Encores que la Regalisse croisse en diuers lieux en France, si n'est elle pas toutesfois telle que celle qui vient en Candie, selon l'auis de Galien, non pas mesme cōme celle qui viét en Espagne, ou en quelqu'autre lieu, qui n'est pas si humide : la meilleure est en dehors, de couleur de Bouis, ayant son bois ployable, & mal-aisé à rompre, & au dedans fort iaune ou saffranné, qui estant mäschee estanche la soif, ayant aussi quelque peu d'astriction au goust, douce toutesfois : il y en a qui tiennent que celle qui est noirastre, & ployable, est meilleure que celle qui est de couleur de Bouis, & qui se rompt aisémēt. Il ne faut point tenir de conte de celle qui est blanche, ou noire au dedans, sans suc, vieille, & qui se rompt tout en rōd comme vn Reffort, & qui quand on la rompt rend de la poussiere : par laquelle marque on pourra cognoistre en toutes les parties des plâtes, que elles sont

enuieillies, sinon que ceia leur fust naturel.

Les meilleurs Hermodactes, selon l'aduis de Mesué, sont ceux qui sont ronds, gros, bien blancs & dehors & dedans, moyennement durs, cueillis en lieu haut & esleué: ils sont chauds & secs, au commencement du second degré. Mais ceux qui sont flaques, rares, & legers, n'ont pas grande vertu: & les rouges, & noirs, sont du tout mauuais. Quant à celuy duquel on vse és boutiques, i'ay esté asseuré par ceux qui l'ont souuent cueilli en Languedoc & Prouence, que c'est vne plante ayant les fueilles noires, semblables au pourreau produisant en Automne, vne fleur semblable à la fleur du Saffran, hormis qu'il ny à point de filamens rouges, comme il y a au Saffran: sa racine est noire en dehors: par ces marques on peut cognoistre que c'est le Colchicū, qui n'est pas toutesfois venimeux, ou bien peu, comme nous le voyons par experience: & peut estre que cela vient, pource que nous vsons tousiours du sec, sinon que quelque fois nous vsons du frez.

*Dioscor.* Les Anciens parlans des Glayeuls ou Iris, ne faisoient quasi estat que de l'illy

l'Illlyrique ou Sclauon : ayant les racines fort petites : massives, difficiles à rompre, de couleur roufistre, mais blanches au dedans, ameres au goust, de bõne odeur, & qui font esternuer quãd on les pile. Auourd'huy on ne prise que celles de florence : & toutesfois Galien au huitiesime liure de comp. pharm. part. prise beaucoup celles de France, proueu qu'eiles soyent bien blanches, & bien nettes. l'en ay recouuré vne plante, estant à Venise, par le moyen de Martinus Gregorius excellent medecin : laquelle auoit esté cueillie en Illyrie ou Sclauonie, és lieux les plus secs, & plus à l'abry du Soleil, laquelle j'ay replâtee au lieu le plus haut de mon iardin, ou elle commence à bourgeonner. Mesuesfaict plus de cas des racines d'Iris, qui sont grosses, dures, massives, & comme amassees de plusieurs neuds courts : ayans vne couleur blanche tirant sur le rouge, ayans l'odeur de la violette, de Mars, aromatiques au goust, acres & mordantes, & qui produisent la fleur violette, plustost que blanche : estans cueillies au commencement du printemps

Le, Spica Nardi, à sa racine l'ogues de

douze doigts, de la grosseur du petit doigt, vn peu astringente, ayant quelque acrimonie, avec quelque amertume: de bonne senteur, chaude au premier degré, & seiche au second. l'en receus vne plâte de telle forme, lors que i'estois à Lyon, laquelle me fut apportee, par Ioannes Horneus, apoticaire fort expert & fidelle à Paris, homme fort bien versé en la langue latine, & quin'est pas ignorât de la langue Grecque & Hebraique: & m'apporta celle plante, avec vne plante de Costus, d'Acorus, & plusieurs autres.

*Discor.* Le Pyretre à sa racine longue, de la grosseur du ponce, & de goust fort bruslant & chaud ( d'ou aussi il à prins son nom ) laquelle attire fort les flegmes, estant machée.

*Discor.* Le Polypode à sa racine douce, vn peu aspre, de la grosseur du petit doigt, fort dessicative, mais sans aucune mordacité: le meilleur est celuy qui est douceastre, tenât quelque peu de l'aspre au goust & qui finalement se treuve vn peu amer, & aromatique: qui est massif, ayant plusieurs neuds, de couleur rougeastre tirant sur le noir, & au dedans de couleur d'herbe, comme les

Pista

Pistaces : qui est recent, cueilli sur les chesnes, ou autres arbres portans glâd: d'autres estiment plus celuy q vient és murailles, & sur les rochers, mais que ce ne soit en lieux humides & ombrageux.

La Rhapontique, est vne certaine racine noire, au dehors semblable au Costus noir, & au dedans au grand Centaurium: toutesfois elle est moindre, plus rousse, & spongieuse & trouee: estant aucunement polie, lissée, & sans odeur: laquelle aussi estant machée, se treuve palle, ou iaune comme saffran: la meilleure est celle qui n'est point vermoluë. Voila ce qu'en dit Dioscoride: à quoy Serapio adiousté, qu'elle est vn peu adstringente au goust, & si on la mache vn peu plus longuement, elle à quelque acrimonie.

*Dioscorid.*

Le Rha Indique & le Rhabarbe, qui ne sont en gueres differens, sont bons quand ils sont noirs & tires sur le rouge, pesans, encores qu'ils soyent de substance lache & rare: estans roux & azurez quand on les rompt: & teignent en iaune, quand on les mache: estans frez, non point sophistiqués, adstringés, & amers: ils ont vertu de purger la Co-

*Galien l'appelle Rased sen de Mesue. Gal. Ant. lib. 1.*

lere, & sont chauds & secs au second degré, on les peut garder trois ou quatre ans, enterrez dans la semée de Psyllium ou herbe aux puces, ou dans du Millet, ou bien enduits de Cire seule, ou meslee avec de Tormentine. Les meilleures Squilles, sont celles qui sont de bonne grosseur ( non pas trop grosses toutesfois ) qui sont bien nourries, blanches, & nouvellement tirées de terre, lors que les feuilles & la tige, sont entièrement seichées & flestries, ou bien quand on moissonne le somét, car elle est lors en sa vigueur. Le Pancratium, qui est nostre Squille commune, luy ressemble fort, & au goust, & quant à sa faculté, mais il n'est pas de si grãde vertu. Mesue faiët plus d'estat de celle qui est douce au goust, acre, & amere: mondée de toutes ses pelures, estant reluisante, cueillie en lieu bien ouuert, & aupres de plusieurs autres.

Les Arabes parlans du Turbit, estiment le meilleur, celuy qui à son escorce blanche, gommeuse a cause du lait amassé, qui est bien vuidé, faiët en forme de Canne, aisé à rompre, frez, lissé & poly au dehors: estant de couleur cendree: & qui est cueillie en lieu sec.

La racine de Gingembre, doit estre blanche, odorante, ayant le goust, & la faculté du Poyure, non pas si soudain toutesfois, mais aussi sa chaleur dure plus longuement, comme du Poyure long. Il faut reiecter celles qui sont vermoluës, pleines de poussiere: & celles qu'on a couuert de quelque couuerture, soit que cela ait esté fait pour les faire peser dauantage, ou pour couvrir la vermoliſſeure. Au reste ceux la font mal, qui au lieu de la poudre du Gingembre, mettent vne certaine racine, appelée Terra merita, ou Columbinum, encores que ce soyent racines du tout diuerſes, & au pois & en la couleur, & en la vertu ou faculté.

La Zedoaria, est vne racine qui ressemble fort à la racine d'Aristolochia ronde, ayant toutesfois le goust, & la couleur du Gingembre, chaude & seiche au second degré: Serapio l'appelle Zurumbeth: mais il se faut bien prédre garde, que Zurumbet, sans point de b, est vne autre racine.

*Du chois des herbes.*

C H A P. I X.

**Q** Vasi toutes les herbes desquelles nous yſons, sont prinſes en noſtre



region,encôres qu'ils s'en pourroit bié trouuer de meilleures en d'autres pays, comme l'Absinte de Ponte: la German-dree, le Chamepitis, & le Scordium, de Candie: la German-dree qui vient en la Campagne, est meilleure que celle qui vient prez des villes: la Calamintha des montagnes, est meilleure que celle des iardins: toutesfois si nos plantes se rencontrent en vn terroir & climat, semblable à l'estranger, elles ne seront pas beaucoup differentes en vertu, aux autres: voila pourquoy Galien dit que les herbes & plantes d'Italie, ne doyuét pas beaucoup à celles de Cádiz, si elles rencontrent vn temps sec, & non point pluvieux. Quand aux herbes acres, & qui ont vertu de digerer, & resoudre les humeurs qui seroyent en quelque partie du corps, il seroit bõ de les cueil-lir en lieu sec, & proche de la mer.

Premierement, entre les herbes il y en à, desquelles on se sert seulement quand elles sont vertes, à sçauoir quãd leurs decoctions, ou leurs suc, entrent en la composition des sirops, des apozemes, clisteres, fomentations, cataplasmes, & autres semblables remedes: pour la composition desquels (principalle-  
ment

ment des derniers ) on les peut cueillir en toute saison : mais pour les sirops, & pour les autres cōpositions, qu'on veut garder toute l'annee, il les faut cueillir, lors qu'elles sont en leur vigueur, à sçavoir lors qu'elles fleurissent, ou qu'elles sont pleines de semence, comme la Fumeterre, la Calamintha, & les autres suyantes, qui entrentés sirops, & autres compositions qu'on garde long temps. Car Mesues eist d'avis de cueillir la Fumeterre en fleur, au commencement du Printemps, & la Fumeterre en graine, à la fin du Printemps.

Quant aux herbes qui ne produisent ni tige, ni fleur, ni semence, cōme sont toutes les capillaires, & le Ceterach, il les faudra cueillir, lors que les fucilles sont en leur plus grãde vigueur: à sçavoir quand elles sont bien grandes, & bien vertes. Il y à des autres, qui à cause qu'elles deuiennēt dures comme bois, & sans aucun suc lors qu'elles fleurissent & iettent leur semence, il les faudra cueillir & s'en seruir auāt ce temps la: comme sont la Blette, le Chou, la Cicoree, la Chondrilla ou Lettron, l'Eupatorium, les especes de Lapatum, les Plantains, le Verbascum ou Bouillon, &

la Vervaine. Auquel eage vigoureux, il faudra aussi cueillir celle qu'on veut faire seicher pour garder, à fin de s'en servir quand il sera besoin toute l'année: comme toutes les especes d'Aluine, toutes les especes de Capilli-veneris (ie dy quand à nous, car ceux qui en ont en abondance, les peuvent toujours avoir toutes verdes, & en leur force) la chevelure d'Aneth, la Betoine, le Char-don beni, la Cicoree, la petite Centauree, le Calament, la Mente, la German-dree, le Chamepitis, l'Eupatoire, l'Euphrase, la Fumeterre, la chevelure d'hyllope, le marrube, la Mariotaine, l'Origan, le Poliu, le Pulege ou Pouliot, la Rue, le Rosmarin, la Sauge ( bien est vray que ces deux ont aussi grande vertu, encorés que la fleur ny soit pas ) le Scordium, le Ceterac, le Thym, la Sarriette ou Sauoree, le Bouillon: ou pour le moins il les faudra cueillir lors que les fueilles sont en leur force, à sçavoir quand elies ont leur grâdeur, odeur, & couleur naturelle, mesmemét celles qui sont prochaines de la cime. Mesmes est d'avis de cueillir l'Aluine, au printéps, si on en veut tirer le suc, ou l'eau distiller: & leurs fleurs au commencement de

*La chevelure és herbes d'est la fueille en-jemble avec la fleur.*

l'Esté : mais ici il les nous faut cueillir, sur la fin de l'Esté ou au commencement de l'Automne. Mesues dit aussi, que pour tirer le suc de l'Eupatoire, il le faut cueillir, sur la fin du Printemps. La pluspart des herbes qu'on cueillit pour garder, on les faict seicher à l'Ombre, si ce n'est quelques vnes qui ont la tige trop grosse, ou la fueille trop humide, & qui seroyent en danger de se pourrir. Estans bien seichees, on les serre, comme nous auons dit : des racines, il est bien vray qu'elles ne se peuuent pas garder si longuement, parquoy il sera bon de les changer chascun an.

Les capillaires, selon le dire de Mesues, doyuent estre prinſes, quand elles ont les fueilles bien nourries, & bien verdes : car celles qui ont la fueille par trop petite & gresse, & qui commencent à iaunir sont sans force & vigueur.

*De l'olection des fleurs.*

C H A P. X.

**L**Es fleurs veulēt estre cueillies comme les autres parties des plantes, asçauoir lors qu'elles sont le plus en vigueur, & en temps sercin : & non pas, comme dit Bulcasis, & autres gens ignorans,

rans, vn tel ou tel moys: car il se treuve de regions & de saisons, que les plantes germent & produisent leurs parties, plus tost és vnes qu'és autres: semblablement il faut cueillir les vnes, comme les Capres, lors qu'elles sont en bouton: les autres, comme la Rose, lors qu'elle cômence à s'panir: & presque toutes autres fleurs, lors qu'elles sont du tout ouuertes & espannies, vray est qu'il ne faut pas attêdre long temps apres qu'elles sont espannies, afin que la vertu ne se perde, & que les fueilles ne deviennent par trop deliées, ou qu'elles tombent. On les faiêt seicher au Soleil, ou en lieu chaud, plus ou moins, selon la diuerse nature de la fleur. Il y en à qui disent, qu'il les faut faire seicher iusques à ce que de dix parties il n'en demeure que l'vne au poids: & que les fleurs de montagne se diminuēt moins que celles de la campagne: on les serre, & les garde on comme les autres parties, on les chäge aussi tous, les ans: vray est que le Squinathum se peut bien garder dix ans, la fleur de Camomile aussi retient longuemēt sa vertu à cause que ses parties sont fort meslées, ce qu'on peut cognoistre par ce qu'elle garde  
longue

longuement son odeur naïfue. Quand aux fleurs d'Absinthe, de Germandre, de Chamepiris, d'Hyslope, d'Aneth, d'Euphrase, de Fumeterre, de Marjolaine, de Origan, de Rosmarin, de Sauge, de Thim, & de Bouillon, il en a esté parlé quand nous auons traicté des herbes. Il reste seulement à parler des autres.

Le Balaustium, qui n'est autre chose que la fleur de Grenadier sauvage, est beaucoup plus astringent que le Cytinus, qui est la fleur de Grenadier priué & domestique, meismement quand il est prins des Grenadiers aigres. Et l'un & l'autre doyuet estre arrachez de l'arbre, vray est qu'il ne faut apres s'attendre d'auoir des grenades : car ceux qui tombent d'eux mesmes, n'ont pas telle vertu que les autres, car ils tombent ou par faute de nourriture, le fruiet commençant à croistre, ou à cause d'un vermisseau, où pour quel qu'autre occasiō: on les peut facilement recognoistre, ar ils sont demi noirs, & si les fueilles & filainés n'y sont point comme en ceux qu'on aura arrachez, lesquels tu trouueras aussi rouge dedans que dehors. Ceux d'Espagne, qui sont  
gran

grands cōme Roses, & courts, son beaucoup meilleurs que ceux de Lāguedoc & Prouence, qui sont longs & estroits.

Les meilleurs Gyrofles, sont ceux qui sont mal-aïsez à rōpre, de bonne odeur, polis vn peu enfléz toutesfois, qui estās pressez avec les ongles, rendēt vne certaine humeur acre, & aromatique: ils sont chauds & secs au second degré, ou mesmes au troisieme. Ils se peuuēt biē garder, cinq ans entiers, pourueu qu'on les tienne en vn lieu temperé: car si le lieu est trop humide, ils pourrissent, & s'il est trop sec, ils se seichent aussi, tellement qu'ils en deuiennent ridez, & perdent leur force. Ceux qui se treuuent parmi (que les barbares appellent Antophyllon, qu'ils exposent comme venant deuāt la fueille, comme si ce mot estoit composé d'vne proposition Latine antè, qui signifie deuāt, & d'vn mot Grec Phyllon, qui signifie fueille) qui sont fort gros au pris des autres, ne sont pas de grande vertu.

Le meilleur Saffran qui soit vsité en medecine, selō que dit Dioscoride, est celuy qui croist en Corycée, estant frez, long, entier, plein, non point, fraisle, &

qui est

qui est bien coulouré: qui estant baigné & broyé, teint & iaunit les mains: & qui ne sent ni le châci, ni le vermoulu. Toutesfois Galien dit, qu'encores que le Saffran de Corycée (lequel est ainsi appelé à cause du lieu où il croit) soit plus grâd que les autres, il ne les surpasse pas toutesfois, ni en vertu, ni en odeur, ni en durée: & qu'en choisissant le Saffrá, il ne faut pas regarder quel est le plus long: mais celuy qui est le plus odorât, le plus vermeil, & qui garde plus long téps sa force & vigueur, est tousiours le meilleur. Parquoy si tu veux cognoistre le bõ Saffran, prens du meilleur que tu pourras choisir, & le serre en quelque lieu de la maison qui soit propre, & le visâre souuét, & tu verras qu'il gardera sa premiere couleur & odeur fort longuement: au côtraire celuy qui est sophistiqué, perd bien tost sa couleur & son odeur. Voila ce qu'en dit Galien.

Les fleurs du petit Centaurium, qui sont petites, de couleur passe tirant sur le iaune, doiuent estre cueillies incôtinét au commencement de l'esté, si on veut croire au dire de Mesues. Mais celles qui viennent en nos quartiers, sont rougeâtres tirans sur le purpurin.



L'Epithymū des Arabes , qui est vne espeece de Cassuta capillaire, q s'étortille autour du Thim, cueilli avec les brâches du Thim, ne se flectrit pas si tost, & par là on cognoit aussi qu'il est creu sur le Thim, & non pas sur autres herbes semblables. Pourtant Galien est d'opinion, qu'il seroit bon de cueillir toutes les autres fleurs & fruiçts avec leurs brâches. Il faut bien noter aussi que l'Epithymū qui vient au Thim de montagne, est meilleur que celuy qui vient au Thim des iardins. Mesué prise' sur tous, celuy de Candie, qui est rous. Quant à l'Epithymum des Grecs, nous n'auons encores peu remarquer à la verité que ce peut estre, si ce n'est la fleur de Sarriette, qu'on appellee communement Sarriette de Picardie, laquelle est tousiours verde.

L'Hyssope, sellon Mesué, doit estre cuillie lors qu'elle commence à fleurir.

La fleur de Nenuphar, tant le blanc qui viét és estâgs, que le iaune qui viét és riuieres, doit estre cuilli au printēps lors qu'il est espanni. Le iaune, pource qu'il est petit, on le peut seicher tout entier: & le blanc, il faut oster quelques fucilles qui sont au dehors, toutes salies

es, la tige & les petis filamens iaunes qui sont au dedàs. Le plus souuent nous faisons distiller le iaune parmi le blanc pour faire de l'eau, mais nous le faisons bien peu souuent seicher pour garder. Ceux de Languedoc & Prouence, n'en vsent point que du blanc.

Entre les Roses, celles-là sont les plus exquisés, qui sont les plus odorantes, & les plus rouges: comme sont communément celles qui viennent és montagnes, plustost que celles des valées: il les faut mettre à seicher en lieu haut, & qui ait son regard vers midi, là où, le soleil donne, il ne faut pas neantmoins qu'il touche les roses: car les blâches, les incarnates & les muscates, encores qu'estans fresches elles sentent fort bon, toutesfois seichées elles n'ont point d'odeur: les rouges au contraire, quand elles sont fresches, ne sentât quasi rien, mais estâs seichées, elle sont tresodorantes, & gardent leur bonne odeur fort longuement. On en' recueillit grande quantité & de fort exquisés au terroir de Prouins, distât vne iournée de Paris, qui est vn terroir monteux & pierreux, & de là on les porte quasi par toute la France. Il s'en treuve toutesfois au terroir de Paris,

qui ne sont pas trop mauuaises, mesme  
 ment en la bourgade que le commun  
 mesme appelle Fons Naiadum , où il  
 en vient telle abondance , parmi le vi-  
 gnoble sabloneux, que c'est assez pour  
 en pouruoir la ville : de sorte que nous  
 n'auons point besoin de celles que les  
 anciens estimoyēt tant, comme estoyēt  
 celles qu'ils appelloyent Pestanes, & au-  
 tres. Mesues estime sur toutes les rou-  
 ges qui ont fort peu de fueilles & lissées.  
 Les roses cuillies trop tard, ne se gardēt  
 pas longuement, & si deuiennent bien  
 tost noires: mais celles qui sont cuillies  
 en leur saison , se garderont bien deux  
 ans. Il les faut donc cuillir lors qu'elles  
 sont moyennement ouuertes & espani-  
 es, & les mettre seicher incontīnēt tou-  
 tes entieres , & les reuēir souuēt apres  
 que'elles sont seichées il faut arracher  
 les fueilles. & les terrer dans vn pot de  
 terre bien bouché , à fin que l'odeur ni  
 la couleur ne se perdent. Si le soleil ne  
 luit point le iour qu'on les cuillit, il les  
 faudra estendre bien cler, de peur qu'e-  
 stans trop serrées, elles ne se gastent. Il  
 faut seicher de mesme les autres fleurs.

Nous ne voyons gueres qu'on appor-  
 re par deçà, le Squinantum ou fleur de  
 lion c

Ionc d'Arabie: mais on nous apporte seulement les tuyaux & roseaux du lœc que si on pouuoit recouurer des fleurs, & on veut cognoistre si elles sont bonnes ou mauuaises, il ne faut regarder sinon si elles sentent bon ou non, car leur bõne senteur se perd bien tost, comme dit Galien au premier liure des Antidotes.

Nous pouuons mettre le Stechas entre les fleurs estrangeres, car celle qu'on apporte de Candie, est biẽ mieux nourrie, & plus pleine que l'autre, & par cõsequent elle est aussi meilleure: il est biẽ vray que nous en pouuons recouurer beaucoup en nostre regiõ mesme, asçauoir de celle qui croist es Isles qu'on appelle Stecades, qui sont pres de Marseille; dont ceste plante a prins le nom. Il en vient aussi en grande abondance en Arabie (d'oũ est venu qu'on l'a surnommee Arabique) laquelle Mesuẽ prise sur toutes principalement la fleur, & apres les fucilles: elle est amere, & moyennement adstringente, ayant son espyde couleur purpurine tirant sur le celeste, & de bonne odeur.

Quant a la Stechas citrine ou iaune, ce n'est autre chose que l'Heli tryom

de Dioscoride, & l'Amatanthus de Galien: ayant sa fleur iaune comme or, & bien espesse, comme en esmouchettes. Elle croist en grande abondance en Languedoc, en Guienne, & au terroir de Bourdeaux, qui est fort bonne: ayant l'odeur de l'Aurône masle, & le goust aussi, non pas toutesfois si amer.

De la violette noire, qu'on appelle communément Violette de Mars, ou de Carême: Mesuée prise celles, qui sont fleuries des premières, tellement qu'elles n'ont point perdu leur force, par la trop grande chaleur du Soleil, n'ayant point aussi esté par trop lavées, & comme affadies par la pluye. Car celles qui sont espanies des long temps, celles qui ont senti la pluye, celles qui viennent parmi les bois, ne sont pas de grande senteur, aussi n'ont elles pas grande vertu.

A grand peine peut on garder les fleurs vn an entier avec leur vertu, si ce n'est la Camomille, le Stechas, le Saffra, & quelques autres, mais bien peu: qui se garderont avec leur couleur naifue, & leur odeur naturelle, deux ou trois ans, mais bien peu d'avantage.

*Du choix des semences,*

## C H A P. X I.

Nous auôs traité assez amplemēt au premier liure de nostre methode, la difference qui est entre la semence, & le fruit. Quant aux semences, il les faut tousiours prendre, quand elles sont bien meures, bien nourries, pleines, & grosses: ayans la vertu & faculté qui leur est naturelle, fort efficace: & l'odeur, saueur, & couleur de leur espeece, entiere & naifue, voire si elles doyuent auoir quelque odeur ou saueur: car il s'en treuve beaucoup, qui n'ont point d'odeur, ny de saueur manifeste, non seulement entre les semences, mais aussi entre les autres parties des plâtes. Il sera bon aussi, s'il est possible, de les recouurer des pays & regions, ou elles croissent les meilleures, & plus exquises, par le tesmoignage des anciē: eitās aussi toutes recentes, ou pour le moins cueillies depuis peu de temps: car & les semences, & les autres choses, qui ont eité lōguemēt gardées, ont perdu beaucoup de leur force & vigueur. Mais quand elles iettent de la poussiere en les rompant, elles ont passé leur temps,

& ne valët plus rien Galien: au premier, liure des alimens.

L'Amomum doit estre bläc, ou rous ayant vne couleur seulemēt, & nō plusieurs, ayant sa semence comme en petis raisins, qui soyent bien farcis, espars neantmoins, & non pas trop serrez: estant au surplus odorante & aromatique, & qui pëte le nez de son odeur, quand on la fleure: aiguë & mordante au goust: & qui est fresche, & non poine pouttie ou vermoluë. Galien au liure huiëtiesimē de comp. pharm. louë fort l'Amomum de Styrac.

L'Ami de Sclauonie, ou d'Egypte.

L'Anis de Candie.

Le Cumin d'Ethiopie, & apres celuy d'Egypte.

Le ligusticum des montagnes de Gènes, dōt aussi il ä prins son nom.

Le Seli de Marseille est le meilleur, celuy d'Etiopie apres, celuy de Candie le troisiēsme selon Dioscoride.

La Moustarde d'Alexandrie.

Le Thlaspi de Cappadoce, ou de Candie: mais celuy qui est plus gros, & moins rond, est le meilleur, selon le dire de Galien. Nous auōs & l'un & l'autre, qui sōt biē diuers de la Bursa pastoris, qui

qui est vne herbe froide & adstringente.

Le bon Cardamomum est difficile à rompre, resserré, plein & farci: acré & vn peu amer au goust: ayant vne odeur qui cause pesanteur de teste, & si a grãde vertu d'eschauffer: celuy qui n'est tel, est vieil & passé. Voila ce qu'en dit Dioscoride. Mais Galié le surnomme noir: disant qu'il n'est pas si chaud, que le Cres son Alenois ou Nasitort, mais qu'il est plus doux & plus odorant. Aureste si quelcun demande, asçauoir si c'este semence que Ioanes Horneus nostre ami, a apportée à Lyon, laquelle est vn peu moindre & plus lisee, que la graine de Paradis, ayant quasi mesme couleur, & mesme goust, qui est fort large, & enclose dans des gousses courtes & triangulaires, est le vray Cardamomum ou non, ie ne sçauois qu'en dire à la verité, à cause qu'on la deiscritt trop brieuement. Ie puis bien dire toutesfois, que ceux qui mettent ceste semence, ou bien la graine de Paradis ou le petit Cardamonum (qu'on appelle)és compositions & preseruatifs, ne font point de mal, à cause de leur vertu & faculté aromatique.

La semence du Carthamus ou Sas-



fran bastard, doit estre grosse, pleine, ayant sa mouëlle grasse, blanche, faicte à angles, & l'ssee: comme dit Mesué.

Du Psyllium ou herbe aux puces, dit Mesué, il faut prendre la semence qui soit parfaicte, grosse, & tellement pesante; que la mettant en l'eau elle aille au fond.

*De l'election des fruiëts.*

C H A P. X I I.

**E**Ncores que nous nous seruions de plusieurs de nos fruiëts pour faire les cōpositions: toutesfois à cause qu'il se treuve quelque fruiëts estrangers, beaucoup plus exquis que les nostres: il me semble que ie feray mon deuoir, de mettre icy quelques marques, pour cognoistre les bons.

Des Amêdes soyent douces ou ameres, les meilleures sont celles qui sont soit iaunes bien pleines, entieres, non point rōpues ou rōgées, legieres toutes fois, dures & seiches, autāt qu'il en est besoin, car par ce moyen, elles seront aisées à rompre: estans aussi bien blāches au dedans. Les douces ont vn goust fort delicat, lequel on ne peut quasi dire, retirant aucunement au goust des chasta'gnes rosties, meslees avec du pain

pain bien blanc, & bié cuit: n'ayans aucune odeur ou bien peu, auant qu'estre maschees: mais quant on les mange, elles ont vne odeur fort plaisante. Il faut entierement reiecter celles qui sont blanchastres, ou noirastres, ridees, molles, tellement humides qu'on les pourroit bien tordre: qui sont mal aisées à rompre, & estans rompues ne sont pas bien blanches dedans, mais tirent aucunement sur le palle, ou sur le noir: qui sont huileuses, sentans le rancy, soit que cela leur soit naturel, ou que procede de vieillesse: ayans aussi vn goust mal plaisant, & huileux. Desquelles, encores qu'estans pilees, on en tire beaucoup plus d'huile que des autres, toutesfois il n'a pas les vertus & facultez que le bon huile d'Amandes doit auoir: lequel on tire des premieres, ostant la peau avec vn couteau, & non avec eau chaude: comme nous enseignerōs, quād nous parlerōs des huiles.

L'Anacardus, ou comme Paulus & Actuarius l'appellent, Anacardion, doit estre bien plein & bien nourri, de couleur brune ou noirastre, ayant en son escorce force resine, qui soit acre & piquāte au goust, noire: & vn noyau au de-

dedàs qui soit blanc, lequel estant cuit avec miel, fait le miel Anacardin. On en peut aussi tirer de l'huile, si apres les auoir pilez, on les presse : il est bien vray que ce sera vn huile tout autre que celuy qu'on fait, faisant boullir les escorces des Anacardi dans de l'eau, & amasse-on avec vne cueilliere, ce qui nage par dessus l'eau pour faire la confection Anacardine.

Les Myrabolans Citrins, doyuent estre iaunes entierement, tirans sur le verd, pesans & massifs, gommeux quand on les rompt; & gros, ayans aussi l'escorce grosse & massiue, & noyau fort petit. Quant aux Chepulins, les plus massifs sont les meilleurs, lesquels ont vne couleur noire rougeastre, & si sont pesans, de sorte que estans mis en l'eau, vont incontinent au fons.

Entre les Myrabolans Indes, ceux-là sont les meilleurs, qui sont fort noirs, gros pesans, de substance massiue, & qui n'ont point de noyau dedans : desquelles marques, tant plus ils s'en esloignent, tant moins ils valent.

Des Embliques ou Empeliques, ceux sont les meilleurs, qui sont gros, pesans qui ont beaucoup de chair & bié massi-

ue, & le noyau petit. Car quant à ceux qui ont la chair flaque; ils n'ont ni force ni vertu. Quant aux Belliriques, les plus gros, plus pesans, qui ont beaucoup de chair & de poulpe & bien massiue, sont les meilleurs. En general, les marques & enseignes de bonté és Myrobolâs, ie dy les principales, & qui leur sont communes avec les autres fruits, sont, qu'ils soyent bien nourris, gros, ayans beaucoup de chair bien ferme & massiue, & par consequent petit noyau, car les Indes n'en ont point. Quand aux autres marques; qu'on prend de la couleur & de la forme de l'os ou noyau, sont de peu d'importance.

Les meilleurs Ben ou Glans vnguentaria, sont gros, vieils: ayans leur écaille lissée, menuë, pleine de mouëlle; legere, & huileuse. Quant aux petits Ben, les meilleurs sont ceux qui sont blancs, tirans sur le noir, ou cédrez, vieils, pleins de mouëlle blanche, rissée & grasse: & si sont moins nuisibles.

Les Pignolats, qu'aucuns appellent Conij, ou Strobili, ou Pineoli, sont bons quand ils sont pleins, frez, blancs, seichez autant qu'il en est besoin. Il faut reietter ceux qui sont iaunes, ou passés,

buy

huyleux & rances: à quoy ils sont fort suiects: car à grand peine les peut on garder six mois entiers, qu'ils ne rancissent; ce qu'on pourra euitier, si on les couure de sucre, comme la dragée: mesmement si on les fait en premier lieu fricasser avec du son, afin de les secher, & puis les cribler. Lequel remede doit estre obserué quand on veut confire les autres semences, à fin qu'elles ne rancissent, auant qu'estre confites, ou mesme apres qu'elles le seront.

Les Noix de Cyprez, doyuët estre entieres fresches, molles, pleines de semence, mesme dedäs ses fentes & creuasses.

Les meilleures Pommes de Coing, sont celles qui sont bien nourries, iauues odorantes: q̄ si on ne veut pas beaucoup restraindre ou refroidir, il faudra choisir les bien meures: mais si on veut fort restraindre, il les faudra cueillir encores vertes. Il en est de mesme, de ceux que nous appellons Struthia, ou Coings femelle, qui sont beaucoup plus gros que les autres, mais ils ne sont pas si aspres, mais bien plus charnus.

Les Citrons, Oranges, & ceux qu'on appelle Limós, doyuët estre de moyēne grosseur, chacū en son espee: ayās vne  
odeur

odeur forte, & plaisante: leur escorce subtile & delice: quant à la couleur, le Limon doit estre pasle, le Citron iaune, & l'Orange tirant sur le rouge: vray est qu'il se treuve des Orâges q̄ sont verds de couleur, encores qu'ils soyēt meurs. Ils doyuent auoir beaucoup de poulpe au dedans, qui soit ferme: le suc odorât & aigre, quelquesfois doux, & mesmes s'en treuve qui ont vn goust meslé.

La mouëlle de la Coloquinte, ayant osté l'escorce de dessus, doit estre grosse & ronde cōme vne paume de moyenne grosseur, fort amere au goust: estant bien meure, grosse, rare & spongieuse, & par ainsi legere: & tant plus elle sera legere, tant meilleure elle sera, celle qui est bien blanche, est tousiours fort legere, & l'appelle on femelle: le temps de la cueillir, c'est l'Autōne, lors qu'elle cōmencē à iaunir, & perdt sa verdeur.

Le fruiēt du Cocombre sauuaigé, est estimé bon, quād il est parfaict & meur, & qui ayant laissé sa couleur verde, est deuenu iaune, estant amer au goust. De ce fruiēt, on tire vn suc blanc, & aucunement gras, qu'on appelle Elaterium: Quant à la maniere de le faire sans grande expresseion, Dioscoride l'ensei-  
gne au

gne au long.

*Dioscor.* Le meilleur *Carpobalsamum*, est de couleur iaune, plein, grand, pesant, mordant au goust, & qui eschauffe la bouche, sentant aucunement la liqueur de Baume. Pour auoir de boane Casse en

*Mesué.* Canne, qu'on appelle autrement Casse  
*Aluar.* laxative, il faut choisir celle qui est noire & dehors & dedans, grande, claire, pesante, bien pleine: de sorte que quand on la secout, la greine ne grillote point dedans: ayant au dedans, vne mouëlle grasse, luisante, pleine de suc, ne sentant point le chançy, ou le pourri; ayant quasi le goust, de bonnes prunes, chaude & humide au premier degré. Il faut noter, qu'il ne faut extraire la mouëlle de Casse, sinon lors qu'on en a affaire: car si on la garde long temps hors de la gousse, elle se corrompt biëtost, ne plus ne moins qu'on voit le sang, le lait, & la semence, se corrompre quand ils sont hors de leurs vaisseaux & lieux naturels: encores qu'on la serre bien.

Les bons Cubebes doyuent estre gros, pleins, pesans, acres, non pas toutesfois tant que le Poyure, tenans quelque peu d'amertume: estans fort aromatiques, avec quelque douceur: on

les peut bien garder dix ans.

Le Granum gnidium doit estre prins de la Thymelea, qui ait les fueilles grandes & deliees, nourrie en lieu bien ouuert, & pres de plusieurs autres plantes de son espece. Mesues dit, qu'il faut mettre les fueilles en vsage, & non pas les grains.

Les Dattes que nous appellons, avec les Grecs vulgaires ne sont autre chose que les fruiçts du Palmier, & sont ainsi appellees, à cause qu'elles ressemblent à vn doigt. Les meilleures sont celles qui sont grosses, iaunes, peu ridees, moles, pleines toutesfois: ayans beaucoup de chair au dedás, assez massive, laquelle est blanchastre du costé du noyau, & rougeastre du costé de la peau: qui ne sont point pertuisees, ny mangees des vers: & qui ne grillotent point, ou bien peu, quand on les secout: ayans aussi vn goust vineux. Les moindres & desquelles on doit moins tenir de compte, sont celles qui sont gresles, flaves, dures à faute de chair, qui ayant perdu leur queue, sont pertuisees: celles aussi qui sont pleines de vers.

Les meilleures figues seiches, sont celles qu'on apporte en Cabas, la ou elles sont



sont régees & pressées avec les doigts, ou les poings: & qui obeissent tellemēt à cause de leur mollesse, qu'en les maniant on sent les doigts de part à autre, elles sont aussi de bonne odeur, ne sentāt point l'eschauffé, ny le vermolu.

Que si on veut se prendre garde particulièrement à chacune, on trouuera que les bonnes ont la queue fort courte, la couleur blanchastre: elles sont molles, obeissans au manier: ayans la peau deliée & molle, estans pleines de suc & de semence iaune, avec vn goust quasi semblable au goust de miel, & vne odeur fort souëfue auāt q̄ les manger, & en les mägeant aussi qui sont pesantes & petites: vray est que de celles de Marseille (lesquelles on estime les plus exquises, soit qu'elles soyent blanchastres seulement, ou bien blanches du tout, & dehors & dedans, ayans toutesfois la semence iaune) les plus grosses sont les meilleures. Mais si on les apporte de pais estrange, cōme sont celles qu'on apporte d'Espagne, lesquelles on fait premierement tremper dans du moust, pour les rēdre pl<sup>r</sup> douces, & puis les saupoudreon avec de la farine, pour les garder de se prendte l'vne à l'autre,

ciles

elles ne valent rien, non plus que celles qui sont dures & en masse, & particulie remēt chacune, celles aussi qui sont plei nes de vers, estant de mauuaise odeur, noires au dehors, rougeastres au dedās, ou ayās quelque autre couleur, qui n'est pas selon leur naturel: ayans au reste l'e- scorce dure, espesse & seiche, d'estrāge couleur, odeur, & saueur au dedās. Tou- tesfois il s'en treuve de noires, & en Pro uence & en Languedoc, noires en de- hors, & fort rouges au dedans, les meil- leures & plus delicates de toutes, quād elles sont fraisches: car si on les fait sei- cher, elles se fondent. Il s'en treuve biē és dicts pays d'autres de couleur cen- dree, mais elles ne se peuuent seicher à cause de la trop grande humidité: les hommes ne les treuuent gueres bōnes, mais les oyseaux en sont fort friands.

La Galle Omphacitis, c'est à dire non meure, est meilleure quand elle est pe- tite, ou bien de moyenne grosseur: estāt refroncee, pesante, solide, & non point pertuisee: mais celle qui est grosse, fort rōde, lissée, legere, flaque, pertuisee, iau- ne, ou pour le moins rouille, n'est pas si bonne. Ceux de Languedoc & de Lyon: estiment sur toutes celles qu'on appelle

communément Rosmarines, qui sont les plus petites de toutes, estans pesantes, massiues, aspres, & fort cheres.

Les Iuiubes, que les Grecs appellent Zizipha, ou Zinzipha, sont meilleures, quand elles sont fraisches, grosses, longuettes, seiches, non pas toutesfois ridees, ayãs beaucoup de chair, pleine de suc, flaque, douce & vineuse: estans aussi pleines & pesantes: d'un goust doux & delicat, ayans le noyau petit: elles doyuent aussi estre rousses au dehois, ou plustost rougeastres, & au dedans passes ou bien blanchastres. Car quant à celles qui sont blanches par dessus, ayans le noyau semblable au noyau des prunes, plus rond toutesfois, ayant vne petite chair dedans, qui est douce: ie n'en ay point encores veu. Celles qui sont noircies de vieillesse, legeres, seiches, poudreuses, fraibles, & qui n'ont presque point de chair, sont à reietter.

Ce fruit appelé Mixæ, Mixæ, ou Mixaria, & vulgairement Sebesten, à cause d'une certaine mucosité gluante qu'il a, ressemble fort au fruit des autres pruniers, mais il est moiadre la moitié, il est fait en aiguissant, & si est ridé vn petit, pesant, noir, ayant beaucoup de chair, laquelle

laquelle est de couleur rouge noirastre, ferme & massiue, gluante, douce, & vn petit aigrette. ayant son noyau semblable au noyau des prunes damasines, fait à quarres, & dans le noyau y a vne petite amande douce.

La bonne pomme de Grenade, doit auoir son ecorce ou son cuir entier, roux, dur, & massif; au reste celle qui est pesante, bien meure, ayant les grains de dedans rouges ou de couleur de rose, pleins de suc semblable au vin, est la meilleure.

Les meilleurs fruiçts de Meurte, sont ceux qui sont frais, pleins, succulens, odorans, gros, & bien nourris.

Les meilleures noisettes, sont celles qui ont leur coquille solide, & qui n'est point pertuisée, de couleur rouge, & qui sont rondes, grosses, pesantes, & qui ont vn noyau dedans, qui grilotte quand on le secout: & si on le gousté apres auoir rompu la coquille, on le trouuera de fort bon goust, retirant aucunement au goust de la chastaigne: ce noyau de dedans est iaune par dessus, & en dedans il est blanchastre, & si doit estre bien plein, bien nourry, & dur.

Après celles-cy, les meilleures sont celles qu'on appelle Noisettes franches, c'est à dire legitimes, ayans la coquille comme les autres, & la petite peau qui environne le noyau dedans la coquille, est fort rouge : le noyau a la chair fort dure & ferme, laquelle tire aucun mēt sur le rouge. Les moindres de toutes sont les sauvages, qui ont la coquille & le noyau de dedans blanchastre. Quant à celles qui sont legeres, trouées à cause du ver qui est dedās, rāces de vieillesse, ou qui ont le noyau ridé, transi & sans suc, ne valent rien du tout.

La bonne Noix muscate, doit estre pesante, huileuse & odorante.

La noix d'Inde aura vne certaine eau au dedans, qui est douce quand elle est fresche & recente. De laquelle eau il se faut servir & non pas de l'escorce.

Des Oliues qu'on surnomme Halma des, ou Colymbades, lesquelles on confit, & les laisse on tremper en leur saumure : les meilleures sont les plus grosses, qui sont faites en ouale, de couleur palle ou rousse, pleines, massives : ayans beaucoup de poulpe bien ferme, quelque peu amere, avec quelque douceur : avec vn noyau au dedans, petit, longuet,

dans

dans lequel y a vne petite amande fort delicate Mais celles qui sont trop grosses, qui vont en aiguissant, & qui ont beaucoup plus de chair que les autres, ne sont pas de si bon goust, comme sont celles d'Armenie. Les Oliues qui viennent des Oliuiers entez, sont beaucoup plus grosses que celles des autres, mais elles ne sont pas de si bon goust.

Les fruiets d'Aubespain, & les Raisins d'outre mer, doyuent estre cueillis lors qu'ils sont bién meurs, bien pleins, ayans peu de grains en leurs grappes, mais bién nourris, plustost qu'ayans leur grappe bien espesse, & les grains petis & mal nourris.

Pour auoir du bon poyure long, il faut qu'il soit gros, entier, recent: & qui pique la langue quand on le masche, non pas soudainement, mais aussi il gar de longuement son acrimonie. Il faut reietter celuy qui est pertuisé, ou sophistiqué.

Le Poyure blanc, qui vient de cestuy-*Misuel.*  
cy, est beaucoup plus fort & plus piquant que non pas le poyure long ou le noir: il faut choisir celuy qui est gros, bién plein, pesant, & non ridé. Du poyure noir, il faut choisir celuy qui est plus gros, ayât

son escorce deliée, & qui est le moins ridé, étant fort pesant.

Les Pistaches, qui les veut auoir bōs, il les faut prendre frais & recens, ayans le dedans du noyau de couleur verte, & qui soyent de bon goust.

Les meilleurs Tamarins, sont ceux qui sont noirsâtres ou bruns, luisans, mols, fraiz, gras, composez & tissus, comme de petis fils nerueux: qui sont aigres-doux, ou bien doux, tenâr quelque peu d'aigreur & de goust vineux. Il faut reietter ceux qui sont secs, sophistiqués avec chair de pruneaux, lesquels ont vne couleur noire & obscure, & le goust & odeur de prunes.

Les Prunes seichees, ou elles sont aigres, ou douces, & des vnes & des autres, il faut tousiours choisir celles qui sont grosses, pleines & massiues, qui ont beaucoup de chair, pleines de suc & fermes: qui ont le noyau petit, & sont couuertes au dessus d'une certaine rosee blanche, ou bien sont noires, sans qu'on les ait rien lauees, & non pas celles qui sont rances, qui sentêt le chancy, ou qui sont pleines de poussiere. Que si no'voulons lascher le ventre, il faudra prendre les prunes de Damas, ou les Armeniennes,

nes,& les autres qui sont douces & humides, plustost que les aigres, ou les moyennes selon le dire de Mesué.

Le bon Sené doit auoir les gousses (desquelles on se sert principalement) noiraîtres, tirans sur le verd, vn peu ameres, avec quelque astringtion, parfaites auant que les cueillir, fresches, ayant au dedans sa semence grosse & pressée. Les pires de toutes sont celles qui sont blanchastres, & qui ont esté cueillies auant qu'elles fussent parfaitement meures. On peut mettre en secôd reng de bonté les feuilles, pourueu qu'elles soyent vertes & pleines, & non pas blanchastres & delices: les tiges & iettons ne seruent de rien à lascher le ventre, parquoy il les faut ietter là. Je m'esmerueille des Apoticaire d'aujourd'huy qui s'oubliét tât, sans se souuenir du dire de Mesué, qu'ils estiment plus, & vendent aussi plus cheremét les feuilles du Sené que non pas les gousses. Nostre Sené, qui viét en noz iardins, n'est pas de telle vertu côme celuy qu'on appelle Oriétal, mais aussi on voit tous les iours par experience, qu'il n'est pas du tout inutile.

Des Raisins secs, il faut tousiours prendre ceux qui sont gras & charnus,



& qui ont l'escorce fort delice: dit Galien au second liure des Alimens. Ceux de Damas & de Corinthe no<sup>r</sup> sont fort communs.

Les meilleurs raisins de Damas, sont ceux qui sont gros, iaunes, transparans, charnus, ayans peu de pepins, & bien petis, & qui ont le goust vineux. Ceux de Corinthe sont les plus petis de tous, & n'ont point de pepins: ayās vne couleur tirant sur le rouge, vn goust fort delicat & bon. Il s'en trouue bien peu, & si sont bien chers.

On en apporte par deçà des cōmuns, ou de Prouence, dans des caisses de Sapin, ou bien d'Espagne dans des cabas. Ceux de Prouence sont les meilleurs apres ceux de Damas & de Corinthe, principalement ceux que les gens du pays mesme, appellent Prunelles, & croy qu'ils les appellent ainsi, à cause qu'elles ont la grume fort semblable à vne prune, à sçauoir noire, mais couuerte au dessus d'vne certaine rosee bleuë. Ceux qui sont iaunes ne sont pas mauuais, les gens du pays les appellent Picardans: ils sont du tout semblables aux raisins de Damas, hors mis qu'ils ne sont pas si gros, ny si charnus, & si n'ont pas la  
chair

chair si ferme. On fait seicher & les vns & les autres sur le sep, tordant seulement *L'autheur* la queue. S'ils s'engraissent tellement *n'auoit pas* qu'ils tiennent aux doigts, les gens du *veu ny en* pays mettent de farine par dessus, pour *tendu la fa* couvrir celle imperfection. Les Espa- *çon de sei-* gnols vsent fort souuent de ceste trom- *cher les rai* perie en leurs raisins secs, qui sont les *sins, qui est* moindres de tous, car ils gardét les meil *toute cōtra* leurs pour eux, & enuoyent les pires & *re à celle* ceux qu'ils ne veulét pas, aux autres na- *qu'il dit.* tions.

*De l'election des Bois.*

C H A P. X I I I.

**L**E bō Agolochum ou Bois d'Aloës, est marquetté & mouchetté, odorant, ayant vne certaine adstriction & amertume quand on le goust. Son es- corce est si deiee, qu'on la diroit plu- stost vne peau, qu'autre chose, laquelle est de diuerse couleur: on le masche pour auoir l'aleine bonne: on en vse au lieu d'encens és parfums, aussi se fond il au feu comme l'Encens, mais non pas si soudain, lequel estant ietté en l'eau, va incontinent au fonds, & produit des pe- tites bouteilles. *Ætius & Actuarius l'ap-*

pellent Xylaloë, qui est à dire Bois d'Aloë, r'on pas de l'herbe ainsi nommee, mais d'un arbre : toutesfois le Bois d'Aloës ressemble aucunemēt au suc qu'on tire de l'Aloës en herbe, tant en son amertume, qu'au suc gommeux, qu'il a au dedans, de la ou aussi ie pense qu'il a prins son nom. Au reste Mesues ordōne tousiours l'Agalochū crud: car celuy qui a esté bouilly pour en tirer la senteur, a perdu sa force & vertu.

*Diast.* Quant au Bois qu'on montre es boutiques, pour l'Agalochum, c'est plustost l'Aspalathus qu'autre chose: que s'il est bon & legitime, il sera pesant, & apres luy auoir osté l'escorce, est rougeastre ou purpurin: il sera aussi massif, odorant, & amer au goust: celuy qui est blanc, retirant au Bois, & sans aucune odeur, est le pire. Il y en a toutesfois qui au lieu d'Aspalathus, mettent le cœur d'Oliuier.

Le Bois de Guaiac, est à mon aduis, vne espeece de Bois d'Ebene, & ce qui le me faiēt croire est, qu'il ressemble en tout & par tout, & en substance, & en facultez, à ce que Galien dit de l'Ebene: mais quoy que ce soit, soit qu'il soit vne espeece d'Ebene, ou qu'il ne le soit pas: le  
meilleur

meilleur est celuy qui est brun & iaune, qui à son escorce qui tient ferme contre le Boys: estant massif, pesant, bien nourry, prins d'un arbre qui ne soit ny trop ieune ny trop vieil: & tant plus il sera frais & recent, tant mieux il vaudra, car il sera tant plus succulent & vigoureux: & pour le moins il le faudra choisir, qui soit bien gommeux, & quāt il sera ainsi recent, & qu'il aura encores son escorce, il sera bon de prendre les branches, de moyenne grosseur: que s'il est desia vieil, il vaudra mieux prendre du tronc (pourueu qu'il ne soit pourry, vermolu, ou autrement corrompu, comme on le voit bien souuēt) car à cause de sa grosseur & dureté, il resiste mieux à la corruption, & si demeure plus longuement avec sa gôme, que ne font pas les branches, encores que son escorce soit tousiours plus seiche. Et au contraire, l'escorce de celuy qui est frais, ie dis l'escorce interieure est tousiours plus grasse que le bois, & à plus de suc, à cause que ce à esté comme le conduit de la nourriture pour la plante. Quant au goust, il faudra prendre celuy qui est doux, amer, & piquant. Celuy qu'on apporte de l'isle saint Iean, qui est vne region

region temperee & bien arrousee, du costé de Midy, est plus gras, & à plus de Resine que celuy qui croist en l'isle S. Dominique, qui est situee sous la Zone torride, lequel à cause de la grande chaleur, est beaucoup plus sec & aride.

Il y en à qui estiment que le Palus sanctus (qu'on appelle) soit les branches du Guaiac, lequel ayant en son bois diuers filamens, & le cœur estant noir, fait que plusieurs s'en seruent aujourdhuy au lieu d'Ebene, & mesme il à quasi semblable faculté: il est bien vray qu'il est plus efficace quand il est frais & recent: & au contraire, il a moins de vertu, & est plus sec (à cause qu'il est delié & pluïstost seiche) quand il est enuieilly: comme il se voit es branches des autres plantes, & principalement en celles qui sont petites. D'autres estiment le Palus sanctus, ou Lignum sanctum, estre vne autre plante que le Guaiac, & se fondent en ce que son etcorce est plus blanche que celle du Guaiac, & sur quelques autres raisons. l'en laisse la decision & le iugement à ceux qui les couppent, mais quant à leur faculté & vertu, ils ne sont gueres differens.

Entre les Santals, le Citrin est le meilleur



leur & le plus aromatique, mais il s'en treuve bié peu: comme Platearius mesme à bien remarqué. Le moindre, c'est le Santal blanc: le rouge tient le milieu en bonté: tous les trois sont froids au tiers degré, & secs au second. Quant a ceux qu'on treuve és boutiques, qui piquent la langue quand on les goust, principalement le Citrin, il se faut bien garder d'en vser.


Le bon Xylobalsamum, est celuy qui *Dioscor.*  
est frais, ayant ses rainseaux menus & subtils, de couleur d'or, & qui est odorant, retirant aucunement à l'odeur du Baume.

Le Calamus aromatique que les Apothicaires tiennent, n'est autre chose que vne certaine racine, & non pas la racine du Calamus, toutesfois l'odeur & le goust montrent assez, qu'ils ne sont gueres differens en vertu & faculté: le meilleur est celuy qui est blanchastre, ayant vn goust & vne odeur bonne & aromatique, & qui ne iette point de poussiere quand on la rompt, il se peut bien garder trois  
ans.

*Galien en  
diuers  
lieux.*

**L**E meilleur Cinnamome, est celuy qui est de subtiles parties fort odorant: ayant vne certeine odeur qu'on ne scauroit dire, mais qui est souëfue sur toute autre senteur: acre & mordant au goust, & fort chaud, non pas tant toutesfois qu'il soit fascheux: retirant aucunement à l'odeur de Rue, quand on le masche, ayant sa couleur blanche, meslee de iaunastre & de bleu, ou bien cendree, iettant ses branchures & rainceaux menus, environnez de plusieurs nœuds, qui est aussi poly & lissé, & se rompt aiseemēt. Aetnarius pour dire du bō Cinnamome, met en ses cōpositions *Leptocinnamomum*, qui est à dire en nostre langue, Cinnamome delié. Quād à ce que nous appellons Canelle, ie tiēs que c'est la Casse, ou bien vn faux Cinnamome, encores qu'il se treuve entre les Cinnamomes que les Princes gardent, six especes de Cinnamome, routes diuerses. Quand il est garde trente ans, il diminue la vertu: & ne se faut pas abuser, de le penser garder dauantage avec sa vertu & faculté, car il est trop subtil, & en sa substance & en ses vertus. La Casse

ou



ou Canelle, tant plus elle ressemble au Cinnamome, & en odeur, & au goust, tant plus elle est excellente & exquise: la meilleure est rousse, ayant l'odeur de la rose, & du vin, ayant aussi quelque douceur au goust, garnie de fleutes ou Canes, fort odorâte, comme sont cōmune-ment les choses aromatiques, & à cause de ses fleutes ou canes. Galien en plusieurs lieux, l'appelle Cassia syrix, ou fistula Cassiæ syrix, qui est bien toutes-fois autre que la laxative, laquelle on apporte d'Egypte, comment il à esté discouru cy deuant quand nous auōs parlé des fruidts: ceste Casse donc ou Canelle à son escorce exterieure, a laquelle on donne aussi le nom de Fistula, forte & à l'odeur & au goust: mais ce qui est dedans est quasi sans vertu, aussi ne s'en sert on quasi à rien.

Qui veut auoir de bon Macis, il doit prendre celuy qui est roux, ou iaune comme or, estant fort aromatique & de souëfue odeur, ayant son goust vn peu acre & piquant avec quelque petite amertume, & tāt plus il sera frais & plein de suc, tant meilleur il sera. C'est folie d'estimer qu'il se puisse garder dix ans en sa force & vertu, comme aucuns ont resuë.



refué. Le suc qu'on tire de Macis, qui retire fort à la Gomme de Lierre, est beaucoup plus efficace & vertueux que le Macis. Quant au Macer, on n'en treuve point auourd'huy.

La meilleure escorce de Tamarix, est celle qu'on apporte de Prouence & de Languedoc, non pas celle qui croist à Fontaine-bel'eau, qui est vn lieu de plaisir pour les Roys, aupres de Melun. Au reste, pource que le Tamaris croist en noz quartiers, son escorce est cogneuë de chascun : si est bien aussi l'escorce de la racine de Cappres.

La meilleure escorce d'Encens est celle qui est grosse & espesse, grasse, odorante, fraische, polie & lissée, & non pas raboteuse, qui n'est pas aussi cartilagineuse. On la sophistique, avec escorce de Pin, ou de pomme de Pin : mais la tromperie se descouure au feu, car les autres escorces mises sur le feu. ne iettent point de flamme, ains ne font que fumer, mais l'escorce d'encens, iette incontinent flamme, & si rend vn parfum de fort bonne senteur, on la treuve le plus souuent parmy les morceaux d'Encens.

**L'**huile qu'on tire par expression, des Oliues meures, doit estre rous ou iaune comme, or pur, bin cler, delié & subtil, n'ayant point ou bien peu d'odeur mais qui soit bonne, vn goust doux, & quelque peu piquant, lequel à grande peine peut on exprimer: qui ne soit pas aussi trop viel, ains tout frés & recent: sinõ qu'on en aye à faire du viel, duquel celuy de trête ou de quarante ans, est meilleur que celuy de trois ou quatre ans, car il est plus efficace, plus espez, d'odeur plus forte, plus chaud, & plus mordant que l'autre. Celuy qu'on appelle huile vierge est fort exquis: il s'en treuve bien peu, aussi est il bien cher.

L'huile Omphacin, lequel on tire des Oliues vertes & non meures, tire aucunement sur le verd: le meilleur est celuy qui est frés, odorant, sans aucune mordacité, & qui est brusé & apre au goust. Au defaut duquel il faudra mettre d'huile laué.

Des vins on choisit tantost les vns, tãtost les autres, scelõ les diuerses inten

tiōs auxquelles on pretend; vray est que les argumens sur lesquels on se fonde pour choisir les vins, se prennent le plus souvent, ou de la couleur, ou de l'odeur, ou de la saveur, ou de la consistance.

Le vin aigre blanc est plus subtil, que ne sont pas le claret, ou le rouge, aussi est il plus puissant : principalement quand il est aussi aigre, & aussi vieil que les autres.

Le bon Miel doit estre pur & net, de sorte qu'il luise par tout, odorât, iaune, fort piquant & fort doux au goust, & fort plaisant : estant au reste de bonne consistance, asçavoir ni trop espez, ni trop cler & liquide, gluant & visqueux, de façon qu'il ne coule point, mais file bien loing, quand on le leue avec le doigt. Si on le fait cuire, il ne iette pas beaucoup d'escume, & si ne sent pas par trop l'odeur du Thym. Et encores qu'il soit blanc, pourueu qu'il ait les autres marques de bonté, il ne laissera pas d'estre bon: & mesme ceux de Languedoc, & les Espagnols, font traffique d'un Miel fort blanc, qui ne laisse pas pour tāt d'estre excellēment bon, & si est fort dur: cōme aussi du iaune duquel nous vsōns, le dur est meilleur que le liquide:  
à cause

à cause qu'on iuge, qu'un miel ainsi liquide, est sophistiqué & embrouillé avec quelque autre liqueur.

Quand à la Manne ( que les Arabes appellent ) qu'on peut aussi nommer *Æromeli*, c'est à dire Miel de l'aer, soit qu'elle soit liquide, ou amassée en petis grains, il faut tousiours choisir la bien blanche: qui est fresche, douce, bien nette & pure, non pas meslée avec vne infinité d'ordure: cuillie sur quelque plante de bonne odeur, & qui ne soit point nuisible à l'homme: cōme est celle qu'on cuillit sur le Larix ou Meleze, de laquelle on faict auourd'huy grād estat: elle se peut bien garder vn an. On ne se sert quasi auourd'huy de point d'autre, que de celle qui est amassée en petis grains, car la liquide, est malaisée à recouurer: celle qu'on recueille sur les Pierres, n'est gueres bonne: mais encores est plus mauuaise celle qui est de couleur cendrée: la pire de toutes est celle qui à vne couleur brune, qui est pleine d'ordures, celle qui est trop vieille, & celle qui est sophistiquée avec sucre, & gosses de Sene: mais la tromperie se descouure avec le temps, car ceste manne ainsi sophistiquée deuent molle & se fond

avec le temps.

La bonne Cire doit estre fort iaune, odorante, grasse, bien serrée & massiue, legere bien nette, & qui ne' soit point embrouillee d'autres matieres. Celle de Mauritanie encores qu'elle soit noirastre, si est elle fort propre pour iaunir les autres: la blanche ou elle est naturelle, ou bien on la rend blanche, en la lauant: la verde se fait y meslât de la rouille ou verdet: & pour feire la rouge, il y faut mesler de la racine d'orcannette, toutesfois on la fait souuent avec du Cinnabre.

Le meilleur Sucre & le plus exquis, est celuy qui est fort dur, solide, & qui faisant hurter vn pain contre lautre, rend vn certain son comme feroit vn bois bien sec & solide: & toutesfois à cause de sa siccité & rarité inuisible, il est leger: estât au reste fort doux, fort blâc, & reluisant comme la neige, reduit en pains qui sont faits en forme de Pyramides (comme est celuy de Valence) qui ne sont gueres gtos pesans enuiron vne liure & demie chascue pain: qui est fort cher, propre à faire confitures seiches: mais il ne vaut rien pour faire les Penides, à cause qu'il s'esmie trop

trop aisemēt, pour estre ainsi sec. Celuy qu'on appelle de Madere, tient le secōd reng en bonté, lequel est en pains pesans cinq, six, sept huiēt, voire neuf liures chascun, il est fort en vsage pour faire les confitures, car avec ce qu'il n'est pas trop cher, il n'est gueres moindre en bonté, que le premier. Le troisiēme est celuy qui est mol, lequel est blāc, mais il est plus gras que les autres, aussi n'est il pas si cher, & ne vaut rien pour faire confitures seiches, si fait biē pour faire les Penides. Le quatriēme, est celuy qu'on apporte des Isles de Canadas, qu'on appelloit anciennement, Isles fortunees: lequel est aussi blāchastre au dedans, mais il n'est pas si bon que ceux desquels nous auons parlé cy-deuant, il est aussi meilleur, que celuy dōt nous parlerōs apres: il est en fort gros pains, tellement qu'ils pezent bien, iusques à dix ou douze liures la piece. Le cinquiesme, qui est le moindre de tous, est celuy qu'on appelle Sucre de sainct Audomar, blanchastre en dehors, mais au dedans il tire sur le rouge, comme s'il estoit farcy d'un autre Sucre & fardé au dehors tout expres pour tromper, les pains sont tous egaux: c'est le plus gluāt

de tous les Sucres, on ne s'en sçauroit  
aider à faire confitures seiches, mais  
pour faire confitures liquides, ou si-  
rops, opiates, conserues, & autres telles  
compositions, on s'en pourra bien ser-  
uir, car il est à fort bon marché, mais  
pour corriger vn petit la compositiō, il  
sera bon de mesler vn peu des autres  
par-mi. Si ce Sucre sent la marce ( com-  
me bien souuent les mariniers le met-  
tent au fons de leurs vaisseaux, à cause  
de sa pesanteur, & leur sert de saure) il  
se conuertit en ce qu'on appelle vulgai-  
rement Sucre rouge: il est bien vray que  
plusieurs pensent, que le Sucre rouge  
ne soit autre chose, que la crasse & es-  
cume que le Sucre rend, quand on le  
cuit. Il y en a qui font des pains, des  
miettes de Sucre qu'ils recueillent, qui  
s'estoyent faites les pains se heurtans  
l'vn contre l'autre, lesquels ont la mes-  
me nature que le Sucre de quoy ils sont  
faits. Entre les Sucres, le meilleur ne  
peut endurer d'estre cuit longuement,  
autremēt il se met en poudre: & au con-  
traire le moindre, est celuy qui souffre  
d'estre cuit le plus longuement: quāt aux  
autres, selon qu'ils sont bons ou mau-  
uais, ils peuuent aussi estre cuits, peu ou  
beau

beaucoup.

Nostre Acacia encores qu'elle soit bien vieille, elle ne laisse pas d'estre bõne: pourueu qu'elle ne soit ni pourrie, ni chancie ou moylie: sinon que le Medecin, pour quelque intention, requist qu'elle fut fresche & recente.

Le bon Aloës doit estre gras, gluant, fraisle quand on le manie, & qui se fonde aisement: estant de couleur tirant du rouge au rous, figé & serré comme le foye: ayant des cautez au dedans, & pourtant il est léger, de bonne odeur, retirant à l'odeur de la Myrrhe: encores que toute la plante soit de mauuaise odeur: estant au reste fort amer, pur & net, reluisant, sans aucun grauiier ou sablon: comme est pour la pluspart, celui qu'on apporte des Indes. Il se peut sophistiquer, comme Mesues & autres auteurs disent: mais quãd il est sophistiqué, il n'a pas les marques que nous auons dit.

Si tu peux recouurer l'Elaterium, le Glaucium, & le Lycium, & tu veux cognoistre s'ils sont bons ou nõ: tu trouueras les marques pour le cognoistre, en Dioscoride.



Le meilleur suc de Regalisse, est ce-  
 luy qu'on apporte de Candie : car il est  
 fort doux, mol, frez, pur, & gluant : &  
 estant rompu il est resplendissant & fort  
 noir : & si on la met sous la langue, il se  
 fond entierement.

Encores que Dioscoride mette trois  
 sortes d'Hypochistis, à sçauoir de iaune  
 de verde, & de blanche: il faut entēdre,  
 auant qu'elle soit preparee, car estant  
 mise en masses, elle est noire, visqueuse  
 & gluante : ayant vu goust fort attrin-  
 gent, & vne odeur qui n'est pas mau-  
 uaise.

*Du choix des liqueurs.*

C H A P. X V I.

**C**E que les Grecs appellent opos &  
 le latins liquor, n'est autre chose,  
 qu'un certain suc qui vient de soy mes-  
 me és arbres, apres qu'on leur à fait v-  
 ne playe, ou avec quelque tranchant,  
 ou avec un taraire: ou seulement les es-  
 gratignant, ou coupant vne branche: le  
 quel suc est de bonne odeur. Le suc Cy-  
 renaique, doit estre acré & mordāt, quel  
 que peu rous, & non pas de couleur de  
 pourreau: estant aussi transparent. & re-  
 tirant

tirant à la Myrhe: odorant & qui estât détrempé, deuiet incontinent à anc. Les Portugalois l'apportent aujourd'huy en grande quantité en leurs voyages de Taprobane, qui est vne grande Isle en la mer Indique: ceux du pais l'appellent Beizoé, dont est aussi venu que nous l'appellons Belzoin (car Meues fait aussi cas de ce uy d'Inde) ou bien par vn mot plus corrompu Bencoin, ou Benioin. On l'appelle aussi Asa aromatique ou odorante, prenant le nom (corrompu toutesfois) de la denomination de l'herbe de laquelle on le tire, qui est le Lafer: comme aussi on appelle Asa puante, le suc du Lafer Parthique, & Persique: ou bien, selon le dire de Meues, celui de Medie & de Syrie: laquelle liqueur, sent le pourri, comme dit Dioscoride.

L'opium a prins son nom d'Opos, car c'est la liqueur du Pavot noir: cōme le meconium est le ius de la mesme plante: anciēnemēt on faisoit estat de celui de Thebes, & de celui d'Espagne: mais au- *Dioscorid.* iourd'huy, i'entens q̄ celui d'Apulee est le plus vsité. Le meilleur Opium est celui qui est pesant, massif, amer au goust, & qui prouoque à dormir en le neurant

qui se resout aisement en l'eau, estât lissé, & blâc; & n'est ni aspre ni plein de grumes: si on le coule, il ne se tient point comme cire, & si se fond au Soleil: si on le met dans la lampe, il ne iette point vne flamme noire: & estant esteint, maintient tousiours son odeur.

*Diosc.*

*Mesues.*

La liqueur du Baume, qu'on appelle Opobalsamum, est estimee bonne, quand elle est fresche, d'odeur puissante, qu'elle est pure & entiere, & non fardée, & ne tient rien de l'aigreur: il faut aussi qu'elle soit aisee à dissoudre, lissée, astringente & vn peu mordante à son goust: si on la verle sur vn drap de laine, elle n'y faiët aucune tache, & si on le laue, on n'y cognoist rien: si on la iette dans du laiët, elle le fait prendre, comme la presure: dauantage si on la iette dans l'eau, elle se dissout soudain, & prend la couleur de laiët. Mais si elle est enuiellie, elle s'espessit, & n'est pas si bonne, cōme dit Dioscoride. L'Opoponax, qui est la liqueur qui sort de la racine ou de la tige du Panax nommé Heracleū, apres l'auoir esgraignee ou coupee: il est blanc quād il est fiez & recent, mais estant seiché, il deuient de couleur de Saffran en dehors, ou bien iaunastre, & de cou

de couleur blanche au dedans, ayant vne odeur forte, ou bien cōme dit Mesues, vne odeur bonne, qui luy est naturelle: fort amer au goust: estant aussi lissé, gras, fraisle, tendre, & qui fond incontinēt en l'eau. Celuy qui est noir, & mol, n'est aucunement receuable. Le bon *Dioscor.*  
 Euforbe est celuy qui est de couleur de *Gal.*  
 lait, caustique & bruslāt, d'essence fort subtile & penetratif: soit qu'il soit amassé en petis grains de la grosseur de vn Ers reluisant cōme la Sarcocolla: ou biē qu'il ait esté recueilli, és boyaux de brebis ou chientes, d'ont l'arbre est environné: lequel est amassé, reluisant cōme verre, trāsparent, acré, recēt: & si on veut, qu'il soit bien caustique & bruslāt, il faudra choisir le plus blanc: mais si on veut qu'il ne soit pas tant bruslant, il faudra prendre celuy qui est iaune, & desia vieil: car celuy qui est recent & frez, est beaucoup plus blanc, & plus bruslant, tellement que pour peu qu'on le goustē, il enflamme tellement la bouche, que tout ce qu'on y mettra, voire long temps apres, aura le goust de l'Euforbe. Mais ceste couleur se passe, & s'esuanouit bien tost, de sorte que avec le tēps il deuient plus cendré, plus  
 passe

pasle, & plus iaune, & si diminue beaucoup de sa Chaleur. Celuy de deux ou de trois ans, est encores en sa vertu, voire iusques au quatriesme an; mais depuis qu'il vient iusques à cinq ou six ans, il perd sa force, tellement que celuy qui est gardé plus longuement, est du tout sans vertu. Il est bien vray aussi, que ce uy qui est recent & frez, est fort dangereux, à cause de sa grande violence, parquoy il n'est pas bõ d'en vser, sans le conseil & aduis de quelque Medecin bien expert, mesmement es remedes interieuts. Mesues prise sur tous celuy qui est leger, fraisle, pasle, cler, fort acré, d'odeur forte & piquante, gardé quelques anneés, car celuy qui est plus frez & recent, est trop bruslant, & si est venimeux.

Le bon Galbanum ne tient rien du Bois, il à toutesfois quelques graines meslées par-mi ayant vne odeur forte & facheuse, qui est gras, estant cartilagineux, comme l'Ammoniac ou l'Encens: n'estât ni trop humide ni trop sec.

Le meilleur Armoniac, est celuy qui n'est embrouil.é ni de raclures de Bois, ni de sable, ni de terre, ni d'autres ordures: qui est haut en couleur, retirant à l'odeur

l'odeur du Castoreum, estant amer au goust, fort massif, estât fait à petis morceaux cartilagineux, cōme l'écēs masse.

Le Sagapenum est reputé bon, quand *Gal. lib. I*  
il est luitant, rous au dehors, & blanc *Ant.*  
au dedās: acre au goust, ayât son odeur retirant à l'odeur du Pourreau, ou bien participant de l'odeur du Lasfer, & du Galbanum (& mesme on à acoustumé de le sophistiquer avec ces liqueurs) & ressemble fort au Galbanum le plus blanc, & de fait la partie la plus escumeuse, la plus gluante, plus blanche, & plus legere du Galbanum se conuertit en Sagapenum: mais celle qui est la *ibid.*  
plus massive, & la plus serrée est la meilleure, sentant le Sagapenum: & c'est de celuy qn'il faut vser, cōme le meilleur que si c'est du vray, il se dissoudra incōtinent qu'on le mettra dans de l'eau ou dans du vin, ce que ne fera pas s'il est sophistiqué. Mesues dit que le meilleur Sagapenum, est celuy qui est blanc tirant sur le rouge, d'odeur de Pourreau, tenât quelque chose de l'odeur du Lasfer, & du Galbanum, avec lesquels on le sophistique: qui est espes, & neantmoins est leger, & qui se resout facilement, si on le met en l'eau.

*Dioscor.* La meillenr Scammonée, s'apporte  
*Mesues.* de Mysie region d'Asie, laquelle est nette,  
 clere, spōgieuse, & pleine de fistules,  
 legere: retirant aucunement à la couleur  
 de la colle du Taureau, ou de la gomme: estant clere, bruslant vn bien  
 peu la langue, & qui mise sus la langue,  
 ou trempée avec quelque chose humide,  
 blanchist incōtinēt, & deuient comme  
 laiēt: estant au reste tendre aisée à  
 esmier & mettre en poudre, de bonne  
 odeur, qui luy soit naturelle & non  
 prinse d'ailleurs, & non pas d'vne odeur  
 facheuse. Celle qu'on apporte de Syrie  
 & de Iudee, qui est pesante & massiue,  
 ne fait aucunement à recevoir: toutes  
 fois Mesues fait estat de celle d'Antioche.  
 Mais si la goustant, on treuve qu'elle  
 brusle la langue, c'est vn argument  
 qu'elle est sophistiquée & brouillée,  
 avec laiēt de Tithymale.

Le Ladanum est estimé bon, quant il  
 est odorant, tirant sur le verd, qui se  
 molifie aisement: estat gras & resieux,  
 & non pas sablonneux, ou chancy: comme  
 est celuy qui vient de Cypre: celuy  
 d'Arabie & de Lybie, n'est pas de telle  
 estime.

*Du choix des Resines.* CHAP. XVII.

**L**E meilleur Mastic est celuy qui re-  
luit cōme le feu, qui est blanc com-  
me la cire de Toscane: estant plein, sec,  
fraisle, crissant, odorant, & quelque peu  
acre: apporté de l'isle de Chio, chaud &  
sec au second degré, avec quelque astri-  
ction. Le moindre de tous est celuy qui  
est verd & noir, qu'on appelle Mastic  
d'Egypte ou de Ponte, estant noir  
comme le Bitume. Or le Mastic n'est  
autre chose que la resine du Lentisque,

La Terbentine, est la resine qui sort  
du Terbentin. La meilleure est celle  
qui est blanche, ou tirant sur le pers, ou  
de couleur de verre, qui est clere, odo-  
rante, & qui sent le Terbentin; estant  
vn peu amere au goust, apportee de  
Chio, qui pique la bouche & le gosier,  
& qui est liquide. Entre les Resines Dia-  
scoride met ceste-cy au premier rang  
de bonté, mettant en secōd lieu le Ma-  
stic: mais Galien est de cōtraire opiniō,  
lequel i'ay suiui, parlant premierement  
du Mastic. On apporte aujourd'huy de  
l'isle de Chipres de la Tormentine,  
& de liquide & de seiche, qui ne sont  
pas à mépriser. La meilleur resine  
apres la Tormentine, est la Resine du

Larix



Larix ou Meleze, qui est vn arbre sur lequel on recueille le plus souuent la Manne. Celle du Sapin est quasi semblable à celle du Larix, & en bonté & en toute sa nature; & de fait la pluspart des boutiques ne tiennent point d'autre Tormentine que ceste cy: mais la faute en est trop lourde, car il s'en faut beaucoup qu'elle soit de telle vertu, que seroit la vraye Tormentine: & mesme Galien ordonnoit qu'en ses cōpositiōs on mist, non pas la Tormentine simplement, mais celle de Chio, comme la meilleure & plus exquise: quelle honte est ce dōc, ou plustost, de quelle peine sont dignes ces vèdeurs de Resines, qui n'ont point de honte de vendre à leur escient la Resine du Sapin pour la vraye Tormentine? & mesme en vsent és compositions, qui est vne faute bien grande, & vne grande vergongne aux Medecins de l'endurer.

Outre les Resines desquelles nous auons parlé, Galien & Dioscoride font mention des Resines de Pesse, de Pin, de Pommes de Pin, & de Cyprez: & disent que celle de Pin & de Pesse sont liquides, & les appelloit-on anciennement Colophoniennes, à cause qu'on  
les

les apportoit de Colophon ville d'Asie la mineur : maintenāt ie ne sçay à quelle occasion, on à donné le nom de Colophoniēne , à la seule crasse & fondraille de la Terbentine distillée.

*De choix des Gommes.*

CHAP. XVIII.

**L'**Acacia, qu'on appelle autrement, Espine d'Egypte, produit vne Gomme, appelée communémēt gomme Arabique, ou Gomme simplement, la meilleure est celle qui est amassée à mode de vers, resplendissante comme verre, pure & nette: elle à vertu de refroidir; & resserrer.

Le Cancanum est la Larme d'un arbre Arabesque, on le nomme vulgairement Gummilacca : qui vouldra sçauoir les marques pour cognoistre le meilleur, qu'il les lise en Dioscoride lib.1. chap.23. *Dioscor.*

Le Camfre est la liqueur d'un arbre qui croist és Indes, rerirant à la Ferule: ceste liqueur a esté cognuë des Arabes seulement, & des Grecs modernes. Le meilleur Camfre est celuy qui mis au feu, ou au Soleil, prend vne couleur du

rouge tirant sur le blanc, qui est reluisant, & fraisle. Car vn tel Camfre est beaucoup meilleur, plus subtil & de plus de duree: on le peut aussi cognoistre s'il est bon ou non, le mettant dans vn pain tout chaud, car s'il est naturel il deuiendra moite, & s'il est brouillé, il se feichera. Celuy qui est gros, brun, ou noir, & qui est meslé avec plusieurs pieces de son bois, est le pire de tous. Aucuns tiennent, que le Camfre se peut bié garder iusques à quarâte ans, pourueu qu'on le tienne dans vn pot d'yuoire, avec seméce de Psyllium, ou de Lin.

La gomme quel'Oliuier Ethiopique produit (qu'on appelle par vn nom corrompu Gummi Elemni) est estimee bõne, quand elle retire à la Scammonee, & est rousse, consistant en petites gouttes, & mordante. Celle qui retire à l'Armoniac, ou à la gomme Arabique en couleur, estant noirastré, & sans aucune mordacité, est de nulle estime. Celle qu'on montre és boutiques, à de premiere arriuee la couleur, la consistence, & l'odeur de la resine de Pesse ou du Pin, que nous appellons de Bourgongne, mais apres elle se trouue plus forte & facheuse à plusieurs.

La gomme du Geneure, est vulgairement appelée Vernix, à cause qu'elle sort & est produite au Primptéps, & lors aussi on la recueilleit. La meilleure est celle qui est recente, resplendissante & passe : quand elle enuieillit elle iaunit aussi, & deuient fraisle, comme le Mastic, auquel elle ressemble en toute son essence. Elle est plus en vsage entre les escripuains & peintres, que non pas entre les medecins, si ce n'est és parfums; mais pour en dire mon aduis ie ne sçay à quelle raison on s'en sert ainsi és parfums, veu que & ceste gomme & l'encens, appelantissent la teste, & la remplissent d'une vapeur grosse & chaude.

La Myrrhe est la liqueur d'un arbre *Dioscor.* Arabesque. La meilleure est celle qui est fraische, qui n'est ny chassie ny moisie, legere : estant toute d'une couleur, & qui quand on la rompt, monstre certaines veines blanches, semblables aux ongles & lissees, qui est amassée en petits grains, amere au goust, acre & odoriférante. Celle qu'on appelle Trogloditique, pour raison de la region d'Affrique où elle croist, est la plus singuliere, & est verdoyante, clere & transparente,

mordante au goust, de bonne odeur, & si n'est point embrouillée ny sophistiquée avec quelque autre liqueur. Celle qui est menue & qui s'amollit en la maniant comme le Bdellium, tient le second rang, toutesfois elle a son odeur un peu plus forte que la première, & croist à l'abry du Soleil. Il ne faut tenir aucun conte de celle qui est noire, ou de couleur de Poix, estant pesante, sèche, & ayant perdu sa force pour estre trop meure: mais la pire de toutes est celle qui n'est aucunement huileuse, estant toute chancie & moisie, aigue au goust, & retire de forme & de vertu à la gomme. Aussi la sophistique on avec Gomme trépee en infusion de Myrrhe. Car la vraye est fort mal-aisée à recouvrer, principalement toute pure. Parmy la vraye Myrrhe aussi se trouue l'Opocalpasum, qui est bien diuers & autre que la Myrrhe, comme nous auons amplement enseigné en nostre liure des simples, parquoy tant à cause de ce, que pour autres causes, l'usage d'une telle myrrhe sophistiquée, est fort d'agereux és compositions qui se prennent dans le corps.

La myrrhe Staeté se fait de la myrrhe  
recen

recente, grasse, & qui croist en bon lieu, destrempee en vn biē peu d'eau, & mise au pressoir: vne telle myrrhe est de couleur passe, amere sur toute autre, fort odorante & bien chere: elle fait grande operation en bien petite quantité, aussi se recouure elle plus difficilement que la myrrhe. Il est biē vray, que si ce qu'on appelle Storax liquide, estoit le vray, que ce seroit la myrrhe Staeté: mais la mauuaise & fascheuse odeur que le Storax liquide commun a, descouure assez que c'est vne autre chose que myrrhe. Le marc qui demeure apres auoir pressé la myrrhe, pour en tirer la myrrhe Staeté, est ce qu'on dit communément Styrax rouge.

Le Bdellium est la gomme d'un arbre Sarrafinesque, ou comme dit Hermodolus d'un arbre qui croist en Sembrache. Le meilleur est celuy qui est net de toutes escorces, bois, & autres immondices, estant cler & transparēt comme de colle de Taureau, & qui bruslé rend vne odeur semblable à l'Vnguis odoratus: ayant vn goust amer, eētāt gras au dedans, & aisē à molifier si on le manie. Celuy qui vient de Scithie est plus noir, plus resineux, & plus remolitif.

Celuy qui vient d'Arabie, est resineux, terny, luisant, plus delicatif, hors mis quand il est recent & humide: si on le pile, il s'amollit aiseement. Le Bdellium Indique est fort sale, noir, amassé en grollettes pieces: On le sophistique avec Gomme, mais la tromperie se cognoist, à ce qu'il n'est pas lors si amer, & si n'a pas vne telle odeur quand on le brulle.

Du Storax, qui est la gomme d'un arbre qui croist en Syrie, le meilleur est ce luy qui est roux, gras, resineux: qui à ses grumeaux blanchastres, estant fort acre & amer au goust, & qui garde long temps son odeur, & si on le molifie, il rend vne liqueur semblable au miel. Celuy qui est noir, sablonneux, fraisle, & qui s'esmie aiseement, estant chancy & moisi, est le pire de tous. On le peut sophistiquer en deux façons, dit Dioscoride, mais la piperie se descouvrira par ses marques. Le Storax estoit fort cher & bien rare du temps de Galien, & l'apportoient on de Pamphylic dans des Canes, & croy que de là est venu, que iusques au iourd'huy le Storax a esté sur nommé Calamite, encores que le nostre soit tout autre que celuy que les anciens

ciens appelloyēt ainsi. Mais il faut tousiours choisir le plus chaud, & celuy qui est le plus puissant & en odeur & en saveur. Des autres deux especes qu'on suppose pour Storax, nous en auôs parlé traitans de la myrrhe.

La Sarcocolla est la Gomme d'un arbre croissant en Perse : elle ressemble à la Manne d'Encens, estant rousse, emplastique, aucunement amere, & qui desseiche sans aucune mordacité, dit Mesues. Dauantage la iaune est plus efficace que la blanche, & tant plus elle est amere, tant meilleure elle est. On la falsifie y adioustant de la Gomme: quand elle est en poudre, il est fort à craindre qu'elle ne soit sophistiquée : Car la vraye se recouure mal aiseement.

L'Ambre (qu'on appelle en Grec Eletrum, & en Latin Succinum) est la gomme d'un arbre retirant au Pin, ou des especes de Pin, laquelle est produicte en Automne: elle croist en abondance en la Germanie Septentrionale, & es isles de la mer Germanique, & de là on l'apporte: si on la brusle, elle a l'odeur de la Resine de Pin. On l'appelle vulgairement, Ambra, ou Charabé: les medecins ne s'en seruent pas beaucoup.



Mais l'Ambre gris, qu'on nomme Ambar, ou Ambarum, ou Ambra, selon les Arabes & Grecs modernes, est vne forte de senteur, de couleur cendree: celuy d'Arabie est blanchastre: celuy d'Inde est rous, gras & odorât, Hermolaus l'appelle Succinum Oriental. Le noir est le moindre de tous.

*Diſco.*

L'Encens est la gomme d'un arbre Arabesque: celuy qui est plus gras & plus blanc, est emplastique: & le plus iaune & qui est le plus sec, est enuieilly. L'Encés qu'on appelle femelle, est plus resineux, & plus mol, & bruslé incontinent qu'on le met au feu, mais le masle est blanchastre du commencement, mais il se iaunit par apres & deuient rous, il est clair & luisant, mesmemét s'il retient la forme des gouttes. On le falsifie avec gomme & Resine de Pin, mais la piperie se decouure au feu, car l'encens bruslé iette incontinent flamme, & la gomme n'en iette point, & la Resine ne fait que fumer.

Ce que les Grecs appellent Manne ou Malne d'Encens, n'est autre chose que la poudre ou l'encés qui s'est esmié dans les balles, ayant quelques esclats de l'es-corce de l'arbre parmy.

La Gomme Draganti est estimee bõ-  
ne, quand elle est blanche, clere gresle,  
lissee, pure, & douceastre: mise sous la  
langue, elle deuient gluante, & demeu-  
re longuement ainsi, sans se resoudre.  
Mais celle qui est enuieillie, se passit pre-  
mierement, apres elle roussit, & par trait  
de temps deuient iaune: ce qui est com-  
mun presque à toutes gommcs. Dauan-  
tage, la gomme Draganti deuient amere  
auec le temps, & par consequent plus  
chaude, comme font toutes choses dou-  
ces. Et voila d'ou vient, que commune-  
ment en la composition d'Aurea Alexã-  
drina, & en l'antidote d'Adrianus, & en  
la composition de Diacurcuma maior,  
& en plusieurs autres cõpositions, prin-  
cipalement en celles qui sont chaudes,  
apres estre fermentees (qu'on appelle)  
à sçauoir apres demy an, on met la gom-  
me Draganti iaune: mais es autres com-  
positions froides ou temperees, on y  
met celle qui est blanche ou passe.

*Des choix des Simples metalliques &  
terrestres.*

C H A P. XIX.

**L'**Or & l'argent s'espreuuet à la pier-  
re de touche, à laquelle ils laissent

leur naïfue couleur, à ſçauoir l'or la couleur iaune, & l'argent la blâche. Les orfeures ont d'autres moyens pour les eſprouuer, à ſçauoir le feu & autres.

Entre les Litarges, celle qu'on appelle Litarge d'or eſt la meilleure, meſmemēt quand elle eſt en fueille, ayant la couleur d'or, elle ſe fond cōme la cire, mais non pas ſi ſoudain, comme tu pourras voir par ce que nous en dirons au ſecond liure, quand nous parlerons de la façon de fondre & liquetier, elle ne ſert que de matiere és emplâſtres: le vray moyen de la garder, eſt de la tenir en pots de verre, de Plomb, ou d'Eſtain, car elle ronge toutes autres matieres, & les fait couler, dit Dioſcoride. La Litarge d'argent ou de plomb, n'eſt pas ſi bōne. Or la Litarge n'eſt autre choſe que l'eſcume que ces metaux rendent, quand on les fait bouillir.

L'Aſſenic, ou Orpin eſt eſtimé bon, quand il eſt de couleur d'or, & n'a point d'autre matiere meſlee parmy, eſtant croſtueux, & qui ſe fend comme par eſcailles. Il y en a vn autre qui eſt fait à mode de Gland, eſtant iaunaſtre & de couleur de Sandaraca, & l'vn & l'autre ſont cauſtiques, c'eſt à dire ont vertu de  
bruſler

brusler. Il vient de Ponte & Capadoce, & le treuve on és mesmes mines que la Sandaracha.

Le Sandaracha est vn mineral, qui est fort semblable à l'Arsenic, venans en mesme lieu, est estans de mesme nature : de sorte que l'Arsenic, estant bruslé se conuertit en Sandaracha, à cause de quoy aucuns appellent la Sandaracha, Orpin rouge. Le meilleur Sandaracha est celle qui est rousse & de haute couleur, ayant la couleur rouge comme le Cinnabre, & sentant le souffre, estant fraisle, & sans point d'autre matiere parmy, elle est aussi bruslante. Prends toy donc bien garde, que desormais tu ne mettes la Gomme de Geneure pour la Sandaracha, és compositions des auteurs Grecs.

Le meilleur Erain bruslé, est celuy qui est rouge, & qui prend la couleur du Cinnabre, quand on le broye: que s'il est noir estant broyé, il est par trop bruslé.

L'escaille de Bronze est estimee bonne, quád elle est grosse, & rousse: & principalement si elle s'enrouille quand on l'arrouse de vinaigre.

La fleur de Bronze se fait, quand on arrouse d'eau la Bronze fondue, car lors elle

elle crache & iette ceste fleur, elle ressemble fort au Millet & en nombre, & en sa forme: la meilleur est celle qui est courte, pesante, & quelque peu luisante, & qui deuiant rousse quād on la broye: estāt aussi fraisle. On la sophistique avec escaille de Bronze, ou limure de Bronze: mais la tromperie est aisée à descouurir, car la limure de Bronze s'escache & s'applatit, si on le met entre les dents, & qu'on la morde.

Le Diphryges à prins son nom, de ce qu'il est comme deux fois bruslé, ce n'est autre chose que le marc & la lie de Bronze, laquelle se treuve au fond de la fournaise, apres en auoir osté le Bronze: il est acre comme l'Erain bruslé, le meilleur est celuy qui a le goust de Bronze, ou de vert de gris, qui est astringent, & qui desseiche fort la langue. Ce qui ne se trouuera pas en l'Ocre bruslee, laquelle on vend en lieu de Diphryges: car on le falsifie avec Ocre bruslee.

On appelle Scoria, la Crasse & ordure de tous les Metaux. La meilleure Scoria de Plomb, ou Litarge de Plomb, est celle qui est massiue, difficile à rompre: restant entierement à la Ceruse, & ne tenant rien du Plomb: qui aussi est de couleur

leur iaunastre & luisante comme verre.

Le verd de gris est l'enrouilleure de Bronze, il est acré & mordant, & si est bruslât. Guidon & plusieurs autres ignorans, l'appellent fleur de Bronze, mais ils se trompent. Le verd de gris qui est pur, se deffaiët si on le manie seulemēt, & s'applatit si on le met sous la dēt, il est lissé & poly, & n'a aucune aspreté. Apres le mineral on faiët estat de celuy qu'on racle, duquel seul nous vsons aujour-d'huy.

Le Sory, le Chalcytis, le Misy, & le Vitriol (quis'engendre de l'eau qui passe à trauers des trois premiers estat sechee) sont fort acrés, & bruslent de sorte qu'ils font venir des croustes.

Le Sori se treuue le plus bas en la mine, aussi est-il le plus gros, qui retire le plus à la pierre, & qui est le plus massif: il ne se fond point, & ne se rend point liquide: si on l'esmie, il se rencontre noir comme la Melanteria, & luisant comme le Misy, estant trouë, grasset, & astringent, & si a vne odeur & vn goust fort fâsch:ux.

Le Misy est le plus haut en la mine, il est grumeleux & composé de plusieurs pieces, & si est plus dur: il ressemble à  
l'or,

l'or, & si on le rompt, il se trouue de couleur d'or, & resplendissant comme vne Estoille: il est fort mal aisé à fondre. Celuy de Chipres est le meilleur és médicaments qu'on fait pour les yeux, mais pour les autres remedes, celuy d'Egypte est plus efficace Diosc.

La Chalcitis se trouue en la mine, entre les deux autres, aussi a elle sa nature moyenne entre les deux, elle retire au Bronze, & est fraisle, non pierreuse, ny enuieillie, & à certaines veines longues & resplendissantes à trauers, elle est fort aisee à fondre.

Du Vitriol, le meilleur est celuy qui est mol, amassé, pesant, pers, luisant: le Stillatique (c'est à dire degouttant) est meilleur que non pas celuy qu'on appelle congelé, ny que celuy qu'on dict Vitriol cuit.

La meilleur Melanteria, est celle qui a la couleur de souffre, estant lissée, nette, vnie. & qui noircit incontinent qu'elle sent l'eau, elle est aussi brulante que le Misy. Diosc.

De la Tutie ou Calamine qui se faict és fourneaux, la meilleure est celle qu'on appelle Botricys, c'est à dire faicte en grappe, laquelle se trouue attachée

au plus haut des voutes, des fournaïses: estât massiue, moyënemët pesante, tirât plus à legereté qu'à pesanteur, ayant la couleur de Spodium, estât rompue, elle est cendree, tirant sur le verd de gris.

Le Calamine en pierre est vulgairement appellee, Pierre calaminaire, de la poudre de laquelle se seruent auourd'huy ceux qui trauaillët en bröze, pour faire prédre couleur passe au bröze, rouge, voire meême pour l'augmenter. Ceste pierre à vne estrange saueur, si on la gousté. Dauätage estant puluerisee, incorporee en vinaigre, elle se seiche & espessit au Soleil. Item si on la met au feu, elle ne se bouge, & iette vne certaine fumee quelquesfois iaune, & quelquesfois de couleur de bronze: toutes lesquelles marques, ne se trouueront point en certaines pierres qu'on trouue és mines, lesquelles aucuns supposent fausement au lieu de Calamine. Diosc.

Quand donc les forgerons, pour affiner leur bronze, mettent à force Calamine dessus, les subtiles fanfreluches & estincelles qui s'attachent à la voute de la fournaïse, se conuertissent en ce qu'on dit Pompholix ou Tutie bläche, & ce qui s'attache aux murailles aussi:  
mais



mais le Spodium, a cause qu'il est plus pesant que non pas la Pompholix, il retombe sur le pavé de la fournaise : nous auons grande abondance de l'un & de l'autre, par le moyen des fournaises de brôze qui sont en ceste ville de Paris en la rue saint Martin, pres la maison de feu de bonne memoire monsieur Budee.

On faisoit anciennement estat de la Ceruse de Rhodes, de celle de Corinte, & de celle qu'on faisoit à Puzoli en Italie: elle estoit aussi plus blanche, plus legere, & de plus subtiles parties que les autres, on l'estimoit beaucoup, pour composer les emplastres blancs.

Le souffre vis est le meilleur principalement quand il est luisant comme les vers luisans la nuit, ou resplendissant comme l'esclair, & qu'il n'est point pierreux : mais le Souffre qui a passé par le feu, est dit estre bon, quand il est verd & gras, car tant plus il sera verd, huileux, & gras, tant meilleur il sera.

Entre les especes d'Alun, celui qu'on appelle fraille ou scissile, & vulgairement alun de plume ( lequel se departit non pas seulement en filamens, mais si seulement ou le frotte avec les doigts,

il s'esmie) est de plus subtile substance que tous les autres, aussi est il plus precieux: il nage sur l'eau si on le met dedans, il pique la langue & la peau, encores qu'elle ne soit point entamee, & si se fond au feu, comme les autres especes d'alun: & par ces trois marques on le peut discerner d'auec la pierre Amianthus laquelle on à de coustume de mettre, au lieu de l'alun fraille. L'alun surnommé liquide à sa substance fort grosse, aussi n'est il pas de grand pris, car on le recouure facilement en tous lieux, il a la forme d'une crouste ou d'une brique. Je croy qu'on l'appelle liquide, à cause qu'il est fort aisé à fondre. Quand à l'alun rond, & qui est fait à la forme de l'os de la cheuille du pied, il tient comme le milieu entre les deux autres. Le Gy ou Plastre en le cuisant (comme aussi la chaus qui se fond faisant brusler les pierres) se rend emplastique: mais s'il est derechef bruslé (côme quād on le met en vn fourneau pour iondre & faire tenir les pierres) ou si on le calcine, il n'est pas apres si emplastique.

On ne treuve plus la Spuma Nitri, Aphronitrum, ni le Nitrom auec: & le

ne trouue pas bon qu'on mette le Salpetre, en leur lieu,és compositions: & vaudroit beaucoup mieux, y mettre ce Nitre blanc, qu'on m'a apporté du terroir de Nauarre, qui est bien peu salé.

Le meilleur Nitre est celuy qui est blanc incarnat, luisant, qui estant rompu se rompt en escailles & lames: estant fraille: spongieux & troué, leger, salé, mordant au goust: le natutel est meilleur que l'artificiel.

Le Sel mineral, est estimé du vulgaire estre le Sel Gemmé: mais Mesué met en premier reng de force, le Sel Naphtique, & apres celuy, le Sel Gemmé, mettant en troisieme lieu le Sel mineral: le moindre de tous est le Sel marin.

Le Sel armeniac (qui semble estre ce que Galien & Dioscoride appellent Sel Ammoniac) est aucunement acré, & fort leger.

*Dioscor.* Le Stibium, vulgairement appelé Antimoine, est estimé bon, quand il est fort luisant, & qui resplendit comme les vers luisans de nuit: qui aussi est crousteux quand on le rompt: n'ayant point de terre ni d'ordure meslée par-mi: & qui se rompt aisement.

*Dioscor.* Le Borrax ou Chrysocolle d'Arménie est

nie est le meilleur, qui est verd comme vn Pourreau: estant net & sans aucune ordure, & aisé à csmier.

Le Lapis lazuli, est vne Pierre que quand on la rompt, à des marqueturés en forme d'Estoiles, qui sont de couleur d'or: & à cause de ce Mesues l'appelle lapis stellatus: estant brulé il deuyent plus bleu: le meilleur est celuy qui est le plus chargé de la couleur, de laquelle il à pris le nom, selon Dioscoride: mais Mesues dit que c'est le plus verd, & bleu, qui est marqueté de taches dorees, estant pesant, & qui ne tiét rien du metal.

Quant à la Pierre Armenienne, la meilleure est celle qui est polyé & lissée, n'estant chargée de sable ni de pierre, de couleur celèste, fraille, selon Dioscoride: ayât la couleur verde brune, obscure, & inde ou ternie, marquetée de taches verdes & noires doux au manier & nō pas rude ou aspre, & qui n'est pas parfaitement pierre, mais qui se met aisement en poudre, & s'csmie fort facilement: Mesues.

La meilleur Ochre est legere, & entierement laune: estant fraile, & non pierreuse: Elle se brasse & se lau pour

ainsi que la Calamine.

Les Grecs n'auoyent pas accoustumé de mettre en vsage, ou bien peu souvent, les pierres.

Galié estimoit que le seul Iaspe verd estoit propre en Medecine: mais Dioscoride dict que tout Iaspe y peut seruir.

Les Arabes mettent en aucunes de leurs cōpositions cordiales, les Saphirs, les Iacintes, Grenats, Sardoines, Perles, & en font grād estat: Albert le grād, Serapio, & plusieurs autres, en ont fait de grans discours, mais si tout ce qu'ils en ont dict est vray ou nō, ie m'en rapporte.

*Dioscorid.* La bonne Ematite est fraille, & fort noire: estant dure, & naturellement vnie & n'a ni crasse ni veines.

Le bon Aymant attire aisēmēt le fer, & est bleu, massif, sans estre trop pesant.

La bōne pierre Iudaïque, est formee comme si elle estoit faite au tour, ayant des lignes fort industrieusement comparties, estant tendre & fresse

Actuarius met le Corail au nombre des pierres, d'autres le nomment arbre conuertý en pierre: Dioscoride en met de deux sortes, à sçauoir de rouge & de noir: mais nous en auons aussi de blác, & d'au

& d'autre couleur: l'é ay autresfois veu, qui estoit blanc au dehors, & rouge au dedans.

Le Boli Armeni de Leuant, ou autrement Terra Lemnia, est mise en 'petis Trochisques, marquez du seau du grád Turc: il à la couleur tãtost passe, tantost rouille: & si à quelque astrictiõ au goust.

Le Boli Armeni commun est de couleur d'Ochoe, à sçauoir passe ou iaune, & si est fort aisé à reduire en poudre tresdeliée, comme la chaux, soit qu'on le pile, ou qu'õ le mouille avec quelque liqueur que ce soit: & si n'est point meslé de Pierres ou de Sable. On sophistique auourd'huy si subtilemēt & le Boli Armeni, & la Terra Lemnia, qu'il ne faut point prendre pour vrais sinon ceux desquels nous aurons tesmoignages par ceux mesmes qui les ont cueillis & amassez.

*Du chois des simples, prins des parties des animaux.*

C H A P. X X.

**I**L faut choisir le sang d'un Bouc de quatre ans, qui soit en bõ point ayant esté nourri quelque temps avec vin blanc, & avec herbes qui ayent faculté

de rompre le calcôl, comme avec Fenouil, Sefeli, & Laurier luy faut couper la gorge au mois d'Aouſt, & ne faut recueillir le premier ſang qui coulera, ni le dernier, mais celuy du milieu : car on eſtime que le premier eſt trop ſubtil, & le dernier trop gros: le ayant recueilli, il le faut mettre en vn pot de verre, le couvrir avec vn linge, & le faire ſeicher au Soleil.

Le ſang de Dragon des Anciens eſt auourd'huy incognu: celuy qn'on monſtre eſt artificiel, & eſt compoſé avec ſang de Bouc, boli Armeni commun, ius de Sorbes, & autres choſes.

Il faut choiſir le laiët de Vache, ou de Cheure ou d'Aneſſe, qui ſoit ieune, qui ait fait quelque exercice apres auoir fait ſes petis, bien nourrie & de viâdes & paſturages qui luy ſoyēt propres & conuenables. Ces animaux ont au printemps plus grande abondance de laiët, mais il eſt plus humide, & au contraire en autône ils en ont moins, mais il eſt plus ſec, & plus propre à garder longuement le beurre. Or le bõ laiët doit eſtre fort doux (entant que ſon naturel le porte) fort blanc, moyennement eſpes, ſi c'eſt laiët de vache: mais ſi c'eſt laiët d'An

d'Anesse ou de Cheure, il doit estre cler & subtil.

Mesues fait cas du petit laiët de Chieure ieune, noire, & nourrie de pasture salutaire, & qui n'a pas l'og temps qu'a fait ses petis : mettant en second rang celuy de brebis.

On choisit la gresse d'un animal citât en fleur d'age, & l'amasse-on en Autōne: & pour la garder, ou on la laue biē sans oster les pellicules, & la fait on seicher à l'ombre: ou bien on la nettie des pellicules, & la fait-on fondre au soleil, ou au feu, en double vaisseau. D'autres font rostir à la broche, l'animal duquel il veulent auoir la gresse, & recueillissent la gresse qui coule.

La Mouëlle veut estre recueillie comme gresse sur la fin de l'esté, ou au commencement de l'hiver, d'un animal estant en fleur d'age: & la faut serrer en lieu sec, haut, & qui regarde le septentrion: & sera bon de la mettre avec racilles de Laurier seiches, de peur qu'elle ne pourrisse ou moisisse. On vse aussi quelquesfois de la mouëlle des ieunes animaux.

On amasse aussi des ceruelles de Passerats, qu'on prend au printemps ou en



Autône, & les mesle-on vn iaune d'œuf & du miel, puis on les fait seicher au soleil, ou sur les cendres chaudes.

De la corne de Licorne, il faut tascher d'auoir la vraye.

La Mumie de Serapio, qui n'est autre chose que le Pissasphaltum de Dioscoride, c'est à dire de poix & de bitume meslez, se cognoit par les marques de la poix & du bitume. Quant à ce que nous tenons aujourd'huy pour Mumie, ce n'est rien autre chose que l'humeur qui decoule des corps morts qu'on auoit embaumez de Aloës & de Myrrhe, ou bien de Baume, quand on en peut recouurer car on nous apporte la chair seichee, avec les os aussi.

Il ne se faut gueres tourmenter pour la peau interieure du vëtricule des poules, veu que Galien assure qu'elle ne sert à rien.

Le foye de Loup, doit estre prins, s'il est possible, d'un Loup en fleur d'age, & en bon point, & plustost ieune que vieil: il est aussi beaucoup meilleur frez que sec: toutesfois si on le faict secher, il se pourra longuement garder, comme aussi le poulmon de Renard.

*Dioscor.* Les reins de Scincus (qui n'est autre chose

chose que le Crocodile terrestre<sup>1)</sup> doy-  
uent estre seichez pour les garder: il  
faut choisir ceux qui sont pleins & bien  
nourris, & nō pas ceux qui sont flâques.

Du Castorium, c'est à dire des Geni-  
toires du Castor, il faut prendre ceux  
qui sont comme beffons: ayans au de-  
dans vneliqueur retirant à cire qui est  
fraille, d'odeur fascheuse & puante, e-  
stant aiguë & mordante au goust: quel-  
ques vns l'estiment meilleure recente  
qu'enuieillie. Mais Auicenna afferme,  
que le Castorium qui est noir, puant  
& rance, peut tuer en vn iour vn hōme  
qui en auroit prins. Voila ce qu'il en dit  
parlant des venins.

L'œsopus, qui est le suyn qu'on tire de  
la laine ensuyce, doit estre gardé nette-  
ment, prins de laine des brebis bien sai-  
nes & nō point galeuses, ou rogneuses.  
Les'ourdaux le nommēt Hyssopus hu-  
mida. On n'a sçeu encores descouurir,  
que le est la source & origine de l'Am-  
bre gris: toutesfois le meilleur est ce-  
luy qui est rare & spongieux, leger, reti-  
rāt au Rhabarbe: mais celuy qui est plus  
brun, & quelquesfois cendré, ou blanc,  
est en grand pris à cause de son odeur:  
mais le noir est à mespriser, car on tiēt

qu'un renard l'auoit auallé, & la reuomi.

Le Musc qui est iaunatre, est meilleur que celuy qui tire sur le noir: & celuy qui estant mis en vn bassin mouillé deuiant leger, est meilleur que celuy qui deuiant pesant, toutesfois on apporte aujourd'huy de Musc de Catai, qui encores qu'il soit noir, ne laisse pas d'estre excellēment bō. Celuy que nous auons, est pour la pluspart de couleur de rouille de fer, & nō pas citrin, cōme Auicenne dit qu'il doit estre, & le nōme Musc Alexandrin, il retire quant à l'odeur au Ben ioin, plus forte neātmoins, & outre l'autre bonne odeur qu'il a, il est en petites pieces: il se garde beaucoup mieux en boites de plomb, bouchées de cire, tout seul, que ailleurs: que s'il aduient qu'il ait perdu son odeur, il le faudra mettre en vn pot de verre tout ouuert, & le pendre dans les priuez, car par ce moyen il recouurera son odeur, si ce q̄ Platearius dit est vray.

*Dioscor.* Les Cantarides qui se trouuent dās les fromens, sont les meilleures, celles aussi qui sont de diuerses couleurs, & qui ont des rayes iaunes au trauers de leurs ailles: ayans le corps long, gros & nourry. Celles qui sont d'une couleur  
ne

ne seruent à rien. Il les faut amasser au printemps, & les garder dans vne phiole: quant au moyen de les faire mourir, Dioscoride l'enseigne.

Si on veut auoir vn coq, le ius du- *Mesua.*  
quel soir laxatif, il le faut choisir roux, fort vieil, qui soit toutesfois encores hardy à marcher, à combattre, & à courir les poules: puissant au combat, ny trop gras ny trop maigre, c'est à dire bié charnu, qui voudra sçauoir comme il le faut preparer, qu'il lise Mesues.

L'Vnguis Odoratus, que Actuarius appelle Blatus Bizantis, & le commun Blata Bizantia, est la couerture d'vn poisson avec coquille, laquelle red vne odeur semblable à l'odeur du Castoreû: on en vse és parfums, car ceste coquille se fond incontinent au feu, comme feroit le Bitume, aussi red-elle vne odeur qui ressemble fort à celle du Bitume: aucuns prisent sur toutes celles qui sont blanchastres, & de bonne odeur.

Les perles, lesquelles on prend d'vne certaine espee de coquilles, doyuent estre grosses, entieres & non pertuisees. Quelques vns estiment plus celles qui sont naturellement pertuisees, pource disent ils, qu'elles sont purgees de leurs  
super

superfluités par ces peruis.

Nous auons amplemant enseigné, au 4. liure de nostre Methode, parlans de la composition de la Theriaque, comme il faut choisir les Viperes.

*Des simples ausquels, il faut regarder de pres quand on les choisit.*

#### C H A P. X X I.

ENTRE les simples susmentionnez il y en a d'Aromatiques, comme sont l'Amomum, le Cinamome, la Canelle, le Calamus aromatique, le Nardus Gaulois & Indique, les patties du Baume, le Saffran, le Folium, la fueille du Malobathrum, le Ladanum, l'Aspalatus, le bois d'Aloës, le Macer: & des nouueaux, l'Ambre, le Musc, l'vnguis odoratus, le Camfre, les Cubebes, le Dorocnicū, la Galāga, les Gyrosses, le Macis, la noix muscade les trois especes de Sātal, la corne de Licorne, & la Zedoaria: entre ceux cy, ceux qui ont la meilleur odeur en leur espece, sont aussi les plus estimez: Mais si tu veux experimenter par le goust quels sont les meilleurs, il te faut prendre garde, que tu n'en goustes de plusieurs tout à la fois, mais ayāt gousté de l'vn, il te faudra lauer la bouche, ou macher

cher vn peu de papier, ou bien attédre d'en taster d'vn autre, iusques à ce que le goust, du premier soit passé, car autrement il y a danger que le goust du premier, qui demeure encor, à la bouche, ne te fasse faillir au iugemēt du secōd. Dauantage d'autant que les choses aromatiques sont de substance subtile, elles s'esuanouissent bien tost, mesme-ment en l'air chaud, & qu'elles sont ou mal serrees & couuertes, ou qu'elles sont desia menuisees, parquoy il les faudra mettre en vsage, lors qu'elles sont en leur vertu, & non pas attendre qu'elles soyent vermolues, pertuisees, desia passees, & ayant perdu leur vertu, ou comme à demi mortes.

Il y en a aussi des autres que nous disons laxatifs, comme sont l'Agaric, la Coloquinte, le Cocombre sauvage, les deux especes d'Elebore, les Titimales, la Laureole, l'Opopanax, le Polipode, le Sagapenum, la Sarcocolla, la Serpentine, la Scammonee, l'Euphorbe, la Cassie laxative, les cinq especes de Myrabolās l'Hermodacte, le Lapis Lazuli, & la pierre Armenienne, la Māne, le Rhabarbe, les Tamarins, le Turbith, le Sené, & quelques autres descrits par Mesues  
& par

& par les autres auteurs.

En ceux ci il faut estre fort fongueux & diligens quand on les choisit, & les bien ferrer & garder: & ceux qui ont quelque mal lignité, il les faut corriger comme il sera monstré au liure suuant.

*De la sophistication des simples, & de ceux qui ont mesme denomination.*

C H A P. X X i j.

**Q**uant à la sophistication des simples, d'autant qu'elle sert pour bien choisir les bons, nous l'auons inserée en ce liure, mettant à chacun simple la façon de le sophistiquer, afin que les lecteurs n'eussent pas la peine de les aller chercher plus loin: toutesfois nous en auons traité en brief, pour les raisons que nous auons alleguées, au troisieme liure de nostre Methode de composer les medicamens, que si tu desires d'auoir quelques marques d'auantage pour cognoître les simples sophistiguez tu les pourras prendre là.

Il reste seulement que nous traictiōs encores en liure, des medicamens qui ont mesme des madicamens qui ont mesme denomination: & de ceux qu'on  
peut

peut substituer pour des autres, appelez des Grecs *Antiballomena*: d'autant que la cognoissance des vns & des autres, me semble fort necessaire pour bien choisir les simples: puis nous viendrons au second liure, auquel nous discourrons seulement la diuerse façon & maniere de preparer les simples, laquelle est non seulement vtile, mais aussi du tout necessaire, pour faire, les compositions.

Quand donc nous, trouuerôs le nom d'un simple mis absolument, lequel ne antmoins se peut rapporter à plusieurs: il faut premierement, considerer, quel est le plus efficace de tous ceux qui portent ce nô: ou bien quel est le plus propre & cōuenable, à la composition que nous voulons faire: cōme pour exēpie, l'Ammi, l'Anis, l'Anet, l'Ache, le Carthamus, le Cumin, la Nigella, le Leuesque, le Creonainois, le Piyllium ou herbe à paces, le Sefeli, le Staphis agria, sont plus efficacee en leur semence, qu'en leurs autres parties. Parquoy quand nous trouuerons es compositions, l'Ache, l'Ammi, l'Anis, ou l'Anet, mis absolument, il faudra prendre leurs semences: & dauantage, il faudra prendre



dre l'Anis de Candie , & l'Ammi Illirique, comme estans les meilleurs.

De l'Aloës il faudra choisir le meilleur, comme est selō Galien l'Indique: & selon Mesuë le Succotrin.

Du vin aigre, faut choisir celuy qu'ō fait avec vin: Car on en faiēt aussi avec eau miel , ceruoise , & autres choses, mais il n'est pas de telle vertu,

De l'Agaric, il faut choisir celuy qui est blanc , & prendre le femelle , ayant toutes les marques de bonté que nous luy auons attribuees ci-deuant : & faut faire de mesme és autres simples.

De l'Agnus Castus, qu'on appelle , il faut prédre la fleur, ou bien la semēce.

De l'Alun, le fraisle ou scissile , car c'est le plus exquis.

De l'Aristolochia ou Sarrasine , la ronde est la meilleure: vray est qu'ez onguens la Clemarite est plus propre.

L'Ammomum, de Scythie , ayant esgard aux marques que les autheurs luy attribuent.

Du Baume, faut prendre sa liqueur.

De la Bryonia, la blanche est plus efficace que la noire.

De la Buglosse, faut prendre la fueilie & les fleurs.

La Case que les auteurs Grecs appellent Cassia, est nostre Canelle commune, laquelle les auteurs Arabes nomment Cassia lignea, Mais quand ils mettent Cassia fistula, il faut entendre la Case laxative.

Du Cardamomum, faut prendre le petit.

Des Cappres, l'escorce de la racine.

Du Coriandre & du Cumin, l'Éthiopique, & faut prendre la semence.

Du Centaurium, si c'est pour vn médicament laxatif, faut prédre le petit, mais si c'est pour vn autre medicamēt, il faut prendre le grand.

De la Calaminta, il faut choisir celle qui croist és montagnes, car elle est plus efficace que la domestique.

Quant au Costus, veu qu'il n'y en a qu'une espece, il n'y a point de difficulté, vray est qu'il faut prendre la racine: Touchant le Costus doux des Arabes, on ne sçait que c'est.

Du Cyprez, il faut prendre ses noix, & encores choisir les plus recentes.

Du Cinnamome il faut tousiours prédre le meilleur: on le pourra cognoistre par les marques que nous auons donné cy deuant.

Du Daucus il faut prendre le sauvage: car le domestique n'est autre chose que la Pastenaille, laquelle sert plustost de viande que de medicament.

De l'Elebore, le blanc selon Galien:& le noir selon l'aduis de Mesué.

De la Roquette, la sauvage est la plus efficace.

De l'Epithymum, il faut mettre celuy des Grecs en leurs compositions, & celuy des Arabes aussi en leurs compositions.

Du fenoil; il faut prendre la semence: il est vray qu'es colyres il faut mettre le suc des feuilles ou des racines.

Des noix de Galle, il faut choisir les solides, car elles sont plus efficaces que les pertuisees.

Des Grenades, les aigres.

De la Gomme, l'Arabique: car c'est la plus parfaite de toutes.

Par la Colle absolument mise, les vns entendent la Colle de poisson: les autres la Colle forte, ou Colle de Taureau: & les autres entendent le Mastic.

L'Hysope de montagne, est meilleur que celuy des iardins. Au reste Dioscoride fait cas de celuy qui croist en Cilicie, & d'autres de celuy de Candie.

Du

Du Iusquiamo, le blanc, c'est à dire ayant blanche semence, laquelle il faut prendre.

Du Glaycul, il faut prendre la racine de celuy qui croist en Sclauonnie, selon le dire des Grecs, mais, les modernes prennent celuy de Florence.

Des Lupins, il faut prédre les amers, car le doux sert de viande.

Du Laurier, faut prendre les fueilles.

Du Ligusticum, la semence.

De la Laiétue, la semence. Il est vray que quand il est parlé de la maniere de viure, qu'il faut entendre les fueilles.

Du Lapathum ou Parelle, la pointue est plus efficace que la ronde.

De la Litharge, il faut prendre celle d'or: vray est que bien souuent elle est specifiee.

• Du Mastie, celuy de Chio: ou selon d'autres celuy d'Egypte.

Du Marrube, le blanc est meilleur que le noir.

Du Miel, celuy des mouches: car il y en a vn autre, qu'on dict Miel de l'air, ou Manne.

Des Perles, celles qui sont solides sont meilleures que les pertuisees, sinon que elles soyent aussi iaunes & obscures: car

estans telles elles ne doyuent rien aux entieres & solides.

De la mouëlle, celle du cerf si on veut faire vne composition puissante: mais si on veut faire vne composition qui ne soit pas si forte , il faudra mettre la mouëlle de veau.

Quand on trouue Nucleus és compositions mis simplement, aucuns veulent qu'on entende les noyaux de Pin , d'autres ceux d'oline, & Auicéna veut qu'on entende les noyaux de Dattes.

Et quand on trouue Noix simplement, il faut entendre les noix cômunes, c'est à dire les noix de noyer.

Par Nasturtium, la semence d'iceluy.

De l'huile celuy d'oliue, c'est à dire qui est tiré des oliues.

Du Basilic, selon les Arabes, le Basilic gentil.

Du Opium , celuy de Thebes: toutes-fois aujourd'huy ( comme i'entens ) on fait estat de celuy d'Apulee.

Du Petroselinum, celuy de Macedoine: mesmement celuy qu'on nomme Astreotique , à cause du lieu ou il croist fort bon, qui est vn lieu quasi inaccessible, & si faut prendre la semence.

Des Prunes, si nous voulons lascher  
le

le ventre, il faut prédre les douces, mais si nous voulons restreindre, il faudra prendre les brusques & astringentes.

Du Pauot, il faut prendre le blanc, à sçauoir sa semence.

Du poyure, le blanc, car il est plus acre & plus piquant que les autres.

De la poix, la liquide, quand on veut faire vn médicament suppuratif & deterfis; mais si on veut dessécher, cicatriser, ou consolider, il faudra prendre la Poix seiche.

De la Piuoine, il faudra prendre le masle à sçauoir sa racine ou sa seméece.

Du Polipode, celui qui croist és chesnes: d'autres prisent pl<sup>r</sup> celui des murs.

Du Polium, si c'est pour vne contrepoison, il faut prendre le petit, qu'on dit autrement Polium de Montagne: pour ce qu'il est plus acre & plus amer, parquoy il est aussi plus efficace.

On met pour les quatre herbes remolitives, la Malue, la Guymauue, la violette de Mars, & la Branca vrsina.

Les quatre semences froides, qu'on surnomme grandes, sont la semence de Melons, Cocombres, Courges, & Citrues.

Les quatre semences froides, surnom

mees petites, sont les semences de Lai-  
ëtue, Pourpier, Endiuie, & Cicoree.

Les quatre semences chaudes, surnõ-  
mees ürandes, sont les semences de Cu-  
min, de Cargi, d'Anis, & de Fenoil.

Les quatre semences chaudes, surnõ-  
mees petites, sont les semences d'Ache,  
de Daucus, d'Ammi, & d'Amomum.

Les cinq racines diuritiques, c'est à di-  
re prouoquans l'vrine, sont les racines  
d'Ache, de Persil, d'Asperges, de Gramen  
ou dent de Chien, & de Ruscus: ou bien  
du vray Apium & du Eleoselinum.

Pour la Resine mise absoluëment, il  
faudra mettre le Mastic, si nous voulons  
croire Galien: mais Dioscoride est d'ad-  
uis de mettre la Tormentine.

Pour la Ruë, les fueilles de la Ruë sau-  
uage: il est bien vray que les Grecs l'ex-  
priment le plus souuët, ou bien la nom-  
ment d'vn autre nom, à sçauoir Molybe-  
sasa, Harmola.

Pour le Reffort, la racine du Reffort  
sauuage.

Pour le Rosmarin, les fueilles ou la  
fleur.

Pour le Rhus, l'escorce du fruit, qu'on  
appelle communement Sumach.

Quand on trouue Stechas simplemët,  
il

il faut mettre la fleur de Stecas Arabique.

Du Stirax, il faut prendre le Calamite, si on le peut recouurer, à faute duquel il faudra choisir celuy qui est bien chaud & vertueux.

Des Santals, le iaune, à cause qu'il est plus odorant.

Pour le Spica, le Nard Indique.

Du souffre, il faut prédre le vif, & qui n'est point palseé par le feu.

De la Gomme Dragati, si c'est en vne composition froide, il faut prendre la blanche, mais si c'est pour vne composition chaude, il faudra mettre la rousse.

Les trois fleurs cordiales, sont les fleurs de violettes, & des deux buglosses.

Du Thym, il faut prendre celuy d'Athenes: ou bien du Thym qui croisse en lieu haut & sec.

Pour la Violette mise absolument, il faut mettre la noire ou purpurine, que on dit communemét Violette de Mars, ou de Carisme, & mesme toute recéte, si on la peut recouurer, à sçauoir les fauilles s'il est question de remolir: les fleurs si on veut conforter: & la semence si on veut purger.



Pour le Guy, celuy qui vient és chesnes, a sçauoir la semence quand il est frais, ou bien les summitez, ou ieunes tendrons, avec les fueilles & l'escorce.

Des Iuiubes, il faut choisir les plus fraisches & bien meures, ou pour le moins celles qui sont entieres, & non point pourries. ou trop seiches de vieillesse.

Bref il faut tousiours prendre ceux qui approchent les plus pres des marques de bonté que nous auons donné cy deuant á chascun, entre lesquelles il est bon d'auoir esgard, à la regiõ en laquelle le simple aura esté produit & nourry: Parquoy il sera bon de prendre l'Alun Milesien: l'Agaric de Ponte: le Castoreum de Ponte: le Misy de Chipres: le Nitre de Berecine: le Sinon de Syrie: le Cumin d'Espagne & d'Ethiopie: le Meu, d'Espagne & de Macedoine: la Sarrasine de Ponte, ou plustost celle de Candie: la Valerienne de Ponte: le Verd de gris, la Ceruse, le Bronze, l'escaille de Bronze, de Puzoli ville d'Italie: le Litar ge Romain, & le Sicilien aussi sont fort estimez: l'Anis, le Thim, le Daucus, la Mario'aine, la Regalisse, l'Oüigan, & le Dictam de Candie.

*Des Medicamens substituez, vulgairement  
appellez qui pro quo.*

C H A P. XXIII.

**Q**UANT aux medicamens substituez (qu'on appelle) c'est à dire, lesquels on peut mettre au lieu d'un autre qui defaut, il me semble que ceux cy sont les plus cōformes à raison: à sçavoir. Au defaut d'eau de pluye, qu'on mette l'eau de fontaine pure & nette.

Au defaut du vray Acacia, qu'on mette le suc & la chair des prunelles sauvages.

Au lieu de Cabaret, qu'on mette l'Acorus, ou le Carpesium.

Au lieu de l'Absinte, l'Auronne.

Au lieu de l'Espine Arabesque, ou autrement herbe d'Egypte ( que Serapio appelle Sucaha ) qu'on mette l'Espine blanche (que nous appellons) & que Serapio nomme Bedegar.

Au lieu de l'Alkekengi, la semence de Morelle ou Solanum.

Au lieu de Bitume, la poix liquide de Brutie.

Au lieu de la liqueur d'Olivier Ethio-pique, qu'on appelle Gummi elemij, qu'on mette la gomme d'Acacia, ou la

gomme Arabique.

Au lieu d'Anchusa, le Hyacinthus ou Vaciet.

Au lieu de l'Amidon, de la farine seiche.

Au lieu de l'Arsenic, la Sandaracha.

Au lieu d'Almendier amer, de l'A-laine.

Des Sarrafines, on pourra substituer l'une pour l'autre, de toutes les trois.

Au défaut de graisse de Renard, on peut mettre de celle d'Ours.

Au lieu de graisse de Cerf, qu'on mette de celle d'Oye.

Au lieu d'Alum, du Sel mineral.

Au lieu du Balaustium, l'escorce de Grenade.

Au lieu des cornets de Pourpre, qu'on mette la Coquille de quelque poisson bruslee.

Au lieu de la liqueur du Baume, la Myrrhe Sraeté, ou d'huile Camfié.

Au lieu du Cinnamome, on pourra substituer de la Canelle bien choisie, ou du Carpesium, ou d'Amomum, ou de la graine de Cardamomum, ou au double de Saunier.

Au lieu de la Canelle, le Cinnamome, encores qu'il soit du moindre, sinó qu'il  
fut

fut ordonné de mettre de la Canelle plus exquise, laquelle approche fort du Cinnamonome, on pourra aussi mettre le Nard d'Inde, ou la feuille du Malobathrun.

Au lieu de la fleur de Camomile, que on mette au double de ses feuilles & racines.

Au lieu du Costus, la moitié autant de Pyrethre, ou bien les fruits de Cedre, ou la racine de l'Aunee, ou de Glayeul.

Au lieu de la terre Cimolie, qu'on mette la crasse du fer & de la meule.

Au lieu de la Ceruse, le Spodium, ou la Pompholix ou Tutie.

Au lieu du Camfre, qui est incognu, & de mauvais goût & fâcheux, on pourra mettre les Santals blanc & rouge.

Au lieu du grand Cardamomum, le petit.

Au lieu du Calament, de quelque espèce que ce soit, on pourra mettre le Mentastre, ou le Poliot, car ils sont de même faculté, aussi les peut on substituer les uns pour les autres.

Au lieu du Safran, on pourra mettre le Crocomagma.

Au lieu du Souchet, le grâd Geneure.

Au

Au lieu du Cumin, la seméce de Ruë,  
ou d'Agnus Castus.

Au lieu de la Coloquinte, le Ricinus,  
ou Palma Christi.

Au lieu de l'escorce des racines de  
Cappres, qu'on mette l'escorce des raci-  
nes de Tamaris, ou bien de Bruyere.

Au lieu du Dictam, on peut mettre la  
sauge, ou l'herbe aux chats, ou le Pon-  
liot.

Au lieu du Doronicum, qu'on merte  
la moitié de Girofles.

Au lieu du Daucus, la Pastenaille.

Au lieu d'Elaterium, le suc de la fueil-  
le du cocombre sauvage.

Au lieu d'Ebene, le bois de Guaiac.

Au lieu de l'Eupatorium de Mesué,  
qu'on mette de Cabaret & d'Absinte de  
chascun la moitié.

Au lieu du Folium, qu'on mette la  
feuille de Gyrofle, ou le Nard d'Inde,  
ou la Canelle, ou le Macis.

Au lieu de la limaille de fer, qu'on  
mette l'escaille de fer.

Au lieu de la fiente de pigeons ramiers,  
la fiente des pigeons communs.

Au lieu du fiel de porc, le fiel de per-  
drix, ou de poisson.

Au lieu de la Gentienne, on pourra  
mettre

mettre de Cabaret & de racines de Capres de chacun la moitié.

Au lieu du suc de Regalisse, la poudre de la racine.

Au lieu du *Cranum gnidium*, la semence de la petite Catapuce.

Au lieu du *Galbanum*, le *Sagapenum*.

Au lieu de l'*Ammoniac*, le propolis ou cire vierge.

Au lieu des *Hermodactes*, la fucille d'*Anchusa* ou orcanette, & la moitié de *Bdellium*, quand c'est pour appliquer en dehors, sur les jointures qui font douleur.

Au lieu de la Gomme de Lierre, la gomme de Peschier.

Au lieu du Glayeul de Sclauonie, l'*Anneodorante*.

Au lieu de la Pierre d'Assô, l'*Agate*.

Au lieu de la pierre Phrigienne, l'Aimant, ou le *Marcaffis*.

Au lieu de la semence de *Libysticum*, la semence de *Daucus*.

Au lieu de la racine de l'herbe aux foulons, la racine d'*Elebore* noir.

Au lieu de *Lycium*, le suc de la racine du grand *Centaurium*.

Au lieu du Miel, le Sucre.

Au lieu du *Malobathrum* qu'on met-  
te la

te la Canelle, ou le Nard Indique.

Au lieu de la Myrrhis, ou Cicutaire, le Maceron.

Au lieu de la Myrrhe qui vient en la region des Troglodites, le Calamus aromatique.

Au lieu du Marrube, la Melisse,

Au lieu des Nesples à trois osselets, c'est à dire Azarolo, on peut mettre noz Nesples communes, qui ont cinq osselets dedans.

Au lieu de la semence de Cresson Ale nois, ses fueilles seiches.

Au lieu de la Noix muscate, la Spica nardi.

Au lieu du Nardus de Surie, le Ione odorant, ou sa fleur, dite Schoenanthum.

Au defaut d'Opoponax, on peut mettre l'Ammoniac, le Galbanum, le Sagapenum, ou le Bdelium.

Au lieu de l'Opium, le Meconium.

Au lieu du Basilic gentil, la Melisse, mesmement si c'est pour quelque maladie du cœur.

Au lieu de l'huile Laurin, l'huile de Cedre, ou l'huile de Palma Christi.

Au lieu de l'huile Omphacin, l'huile doux laué.

Au lieu de l'huile rosat, le Violar, ou l'huile d'Amandre.

Au lieu de l'huile de Palma Christi, l'huile de Reffort.

Au lieu de la liqueur du Baume, le ius de Carpasum, ou la Myrrhe Staeté.

Au lieu du Ris, la farine d'Orge.

Au lieu d'Oesipus, la mouëlle de Cerf.

Au lieu de Verius, le ius de Sumach, ou du vin brusé.

Au lieu du Poyure long, le Poyure blanc.

Au lieu du Poyure blanc, le meilleur Poyure noir, c'est à dire qui soit fort pesant.

Au lieu du Persil Macedonique, qui entre en la composition de la Theriaque, on peut mettre le Persil d'une autre region.

Au lieu de Pompholix ou Tutie, le Spodium ou l'Antispodium.

Au lieu de la Rouille, du Machefer, ou Merde à fer.

Au défaut de la semence du Reffort, on peut mettre son ius.

Au lieu des Roses, leurs fleurs.

Au défaut du Rhus des conroyeurs, le Rhus des cuisiniers.



Au defaut de Staphisagria, le Pyrethre.

Au defaut de l'herbe aux foulons, quand on veut faire esternuer: l'Elleboro blanc.

Au lieu de l'Espodium, quelque Antispodium ou la Pompholix ou Turie.

Au lieu du Stryax, le Castorium, hors mis quand la senteur est requise.

Au lieu du Sucre (qu'on dit autrement Sel d'Inde) le Sucre de Candi.

Au defaut du Sagapenum, on peut mettre l'Ammoniac.

Au lieu de l'Escume du Nitre, on peut mettre le Nitre, ou l'Afronitre, mais que ce ne soit pas pour prendre au dedans.

Au deffaut du Souffre vif, on pourra mettre le cuir & bruslé.

Au defaut de Sotyrrium, la semence de Roquette, ou le Scincus.

Au lieu de Mouttarde, le Cardamomum, ou le Cresson Alnois.

Au defaut de Scammonee, la Palma Christi.

Au lieu de l'Antimoine en poudre, on peut mettre l'escaille de bronze, ou l'estain bruslé.

Au defaut d'oz de seiche, on peut mettre

tre

tre la pierre ponce.

Au defaut de Squille, on peut mettre le Pancratium.

Au defaut de la Terbentine, qu'on mettela resine de Meleze.

Au lieu de Thapsia, és medicamens extérieurs, qu'on mettela semence de Cresson Alnois. ou de Roquette.

Au lieu d'Elebore blanc, on pourra mettre le noir.

Au defaut du vin falernien, on pourra mettre d'un autre vin, pourueu qu'il soit iaune comme or, subtil: cler & fort odorant.

Au lieu du Gingembre, on peut mettre le Pyrethre, quand c'est pour appliquer au dehors.

Or comme on peut substituer les simples que nous auons dit, au defaut des autres: aussi peut-on mettre les premiers pour & au lieu de leurs substituez: Chascun pourra aussi substituer & mettre les vns pour les autres, ayant esgard à la diuersité des lieux, des maladies, & des hommes: Il est bien vray que ie ne voudrois pas que les Apoticairese donnassent licence de les changer à tout propos, non pas mesme les plus benins medicamens, sans le conseil & ad-

nis de quelque doctre & bien aduisé Me-  
decin: car il est à craindre que s'estans  
donnez licence de changer les benins,  
ils n'en voulussent après autant faire  
és autres. Et comme le Roy est plus esti-  
mé qu'un sien lieutenant aussi les simples  
que les anciens ont mis és compo-  
sitions, sont beaucoup plus efficaces, &  
plus propres à la composition, que non  
pas un autre qu'on mettra en leur lieu:  
parquoy ie suis d'aduis, que ni le Me-  
decin ni l'Apoticaire ne doyent  
point changer legeremēt les  
simples, mais qu'ils le  
doyent faire en toute  
crainte & re-  
ueren-  
ce.

*Fin du premier liure.*

LA





# LA FACON ET MA-

NIERE DE PREPA-

rer les Simples.

Liure second.

P R E F A C E.

**L** ne faut pas ia qu'on  
 pense, que ceste partie  
 de la Pharmacie, soit à  
 mespriser, ou qu'elle soit  
 indigne d'un homme de sçavoir &  
 de bon esprit: veu que presque toute  
 la vertu & faculté des medicamens  
 composez en depend. Et mesme quel-  
 le vertu, ou quel usage, pensons-nous  
 que les simples puissent auoir, s'ils ne  
 sont premierement pilez, cuits, infu-  
 sez, ou preparez en quelque autre sa-  
 çon, dont sera parlé cy-apres? cōment  
 les pourra-on mesler ensemble, pour

*faire les compositiōs, s'ils ne sont premierement preparez? Et qui plus est, la seule façon de preparer change la faculté, non seulement des simples, mais aussi des compositions, comme il te sera monstřé cy apres. voire si clairement qu'il ne sera besoin d'autres tesmoins, ny de plus lōgue demonstratiō. Au reste il me semble q̃ ce labour sera de tant plus à estimer d'autant qu'il y a plus de difficulté, car iusques à present personne ny à trauaillé, tellement que ie fay cōme vnc œuvre toute nouvelle, la proposant clairement & cōme entre les mains des hōmes: Il est bien vray qu' Hippocrates, Galien, & d'autres excellēs medecins (ie laisse les Empiriques) ont touché par fois comme en passant, la preparation de quelques simples: Galien aussi tesmoigne, que quelques vns auoyent deuant luy, traitté de la preparation des medicamens: toutesfois il n'y a autheur  
de no*

de nostre temps (que ie sache) qui ait parfaict quelque chose digne de louãge, touchant ceste matiere: hormis ce pen que Mesues à traitte des quatre façons de preparation, assauoir de la maniere de piler, cuire, brusler, & infuser, & ce pen qu'il en à escrit merite bien le lire, tu le trouueras en son liure de la Methode de choisir & corriger les simples medicamens laxatifs. Quand à ce qu'un certain Seruitor à en partie arraché de Dioscoride, & en partie ramassé d'un tas d'ignorãs, ie ne scay qui le pourroit souffrir.


Voyant cela, nous auons recueilli d'Hippocrates, de Dioscoride, & de Galien & autres, la preparation de quelques simples, qui estoient dispersées par cy par là, en leurs œuures, & les auõs mises par ordre: en auõs aussi inuenté plusieurs lesquelles nous auõs experimentees: nous en auons aussi appris quelques vnes des Apothicai-

res bien experimentez en leur art.

Or debonnaire lecteur, s'il te semble que traitans ces choses, nous auons usé d'un stile cōmun & abiect : ayes esgard que nōstre intention à esté, d'enseigner les rudes & ignorās, parquoy j'ay mieux aimé m'accōmoder à leur capacité, enseignant les choses clairement, que de rendre raison tout au long de chascune : encores qu'il seroit necessaire à qui voudroit parfaire entierement ceste œuvre.

Je n'ay point deliberé de traićter sinon de la preparation des simples medicamens seulement, & non pas des autres choses, aux quelles la vertu de la preparation se peut rapporter: car nature ne produit ny n'acroist riē sans preparatiō: mesme les arts, soyēt mecaniques ou autres, ne peuvent riē entreprendre sans preparation, par le moyen de laquelle il semble souuent, que l'art surmonte la nature.

QVE



# Q V E C' E S T Q V E

## P R E P A R A T I O N , E T

*des diuerses façons de preparer  
les medicamens.*

### C H A P. 1.

**P**R E P A R E R ou apprester les medicamens, n'est autre chose que artificiellement les rendre propres à mettre en vsage, ou és compositions : à sçauoir les rendre plus benignes plus efficaces, plus aisez à prédre, plus salutaires, ou plus aisez à mesler avec autres: & pour dire en vn mot, les rendre meilleurs, soit pour en vsfer, ou pour mettre és compositions : Car il y à des simples, desquels nous vsons incontinent apres les auoir preparez, sans qu'ils entrent en aucune composition & plusieurs autres desquels nous faisons des compositions apres les auoir preparez, auant que nous en seruir,



Nous pouuons aussi rapporter à la preparation (de laquelle il sera parlé plus au long cy apres) quand nous oistons vne faculté qu'un simple aura, laquelle nuira à nostre intention, ou que nous descouurons quelque vertu cachée, qui nous peut seruir, ou quand par art nous luy faisons auoir vne nouuelle faculté.

Or toutes sortes de medicamens, soient metalliques, plantes, animaux, & bien souuent la nourriture qu'on tire d'iceux, se preparent quelquefois estés encores viuans, mais le plus souuent estans morts. Car la terre Lemnia (laquelle semble viure comme en sa mere nourrice, tandis qu'elle est en la Colline de laquelle on la tire) semble receuoir quelque preparation par le prestre de Diane: lequel espart quelque nombre de grains de froment & d'Orge, lors qu'il la tire, & fait plusieurs autres ceremonies, selon la coustume du pays: tellement qu'il semble que la pluspart, voire toute la vertu de ceste terre, procede de ces singeries.

Ne voit-on pas aussi, que l'Arsenic sera plustost conuerti en Sandaracha. & le Sori en Chalcitis, & le Chalcitis en Misy, dans la mine mesme, si l'ouuerture  
re &

re & entrée de la mine regarde droit au Soleil de Midy. Par mesme raison, la mine d'argent-vif se trouue beaucoup plus subtile, si elle est ouuerte au Soleil. Et le souffre qui est bruslé au mont Vezuue ou ailleurs, n'est pas si gras ni si huileux, mais il se rend plus subtil beaucoup

Ne se voit-il pas aussi, que quand l'hyuer est long & difficile, & qu'à cause de ce les entrailles de la terre ont beaucoup plus de chaleur, qu'il s'engendre plus grande quantité de metaux? & mesme i'ay veu comme des arbres d'or, enclos dans des pierres fort dures, comme si ce fussent esté des commencemens d'arbres d'or & d'argent: tellement que ie ne doute point, que ce qu'Augerelus dit, en son traicté intitulé Chrysopoea, ne soit veritable, assauoir que les metaux s'engendrent, se nourrissent, augmentent, & accomplissent, en vn moment: de quoy on à certain tesmoignage au puis d'Anibal (qu'on appelle) & es metaux de l'isle nommee Ilua, en la mer de Tyrrhene, & en plusieurs autres mines, lesquelles on ne peut espuiser.

*Lib. 9.*

L'eau qu'on amassoit en vne fosse, *simpl.*

procedante de la pluye qui tomboit sur la Colline qui estoit en Cypre, laquelle passoit par la mine de Misy, Chalcitis, & Sori & qui s'assébloit en vne cauerne qui estoit au dessous, estoit comme vne preparation, ou plustost generation de la Couperoie.

*Atesues  
in canon.  
vniuers.*

Pour rédre vn Ressort laxatif, nous ne faisons autre chose q̃ l'entrelarder, lors qu'il est encores viuant, de quelques filamens d'Elebore noir.

Par mesme moyen, nous rendrons rendrons les fruiets d'un arbre, laxatifs, si nous esgratignons l'escorce de l'arbre, au temps que la seue monte, & mettons dans les esgratigneures de la Scāmonnee, mettant apres de Cire par dessus, & les liant bien fort.

Dauantage nous attédons le temps & la saison propre, assauoir que les simples sont meurs, ou en leur force & vigueur, ou qu'ils soyēt secs, selon qu'il est requis au simple que nous voulons cueillir: nous auons aussi esgard à ce que le temps soit propre, & mesme bien souuent nous regardons à la dispositiō de la Lune, afin que la plante q̃ nous voulons cueilir soit plus efficace: semblablement quād nous apuyons les arbres,

bres, q̄ nous taillōs les vignes, que nous prouignōs, plantons, osons les brāches mortes, & sarclons: nous faisons que nō seulement les arbres sont plus fertiles, mais mesme les fruits en sōt meilleurs.

Nous ordonnons vne conuenable maniere de viure à vne nourrice, quād l'enfant qu'elle nourrit est affligé de quelque maladie, à fin de corriger son laiēt: comme aussi le laiēt d'Anesse, selō l'instruction de Galien, au septiesme liure de la Methode. Et le laiēt des vaches, les nourrissant en vn lieu ou la nourriture soit propre, cōme elle estoit au lieu que Galien, au cinquiesme de sa methode, appelle Tabiaz.

Nous chastrons aussi les Porcs, les *Lib. 9.* Boues, les Beliers, & les Taureaux, quād *alimento-* ils sont ieunes, à fin que leur chair en *rum.* soit plus delicate, & de meilleur goust, qu'elle soit de meilleure nourriture, & plus aisee à digerer.

Les Tetines principalement des vaches & des Truyes, sont beaucoup meilleures, lors qu'elles sont pleines de lait, que quand elles sont taries & seiches: & mesme les frians font grand feste du ventre d'une Truye, qui a fait les petits, n'y à pas long temps.

Le caillé qui se treuve au premier ventricule des animaux qui allaitent, qui s'engendre de la corruptiõ du laiët, est beaucoup meilleur si la beste à esté vencee : comme aussi est la chair, non seulement des animaux sauvages mais presque de tous autres.

Nous chassons aussi vn vieux Coq, & le rendons par ce moyen meilleur, pour purger doucement, vsant de sa decoction, qui est quelque peu nitreuse,

Si nous pouuons rencontrer vn renard qui soit de bon eage, & nous le faisons lasser, le venant longuement, & qu'il soit gras & en bon point, & le faisant bouillir en huile, nous faisons vn huile qui est fort resolutif. Mais si nous le prenons, lors qu'ils seront gras & en bon point pour auoir mangé tout leur saoul de Raisins, apres vendanges, il en feta meilleur manger.

Les Pores nourris de grain, ont la chair beaucoup plus ferme, que ceux qui sont nourris de gland, mesmement de celuy de Fau, lesquels ont la chair flaque, & aisee à fondre.

Quád aussi nous choisissons vn Bouc de quatre ans, lequel nous nourrissons quelque espace de temps, avec herbes qui

qui ont vertu de rompre la pierre, & avec bon vin blanc & puissant : nous rendons par ce moyen, son sang propre à rompre la pierre aux reins.

Quand Escrion prenoit les Cancres, & les brusloités iours Caniculaires, apres que le Soleil estoit entré au signe de Leo, le dixhuitiesme iour de la lune, son intention estoit de les rendre plus propres cōtre la morsure des chiés enragez, de façon que par ce moyen il les preparoit. Galien aussi dit que pour auoir de bonnes viperes, il ne les faut pas prendre lors qu'elles ne sont que sortir de terre, mais il faut attendre qu'elles se soyent exercees quelque temps, & qu'elles soyent retournees à la nourriture qu'elles auoyent deuant l'huer, & qu'elles ayent laissé leur despouille entre les pierres: ce que nous pouuons appeller comme vne sorte de preparation. Matheus Gradi nourrissoit de poules & chapons, avec la Chair de viperes, pestrie avec du pain, iusques à ce que la plume leur fut tōbee, pensant par ce moyen guerir les ladres à sçauoir leur faisant manger les poules & Chapons. Si nous nourrissons *Lib. 3. A-*  
des Pouletz quelque téps auant que les *liment.*  
taer,

tuer, avec pain trempé en laiët aigré, & quine soit gueres gras, ils en auront leurs genitoires beaucoup plus delicats à manger, & plus exquis, mesme-ment si on les prend auant qu'ils ayent assailly les Poules à fin qu'ils n'ayent point de mauuais goust, par le moyen de la semence: & par ce moyen ils sont de bonne & grande nourriture, & sont faciles à cuire en l'estomach.

*Ibid.* Le Foye des animaux nourris de figues, principalement des pourceaux, est vne viande fort excellente. Pareillement le foye d'une Oye, nourrie de viandes trempées en laiët, est de beaucoup meilleur goust, plus aisée à cuire, & de meilleur nourriture.

Si on faiët mager de la Scammonee, ou des Titimales, à vne chieure, ou à vn autre animal, son laiët aura la faculté de purger la flegme par embas.

On prepare aussi la fiente d'un petit enfant, par vne cōuenable façon de viure, pour s'en seruir cōtre la squināce. Semblablement la fiente de chiens, leur faisant manger des Os, pour autres usages: & aussi nous preparons plusieurs choses és animaux encores viuans.

Mais il me semble que ces exemples  
suffi

suffiront pour monstrier, que bien souvent nous preparons, par le moyen de nature, plusieurs choses, lors mesme q̃ les medicamens sont encores viuans.

Or d'autant que ceste façon de preparer, encores qu'elle soit de grãde vertu & efficace, ne vient pas toutesfois souvent en vsage, & mesme que quelqu'un pourroit debatre qu'elle ne merite pas d'estre nommee preparation: il me semble que nous ferons bien de venir à la seconde espeece de preparation, laquelle s'estend au long & au large, en toutes sortes de medicamens: laquelle se faiët (si nous voulons parler generalemēt) ou par addition, ou par ablatiō, maintenant de la substance, maintenāt de la faculté, & quelquesfois de tous deux: mais en particulier elle s'acomplit en cuisant, pilant, rostissant, bruslāt, ou preparant en quelque autre façon comme sera dit en apres.

Sous le mot d'ablation, ie comprend aussi la separation des parties, soit qu'elles demeurent ensemble, comme quād on pile les simples: soit qu'on les mette à part, comme quand on oste l'escume, qu'on distille, qu'on extraieët les sucs & les liqueurs.

Nous



Nous traicterons au long ci apres, la quelle addition ou ablation se faiët en chascune espee de preparatiõ, & si c'est de la substãce ou de la qualité, & si c'est d'une substance, seulemēt ou plusieurs.

Il ne reste donc maintenant sinõ que nous enseignõs, quelle faculté à chascun de ces differences de preparation, & comme elle se faiët : commençant par la façon de piler, d'autant que ceste sorte de preparation, est cõmune presque à tous les medicamens, non seulement aux simples, mais mesme aux autres sortes de preparation. En second lieu nous traicterons des especes de preparation qui se font par le moyen de la chaleur : apres de celles qui se font par froideur : au quatriesme rang nous mettrons celles qui se font par siccation : & au cinquiesme celles qui se font par humectatiõ, & aussi des autres, comme nous les auons mis ci apres par ordre.

*Des façons & manieres de piler les simples.*

#### C H A P. I I.

**O**N a accoustumé de piler les simples, c'est à dire les reduire en poudre, ou en frapāt dessus, ou en broiāt seulement : ce qu'on fait à fin qu'ils se puissent  
apres

apres mieux mesler ensemble , ou à fin  
 qu'ils ayēt nouuelle vertu, ou pour leur  
 oster quelque mauuaise qualité. Des-  
 quelles trois intentions, nous en auons  
 amplement discouru en nostre liure de  
 la Methode de composer les medica-  
 mens.

Quant à la façon & maniere de piler,  
 elle est fort diuerse. Car en premier lieu  
 on pile les vns avec vn pilon de fer , les  
 autres avec vn pilon de bronze, de plōb,  
 de verre, ou de bois , & le plus souuent  
 dans vn mortier fait de mesme matiere  
 que le pilon: Vray est que le pilon de fer  
 & de bronze , ne seruent quasi qu'en  
 mortiers de semblable matiere: mais le  
 pilon de bois sert à ceux là, & si sert en-  
 cores és mortiers de pierre & de verre:  
 mais au pilō de plomb, il faut le mortier  
 de mesme, comme aussi au pilon de ver-  
 re, le mortier de verre est plus propre.

Secondement, il y à plusieurs simples,  
 que pour piler , il les faut demener fort  
 long temps sur vne pierre dure & soli-  
 de comme Marbre , laquelle on appelle  
 cōmunement Porphire: ou sur vne pier-  
 re de Mer, qu'on dit escaille de Mer , &  
 les demeine-on avec vne pierre de sem-  
 blable matiere , qui est neantmoins pe-

tite , laquelle on peut empoigner & tenir avec la main, & l'appelle on communément petite Meule , à cause qu'elle à la forme d'une petite Meule, & celle de dessous de la grande.

En troisieme lieu , on pile quelques medicamens , avec vne rouë qui tourne , & mesme en des moulins , comme cela est commun à Lyon , pour piler les choses aromatiques, desquelles est composée la poudre de menues espices, & la poudre fine qu'on appelle , & plusieurs autres poudres, que chascû fait à sa fantaisie. Je ne suis pas delibéré de parler de ceste façon de piler , mais je m'arresteray à traiter au long de la premiere , & quelque peu de la seconde.

Il ne faut pas aussi oublier le couvercle du mortier, pour le moins simple, ou mesme le double, duquel les anciens vsoyent (comme nous l'avons montré en nostre Methode de composer les medicamens ) principalement és choses que nous voulons reduire en poudre : car il semble qu'il n'en soit point besoin és choses humides.

Quant aux especes de preparation, qu'on peut rapporter à la façon de piler , comme luy estans quasi semblables, il

il sera dict cy apres: comme quand nous rapons les vns avec vne rappe: ou les coupons menu, à fin qu'ils communiquent leur vertu & faculté à l'eau, en laquelle, on les veut faire cuire.

Or la diuersité de piler, se prend non seulement des instrumens avec lesquels on pile, mais aussi de la force qu'on pile, du temps & espace, de la situatiō des choses qu'on veut piler, de ce qu'on y adioute, & de la consistance que nous voulons que la chose que nous pilons ait, apres estre pilee, & de fait nous pilons les vns tous seuls & à part, les autres il y faut mesler quelque chose parmy, pour les piler, soit pour les piler plus aiseement, ou pour aider à leur vertu & faculté: d'autres peuuent estre pilez, ou tous seuls, ou avec ce qu'on voudra, & tous ceux-là se peuuent piler, ou grossierement, ou fort delié. Dauâtage les vns endureront bien d'estre longuement pilez, mais d'autres ne souffrent pas qu'on les pile beaucoup, non plus qu'ils ne peuuent souffrir la longue coctiō. Les vns aussi veulent estre pilez en frappant fort dessus, les autres veulent estre seulement broyez tous doucement dans le mortier, demenant le pilon tantost

tout bellement, tantost hastiuement, & par fois frappant fort.

Finalemēt, & les vns & les autres ne veulent pas estre pilez trop violentemēt ny trop longuement, car par ce moyen leur vertu & faculté s'esuanouit, tellement qu'ils demeurent comme sans force: toutesfois les choses subtiles & rares, & celles qui ont leur faculté foible & debile, & qui l'ont comme en la superficie, y sont plus suiettes que les autres qui sont de contraire nature.

Je traitteray donc particulièrement de chacune de ces differēces, apres que j'auray monstré en quelle de ces façons, & en combien, chascune espece des simples medicamens, se peut piler, & commenceray par les racines.

*La façon de piler les racines.*

C H A P. I I I.

**Q**UAND les racines sont grosses, & qu'elles ne sont pas bien seiches, il les faut premierement tailler en piēces, & les mēler peu à peu, avec les autres choses plus seiches, mēlant peu de racine parmy beaucoup de choses seiches, & par ce moyen on les pourra  
reduire

reduire en poudre, mais si elles sont bié seiches, on les pourra puluerizer chascune à part, ou toutes ensemble : apres toutesfois les auoir premierement tailles en pieces avec vn couteau, ou avec des cizeaux, ou lez auoir rompues avec les mains, hors mis celles que no' auôs desia tailles en rouëiles au parauant, à fin de les mieux faire seicher.

Celles donc qui sont grosses, dures, massiues, serrees, nerueuses, cartilagineuses, & difficiles à rompre, veulent estre pilees plus longuement, principalement si nous auons volonté de les reduire en poudre fort deliée, car bié souuent nous ne les voulôs piler sinô grossierement, mesmemét quand c'est pour faire vne decoction. Voila comint il faut piler le plus souuent la racine de l'un & de l'autre Acorus, toutes les especes de Sarrafine, de Guymaune, de Coulouree, de Costus, d'Aunee, de Gentienne, & de Polypode.

Mais celles qui sont de contraire nature, ne veulent estre pilees que bien peu de temps, encores qu'on les voulut reduire en poudre tres deliée, comme sont les racines de Calamus odoratus des apothicaires, des deux especes d'E- *Dioscor.*

le bore, des Hermodactes, de Pyrethre: Et celles qui sont moyennes entre les premieres, & ces secondes, veulent aussi estre moyennement pilees, comme sont les racines d'Ache, d'Asperges, de Turbith, de l'un & l'autre Ben, du Dictam commun, du Doronicum, du Fenoil, de Galanga, de Regalisse, de Gramen, de Glaycul, de Persil, des deux Piuoines, & de Rhabarbe.

*La façon de piler les herbes.*

#### CHAP. IIII

**O**N pile aussi les herbes, quelquefois toutes verdes, quelque fois apres les auoir seichees, & les pile on aussi toutes crues, ou les faisant cuire premieremēt ou bien on les pile en partie auant q̄ les faire cuire, & puis quand elles sont cuites, & ce pour s'en seruir à diuers vsages. Car la fin pour laquelle on les pile toutes crues, est ou pour en tirer le suc, ou pour les reduire en forme de Cataplasme tout crud: Mais on les pile apres estre cuites, ou pour en faire vn apozeme, ou pour les façonner & former en Cataplasme, principalement quand elles ont quelque chose de dur. Mais quand on les pile seiches, c'est ou  
pour

pour les mettre en vne decoction , & lors on les pile grossierement: ou pour les reduire en poudre , & lors il les faut piler longuement , principalemēt si elles sont grosses, dures, serrees, ressemblans au bois, & ployables, mais celles qui sont de cōtraire nature, ne veulent pas estre si longuement pilees , & quand elles serōt pilees , iusques à ce qu'elles puissent passer par le crible , duquel nous nous voudrons seruir, selon l'intention à laquelle nous pretendons , il faudra lors cesser de les piler.

Il est bien vray que quasi toutes les herbes, nous les faisons seicher, ou nous les rompons avec les mains, auant que les piler , & pour la plus part on les pile grossierement, quelquesfois avec les fueilles, voire mesmes avec les fleurs: mais lors il les faut vn peu moins piler, comme toutes les especes de Capilli Veneris, la Calamintha, la Mariolaine, l'Origā, le Rosmarin, le Thym, mesmemēt lors que ces dernieres ont leurs fleurs.

*La façon de piler les fleurs.*

C H A P. V.

**Q**Uand aux fleurs, pour la plus part on a de coustume de les piler quā



elles sont seiches, aussi ne les faut il pas piler longuement, car outre ce qu'elles se mettent facilement en poudre, leur faculté & vertu se perd fort aisement quand on les met en poudre, comme sont le Saffran, l'Epithimum des Grecs & des Arabes, la fleur de Genest, de toutes les sortes de Violier, de Melilot, de Rosmarin, des deux, sortes de Nenuphar, de Cheurefueil, de toutes les especes de Roses, & le Schœnanthos si on le peut recouurer.

Mais s'il est requis de prendre les fleurs avec les herbes, il sera necessaire de les piler vn peu plus longuement, à cause des herbes & de leurs tiges, qui sont parmy, & auxquelles les fleurs sont attachees, qu'il ne feroit pas si elles estoient à part: comme la cheueleure d'Aluine, d'Aneth, d'Auronne, la Germandree, le Chamepitis, l'Eufrage, & le Melilot.

Or quant nous parlons de la fleur, nous n'entendons pas seulement ces petits filamens, qui se trouuent au milieu, le plus souuent semblables aux filamés du Saffrá, mais aussi les fueilles qui l'environnent, lesquelles sont quelquefois blanches, comme en la Camomile, au Nenuphar

Nenuphar blanc, en la Rose blanche, & en la musquee: d'autres fois iaunes, cōme au Nenuphar iaune, & au Chrysanthemum, d'autres fois rouges, 'comme en la Rose rouge, en la fleur du Grenadier sauvage, hors mis que quand on parle du Saffran, on entend seulement les petits filamens qui sont au dedans, pource qu'il n'y à rien du Saffran, dequoy on se serue, sinō cela: comme aussi bien souuent Galien, en la composition des medicamēs particuliers, parlant de la Rose, n'entend pas les fucilles larges, mais seulement les petits filamens qui se trouuent au milieu.

Il faut piler longuement, les fleurs suivantes, à sçauoir la Camomile, laquelle encores qu'elle soit de substance subtile, toutesfois elle est serree, d'odeur riue & forte, & de longue duree: la Stœchas Arabique aussi, laquelle encores qu'on la mette avec les premiers (comme le Turbith) à la fin elle ne se trouue qu'a demy pilee: l'Helichrysum aussi (qu'on dit communement Stœchas citrine) & le Spica nardī, quelque partie de plante qu'elle soit, encores qu'on la coupe bien menu auant que la piler, si la faut-il piler longuement.

La fleur du Grenadier sauvage aussi, veut estre longuement pilee, à cause de ses fueilles qui sont dures comme bois: mais si on vouloit seulement piler les petits filamens, qui sont au dedans à part, ils seroyent bien plustost pilez de beaucoup.

La fleur de Cappres, soit qu'elle soit encores en bouton, ou espânie, ou desia parcreuë en fruiët plein de semence, on ne s'en sert gueres à autre chose, sinon que l'ayant confitte en Saumure, on la mange pour ouurir l'appetit, & au de-faut de Cappres, on confit la fleur de Genest, avec vinaigre & sel pour le mesme vsage. Toutesfois si on la fait seicher, il la faudra piler mediocrement: comme aussi la fleur d'Houblon, laquelle est fueilluë, comme est celle d'Orme.

Les Gyrosses, à cause qu'ils sont de grosse substance, ils sont mal aises à piler, soit qu'on les prenne pour les fleurs de quelque arbre, ou pour quelque autre chose.

On pile les Roses, quelquefois toutes seules, & d'autres fois avec autres simples, apres toutesfois qu'on les a faites seicher au feu, ou au Soleil, entre deux papiers, & qu'on les a coupees  
menu

menu avec cizeaux : quelquesfois aussi on les pile parmy les autres sans secher, mais les couppant seulement bien menu : comme Mesues dit que pour faire le sucre rosat, aucuns ne font que coupper bien menu les roses, sans les rien piler. Mais ie suis d'avis, que quand tu le voudras faire comme vn chef d'œuvre, que tu ne faces point seicher les roses, mais que tu les piles seulement avec le reste, a fin d'euiter la calomnie qu'onte pourroit mettre sus.

*La maniere de bien piler les fruits  
& les semences.*

C H A P. V I.

**L**A pluspart des semences demandent d'estre pilees, comme entre-deux, des Racines & des herbes. Parquoy quand on vouldra piler le tout ensemble, il faudra piler les racines iusques à ce qu'elles soyent cōcassees, & lors y aiouster les semēces, & quand elles seront aussi assez pilees, y mettre les herbes coupees menu, puis piler le tout ensemble : & voila comme il faut faire de la semence d'Agnus Castus, d'Ache, d'Amomum,

d'Amomum, d'Anis, d'Aneth, d'Ammi, de Basilic, de Carui, de Cardamomum, de Coriandre, de Cumin (sinon quand nous nous en voulons seruir pour prouoquer à vriner, car lors il le faut piler, fort subtilement) le Vermeillon, la semence de Roquette, l'Ers, le Velar, le Fenugrec, le Lin, l'herbe aux perles, les Lupins, la Lentille, la Nielle, l'herbe aux puces, le Pautot, le Sermontain, l'herbe aux poux, la Moustarde, le Thlaspi, & l'Ortie. Et entre les fruiçts les noix de Cyprez, la mouëlle de la Coloquinte seichee, & decoupee menu, le fruiçt de Baume (dict Carpobalsamum) les Cubebes, les noix de galle, la noix muscate, le Poyure & outre cela, les Dattes, les grains de Geneure, les Figues, les Iuiubes, les Sebeste, les prunes seiches, les raisins secs: & encores que ces fruiçts soyent mols, toutesfois il leur faudra oster le noyau, les decoupper bien menu, & les piler avec le reste, selon l'ordre que i'ay dict, voire s'ils entrent en la composition: mesme on les pourra reduire en poudre, si on en met petite quantité, parmy vne grande quantité de choses seiches: ou bié apres les auoir pilez, on les passe par vn crible, ou avec la main, ou avec

vn cuillier, à fin de réduire la composition molle, comme nous sçauons qu'on passe les Dattes, pour faire le Diaphonicon.

Mesues ordonne de piler biẽ fort délié, toutes les especes de Myrabolans, si nous les voulons prendre au dedans, en substãce, à fin de restreindre & resserer les entrailles: il y a semblable raison au Rhabarbe.

Les semences de Cocombre, Courle, Melons, & semblables ( que nous dirons cy apres deuoir estre coupees avec vn couteau) estans longuement tenues au Soleil, à fin de les biens seicher, pourront bien estre reduites en poudre toutes seules.

Entre les semences, le Coriandre, le Cardamomum, tant le grand (qu'on appelle Graine de Paradis) que le petit, le Gremil, le Cumin, quand on le veut diuretique, & entre les fruiçts, toutes les especes de Myrabolans des Arabes, comme i'ay desia dit cy-deuant, & les gousses de Sené demãdent d'estre pilez aussi longuement que les racines, parquoy il sera bon de les mettre ensemble avec icelles. Mais les Mouëlles des fruiçts ou des semences, qui sont huileuses: ou il les faudra hacher bien menu avec vn couteau,

couteau, sur du papier qu'il faudra changer souvent, ou bien mesler parmy vn peu de sucre bien fin & bien sec, & les piler à part: cōme on faict de la mouëlle des semences de Cocombre, Courle, Melon, Citrulle, Cotton, Carthame, herbe à poux: & de la mouëlle des fruiets d'Amandes, d'Anacardi, de Ben, de Pignolats, de Pistaces, de Chastaignes, & de Noisettes: La Noix muscate doit estre mise quasi toute la derniere, comme quand on faict la poudre de menues espiques, car si on la met au commencement, elle empesche que les autres espiques ne se peuuent piler, à cause de sa moiteur huilense.

Les semences que nous auons dict estre le plus souvent coupees menu, pourront bien estre pilees à part, si nous les voulons apres mesler avec choses humides, mais si nous les voulons mesler avec choses seiches, on pourra bien mesler petite quantiié de semences, parmy vne grande quantité de choses seiches, & les piler ensemble: si fait bien aussi le suc de Regalisse, le Bdelium, les sucs & les liqueurs, apres toutesfois les auoir coupez menu: on les pourra bien aussi comme i'ay dit, faire  
bien

bien fort seicher au Soleil, & les pulueriser à part.

En la composition de Diaprunis, les semences froides surnommées grâdes, & autres qui y entrent, pourront bien estre pilees avec bonne quantité de Sucre, à cause qu'elles sont en petite quantité, pareillement les Amandes qui entrent en la composition du Diaphenicon, on les pourra couper menu si on veut, ou les piler avec Sucre.

De la semence du Pavot, aucuns la cōcassent vn petit dans le mortier à fin que le cousteau s'y puisse prédre, & puis la hachent avec vn cousteau comme les autres semences.

Il est bien vray que quand ces mouëlles entrent és compositions cordiales, ie ne trouue pas bon de les mesler avec le reste, mais serois plustost d'auis de les hacher menu quand on s'en veut seruir, & les mesler lors avec le reste de la composition: la raison est qu'à grâd' peine se peuuent elles garder vn mois entier sans se rancir, tellement qu'elles gâstent la composition, sinon que la composition soit en petite quantité, & qu'elle soit bien tost vsee.



*La maniere de piler les suc<sup>s</sup>, liqueurs,  
Gommes, & Resines.*

## C H A P. X V I I

**L**Es suc<sup>s</sup> seichez, les liqueurs, Gommes & Resines, si elles sont recen-tes, & par consequent humides & molles, on les pourra mesler parmy les electuaires mols, parmy les pilules, onguents & emplastres, toutes seules, ou bien les amollir avec quelque autre chose : ou bien les dissoudre avec quelque humeur conuenable à la composition que nous voulons faire.

Mais s'ils sont desia secs, de sorte qu'ils se puissent casser, on pilera plusieurs d'iceux, plustost en broyant, & demenant le pilon tout doucement par le fons & autour du mortier, que non pas en frappant, car si on pense frapper dessus, ils s'eslargiront plustost que de se mettre en poudre, & si se prendront tellement au mortier, qu'on ne les en pourra apres separer, à cause de leur viscosité & lenteur, qui est commune à tous, aux vns toutesfois plus qu'aux autres, & avec ce ils s'esuanouissent & perdent leur vertu. Vray est que quand ils sont par trop secs, encores qu'ils soyent plus aisez à  
reduire

reduire en poudre, i's sont neantmoins à cause qu'ils ont perdu leur force & vertu. Nous parlerons donc des sucs qui sont modérément seichez, ou qui sont vn peu plus secs.

La Scammonee donc ( laquelle Mesues met entre les sucs, encores qu'elle ne soit pas de telle efficace que sa liqueur ) & les autres sucs, qui se peuuent réduire ainsi durs les faisant secher, pourront bien estre pilez tous seuls, dans le mortier: vray est que ce ne sera pas si tost fait, avec ce que s'ils sont en petite quantité, il en demeurera la pluspart au mortier, dequoy nous ne nous soucions pas beaucoup, quand il y en a bonne quantité: toutesfois il sera bon de piler premierement dans le mortier, quel que nombre d'Amandes, & les plus vieilles, rances & huileuses sont les meilleures, car par leur lenteur qu'elles laissent au mortier, elles empeschent que les sucs ne se prennent: ce qu'on pourra faire autrement, & si sera aussi bon, & de plus de duree, à sçauoir trempant le pilon dans de l'huile, & en mettant aussi vn peu dans le mortier, de menât le pilon que que temps par dedâs, pour engraisser le mortier: mais il faut que

l'huile soit doux, ou tiré d'Amâdes douces : sinon que le suc fust quelque suc astringét, car en tel cas l'huile Ompha cin sera meilleur. Cest huile donc sert non seulemēt pour empecher que les suc ne se prennent au mortier, mais mesmes garde que la vertu des suc, & la poudre subtile, ne s'enuole : avec ce que les suc en sont plustost, plus aisément & facilement pilez : laquelle faculté, est attribuee par Galien à la liqueur du Baume, pour piler la Theriaque.

Nostre Acacia est fort mal - aisee à rôpre, encores que ce soit la plus seche qu'on scauroit trouuer : tellement qu'il vaudroit mieux la mettre en petites pieces, & la mesler peu à peu, avec le reste qu'on veut mettre en poudre.

Quant à l'Aloës, le dire de Mesues est veritable, à scauoir qu'il est fraille & gluant tout ensemble, car si on le pile en frappât, il se prend au mortier, mais si on le broye seulement, il se met en poudre : on le peut apercevoir en le maniant, car encores qu'il s'esmie, il se prend toutesfois aux doigts.

Le suc de Regalisse, l'Hipochoistis, & le Lycium duquel nous vsons, se pile ront fort bien si nous faisons seulemēt chauffer

chauffer le pilon, à fin de les seicher, & par ce moyen on les pourra esmier: si non qu'ils fussent par trop frez & recés, & encor trop humides, car lors il les faudra mettre en petites pieces, & le pulueriser avec le reste, quand on est desia prest à les cribler, ou autrement on les remarquera parini la composition, à de mi pilez seulement.

Des liqueurs, il en est tout de mesme, assauoir que celles qui sont les plus seches, & moins gluantes & visqueuses, se peuuent esmier toutes seules: comme sont le Ben ioin, l'Euforbe, la Thapsia, & comme j'ay dit, la Scammonee, doit estre plustost broyee, avec vn peu d'huile d'Amandes douces, que nō pas pilee.

Mais l'Opium doit, estre peu à peu me séé, avec le reste des choses seiches, si on le veut pulueriser: & si on le veut dissoudre, le mettre avec les choses humides: il faut faire le semblable de l'Opoponax, Galbanū, Ammoniac, Sagapenum, assauoir s'ils sont en petite quantité, & que la quantité des autres choses seiches soit grande, les meslant par-mi, on les pourra reduire en poudre: comme nous le pouuōs voir en la cōpositiō

de la poudre de Hiera Diacolocynthis: ou bien on les dissout en quelque humeur comme en vin, vin aigre, ou autre, & les ayans chauffez les faut couler, puis les faire cuire iusques à ce qu'ils ayent la consistance convenable à la composition que nous voulôs faire.

Quelque fois aussi, nous les nettions bien des esclats de bois, & autres ordures qui se trouuent parmi, puis nous faisons chauffer vn pilô, avec lequel nous les rêdons molles, pour les pouuoir reduire en pilules, ou en forme d'emplastre: vray est qu'ainsi faisant la composition n'en est pas si nette. Ou bien les fait on dissoudre avec quelque humeur convenable, puis on les passe par vne estamine: mais il faut cōsiderer de combien elles se peuuent diminuer en les coulât, & augmenter la quâtité d'autât.

Les larmes aussi, tant les Resines, cōme sont le Mastic, la Terbétine, les Resines de Pin, de Meleze, de Sapin, de Pommes de pin, & la Colophonienne: comme aussi les Gommess, comme sont la gomme Arabique, le Diagragât, le Laccâ, la Myrrhe, le Bdellium, le Styrax, la Sarcocolla, l'Encens, l'Ambre à patinoftres, la gomme des Amâdiers tât doux  
qu'à

qu'amer, de Cerisier, de Prunier, de Lierre, de Geneure, apres les auoir bien seichees, on les peut pulueriser à part ou avec le reste, les broyant seulement, hormis le Mastic, & la Resine de pin: comme aussi le Camfre, soit qu'on le prenne pour vne gomme, ou vn suc, ou quelque chose d'artificiel.

Les mesmes larmes estans encores fresches & recentes, se peuuent dissoudre avec quelque chose plus humide, hormis le Mastic: ou bien elles seruent pour incorporer les autres medecamés, qui sont plus secs.

Que si d'adventure quelqu'un de ces larmes se prend au mortier en la broyant, il ne faudra sinon oindre le mortier avec vn petit d'huile: comme si on auoit à piler la vraye Myrrhe, & qui ne fut pastarie de vieille: mais la Myrrhe que nous auons, se puluerise assez toute seule. Joint que quand on puluerise le Mastic, qui est vn peu trop sec, il sera bon de mettre vn peu d'eau rose parmi, à fin qu'il ne s'enuole ne perde: & pourra on faire le semblable és autres qui à cause de leur siccité se puluerisent aisément: Toutesfois quand il faudra faire vn emplastre, & que le Mastic ou la

Myrrhey entreient, il vaudra mieux les mettre en poudre.

La gomme Arabique, & le Diagrafant seront beaucoup plus aisez à mettre en poudre, si on fait premierement chauffer le mortier & le pilõ: & encores se pulueriseront-ils plustost, si on y met vn peu d'eau de vie seulement par-mi.

Aucûs tiennent que l'Encës ne se peut dissoudre, mais pulueriser seulement: mais on le resout avec eau & vin-aigre, iusques à la consistance d'emplastre, y mettant aussi vn peu d'huile, vray est q̃ lors il ne se peut amasser en grumes.

On pile le Mastic, y meslant vn bien peu d'huile parmy, en la composition des pilules d'Hermes, & des Trochisques de Coloquinte.

La vraye Myrrhe, on la pile vn iour grossierement, & l'endemain, on acheue de la piler bien delié: le Bdelliũ de mesme, l'Encens (ie di quand ils sont bien secs) la Sarcocola, le Stytax, & l'Euphorbe: le Ladanum si il est bien sec de vieillesse: ou qu'on le fasse seicher chauffant le pilon & le mortier, on le pourra pulueriser: mais s'il est fres, il le faut dissoudre en huile chaud, ou en quelque autre liqueur conuenable.

*La maniere de piler les bois & les escorces.*

C H A P. V I I I.

**L**Es Bois, comme sont les bois d'Aloës, l'Aspalatus, le Guaiac, les Santals, le bois de Baume, & les escorces des bois, comme sont le Cinnamome, la Cannelle, l'escorce de la racine d'Aubespain, de Tamarix, & de Cappres, veulent estre pilees autant de temps que les racines: comme sont aussi les tiges, & le Malicorium, qui n'est autre chose que celle escorce de Grenade qui est dure cōme bois: Mais le Macis, qui est l'escorce de la Noix muscate, veut estre pilee moderement.

Quand à l'escorce des racines d'Asche, de Persil, de Fenail de Reffort, & semblables, nous auons enseigné comme il les falloir piler, quand nous auons parlé des plantes meisme. Le Turbith doit estre moyennement pilé, comme dit Mesues.

Il ne se faut pas esbahir si le Cinnamome, entre les autres ses semblables en chaleur le plus tenue & subtil, veut estre longuement pilé, car cela vient à cause de son escorce interieure, laquelle est fort nerueuse, & mal-aisée à pulueriser.



*La façon de piler les simples Metal-  
ques. & terrestres.*

C H A P. I X.

**T**OUS les simples metaliques sont de substance terrestre, & cōposez de parties grossieres, à cause de quoy ils ne peuvent pas penetrer fort profond, comme iusques à vn nerf piqué. Parquoy il est requis de les subtilier, ce que nous faisons les pestissant longuement, au Soleil chaud, en vin aigre fort vieil, fort aigre, & fort subtil, comme est celuy qui est fait de vin qui n'est point brulé, & qui ne tient rien de la qualité du vin quand on le gousté, ou bien peu; & tant plus lōguement on les broyera, tant plus subtils ils deviendront, parquoy aussi ils deviendront tant plus mondificatifs attenuatifs, & deslicatifs. Mais s'ils sont broyez de la mesme façon que j'ay dit, avec du vin, puis qu'on les fasse seicher au soleil, ou bien au feu ( si le temps n'est pas propre pour le faire au Soleil ) ils seruent mieux pour cicatrifer les playes.

La Litarges'esmie plustost que de la piler, car si on la pile le Plomb s'elargit plus toutesfois en celle qui est surnom-

mee Argyritis, que non pas en la Chry-  
 sitis, & neantmoins ce Plomb demeure  
 quand on le passe par vn linge fort cler  
 & rare: sa crasse & escume le separe en  
 la lauant, & par ce moyen aussi les em-  
 plastres en sont rendus plus blancs.

Si on peut recouurer la pierre Ar-  
 menienne, il la faut piler en vn mortier  
 de pierre assez longuement, à fin de la  
 lauer apres: mais le Lapis Lazuli endu-  
 rera bien d'estre pilé plus longuement,  
 comme dit Mesues.

Les Perles, & le Corail, doyuent estre  
 premierement pilez à part, en vn mor-  
 tier de Marbre blâc, à fin qu'ils ne s'ac-  
 quierent quelque odeur, ou couleur, ou  
 goust estrange & mauuais. Les frasmés  
 des pierres precieuses, à sçauoir Sa-  
 phirs, Iacintes, Grenats, & Émeraudes  
 veulent estre broyez sur le Porfire, les  
 arroufant avec vn peu d'eau Rose, ou  
 d'eau de Bourraches, ou de Buglosse:  
 car par ce moyen ils sont rendus plus  
 propres à penetrer & à estre distribuez,  
 & s'il n'y à pas danger qu'ils fassent  
 quelque obstruô: avec ce on ne peut  
 pas dire qu'ils ayent rasclé quelque  
 chose du mortier en les pilant, qui puis  
 se augmenter la quantité, & c'est la rai-

son pourquoy Galien , en la composition de le Theriaque, ordonne qu'on pile les simples qu'y entrêt, en vn mortier de pierre fort dure, qu'il appelle Pila Aegyptia.

La Blatta Bisantia se peut aussi piler toute seule.

*La maniere de piler les simples prins des parties des animaux.*

#### C H A P. X.

**N**On seulement les parties des animaux, mais les animaux mesme tous entiers, estās bien seichez, ou pour auoir esté rostis, ou bruslez, ou autrement seichez, se pourront pulueriser à la façon des autres simples: si elles sont encores humides & molles, & s'il y en à petite quātité, ou les pourra piler avec bonne quātité d'autres choses seiches: ou bien on les pile à part, & les passe on par vn crible, avec vne cueilliere. Il y en à aussi quelques vnes qu'on peut fondre, puis les couler, cōme sont les gresces, les mouëlles, & le Suin des laines.

La merde des chiens, des loups, & des petis enfans estant seichee, se met fort bien en poudre: si font bien aussi les Cātarides gardees quelques temps,

& le

& le Castoreum le plus sec, mais il n'est pas aussi si efficace : & les Cancre de Riviere bruslez, les Hyruidelles bruslees, vn Lieure bruslé, les reins du Scincus seichez, le foye d'un Loup seiché, & le poulmon de Renard seiché.

Mais le fiel sert le plus souvent pour incorporer les autres choses pl<sup>us</sup> seiches & s'en sert on bien peu souvent du sec.

Des perles, qui sont cōme parties de la coquille qui les produit, & de la Blata bisantia, nous en auōs touché cy deuāt.

Le sang de Bouc seiché, se reduit aisement en poudre.

Les dents de Sanglier, de Brochet, & d'Elephant veulent estre limees, ou rapees, & puis pilees, plustost que de les brusler, si nous voulons que leur vertu leur demeure entiere : & de mesme les autres os, les cornes & ongles, toutes-fois ceux-ci se bruslent par fois, cōme il sera dit quand nous traiterons de la maniere de brusler.

Quant à l'Ambre gris, quelquesfois on le met en petites pieces, puis on le iette en quelque humeur chaude, à fin qu'il se fonde là dedans : comme nous le pouuons voir en la composition de Granum tinctorum, autrement dite

Conse

Confection Alkermes: d'autres fois on le pile, puis on le dissout l'arroustant avec eau rose, comme on fait en la composition d'Alipta Moscata, & en plusieurs autres: quelquefois aussi on pile premierement dans le mortier deux ou trois Amandes, & ainsi qu'on pile le Musc, & le Camfre.

L'os qui se treuve au cœur d'un Cerf, l'yaire, le vit d'un cerf, la corne de cerf & de licorne, & autres semblables, veulent estre premierement razez, puis hachez bien menu, apres on les pourra piler avec les autres. Il y en a aussi quelques uns qui apres estre bruslez sont aisez à reduire en poudre.

*Des choses qui veulent estre pilees à part ou avec autres.*

#### C H A P. X I.

**I**L nous faut maintenant reuenir à nostre propos. Les simples d'oc qui veulent estre pilez à part, sont premierement les metaliques, & les terrestres ou prins de la terre: comme sont le L: targe, l'Arfenic, l'Orpin, l'Érain bruslé, l'escaille de Bronze, l'escume de Bronze, le verd de gris, le Calcitis, le Sori, le Misy, la Melanteria, le Vitriol, la Cadmia, la Pompho

pholix, le Spodium (si ces deux derniers ne sont desia assez puluerisez) le Plōb. brulé, la Cerusse, le Souffre, l'Alun, le Nitre, toutes les especes de Sel, l'Antimoine, le Borrax, le Plastre, la Pierre ponce, le Lapis lazuli, la pierre Arménienne, la Chaux, les pierres des esponges, la pierre Judaïque, l'Esmeril, la pierre d'Aigle, l'Aimant, l'Émarite, l'Améthiste, l'Alun de Plume, la Gagatte, le laspe, le Saffir, le Iacinthe, le Marcassis, & l'Éranus : la terre Selée, la terre Cimolie, la terre Candiote, l'Arménienne, & toutes les especes de Corail : on pourra toutesfois piler tout ensemble, plusieurs simples métalliques, ou autres prins de la terre, mais il ne les faut pas piler par mi les parties des plantes, ou des animaux. Et le plus souvent on à de coustume de les piler sur vn marbre, ou sur vn Porphire, ou sur vne pierre marine, ou sur quelque autre pierre qui soit aussi dure.

Toutesfois on peut bien aussi piler dans vn mortier, les parties des plantes qui sont bien dures, comme les Anacardy en la composition Anacardine, selō que dit Mesues. Il faut aussi piler à part l'Aloës, la Scammonee, le Sucre, les  
Peni

Penides faites de sucre (à cause que le sucre rend les autres choses gluantes, de sorte qu'il empesche qu'elles ne se peuvent piler) le Mattic, le Rhabarbe, le Spodium des Arabes, le Canfran, la gomme Arabique, & la Sarcocolla, le Diagragent, & encores plus l'Encens (vray est que le Diagragent estant incisé bien menu, se pilera bien avec le reste, & mesme cela le gardera de s'en-uoler) l'Ambre gris, le Musc, la fleur de Ionc odoriferant & ses festus & pailles, le Saffran : les semences petites, comme sont les semences de Pauot, Jusquiame. Mariolaine, Pourpier, l'Amomum commun: car si on pile ces semences par-mi d'autres choses elles eurent le pilon, principalement celles qui avec leur petitesse, sont aussi polies & lissées, de sorte qu'elles demeurent quasi toutes entieres. Et si on les cuide piler avec autres choses plus dures, & fort mal aisees à rompre, la meilleure partie s'euolle & se perd, auât qu'elles soyēt puluerisees cōme il faut.

Il faut aussi piler à part les parties dures des animaux, apres toutes fois les auoir bruslees, ou rapees, ou lincees: cōme sont les os, les dents, les cornes, les ongles,

ongles, l'ynoire, le Spodiũ cõmun ( qui n'est autre chose qu'ynoire brusté, ou l'os d'un Elephant, ou de quelque autre gros animal brusté) la pelicule interieure du ventricule des Poules (que Galien reprocue) les ceruelles de passereaux seichees, le foye de Loup seiché, le poulmõ de Renard seiché, la fiente de Chié, de Loup, d'Enfant, la Mumie (qu'aucuns estiment estre le Pissaphaltum de Dioscoride) le sang de Bouc seiché, le sang de Dragon (qu'on appelle) les Cantarides, la Soye bruslee ou incisee, le Musc, les Perles, les Coquilles d'œufs & de Poissons, apres estre bruslees ou limees: toutes ces choses, comme j'ay dit, veulent estre pilees a part.

Il y a aussi plusieurs simples avec lesquels il faut mesler d'autres choses, quand on les veut piler, voire mesme quelques cõpositions; ce que on fait, nõ seulement pour les aider à piler, mais aussi pour aider à leur faculté, à leur couleur, & odeur. cõme au Musc, à l'Ambre gris, au Mastic le plus sec, & autres semblables qui à cause de leur siccité s'esfinient facilement, on y met vn bien peu d'eau Rose par-mi, quand on les pile à fin q̃ la partie la plus subtile ne s'en-  
uole,



vole. Il y en à aussi qui mettent avec le Mastic, vn peu d'huile de Noix, cōme on peut voir en Mesue, en la composition des pilules d'Hermes.

La gomme Arabique & le Diagrégant, seront bien plustost pilez, si seulement on met par-mi vn peu d'eau douce, ou d'eau Rose, ou d'eau de vie, mais il faut considerer que cela ne contrarie à la maladie, pour laquelle nous preparons le remede: ou bien on fait chauffer le mortier & le pilon, à fin qu'ils soyent plustost secs, & par ce moyen ils en deuiennent plus blancs.

Le Diagrégat aussi, & l'os qui se treuve au cœur du Cerf, la limeure d'yuoirre, la corne de Cerf, & autres semblables, apres qu'on les aura bien menuisez, on les pourra bien piler ensemble avec les autres choses plus seiches.

Et mesme si on pile le Diagrégant, & les Penides, ayant premierement bien seiché le mortier & le Pilon, avec les autres choses, il ne s'en perdra pas tant.

Les Myrabolans secs, comme nous le auons pour la pluspart, sont rédus meilleurs, ne s'euaporent point, & si sont plustost pilez, si seulement on met vn peu d'huile parmy, quād on les pile: & si

on y

on y met des Raisins secs, ou du miel, cela gardera qu'ils ne s'attacheront point à l'estomach, & ne le feront point rider.

La Scammonée veult estre pilee avec huile d'Amandes douces.

La Coloquinte, apres estre aucunement conqassée avec le pilon, ou plustost couppee menu avec cizeaux, veult estre pilee, l'arroufant peu à peu avec huile doux, ou d'Amandes douces, ou huile Rosat: Aucuns engraisent seulement le mortier & le pilon: d'autres pilent seulement dans le mortier quelque nombre d'Amandes, & d'autres enveloppent la Coloquinte dans du papier, & la font seicher quelque temps à l'ardeur du Soleil, ou au feu de loin (comme on fait aussi au Saffran & es Roses) & apres elle est beaucoup plus aisée à pulueriser toute seule, ou bien si on veut on la coupera menu avec des cizeaux, & la pilera-on avec les autres choses seiches.

D'autres la mettēt premierement en Trochisques, comme sont ceux que les Arabes appellent Trochisques Alandal, & apres la reduisent en poudre.

Ce qu'il faut faire necessairement en

*Dioscor.*

l'Agaric : à sçauoir , il le faut premiere-  
ment raper grossierement , & apres l'in-  
corporer avec vin blanc , de l'infusion  
de Gingēbre , & le reduire en Trochis-  
ques, puis les faire seicher à l'ombre , &  
les serrer en vn pot de verre , & quād on  
s'en veut seruir on les broye , iusques à  
ce qu'ils soyent reduits en poudre tres-  
deliée.

On pile aussi le Camfre dans vn mor-  
tier , mais on le frotte premierement a-  
uec deux ou trois Amandes, ou bien on  
pile les Amandes premier, ou engraisse  
on le pilon & le mortier avec leur hui-  
le, ce qu'on faiēt à fin que le Camfre ne  
s'enuole, ou se perde en pilant.

Quāt au Turbith, pource qu'il s'elar-  
git quand on le pile , à cause qu'il est  
gommeux, s'il est du bon & legitime, a-  
pres qu'il sera vn peu rompu , il le fau-  
dra mettre parmy les autres choses plus  
seiches, & les piler ensemble, comme le  
Poyure , le Gingembre , & les autres, en  
la composition du Diaphenicon , & de  
l'Indum grād & petit : Mais si on le veut  
piler tout seul , il y faudra mettre quel-  
que peu d'Amandes, ou d'huile d'Aman-  
des , à fin qu'il ne s'exhale & perde sa  
force.

La soye crue, couppée menu se pile aisément, si on met seulement parmy trois ou quatre Amandes, car elles sont cause de l'arrêter sous le pilon: Aucuns l'enveloppent dans du papier, & la font vn peu seicher au Soleil, ou au feu, puis ils la couppent menu, & la pilent subtilement avec le reste.

Aucuns quand ils veulent faire l'hypocras, pilent la Canelle avec quelque peu d'Amandes, à fin qu'elle ne perde point sa bonne odeur.

Le Rhubarbe se pile bié plus aisément si on met quelques Amâdes parmy, & si ne s'enuole point, & ne perd point sa force, mais il n'en est pas si laxatif: cōme le Saffran ne iaunira pas si fort vn bouillō, si on le broye avec huile, ce qu'aucuns tiennēt pour vn grād secret: Aussi pilent ils d'vne nouuelle façon le Saffran, soit qu'ils s'en vœillent seruir pour donner goust aux potages, à la chair, & autres viâdes, ou pour iaunir la taille des liures & voicý cōme ils font, ils mettent le Saffran entre deux papiers, puis le mettent deuant le feu de loïn, ou bié sans papier dans vne poëlle, & ne le laissent pas demeurer long temps, ou bien le laissent longuement au Soleil, à fin de le faire sei-

cher, & que par ce moyen ces filamens soyét plus aîsez à piler. Mais à fin que sa vertu ne s'esuanouysse, & qu'il soit plustost pilé, à fin aussi qu'il ait la couleur plus viue, ils mettent parmy vn biē peu d'huile doux, comme quatre ou cinq gouttes sur chascune once, ou bien ils engraisent le pilon, & en y mettent tāt quelquesfois qu'il en est par trop rouge, lequel aussi n'est pas de recepte entre les grossiers, & font cela à fin qu'il soit plus haut en couleur, mais il ne iaunit pas si fort comme celuy qui est broyé sans huile: mais aux riches on le pile plustost avec vn peu de sucre: que si quelcun au lieu d'huile mettoit quelque autre humeur, il ne laissera pas de prendre la couleur plus viue, mais dans peu de tēps, l'humidité estant esuanouye, il reprend sa couleur fauve, qui luy est naturelle, & apres le vulgaire mēme n'en tient pas grand conte: Vray est que nostre Soffran à bien besoin d'estre ainsi fardé: à fin de luy faire auoir bonne couleur, comme n'estant pas assez cuit, à cause de la froideur du Climat: mais celuy que Galien estime tant, ayant la couleur fort iaune, & l'odeur fort viue, encores qu'il ait esté longuement gardé,

n'a pas besoin de ceste piperie. Au reste le Saffran, comme aussi le Nard, le Macis, la Coloquinte, la Soye, les Roses, & plusieurs autres, veulent estre coupez menu, auant qu'estre pilez.

Si on pile l'Euphorbe tout seul, il red vne poussiere si forte & acree, laquelle montant au nez & aux yeux, cause vne incroyable mordication en ces parties la; & si cause vn esternuement cōtinuel qui tourmente merueilleusement vn homme, aussi les apprentis y sont bien souvent pris sans vert, tellement q̄ bien fouuēt le sang leur en coule par le nez, & d'autres en ont pour leurs espingles, des belles douleurs de teste. Mais on se gardera de tous ces inconueniens, si on met parmy l'Euforbe quelques gouttes d'huile, ou quelque nombre d'Amādes, lesquelles par leur moiteur retiendront la poussiere.

Aucuns aussi pilēt la Myrrhe, le Bdelium, le Cancamum, & la Gomme de lierre, y adioustant de l'huile, à fin que la plus subtile partie ne s'enuole, & que la vertu ne s'esuanouisse, à fin aussi qu'ils ne se prennent au mortier.

L'Opoponax, le Galbanum, l'Ammoniac, le Sagapenū, le Bdelium, le Lada-

num, nostre Acacia commune, l'Opium, l'Hipocystis, l'Asphaltum, la Terbentine seiche, comme est celle qu'on apporte bien souvent à Venise, & plusieurs autres sucs, liqueurs, & larmes, que ne sont pas tellement seichees qu'on les puisse reduire en poudre toutes seules, ou pource qu'elles sont de substance nerveuse, membraneuse, & comme de cuir, estans à cause de ce fort mal aisees à mettre en poudre, il les faudra mettre parmy les autres choses plus seiches, & les piler ensemble, il est vray que premierement il les faudra tailler en pieces, ou les menuiser en petis morceaux, en quelque autre façon, & si faut aussi que la quantité d'iceux soit petite, au respect des choses seiches avec lesquelles on les mettra, & les mettre petit à petit: comme on fait en la composition de la Hiera diacolocynthidos, & en plusieurs autres compositions: & c'est ainsi aussi qu'on pile le Saffran, les fleurs des deux Buglosses, encores qu'elles soyent recentes, les fleurs de Roses, & autres: De mesme les Trochisques de Gallia Moschata, & autres: les Dattes, apres que elles sont nettiees dedans & dehors, les Figues, les Raisins secs, les Sebesten,

sten , les Iuiubes seiches , les fruiçts  
 de Laurier , de Meurthe , de Geneure ,  
 d'Aubespın , de Guy de Chesne , les A-  
 nacardi , les Amandes , les Noisettes , les  
 Pignolats , les Pistaces , & les autres espe-  
 ces de Noix , & de Gland : les semen-  
 ces de Courge , de Cocombre , de Me-  
 lon , de Citrulle , de Citron , de Coings ,  
 les graines de Moustarde , de Chanure ,  
 de Carthame , de Cotton , d'herbe aux  
 puces , de Lin , & autres : Toutes ces  
 choses , apres les auoir hachees menu ,  
 on les pourra piler ensemble avec les  
 choses plus seiches : comme aussi la  
 soye , la laine , les poils coupez menu ,  
 lesquels il sera meilleur de piler avec  
 les autres , que non pas les brusler , pour  
 apres les piler à part , car quant on les  
 brusle , ils en perdent leur vertu premie-  
 re , & en acquierent vne toute nouvelle ,  
 tant pour raison du feu , qu'à cause de ce  
 avec quoy on les brusle : Parquoy ie ne  
 suis point d'aduis qu'on les brusle , si ce  
 n'est par l'ordonnance de quelque me-  
 decin docte & bien experimenté : non  
 plus que l'iuoir , la corne de Cerf , de  
 Chieure , de Licorne , le vit de Cerf ,  
 & de Taureau seichez , car si seulement  
 on met ces choses en petis esclats , ou



qu'on les coupe menu , ou qu'on les lime, avec vne lime commune, ou avec vne rape, on les pourra apres piler parmy les autres choses seiches.

Dauantage on trouue quelques simples lesquels on pile à part, ou bien avec quelque liqueur, & avec icelle on les boit, ou qn s'en sert autrement: comme sont la Peruèche, la cheueure de Passevelours avec vin, le Sefeli, le Satyrion, la Piuoine, le Gnaphalium, avec vin rude & brusc, & avec iceluy on les boit.

La Sarrafine ronde, & les Lupins cuits en eau, se boient en eau meilee avec vn peu de vinaigre: ou bien on les leche avec Miel: il se trouuera beaucoup de tels exemples en Dioscoride & Galien, tant és simples qu'és compositions.

Pareillement le Bdellium se reduira en forme d'emplastre, s'il est seulement malaxé avec la salive d'vn homme, de matin à ieun à tout les doigts, il y en à plusieurs autres, desquels on se sert, les ayant seulement pilez avec quelque chose humide, comme tu pourras voir quand il sera parlé des compositions.

Es compositions qu'on fait pour les vlcères des Oreilles, on pile non seulement les simples, mais aussi les compositions qu'y

qu'y entrent, tantost en vin doux, tâtost en vin rude: vne fois en vin vieil, l'autre en vin nouveau ou de moyen aage, ou en vinaigre, lequel est quelquesfois fort aigre, puissant & acre, selon la diuersité des intentions auxquelles nous preten- dons: Semblablement és Collyres qu'on fait pour les yeux, on dissout les choses seiches, avec quelque humeur conue- nable, à fin de s'en seruir apres: On fait de mesme és maladies des autres par- ties.

*Des choses qui veulent estre pilees tout dou-  
cement, & de celles qui le veulent  
estre avec force.*

C H A P. X I I.

**I**L faut broyer tout doucement en vn mortier, les simples, la vertu desquels se perd & s'esuanouyt facilement quâd on les pile avec violence, & ceux aussi qui s'elargissent, & se prennent contre le mortier, si on pense frapper dessus: ceux pareillement qui sont tort fraisses & aisez à esmier, côme le Camfre, l'Ambre gris, le Musc, le Mastic, la Myrrhe, le Bdellium, l'Encens, la Gomme de Geneure (qu'on dict vernis) le Cancamum,

la Sarcocolla , le Ben ioin, l'Euphorbe, l'Aloë, la Scammonee, le Styrax calamite, le Boli Armeni, la Terra sigilata, & presque toutes les autres terres, & les Metaliques, l'Amidon, la Ceruse ( voire mesme nous ne faisons bien souuent que frotter ces deux derniers contre vn crible ) le Sucre, le sang de Dragon, le Castoreum, la racine de Iarus, ou vit de chien, la racine de Serpentine, d'Hermodactes, des deux Ellebores, le Turbith, le Rhabarbe, & le Spodium des Arabes, les Trochisques d'Agaric: à sçauoir quand les choses qui souloyët estre humides, sont seichees. Que s'il y en à quelqu'vne qui tienne encores de l'humidité, il ne faut sinon faire chauffer le mortier & le pilon, & ainsi elle se seichera soudain, & la pourra-on après broyer avec le reste, & ce remede est fort propre és suc, liqueurs, gommes, & resines, mesme en celles qui sont moyennement fluides & liquides, mais aussi tant plus elles seront humides, tât plus souuent & plus longuement les faudra il faire chauffer, & les broyer, de sorte que ie croy que par ce moyen on pourroit bien reduire en poudre l'huile, & la Terbentine de Venise, & encores plus

plus aisément l'argent vis, avec du jus de Sauge. Mais les pierres precieuses, & les simples metaliques, se pileront beaucoup mieux sur vn Marbre, ou sur vn Porphyre, ou sur vne pierre Marine, avec la petite meule, les arroufant avec quelque humeur propre, à fin que la poussiere ne se perde, lequel neâtmoins on fait apres consumer.

L'Argent vis sublimé, & celuy que les Modernes appellent Præcipatum, le Cinabre commun, l'Alun fraisle ou scissile, qui est le plus tenuë de tous les Aluns, se peuent pulueriser, mesme dedans vn mortier, à la façon des autres metaliques.

Tout le reste demande d'estre pilé avec force, à cause que la plus part sont mal-aisez à rompre & casser, les vns pour leur durté, les autres pour leur grosseur, les autres pource qu'ils sont gluâts, & les autres pour estre solides & massifs, comme sont plusieurs racines, escorces, bois, herbes; & semences, & peut-on mettre en ce rang, les racines de Guymaue, d'Ache, d'Asperges, de Sarrafine, de Cabaret, d'Affrodilles, de Coulouuree, de Behen, du grand Centaurium, de Souchet, de Ciclamen, de  
Costus,

Costus, de Calamus aromatique, de Co-  
 combre sauvage, de Daucus, de Doro-  
 nicum, de Dictam commun, d'Aunee,  
 de Panicaut, de Fenail, de Fougier, de  
 Galanga, de Gentienne de Regalisse, de  
 Gramen, de Glayeul, de Mandragore, de  
 Nard, de Persil, de Pyrethre, des deux Pi-  
 uoines, de Polipode, & de Gingembre:  
 les escorces des racines de Cappres, &  
 de Tamarix, & autres: toutes les sortes  
 de bois: semblablement toutes les her-  
 bes, principalemēt les seiches: les fleurs  
 de Camomille, la fleur de Ione, les pail-  
 les & festus desquels, nous nous seruons  
 au lieu de la fleur, la Spica nardi, la fleur  
 du Grenadier sauvage, les Gyroflēs, &  
 toutes les autres fleurs, tant fraisches  
 que seiches: les semences d'Anis, d'A-  
 net, de Carui, de Cumin, de Coriandre,  
 de Fenail, de Fenugrec, de Lin, de Lu-  
 pins & autres, les gouffes de Sene, & les  
 autres fruits: les suc, liqueurs, gommēs,  
 resines, apres qu'on les aura mises en  
 petites pieces, il les faut mettre peu a  
 peu parmy le reste qu'on pilera, la li-  
 meure, racleure ou raboteure des os,  
 cornes, & vits aussi.

Des

*Des simples qui ne veulent pas estre pilez  
longuement, & de ceux qui le peu-  
nent porter.*

C H A P. XIII.

**A**Vcuns simples ne veulent pas estre  
longuemēt pilez, à cause qu'ils sont  
rares, desliez, fraissles, ou bien qu'ils ont  
leur vertu en la superficie, laquelle enco-  
res est foible & debile, & on estime com-  
munément que tels simples ne veulent  
pas estre longuement broyez, qui vou-  
dra que leur vertu demeure Galien par-  
le de quelques vns qui sont de ce natu-  
rel, au quatriemeliure de la composi-  
tion des medicamens en general, & voi-  
cy ce qu'il en dit. Les medicamens qui  
proviennent des suc, liqueurs, & lar-  
mes seiches, comme la Myrthe, l'Aloes,  
l'Acacia (à sçauoir la vraye) & ceux qui  
leur ressemblēt, ne sont point fort durs,  
& se brisent ailement, & si sont faciles à  
mettre en poudre tres-deliee, aussi ne  
les faut-il pas broyer longuement, de  
peur que leur vertu ne s'euanouysse, &  
que le plus subtil de la poudre s'en aille  
comme iont le Camfre, l'Ambre gris, le  
Musc, & quasi tous les autres que nous  
auons

auons dit deuoir estre broyez tout doucement.

Et mesme l'Euforbe, ne veut pas estre longuement pilé, si nous adioustons foy à Mesué, & le Spodium des Arabes, lequel est composé de Racines de Cânes bruslees: car celuy qui est fait d'inoire bruslé, qu'on appelle Spodium, veut estre pilé assez longuement. Mais le Spodium des Grecs, & la Pompholix ou Eutie, qui n'est gueres differente du Spodium, sinon qu'elle est bien plus excellente, ne veulent point estre pilez, mais seulement passez par l'estamine, en les lauant, ou mesme sans lauer.

Dauantage les choses acres, & faciles à enflamer, comme sont les Resines, liqueurs, gommes, aucunes ne veulent pas estre longuement pilees, car si on les pile longuement, la chaleur qui procede du mouuement, dissippe la substance subtile, & endame le reste.

Il se treuve aussi des simples qui sont si fraissles, qu'on les esmierà si seulement on les frotte auec les doigts: comme le bon Agaric, la racine de vit de Chien & de Serpentine seichees, la Racine d'Afrodilles bruslee, encores què Mesues  
die

die que les premieres endureront bien d'estre cuites longuement, car il entend cela quand elles sont fraïsches, & non pas quand elles sont seiches: semblablement l'Amidon, la Ceruse, la Chaux faite de pierre tendre, car quand elle est faite de pierre dure, encores qu'on l'arrouse d'eau, à grand peine sera elle dissoute vne heure apres, vray est qu'elle est plus propre à faire du Ciment pour joindre les pierres, mais elle n'est pas si blanche de beaucoup que l'autre.

D'autres veulent estre fort & longuement pilez, si on veut qu'ils soyent propres à faire compositions, comme sont les choses grosses, dures massiues, gluantes, ou qui ont leur vertu fort profonde, & qui ne se dissout pas aisement: lesquelles nous disons pouuoir endurer d'estre longuement pilees, sans crainte que leur vertu se perde ou amoindrisse: au nombre desquels nous pouuons mettre les simples metaliques, ceux qui sont de nature pierreuse, de la nature de bois, ceux qui sont nerueux, & membraneux: lesquels neantmoins, selon la diuersité des intentions, on pile tantost grossierement, tantost on les met en poudre tres deliée, comme  
quand



quand on les veut mettre en quelque médicament qu'on fait pour les yeux, ou quand on veut prouoquer l'vrine, & c'est la raison pourquoy il faut ainsi piler subtilement le Cabaret, le Cumin, & beaucoup d'autres, quand nous nous en voulons seruir pour ouurir les obstructions, & pour faire que la nourriture soit mieux distribuee par tout le corps; ou bien quand nous voulons prouoquer l'vrine.

Pareillement les Myrabolans, quand nostre intétion est de restraindre & fortifier les entrailles, par le moyé de leur substance, car lors Mesues commande de les piler bien delié, comme le Rhabarbe aussi, vray est que lors il est plus diuretique, c'est à dire il prouoque plus l'vrine: & au contraire il purge mieux par le bas, quand il est pilé grossierement, mais il faut entendre tout cecy, du Rhabarbe qui est bon, & n'est point sophistiqué, car celuy qui est rare & lâche, estant fort & longuement pilé, sa force se resout & se perd, selon que dit Mesues.

Semblablement les autres racines, mesme les Aromatiques, qui les vouldra piler entierement, il les faudra longuement

mēt piler: comme font l'Acorus, la Sarrafine, la Coulouuree, le grand Centaurium, le Ciclamē, & selon Mesué le Cocombre sauvage, le Costus, le Souchet, l'Aunée, la Galanga, le Glayeul la Piuoine, le Pyrethre, le Polipode, & le Gingembre, mais l'Agaric trochifqué, & les autres racines que nous auons dit deuoir estre tout doucement broyees, pour peu qu'on les pile, elles se mettent en poudre.

D'abondant (dit Galien au 4. liure de la composition des medicamens generaux) les simples metaliques, la Noix de galle, la fleur du grenadier domestique, le Malicorum, le fruit d'Acacia, sont malaisez à rompre & à reduire en poudre: or quand il parle des metaliques, il faut entendre le Litarge, l'Orpin, la Sādaracha, l'Erain brusle, le Verd de gris, la Chalcitis, le Vitriol, la Calamine, tant celle des fourneaux, que la minerale qui est comme vne pierre, le Plomb bruslé, la Plombagine, le Soufre, l'Alum l'Antimonie, le Borrax naturel (car l'artificiel se pile plus facilement) le Plastre, le Lapis lazuli, le Pierre Armenienne: mais le Lapis la zuli est bien plus malaisé à piler, cōme sont aussi le

reste des pierres, & la plus grande partie des choses que nous auons dit deuoir estre pilees à part.

La Coloquinte, veut estre exactemēt puluerisee, pour la raison aleguee par Mesué, quand il traite des facultez des simples laxatifs: encores que Galien die que à cause de sa grande vertu laxatiue elle sort deuant que son amertume face aucune action, ou qu'elle deterge.

La Scammonee aussi veut estre diligemment pilee, sinon quand on la met es pilules: car lors tant plus grossierement elle est pilée, tant plus longuement elle demeure en l'estomach, & fait aussi meilleure operation.

Ainsi aussi les Os, les cornes, encores qu'elle soyent bruslees, les poils, la Laine & la Soye.

Le petit centauriū portera biē aussi d'estre exactement pilé, encores qu'il soit avec ses fleurs, selon que dit Mesue: les autres herbes aussi qu'on fait secher pour garder.

Quasi toutes les autres choses veulent estre mediocrement pilees: comme les racines d'Ache, d'Aisperges, de Gabaret, sinō quād on veut prouoquer l'vrine

l'vrine, la Cicoree, la Calamus Aromatique des Apoticairez qui ne soit point vermolu, le Doronicum, le dictam commun, le Fenoi, la Regalisse, la Gentienne, le Gramen, les Hermodactes, le Gla yeul de Sclauonie & de Florée, le Meu, les racines de Mandragore, de Nard, d'Oenanthe, de Persil, de Valerienne, de Garée, de Brusc de Reffort de Rha pontic: le Gingembre, le Zurumbeth: semblablement les herbes, acres & aromatiques, comme l'hysope, & le Thym, hormis quād nous voulons prouoquer l'vrine ou les mois aux fēmes, à raison dequoy nous les pilons plus lōguemēt,

Et pour le faire court, toutes les choses qui endurent bien d'estre cuites longuement pourront bien aussi porter d'estre longuement pilees: & celles qu'il faut faire cuire hastiuemēt, yeulēt aussi estre pilees soudain: & celles qui endurent moyēnement l'vn endurerōt aussi moyēnement l'autre: par quoy la façō de piler sera rendue plus facile à entendre, quand on aura aprins la maniere de cuire les simples.

Il ne se faut pas estōner, si on lit quelquefois qu'vn mēme simple peut estre peu & mediocremēt pilé, ou beaucoup

& moyennement: car la mediocrité s'estend tant au large, qu'il y en à qui approchent tellement des extremitéz, qu'à grand peine les peut on discerner: comme l'Agaric veut estre moyennement pilé, selon le dire de Mesues: d'autres tiennent qu'il veut estre peu pilé, non pas toutesfois si peu. Et par ceste mesme raison le discord d'entre les auteurs, touchant les degrez des premieres qualitez, peut estre accordé, comme nous auôs môstré en nostre liure de la Methode de cōposer les Medicamēs.

*Des simples qui veulent estre pilez, subtilement ou grossierement.*

#### CHAP. X I I I I.

ENTRE les simples, les vns demandēt d'estre pilez fort delié, à fin d'estre pluſtoſt par effect, ce qu'ils ſont ſeulement en puissance, à fin auſſi qu'ils puiſſent p'us aiſément penetrer par toutes les parties du corps: ſoit que noſtre intention ſoit de cuire les matieres (qu'ō appelle) ou de renforcer & fortifier les parties, ou incifer, attenuer, nettoyer, & euacuer les matieres, ou par les vrines, ou par les mois, ou par ſueurs, ou par tranſpiration inſenſible: Voil-

la comme nous ordonnons que ce qu'on prend pour fortifier le cœur, le foie, & les autres parties interieures, qui sont fort esloignées de la bouche, ou pour euacuer quelque chose d'icelles, ou pour oster les obstructions & opilations, ou pour prouoquer les vrines, ou les mois, soit pilé bien fort delié, à fin qu'ayant acquis par cela quelque tenneté de substance, & subtilité, il puisse mieux passer par les orifices des vaisseaux qui sont estroits & par les petits cōduits qui sōt en l'habitude du corps, lesquels sōt inuisibles pour leur petitesse, à fin aussi qu'ils facēt l'operatiō qu'ils doyent faire, plus soudainement. Et c'est la raison pourquoy en la hiera de Galien, on doit piler fort delié toutes les poudres, & les passer par vn Thamis de Soye, à fin que la vertu de l'Aloës: & des autres, puisse penetrer dās les cōduits du ventricule & des autres parties voisines. De mesme en la Theriaque, au Mithridat, en la Aurea Alexandrina, & semblables compositions, desquelles on se sert à plusieurs & diuers vsages, ce qui y entre veut estre puluerisé bien delié, à fin que les simples communiquans leur action les vns aux au-

tres, foyent, pluſtoſt fermentez ( qu'on appelle) & ainſi, qu'on ſ'en puiſſe pluſtoſt ſervir. Car tandis que ces compoſitions ou il entre d'Opium ſont: encores recétes, elles, ſont fort, ſtupeſactives: toutesfois il ne les faut pas auſſi piler ſi delié, car leur vertu aromatique ſ'eſuanoüiroit.

Tous medicamens ſtupeſactifs, qui entrent és compoſitions ſuſdites, ou autres: ou deſquels on ſe veut ſervir à part, doyvent eſtre pulueriſez bien delié, à fin qu'ils puiſſent penetrer par les petits conduits, & paruenir aux parties lointaines & profondes, pour les rendre ſtupides.

Les choſes qu'on prend pour les maladies du foye, doyvent eſtre pulueriſees delié, & encores plus és maladies de la Rate, mais ſur tout és maladies des reins & de la veſcie: à fin qu'ils puiſſent paſſer par l'orifice eſtroit des vaiſſeaux: & c'eſt ainſi qu'il faut piler le Thym, le Cabaret, le Cumin, & autres ſemblables, en la compoſition d'Aurea Alexandrina, de Curcuma maior, de Dialacha maior, & autres ſemblables compoſitions: Mais és compoſitions laxatives, comme ſont le Diſpoſition, la  
Con

Confection Hamech, & l'electuaire Indum maius, les mesmes simples veulēt estre pilez grossierement.

Il n'y a medicamens qui demandent d'estre puluerisez plus delié, que ceux qu'on employe pour les maladies des yeux, de peur que si la poudre est trop grossiere, elle ne cause quelque douleur aux tuniques des yeux, qui sōt fort sensibles, par son aspreté: principalemēt si ce sont simples metaliques, ou pierres ou autres semblables medicamens durs & secs. Car encores que le Sucre candi, & le Boli armeni, ne soyent pas trop exactement pilez. & qu'on les mette sur les yeux, ils le dissoudront, incontinent, par le moyen de l'humidité & des larmes qui en sortent.

Il faut aussi piler bien delié, les medicamēts lesquels, c'estāt grossieremēt pilez ont qlque mauuaise qualité & nuisible, laquelle se se perdra en les pilant, cōme nous voyons en la Coloquinte, laquelle c'estāt grossierement pilée à cause quelle est espōgieuse, elle s'ēle, se remplissant d'humour superflue, & lors elle cause vne grāde facherie, par sa pesanteur, & grosseur, & par la mordicatiō q̄lle cause es parties ou elle est atachee: lesquels



incōueniens, ne peuuent aduenir si elle est exactement puluerisee, car la poudre ne peut contenir aucune humeur. Toutesfois quand on fait les Trochisques Alandal, il la faut piler vn peu plus grossierement, mais aussi il faut repiler trois ou quatre fois les Trochisques, & puis les refaire, de sorte qu'en fin elle se trouue assez puluerisee. Il en est tout de mesme de l'Agaric, aussi est-il de semblable substance: vray est qu'il n'est pas si violēt, mais plus benin, aussi n'est il pas besoin de le piler si exactement.

Le Rhabarbe veut estre diligemmēt pilé, quand on à volōté de renforcer les entrailles par son adstriction, ou bien quand on veut prouoquer l'vrine: comme les Myrabolans aussi.

Les autres demandent d'estre pilez grossierement, à fin qu'ils arrestent plus longuemēt en l'estomach, & à fin qu'ils n'aprochent pas si soudain l'orifice des vaisseaux: & aussi nous pilons, les medicamens laxatifs grossieremēt, à fin que seiournant longuemēt en l'estomac, qui n'est pas vne partie des principales, & qui est preste à euacuation, ils puissent attirer de la reste du corps: & qu'ils ne paruiennent pas iusques aux parties prin

principales en leur entier, lesquelles ils pourroyent offenser: car il suffit bien que leur faculté, ou leur vapeur, ou pour le plus vne bien petite portion de leur substance, paruienne iusques à ces parties-la.

Il faut aussi piler grossierement, les simples la vertu desquels se pourroit perdre, si on les piloit longuement: comme on voit par experience, que la Scammonée perd sa vertu laxatiue, si elle est longuement pilee.

Par mesme raison, les medicamens qu'on fait pour conforter l'estomac, doyuent estre grossierement pilez: à fin qu'a-restant longuement en l'estomac, ils aident tant mieux la digestion, & que les viandes ne puissent pas si facilement empescher leur vertu.

Pareillement les choses Aromatiques, lesquelles on met és compositiōs, seulement pour y laisser leur vertu, & pour leur donner bonne saueur & bonne odeur, & non pas pour augmenter la compositiō par leur substance: cōme nous pilons grossierement la Canelle, quand nous la mettons dans les colatures, pour les aromatiser: & le Cardamomum aussi, le Gingembre, les Gyro-

fles, le Macis, le Bois d'Aloës, la Spica, & le Saffran: lesquels nous pilons grossierement, quand nous passons le vin miellé parmi, dans vne estamine, ou vn linge bien cler.

Dauantage, les simples seruans à dissoudre & dissiper les ventositez, veulent par mesme raison, estre grossierement pilez: comme en la composition Diospoliticon ou Diaciminum, on pile les simples grossieremēt, à fin qu'ils purgent & facent leur action plus longuement cōtre les vëtositez, vray est qu'ils feront aussi leur actiō plus tard, & avec moins de vertu, que si on les auoit bien puluerisez: mais aussi si on les puluerise exactement, ils ne dissoudront pas les ventositez fort longuement, & leurs facultez en seront plustost dissipees, & si passeront incontinent par les vrines lesquelles ils prouoqueront, veu qu'ils sont chauds & secs.

Il y a aussi des simples, qui veulent estre seulement rompus en assez gros morceaux, à fin de les brusler apres: cōme le Litharge qu'on veut brusler, veut estre rompu en pieces de la grosseur d'vne Noix commune: la Pierre Phrygiennae qu'on veut brusler; doit estre  
premiere

premierement mise en morceaux de la grosseur d'une Noisette.

Il y a aussi des autres qu'on pile, à fin de les laver plus nettement, mais il en sera parlé amplement, quand nous traiterons de la lotion de simples.

Par ce discours on peut cognoistre, qu'un mesme medicament veut estre tantost pilé delié, & tantost grossierement, selon l'intention diverse à laquelle le medecin pretend: comme le Rhabarbe, le Cabaret, le Nitre, le Thym, le Calament, le Glayeul, l'Hysope, le Pouliot, l'Origan, & le Cumin, demandent d'estre puluerisez bien subtilement, quand par iceux nous voulons prouoquer à vriner, comme dient Galien & Mesues: mais au contraire nous les pilons grossierement, quand nous voulons purger par le bas.

De mesme la Scammonee, la Coloquinte, & autres qui sont fort laxatifs, veulent estre quelquefois pilez grossierement, comme quand la Scammonee entre és pilules, & la Coloquinte és trochisques: & d'autresfois subtilement, pour les raisons que nous auons deduites cy deuant.

Toutesfois le Rhabarbe veut estre  
pilé

pilé delié, & la Coloquinte fort delié, quand nous la voulons faire prendre incontinent, sans la rien piler apres, comme on fait quand on la met en Trochisques. On pile aussi grossierement la Scammonee, quand on la veut mettre en quelque decoction, ou qu'on la met en quelque composition, qu'on garde long temps deuant qu'en vser: ce qui se fait à fin que sa force ne se perde en la cuisant, ou pour la longue fermentation.

Les simples aussi que nous voulons paruenir iusques aux parties lointaines, nous les pilons fort delié: mais si nous voulons que ces simples mesmes arrestent longuement en l'estomac, aux intestins, & aux premieres veines, il les faudra piler vn peu plus grossierement.

De toutes ces choses susdites, on peut establir vn ordre, lequel doit estre obserué en pilant les simples: à sçauoir qu'on mette premierement dans le mortier, & qu'on pile aussi en premier lieu, les choses grosses, dures, & gluantes: comme sont les racines, les fruiçts de quelques arbres, quasi toutes semences, côme aussi si les simples qui ont vne mouëlle gluâte. Vn peu apres il faudra  
mettre

mettre les simples aromatiques, qui s'ont aussi mal aisez à piler, comme sont le Jonc odoriferant, le Calamus odoratus, la Zedoaria, le Gingembre, la Galanga, la Glayeul Sclauon ou celui de Florence, ou le nostre commun qui est blanc, le Costus, le Cardamomû, le fruit de Baume, les Cucubes, le Poiure, & la Noix muscate, la Cannelle, le Cinnamome, & les Gyroflës. Apres tous ceux-là, il faut adiouster les sucs, les liqueurs, & les larmes qui se peuvent pulueriser avec les autres choses, cõme nous l'auõs discou ru cy deuant, quand nous auons enseigné qui sont celles qui se peuvent pulueriser, & avec quoy, ou si elles se peuvent pulueriser toutes seules & à part.

Mais quant aux semences huileuses, il faudra en premier lieu oster l'escorce & puis les couper menu, comme il sera dit vn peu apres, à fin qu'elles ne rendent le reste des poudres gluât, de sorte qu'on ne les puisse apres passer par le crible : telles sont les semences de Cocombre, Courge, Melon, Citrulle, Carthame, Coings, Pistaches, Pignolatz, Amandes, & semblables.

Quant aux Mineraux, le plus souuēt on les pile à part, & tous seuls, les arroufant

fant par fois d'un peu d'eau , à cause de leur sicité, à fin que le plus subtil ne s'en uolle, ou que la vertu ne se perde, cōme nous auons monstré cy deuant. Il est bien vray que la Chalcitis, le Vitriol, le Verd de gris, le souffre, la Sandaracha, & quelques autres qui ont encores quelque humidité, n'ont point besoin d'estre arrousez.

Des suc, liqueurs, larmes, & des parties des animaux, il en à esté amplement traité cy deuant.

En pilant il faut couvrir le mortier avec du papier, ou avec de peau, & mesme par fois il la faut mettre en double ( comme nous auons dit en la composition de la Theriaque ) ce qu'il faut faire, ou à fin que le plus delié de la poudre ne s'en aille, & quelque fois à fin que la poussiere, qui est mauuaise & facheuse, ne chatouille le nez de celuy qui pile, comme il aduient quand on pile l'Euphorbe, le Turbith, & plusieurs autres.

*De quelques especes de preparation qui seruent à la triture ou qui suppléent son lieu.*

#### C H A P. XV.

**N**OUS auons quelques façons de faire, qui sont cōme preparatifs pour mieux

mieux piler, ou mesme qui peuuent tenir son lieu : comme sont quand on fraye quelque simple à la queux medicinale, quand on masche vn simple, quand on le coupe menu, quand on le rompt, quand on le rascle, quand on le lime, ou qu'on le rape.

On à de coustume de frayer ou frotter à la queux medicinale (comme est celle des Barbiers) les Colyres secs, soit qu'ils soyent desia reduits en Trochisques ou que la matiere soit encores toute entiere, les incorporât avec ce qui est liquide au blanc d'œuf, ou avec laiët, ou avec suc de Roses, ou mucilage de semence de Fœnugrec, ou de Coings, ou de Malue, ou de Guymaue; ce qu'on fait à fin que la matiere de ces colyres estant bië Puluerisee, n'offence point par son aspreté, l'œil qui est desia malade.

On peut auili comprendre sous ce frottement, quand on fraye l'Amidon, ou la Ceruse contre vn crible, à fin de les mettre en poudre.

Nous faisons quelque fois mascher des medicamens, és maladies de la bouche, de la gorge, de la canne du poulmō, du poumo, du gosier, de l'estomac: cōme cōtre la douleur de dents on fait  
mascher



mascher la Peruenche, les fueilles & tendrons de fresil on, la racine de l'Escclere, de Plantain, & de Passefleur, selon la doctrine de Galien traitant des simples.

On coupepe les grosses Racines, & celles qui sont par trop longues, les herbes aussi soyét vertes ou seiches: les grosses fleurs, comme sont les fleurs de Nenuphar, de Roses, de Saffran, & la mouëlle de la Coloquinte, nostre Acacia commune, & les Trochisques de Galia: & les simples capillaires, comme sont la Soye, les cheueux, & la Laine: les bois aussi, comme le Guaiac, les Santals, & le Bresil: pareillement les raboutures, & lames qu'on fait avec vn ferrament, des Cornes, Ongles, Os, Yuoire, Vits, & cuirs des animaux, de la colle de Poisson, & de la colle forte.

L'instrument avec lequel on les coupepe, est tout ferrament qui tranche, ou des cizeaux: mais les bois se peuvent aussi mettre en piecés, avec vn pilon de bois, garny de pointes de fer fort aiguës. Or apres qu'ils sont ainsi coupepez, on se sert des vns pour mettre és decoctiōs & teintures, comme le Guaiac, le Bresil, & semblables: les autres on les

les coupe, à fin que mieux & plustost on les puisse mettre en poudre, ou bien on les racle premierement, & puis on les coupe menu. Il faut iuger le semblable de la façon de rompre, racler, raper, limer, desquelles nous auons parlé: à sçauoir que quelques fois on s'en sert pour cuire apres, & d'autresfois pour quelque autre fin & vsage. Côme pour exemple, on coupe bien menu avec vn tranchant de cordonnier, le demenant çà & là, ou frappant longuement avec vn cousteau, ou avec deux ou trois cousteaux qu'on agêce entre les doigts, de l'une des mains ou de toutes les deux, les semences huileuses, & qui sont vn peu grossiettes, car quand on les pense piler avec le pilon, elles s'escachent plustost, & se rendent huileuses. Or on les hache toutes seules, apres toutesfois leur auoir osté l'escorce, ou bien on met vn peu de Sucre parmy, à fin qu'elles ne se rendent par trop grasses & huileuses: il faut mettre dessous vne facille de papier bien blanc & bien net, & le changer souuent, à sçauoir quand il est desia couppé, & mettre au dessous du papier, vn ais bien lissé & poly. Voilà comme il faut couper les semences de Courge,

de Cocombre, de Melon, de Citrulle, de Cotton, de Cerifier, de Prunier, les Amandes, les Pistaches, les Pignolats, les Anacardi, les Ben, les Chastaignes, les Noisettes, les Noix, les Chastaignes d'eau, le Carthame, de l'herbe aux poux: lesquelles semences se peuuent aussi piler autrement, cōme nous l'auons monstřé cy deuant, quand nous auons parlé de la maniere de piler les semences en general.

Il faut aussi coupper ainsi menu les Dattes, apres toutesfois les auoir bien nettiez dehors & dedans, quand ils entrent en quelque composition cordiale. Il est bien vray que par fois nous les coupons grossierement, puis les meslōs parmy le reste que nous voulons piler, mesmement quand ils sont en petite quantité, & qu'ils sont fort secs, quelquesfois nous les faisons seulement tremper quelque temps en vinaigre, comme douze heures ou enuірō, apres nous les pilons, & les passons par vn crible, les remuant avec vne cuilliere, ou avec la main, comme on fait au Diaphenicum, en la composition duquel aucuns meslent quelque quantité d'Amandes, pelees avec le couıteau, & trempées  
avec

avec les Dattes dans le vinaigre, avec lesquels aussi ils les pilent & les passent.

Nous auons accoustumé de rompre à tout les mains, les choses tendres & menues, comme les poignées des herbes que nous rompons, les tordant avec les doigts, & les petites & menues racines, & qui sont aisées à rompre, les escorces aussi qui ne sont pas trop mal-aisées à mettre en pieces, car quand elles sont difficiles à rompre, nous les coupons avec quelque ferrement, ou les cassons avec vn pilon.

Nous auons de coustume de racler, comme i'ay dit, l'iuoirc, les Cornes, les Ongles, les Verges des animaux seiches, les cuirs seichez, la colle de Poisson, la colle forte quand elle est bien seiche, les bois de Guaiac & de Bresil, & quelques autres, à fin qu'ils laissent mieux leur vertu en la decoction, ou à fin de les piler apres. Nous racions aussi l'escorce de Turbith, iusques à ce que le blanc se monstre, comme Mesues l'en-seigne: on racle pareillement la racine de Regalisse, auât q̃ la piler, & les autres racines, & leurs escorces, mais cela se fait plustost pour les nettier q̃ pour autre chose, de laq̃lle il sera parlé cy apres.

On rape aussi avec vne rape, le boys d'Alisier, de Guaiac, de Bouys, le Liege, L'ynoire, & les autres choles dures, lesquelles rendent vne scieure, (quand on les scie avec vne scie commune) qui ne differe gueres de celle qu'on en tire avec vne rape, ou grosse lime.

Nous auons aussi vne sorte de Rape, qui est faite d'une lame de fer blanc deliee, pertuisee en plusieurs lieux, avec laquelle nous rapons en frotant l'Agaric, la Noix muscate, le Gingembre, & les pommes de Coing aussi, car par ce moyen on en tire plus de suc que si on les piloit au mortier.

Dauantage nous auons accoustumé de limer l'Or, l'Argent, l'Etain, le Fer, l'Acier, le Plomb: les vns pour les brusler apres, & les autres pour nous seruir de la limaille telle qu'elle est sans brusler, comme la limaille d'Or & d'Argent, bien est vray que ie serois d'aduis qu'au lieu de la limaille, on vst de l'Or & Argent en feuille.

On lime aussi les Boys qui sont fort durs, comme le Guaiac, les Sâtales, le Bresil, le test de la teste d'un homme, les dents & machoires de Brochet, les cornes de Cerf, de Chieure, de Licorne, & les

les Ongles d'aucuns de ces animaux, & l'iuoir:pareillement la verge d'vn Tau reau, & d'vn Cerf, la colle de Poisson, la colle forte, lesquelles on peut aussi raper & couper, comme nous auons monstre.

Il est vray qu'il n'y à pas grande difference entre raper & limer: sinon que les raboutures qui se font avec la rape, sont plus grosses que celles qu'on fait avec la lime, à cause que les instrumens avec lesquels on rape, ont les dents plus grosses & plus rudes que non pas la lime. On à aussi vne autre façon de racler, comme quād on dole & rabote le bois, de laquelle on se pourroit bien seruir, tant pour faire decoctiōs, comme aussi pour piler apres.

*La façon & maniere de cribler.*

CHAP. XVI.

**A** Pres auoir traicté par ordre des diuerses façons de piler, il me semble qu'à bon droit la façon de cribler doit suyure, d'autant que par le crible nous separons ce qui est net & bien delié, d'avec ce qui est sale & grossier, comme nous voyons que les boulangers se-

parent la fine fleur de farine d'auec le son. Il y a aussi mesme raison à cribler qu'à piler, & pourtāt les choses qui veulent estre pilees delié, veulent aussi estre passees par vn crible delié, & celles qui veulent estre pilees tres-delié, estre passees & bluttees par vn crible tres-delié, comme les poudres qu'on appelle cordiales, lesquelles on passe par vn crible de Soye, qu'on dit communement Tase-tas, le demenant entre les mains : les metaliques aussi qu'on pile fort delié, pour mettre es medicamens qu'on fait pour les yeux, doyuent aussi estre bluttez en vn crible fort delié: pareillement les choses qu'on veut faire seruir à prouoquer l'vrine, & à ouurir les obstructions. Et au cōtraire, les choses qui seruent à lascher le ventre, & à purger, comme elles veulent estre pilees grossierement, aussi les faut-il passer par vn crible grossier & rare. Les choses aussi qui demandent d'estre pilees à part, doyuent aussi estre cribles à part (voire s'il les faut cribler) cōme sont les Metaliques, lesquels estans meslez avec les autres, passent plus soudain, & auant qu'estre entierement puluerisez.

La fin pour laquelle nous criblons,  
est

est quelquesfois pour piler mieux, & le plus souuent pour pouuoir mieux mesler les choses, quand elles sont ainsi bien menues : Car apres que nous auons criblé, ce qui reste qui n'a peu passer par le crible, nous le remettons dans le mortier, & le pilons derechef: & comme i'ay dict, nous passons en vn crible grossier & cler, ce que nous voulons qui soit grossier, & en vn crible delié, ce que nous voulons que soit delié: à cause dequoy il a fallu inuenter plusieurs & diuerses sortes de cribles.

On fait les vns avec les escorces de Tillet, coupees delié, esgalement toutesfois, lesquelles on entrelace en façon de Treillis, lesquels sont fort propres pour cribler les sciures de Guaiac, & les matieres desquelles les teinturiers se seruent, & les autres choses qui sont ainsi pilees grossierement. I'ay veu des cribles faits d'un petit ais pertuisé en plusieurs lieux, qui estoient fort propres à passer l'Argille. On en fait des autres qui n'ont pas les pertuis si larges q̃ ceux cy, & qui ne sont pas aussi quarrés, mais ronds, ou longuets, & les fait on de parchemin, cousu à vn cercle de boys,



avec lesquels on crible le froment, l'Orge, & les autres especes de bleds : on en nettie bien aussi souuent les legumes, pour oster les autres semences qui sont parmy, qui sont toutesfois moindres, car ces petites semences passent aisément par les pertuis qui sont assez grâds, & la bonne semence qui est grosse, demeure, à cause qu'elle ne peut passer par les pertuis.

Il y a des autres cribles qui sont tissus de soyes de cheual, agencees en façon de treillis, & tendues d'une part & d'autre avec deux cercles de bois, & quand on veut cribler quelque chose, on les prend par le cercle de dessous, & les secout on & les heurte à quelque chose : & le cercle de dessus sert à contenir les matieres qu'on veut cribler. Et de ceste espece de cribler, il y en a de plusieurs sortes qui seruēt à diuers vsages : car les vns ont le tissu de poil de cheual, seulement tendu entre deux cercles de bois, & les secoüant tout doucement avec la main, la poudre tombe dans quelque plat de bois qu'on aura mis au dessous pour receuoir, ou sur du papier, & couure-on le dessus du crible avec du papier, à fin que la poudre ne s'enuole, &  
se

se sert on de ces cribles ainsi faits quand on veut cribler quelque poudre qui n'est pas de grand pris.

Mais il y en a des autres qui outre le tissu qui est entre deux cercles, ont vn fond au dessous, & vn cercle au dessus, qui se peuuent oster quand on veut, & sont clos & l'vn & l'autre, avec vne peau de mouton: le fond sert à receuoir la poudre qui passe, & le couuercle garde que la poudre qu'on veut passer, ne se perde ou s'enuole: Or de ces cribles, il y en a plusieurs differences, car les vns sont plus clers & rares, les autres plus espez & serrez, & chascune sorte à son vsage, non pas seulement pour la diuersité des medicamens qu'on y peut passer, mais aussi pour la diuerse sorte des compositions qu'on en peut faire. D'auantage, il y en a de ceux-cy qui au lieu du tissu de poil de cheual, ont vn tissu de Soye ( qu'on appelle Tafetas) lequel est ou blanc, comme quand on s'en veut seruir pour passer la poudre des electuaires blancs, comme sont la poudre du Diagragant, & du Diarhis: ou bien ce tafetas est rouge, lequel est propre à passer la poudre des electuaires rouges, comme sont le Diarhodon, la poudre

de trois Santals, de Diacubebé, & de Diamargariton.

Or ceste sorte de cribles, comme elle est la plus precieuse de toutes les autres aussi s'en sert-on és poudres de grand prix, comme sont communement celles qu'on appelle cordiales; & si se faut bien donner garde aussi qu'on ne face de ceux cy, comme nous auôs dit, de ceux qui sont faits de poil de cheual, à sçauoir les demener & secouër rudement sur vne table, ou sur quelque autre chose solide, mais il les faut branler doucement avec la main, sans aucune violence, à fin que rien ne passe sinon, la poudre la plus delicee.

On se sert aussi quelquesfois d'un linge pour passer, au lieu de crible, & ce linge est quelque fois cler, & d'autres fois ferré, & principalement és metaux, & corps terrestres ou de terre: on fait d'ôc ce sas large, à fin qu'il puisse contenir ce qu'on veut passer, puis on l'encloist dans vne caisse de bois, ou d'autre matiere, qui soit assez grande, a sçauoir entre le couuercle & le corps de la caisse, & la ferre on, puis on le secout bié fort avec la main, sur la banque ou table de l'apothicaire; & met on dedans le sas, avec ce  
qu'on

qu'on veut passer, vne once, ou vn autre pois, pourueu qu'il soit de Plomb, à fin que par son mouvement & pesanteur, il aide à passer ce qu'on veut passer: le commun appelle ceste maniere de faire Cicotrinizare, ayant comme ie croy, corrompu le mot Grec Coschinizim, qui signifie cribler.

Or comme nous auons dit que les racines, herbes, semences, fruiçts, & plusieurs autres simples, se peuvent piler crus ou cuits, aussi les peut-on cribler: Vray est que plus souuent nous les faisons passer par force avec la main; ou avec vn cuillier, comme la Casse & les Tamarins, sans les rien piler, & voila côme on passe les racines de Panicaut, de Satyrium, de Reffort, de Serpentine, apres les auoir cuites & pilees, en la composition de Diasatyrium.

Vray est que ceste maniere de passer de laquelle nous parlons à present, se fait sans rien bouger ny mouuoir le crible, mais quand on passe les poudres, ou demeine bien fort & secout le crible, sur la table ou sur la banque, tellement qu'il semble qu'on vueille faire quelque tintamarre: D'autres fois on tient le Crible suspendu avec les deux mains,

main, & la on le remue & secoust: en d'autres on le demeine tant doucemēt, comme és poudres cordiales, sans toucher rien à la banque, de peur que ce qui n'est pas encores bien pilé, ne passe par force par le crible. D'autres on les frotte bien fort avec vne boîte de quelque matiere dure, ou avec la main.

La Ceruse, l'Amidon, & la Ceruse que on fait de *Serpentaria*, se criblent assez, si seulement on les frotte contre le crible à tout la main, comme aussi toutes les autres choses qu'on peut cribler sans piler.

Quant à ce qui n'a peu passer par le crible, pour n'estre encores assez delié, il le faut piler derechef, iusques à ce que tout soit passé, sinon quand ce qui reste est fort peu, & quasi assez delié, car lors on le mesle bien souuent avec le reste qui est passé, ou bien on le garde pour vne autre fois, qu'on pilera mesmes choses, & lors on les pilera & passera avec les autres.

Quant à la façon de couler, encores qu'elle ne soit en gueres differente de la maniere de cribler, toutesfois pource qu'elle n'est point en vsage és choses seiches, mais seulement és choses liquides,

quides, nous la reseruerons en vn autre lieu, pource aussi qu'elle est fort necessaire pour dissoudre, cuire, infuser, clarifier, & autrement preparer les simples, comme il sera dit cy apres.

*La façon de dissoudre.*

C H A P. X V I I.

**Q** V A N D on dissout, ou qu'on destrempe quelque medicament, il semble que ce soit comme vne façon de piler, à cause que par ce moyen les medicamens tant simples que composez, sont rendus doux à manier, vray est qu'on y mesle quelque humeur, & qu'ils ne demeurent plus secs, encore qu'ils le fussent au parauant, tellement qu'on peut dire qu'entre piler & dissoudre y a la mesme conuenance, qu'entre cribler & couler.

Dissoudre donc ou destremper n'est autre chose, sinon demesler & ramollir vn medicament, soit simple ou composé, qui estoit de consistence grosse & solide, avec quelque humeur & liqueur conuenable, & le rendre de moyenne consistence, ou quelque peu plus espez, ou plus liquide, selon la diuerse quantité qu'on

qu'on meslera du medicament qu'on veut destremper, & de la liqueur avec laquelle on le veut demesler, selon l'intention du medecin. Car si le medicament qu'on veut dissoudre n'est pas trop solide, & que l'humeur avec lequel on le veut destremper est fort liquide, & en bonne quantité, on le rendra bien plus liquide : mais si le contraire aduient, il demeurera plus espes & solide.

Or la fin pour laquelle on destrempe ainsi les medicamens est diuerse : car quelquesfois nous les destrempons ainsi, à fin qu'ils soyent plus aisez à aualler, & plus plaisans, & que plustost ils soyent distribuez & laschent plustost le ventre : car il est biē plus aisé & moins fascheux d'aualler vne chose liquide, qu'une chose solide, cōme il est plus aisé, & y a plus de plaisir à boire qu'à manger : & voila pourquoy iournellement nous destrempons la Casse, les Opiates, & plusieurs autres medicamens.

Par fois aussi nous les faisons dissoudre, à fin de les mieux pouuoir mesler avec les autres pour faire vne composition, & pour les pouuoir apres cuire avec les autres, ou mesmes à part, car s'ils estoient secs, & qu'on les voulust faire

faire cuire , ils se brusleroyent incontinent : voila pourquoy bien souuent nous faisons dissoudre les suc , liqueurs , Gommcs , & larmes : comme l'Euforbe quand il est recent , on le dissout en huile , mais quand il est enuieilly , il n'est pas peut estre besoin de le dissoudre , comme dit Mesues.

Nous destrempons aussi bien souuent les medicamens ; à fin qu'ils puissent paruenir à la partie que nous les voulons faire seruir, ou qu'on les y puisse appliquer & faire tenir : & ainsi nous destrempons tous les medicamens que nous voulons Syringuer dedans les oreilles, dedans les Boyaux, dedans la Matrice , dedans la velcie , ou en quelque autre cavitè. Par mesme raison nous destrempons , avec plus grande quantité d'huile, le Ladanum , pour vn qui à les cheueux longs , ou qui est à demy tondu , que s'il estoit tondu au Rasoir.

Quelquefois aussi on destrempe les medicamens , à fin de les pouuoir couler, & en les coulât les nettier de toutes ordures, comme nous destrempons les liqueurs en vinaigre , ou autre humeur propre,



propre, & apres les coulons & nettions, comme sont l'Ammoniac, le Galbanum, l'Opoponax, & le Sagapenum. Les sucz sechez pareillement, les gommes, les resines recentes, & quelquesfois les vieilles veulent estre dissoutes quand on les veut mettre és electuaires mols, és pilules, liniments, onguents, cerats, & emplastres, mais il faut noter que les resines se dissoluent mieux en huile, ou choses huileuses, & les gommes en liqueurs aigueuses: ou meisme quand elles sont recentes, elles seruent à dissoudre les autres plus seiches, vray est que comme i'ay dit, chascune avec son semblable, ce qui se fait quand on veut, que la composition demeure molle, pour laquelle fin, on fait cuire iournellement plusieurs tels medicamens.

Quant aussi elles sont en petite quantité, meslees avec grande quantité de choses seiches, on les peut puluerizer, comme en la poudre de Hiera Diacolocynthidos.

*Lib. 8. cõp. ph. p.* Le Lycium doit estre dissous en eau, selon le dire de Galien, quand on s'en veut servir contre le flux de sang.

*Lib. 4. cõp. phar. par.* On lesche la Poix liquide destrempee avec du miel.

On

On destrempe la gomme Diagragat, en vn blanc d'œuf pour faie vn medica- ment qui soit propre à la Canne du poulmon.

On incorpore ensemble le fiel du poisson Searus, avec la Myrthe Itacé.

Es maladies & vlceres de la bouche on dissout les medicamens avec eau, ou eau miel, à fin de les pouuoir garga- rizer.

On peut dissoudre en telle humeur qu'on voudra, & sans chaleur, mais plus soudain avec chaleur, le vray Boli ar- meni, la terra Sigilata vraye, la Chaux, le Sel, le Sucre, toutes choses sucrees, la Manne, la Cerusse apres auoir comme bouilli longuement, la Chalcitis, le Vi- triol, le Verd de gris, & la Rouille: vray est que ceste derniere se ramollit plu- tost en huile.

On peut dissoudre avec vin-aigre bien fort, mesmement quand il est di- stilé, ou en suc de limons, les perles, la Coquille des œufs, les pierres des reins & de la vescie, l'vn & l'autre Corail, & si on les fait seicher, on les peut apres fortaiement mettre en poudre: & le Precipatum, le Sublime, & le Cinabre, se conuertissent derechef en vis argët.

Les Alchimistes aussi ont bien trouué le moyen de dissoudre l'or, l'argent, & les autres metaux, par le moyen de leur eau fort.

On peut donc dissoudre les simples, à sçauoir l'Ammoniac, le Sagapenum, Galbanum, Opopanax, l'Encens masle, l'Opium, la Scammonee, l'Aloës, l'hypocistis, le suc de Regalisse, le Pissasphaltū (ientens la Mumie) avec eau simple, ou avec eau de vie, avec vin-aigre, & semblables, & si on les dissout tous froids, on y mettra beaucoup plus de temps que si on les faisoit chauffer : car si ces liqueurs sont bouillantes, elles se dissoudront soudain, à sçauoir les cinq premieres en vn certain suc cōme laiēt, & les cinq derniers en vn suc noir.

Galien pour faire les Trochisques dia-opiu, faisoit dissoudre l'opium en vin cuit.

Qui mettroit tremper les choses susdites en huile froid, encores qu'elles y demeurentoyent six heures, elles ne s'amolliroyent point, mais si l'huile est chaud, l'Opium, la Scammonee, l'Aloës, l'hypocistis, le suc de Regalisse, se dissoudront, & les autres s'amolliront seulement, mais apres il se rendurcissent,  
mesme

mesmement l'Ammoniac. On peut dissoudre dás le mesme huile, ou dás les liqueurs predites (pourueu qu'elles soyent chaudes) le Ladanum, le Mastice, la Myrrhe, le Bdellium, la Sarcocola, le Styrax, & la gomme Arabique.

On dissout la Sarcocola, en eau Rose, quand ou veut faire les pillules de Sarcocola. Le Castoreum, la Mumie, s'amolissent soudain: mais la gomme Diagragant met plus long téps, & si on les fait amolir en huile, ils se rendurcissent vn peu apres, hormis le Mastice lequel estant dissous en huile, ne reuient iamais à sa premiere nature, si non qu'on le face cuire à force de feu, ce qu'on peut remarquer en l'huile Mastichin.

Nostre Acacia commune, le Souffre, & le Gagates, encores qu'on les mette tremper en quelqueune de ces liqueurs toute bouillante, ils ne se changeront aucunement: mais il faut dissoudre l'Acacia peu à peu avec vn piló, la brisant tousiours, & y meslant quelque humeur. Quant au Souffre, & au Gagates, ils se fondent au feu, cômé font aussi toutes liqueurs, l'Opiũ, le Ladanum, la Chalcitis, le Vitriol, toutes les especes d'Alũ, le vray bois d'Aloës, & l'ynguis odoratus.

Le vitriol & la Chalcitis se fondront en telle liqueur qu'on voudra, pourueu qu'elle soit chaude: & meſme dâs le vin-aigre, encore qu'il ſoit froid.

Le verd de gris, le Sori le Nitre, & l'Alun, ne ſe fondent point au vin-aigre quâd il eſt froid, ne fait pas auſſi la Craie, mais il la faut faire bouillir longuement, & elle en deuient beaucoup plus fraiſſe, comme les autres auſſi.

Le Sucre & la Manne, ſe peuent diſſoudre en telle humeur qu'on voudra: meſme le Sucre ſe diſſout diuerſement, pour faire Sirops, Iuleps, Apozemes, electuaires ſolides, Penides, Trochiſques, & pluſieurs autres compoſitiôs, comme on peut voir en l'Antidotaire de Meſués: le meſme autheur fait diſſoudre le Sucre, en eau miellée, pour faire le Dia gingibert: Mais la Manne ſe diſſout le plus ſouuent en du bouillô chaud, puis on la coule afin de la nettier des fueilles de Meleze qui ſont par-mi (à cauſe qu'on la cuillit le plus ſouuent ſur c'eſt arbre) & des autres ordures.

La Manne, la Caſſe, & les Tamarins, ſe doyuent diſſoudre dans les ſucs rafiſſés & purifiés, & apres les couler, quand on veut faire le Diamána, & autres cōpoſitions.

positions:& se meſlét beaucoup mieux ainſi, que non pas ſi on les cuit: on diſſout la Manne en ius de Roſes rouges, quād on veut faire l'electuaire de Man na. Quant au Muſc, l'Ambre gris, & le Camſtre on les deſtrempe le plus ſouuēt en quelque liqueur,& puis on les meſle avec le reſte de la compoſition.:

Le Tartre ſe conuertit & ſe diſſout en huile, par la force de la froideur, mais ceſte façon de diſſoudre eſt bien diuerſe de celle que nous parlons.

Mais il faut eſtre aduerti & ſe prendre garde d'vne choſe, aſçauoir que quand on fait conſumer le vin-aigre ou quelque autre humeur, avec lequel on aura diſſous l'Ammoniac ou vne autre liqueur, les faiſant cuire, qu'on ne ſ'abufe: car bien ſouuent elles iettent d'elles meſmes vn certain humeur, lequel ſi on fait conſumer, on oſte toute leur humidité,& les rend on ſi ſeiches & arides, qu'elles ne ſçauroyent ſeruir pour faire emplaſtres.

Quant aux compoſitions, aſçauoir quelles il faut diſſoudre,& avec quelle humeur, ce n'eſt pas ici le lieu ou nous auons delibéré d'en traiter: mais cela appartient à la matiere ou il eſt traité de la

composition des medicamens en particulier

Toutesfois il y à plusieurs compositions, cōme sont les ellectuaires laxatifs, lesquels pour estre de mauuais goust, ou malaiséz à aualer, ou bien pource que nous voulons qu'ils descendēt soudain, & ne craignons point qu'ils facēt souleuer le cœur, nous les destrempons en eau de ptisane, en eau-miel, en vin, ou en quelque autre humeur propre & conuenable. Nous destrempons aussi les Trochisques sur la queux medicinale, avec quelque humeur propre afin de faire des Colires humides. Les Eclegmes se dissoluent en la bouche, avec la salive.

Par cecy on peut cognoistre que le mot de dissoudre ne se prend pas ici si largement comme au quatriesme liure des Meteores chap. sixiesme, auquel lieu on cōpréd sous le mot de dissoudre, & amollir, & fondre ou liquéfier.

*La maniere d'amollir.*

#### CHAP. XVII.

**A**Mollir n'est gueres differēt de dissoudre, ni de fondre ou liquifier: & se fait quand les medicamens, soyent  
simples

simples ou compsez, sont rendus plus mols qu'ils n'estoyent: ce qui se peut faire ou en y meslant quelque humeur, mais non pas beaucoup, ou par le moyen de nostre chaleur, ou par la chaleur du feu ou du Soleil: le vulgaire appelle cela malaxer, & croy qu'il à prins ce mot du verbe Grec Malaxain qui viét de Malacto & signifie amollir & pestrir, aussi entendét ils ces deux choses par le mot de malaxer: & n'vsent gueres de ce mot, sinon quand ils veulent qu'on amolisse la masse de pilules avec quelque suc, ou quelque sirop, ou quelque autre humeur: ou bien és emplastres, quand ils veulent qu'on les amolisse y meslant quelque huile, ou quelque graisse, ou chose semblable.

On amollit par le moyen de la chaleur, les cornes, ongles, poils, sucs, liqueurs, & larmes de sorte mesme q si on les manie seulement entre les doigts chauds, on les rendra molles & traictables cōme la cire, & par là on cognoist qu'elles sont plustost amassees par froidur, qu'endurcies par seicheresse.

Le fer s'amollit par vne mediocre chaleur, & les autres metaux aussi, mais si la chaleur est trop forte, ils se fondent.



L'Yuoire mis à tremper dans du Zythum (qui estoit vn breunage duquel on vsoit en Alexandrie, & qui ressembloit fort à nostre Ceruoise) deuiant mol & traictable.

Les Perles, & le corail mis en infusio dans du vin-aigre distillé, s'amolissent, & mesme comme i'ay dit, se dissoluent.

*La maniere d'endurcir.*

C H A P. X I X.

**E**Ndurcir & amollir sont contraires; & l'endurcir nous sert par fois es cōduits, electuaires, Cerats, Emplastres, & geles que nous appellons. Or on endurecit vn medicament, ou en y adioustant quelques choses seiches, ou le faisant longuemēt cuire, ou biē le faisant geler & prendre par le moyen du froid. Quand a la maniere de seicher, nous en parlerons cy apres bien au long, d'autāt qu'on s'en sert en plusieurs medicamens; nō pas pour les rendre durs, mais à fin de les pouuoir garder, & pour les autres raisons qui seront la amplement deduites: De la façon de chauffer & refroidir, il en sera aussi parlé cy apres, ce qui esclaireira assez la maniere & façon d'endurcir.

*La maniere de fondre, & liquesier.*

C H A P. X X.

**F**ondre ou liquesier n'est autre chose, que rendre fluides & liquides les choses qui estoient amassees par froideur, & se fait par le moyen de la chaleur: tellement que ce qui est epeSSI & congelé par vne froideur foible, ou qui n'est pas de long temps, comme le Miel, la Cire, l'Huile en hyuer, le Beurre, les graisses, & les Resines, se fondra aussi par vne chaleur moderee cōme on voit fondre la glace, la neige, & la grelle. Mais les choses qui sont congeiees & amassees par vne longue froideur & grande, difficilement elles se fondent, encores qu'il y ait grande chaleur, comme l'or & le fer se fondent avec fort grande difficulté: l'Argent & le Bronze, non pas si difficilement: l'Etain plus facilement: & le Plomb sans difficulté: mais l'Antimoine, l'Orpin, la Sandarach, le Souffre, tous les Aluns (encores qu'il semble q̃ l'Alun fraille ou scissile s'a molisse seulemēt & nō pas qu'il se fonde ou rende liquide) le Chalcitis, le Vitriol le Misy, & le verd de gris plus tard: & le Sori fort tard, à cause qu'il est de sub-

stance plus terrestre, & qui tient plus de la pierre, comme aussi le Litharge. Toutefois si on melle parmi du verd de gris ou au double de vin aigre-huile, il se fondra bien plus soudain que si on y met le double d'eau-huile. Encores se fondent plustost que tous ceux-la, le Gages, l'Ambre à patinostres, l'Vngui odoratus, l'Asphaltú ou Bitume, la Mummie, & le bois d'Aloës.

Et encores plus soudain que ceux-ci, le Ladanum, le Suin de laine, le Castoreum, le sang de Bouc, la gomme Arabe, la gomme Diagrégant, le Cancaum, le Camfre, la Myrrhe, le Bdelliū, le Styrax, le Mastic, la Sarcocolla, la gomme de Lierre, de Geneure, de Cerisier, de Prunier & d'Amandier.

Les Resines se fondent encores plus facilement, & de mesme les liqueurs, comme l'Opium, l'Euphorbe, l'Ammoniac, le Sagapenum, le Galbanum, l'Opopanax, la Scammonée & les sucs de Regalisse, d'Hypocistis, d'Aloë, l'Elaterium, & nostre Lycium commun.

Et sur tous la Cire se fond aisément & bien tost: le Miel, la Mâne & le Sucre mis dâs quelque humeur que ce soit, se  
fron

fondront encores que l'humeur soit froid, comme fait le Sel.

Nostre Acacia commune, & quelques autres ne se peuuent pas fondre, mais on les dissout petit à petit y meslant quelque humeur, & les demeslant avec vn pilon, ou avec vn cueillier, ou bien avec la main.

Pareillement toutes les choses susdites (i'entens les suc, liqueurs, gommes & resines) s'amolissent comme i'ay dit, si on les met tremper dans quelque humeur chaude: mesme il y en a qui se destrempent, & d'autres qui se fondent du tout.

L'Ambre gris taillé menu se fond, selon que dit Mesues, en la composition nommee Alkermes.

Au reste la liquation est fort necessaire en la composition & mixtion des electuaires, pillules, onguents, cerats, emplastres, & presques de toutes autres compositions & mixtions.

Mais d'autant qu'es diuerses sortes de preparation, deiqueselles nous auons cy deuât parlé, nous auons fait souuent mention de la vertu de la chaleur, froidure, dessication, & humectation & qu'il en sera aussi souuēt parlé ci apres,  
il me

il me semble qu'il sera bon de parler premierement de ceux-cy, auant que traiter de la maniere de infuser, cuire, rostit, brusler, & autrement preparer, lesquelles preparations se font par le moyen de le chaleur, & des autres premieres qualitez.

*De la maniere d'eschauffer.*

C H A P. X X I.

**N**Ous traittons icy de la façon d'eschauffer, non pas entât que la chaleur dissout, amollit, fond, cuit, rostit, brusle, ou fait quelque operation apparente : mais seulement entant qu'elle depart & cōmunique vne chaleur temperée aux choses, laquelle est necessaire à la mixtion, ou pour parfaire quelque maniere de preparation, ou pour le droit & legitime vsage des medicamens, soyent simples ou composez,

Comme l'onguēt Populeum, duquel Galien parle au quatriesme liure de Sanitate tuenda, qui sert pour oster les lassitudes, doit estre chauffé au soleil de Mydi, à fin de le mieux assaisonner, & q̄ la faculté des simples soit mieux meslee comme l'autheur mesme le cōmande, Galien ordonne aussi de piler au soleil

leil tous les metaliques, soit qu'on les vueille lauer apres, ou s'en seruir à autre vsage.

Quand on veut couler quelque chose, on la fait chauffer premierement, à fin de la rendre plus rare, & qu'elle passe mieux: car les choses froides, à cause qu'elles sont comme prises & congelees, ne se peuuent couler, sinon qu'elles soyent fort aigueuses & liquides, cōme l'oximel de Galien: mais aussi les choses qui sont trop chaudes, elles passent ordures, & tout, à trauers l'estamine, sinon qu'elles soyent gluantes & visqueuses: & telles choses, ainsi gluantes veulēt estre coulees bien chaudes.

On baille à boire d'eautiede, à ceux qu'on veut faire vomir.

Nous chauffons aussi vn bien peu les medecines que nous voulōs faire prendre non pas seulement les medecines laxatiues, mais aussi celles que nous donnons pour conforter & renforcer, ou pour faire vriner, prouoquer les mois, ou les sueurs, ou pour desopiler les entrailles, principalement quand la saison est froide, ou que celui à qui nous la donnons à l'estomac refroidy, ou de nature, ou par maladie.

Nous

Nous faisons aussi chauffer l'eau & toute autre chose, que nous voulons apres refroidir ou en eau courant, ou en la neige: car la froidure entre & penetre mieux en vn humeur qui est rarifié par la chaleur premierement: comme on fait tremper le fer tout chaud, en eau froide & astringente, à fin de le rendre plus dur.

Nous eschauffons aussi mediocrement, les choses que nous voulons mettre en infusion, à fin qu'elles communiquent plustost leur vertu & faculté à l'humeur ou on les met infuser: car quand l'humeur est eschauffé, il deuiét plus subtil, & la chose qu'on veut infuser est rendue plus rare, tellemēt que la vertu est plustost attirée par la chaleur.

Il y a vne infinité d'autres choses qui ont besoin d'estre eschauffées, mais ce que nous auons dit de la maniere d'eschauffer, à esté plustost pour aduertissement en passant, que pour enseigner, non plus que de la façon de refroidir & humecter: mais quād à la maniere de desicher, elle est bien plus necessaire.

Nous faisons refroidir en eau courante, ou dans la neige, ou dās la glace les breuages que nous ordonnons pou,  
rabat

rabatre les grandes chaleurs des fiebres, & autres intemperies chaudes, & mesme par fois nous les faisons chauffer premierement. Comme aussi nous faisons refroidir ce que nous voulons faire prendre & congeler par le froid, comme le ius & decoction de quelque chair gluante que nous appellons communement gelee.

Nous faisons aussi refroidir toutes les compositions qui sont faictes à la chaleur, auant que les serrer.

Comme aussi tout ce que nous auons fait fondre à la chaleur, & que nous voulons apres faire endurcir, comme les electuaires solides, les onguents, & les emplastres. Les choses qui eschauffent & refroidissent, ont aussi vertu de desseicher, mais c'est par accident : parquoy il me semble que l'ordre requiert que ie traite de la façon de desseicher.

*De la maniere de desseicher.*

C H A P. X X I I.

**D**esseicher n'est autre chose que consumer l'humidité, laquelle est nuisible & damageable, ou superflue & qui prouoqueroit à vomir, ou qui causeroit pourriture, ou qui empesche de  
met



mettre en poudre , ou qui obfusque & surmonte la chaleur qui est necessaire: quelquefois aussi on consume quelque peu de l'humidité naturelle, mais il s'en consume bien beaucoup plus en rostissant & bruslant.

On prend le dedàs de la Squille, ayât osté entierement toutes les pelures iusques au vif du dedans & coupe-on le dedans par rouëlles, lesquelles on fait cuire en eau, & faut souvent changer d'eau, iusques à ce que toute l'amertume & acrimonie de la Squille soit ostee: & puis on enfile ces rouëlles loin l'une de l'autre, tellement qu'elles ne se touchent point, & les met on ainsi seicher à l'ombre par quarante iours: Ces rouëlles ainsi seichees seruent à faire huile, vin, ou vain aigre Squillitique: voila ce que Dioscoride en dit: toutesfois il ne fait point de mention qu'il faille avoir vn couteau de bois de Pin, ou de Cypres, pour couper la Squille, & vne aiguille de bois pour l'enfiler, comme Meues l'a remarqué, parlant du vin-aigre Squillitique: nī qu'il faille la laisser le cœur & le milieu de la Squille, ce qui est obserué auourd'huy de chascun, comme vne solennelle coustume: mais  
dit

dit seulement qu'il faut oster toutes les pelures de dehors, iusques au vif.

On préd du meilleur fourment qu'on peut choisir, & le pile-on grossieremēt, puis on le met tréper en eau, toute vne nuit, le lendemain on le presse avec les mains, iusques à ce que la cresse en sorte, & la laisse on rasseoir: estant rassis, on escoule l'eau peu à peu, qui nage par dessus, panchant tout doucemēt le vaisseau d'un costé: ce qui demeure au fond il le faut faire bien tost seicher sur du Cotton, ou au cœur du Soleil, à fin qu'il ne s'enaigrisse, & l'ayant serré, il le faut tenir biē couuert, pour crainte des vers: On pourra faire seicher cest Amidon, en hyuer au feu. On pourra faire de mesme du Ris, de l'Orge, & autres.

Les Roses quand elles sont à demy ouuertes, il les faut cueillir en téps clair & serein, le matin, puis qui pourta, les faire seicher le mesme iour, toutes entieres comme on les à cueillies, les mettant au Soleil, & les tournant souuent: car à grand peine se pourroyent elles seicher à l'ombre, encores qu'il vaudroit bien mieux: Apres qu'elles seront seichees, il faut arracher les fueilles, & les serrer en vn pot de verre bien cou-

uert, à fin qu'elles gardent leur couleur & odeur plus longuement: Celles de montaigne sont meilleures que celles des champs, & ne se diminuēt pas tant en seichant, car de celles-cy les dix liures reuiennent à vne liure, quand elles sont seichees, comme aucuns dient, & le mesme des Violettes.<sup>1</sup>

Mesues fait seicher la Squille, pour composer l'eclegme qu'il décrit pour les Astmatiques & pouffifs.

Pour faire le sucre Rosat & Violat, Mesues dit qu'il faut vn peu faire seicher les Roses, & les Violettes. L'hysope aussi qui entre en l'eciegma sanum: la Menthe, en l'eclegme des choses aromatiques: la Ruë, en l'autre Diaciminum de Mesues, comme aussi au Diospoliticon de Galien, mais il la faut mediocremēt seicher: car estant trop seiche, elle est par trop amere, & chaude: mais aussi si on ne la seiche rien du tout, elle n'a pas vne telle vertu pour dissoudre & dissiper les ventositez, à cause qu'elle à ie ne scay quelle humidité superflue, qui n'est pas cuite.

Pareillemēt toutes les autres herbes, veulent estre seichees à l'ombre, sinon que la necessité qu'on en à cōtraigne de  
les

les seicher au feu, ou au Soleil, car autrement on les met en petites poignées, puis on les pend au grenier, pour les faire seicher: après qu'elles sont seichées, on les met dans des sacs de toile, & les laisse on la mesmes au grenier.

Quant aux racines des herbes, après les auoir bien lauees, & osté le cœur de dedans qui est dur comme bois, il les faut mettre incontinent au Soleil, & la nuit les faut mettre en quelque lieu sec, & ou le vent donne, & l'endemain les remettre au Soleil, iusques à ce qu'elles soyent bien seiches. Que si le temps est couuert de nuées, tu les pourras faire seicher à la fumée, ou plustost aupres du feu, dans vn panier d'Estrain ou paille, ou de saulx: ou bien si tu auois trop affaire, & que tu fusses trop presse: fay bien chauffer vne poêle, puis l'oste de dessus le feu, & mets les racines dedans, & fay cela tant de fois, les tournant tousiours, que tes racines soyent seiches: mais quand tu remettras la poêle dessus le feu, pour la faire reschauffer, il faudra oster les racines: Voila côme tu pourras faire seicher les racines de Valeriène, d'Aunee, & de nostre

Acorus commun: Pareillement les racines de quelques arbrisseaux, comme de Cappres, & de Tamarix: Aussi de quelques arbres, comme de Fresnoe, de Meurier, & autres.

Si les racines seiches sont encores mal aisees à piler, il les faut mettre dans du papier, & les faire seicher au feu, ou bien on les met dans vne poille chaude, & les presente on deuant le feu: ie dy au feu dans du papier, ou dans vne poille, ou au four, à lçauoir deuant le four, ou dessus, ou dedàs apres auoir tiré le pain.

On peut aussi faire seicher les mesmes racines, & les autres qui sont grosses, en la maniere qui s'ensuit: quand elles sont fraisches on les nettoie bien de toutes les petites racines, & les laue-on biẽ, puis on les met en rouëlles, lesquelles on enfile assez loin l'vne de l'autre, à fin qu'elles ne se touchent, puis on les pend en quelque lieu bien exposé au vent, pour les faire seicher, comme les racines de Glayeul, de Sarrafine ronde & longue, de Coulouaree & semblables: toutesfois il y en à qui se seicherõt bien sans couper, comme la racine d'Aron ou vit de chien, de Serpentine, de Ciellamen, d'Afrodiles: comme aussi celles qui

qui s'ensuyuent, apres toutesfois auoit osté le bois de dedans, à sçauoir les racines de Mandragore, de Panicaut, d'Ache, de Persil, de Fenail, de Ruscus, de Turbith, des deux Elebores, de Dictam commun, & de Thapsia. Les autres petites racines, se pourront seicher à l'ombre, sans rien oster le bois de dedans, comme les racines de Cabaret, d'Asperges, & de Gramen ou dent de Chien.

La Coloquinte se recueille au moys de Septembre, lorsqu'elle commence à iaunir, & choisit on les plus grosses, & qui soyent venues en vne plante ou y en auoit plusieurs. On la met au Soleil le iour, car elle est fort mal aisee à seicher, & la nuit on la met en lieu bien exposé aux vents, ou bien si le temps est nebuloux, on l'enfile, & la met on seicher à la fumee; apres on luy oste l'escoree de dessus, & à fin qu'elle se puisse piler, on l'enveloppe en du papier, & la met on au Soleil, ou pres du feu, ou à la fumee, enuiron vn quart d'heure.

On fait seicher l'Aloës, apres l'auoir bien imbibé & abreué de la decoction des choses aromatiques, premierement à l'ombre, & apres au Soleil. Semblablement les Myrabolans pilez avec huile

d'Amandes douces, bien frottees l'espace de trois iours, en Esté, & arrousez autant de fois qu'il estoit besoin, doyuent estre seichez premierement à l'ombre, & apres au Soleil. Toutesfois les Trochisques qu'on fait des Myrabolans, ne veulent estre seichez qu'à l'ombre.

Le Poulmon d'un renard bien sain, prins à la chasse, & ieune, veut estre premierement bien laué, apres le faut couper du long de l'artere veneuse, ou plustost de la veine qui ressemble à vne artere, & le bien emonder du sang, & le bien laver avec du vin blanc, odorant, & vn peu chaud: apres le mettre dans vn pot, en vn four vn peu chaud, pour le faire seicher: apres qu'il sera refroidi, il le faut envelopper avec fueilles d'Aluine, & le serrer pour garder.

Tu auras beaucoup de tels exemples, cy apres, quand nous parlerons des choses qui se preparent en plusieurs facons.

Les Amandes & les Pignolats, apres leur auoir osté la petite peau delicee que ils ont dessus, il les faut faire seicher en vn bassin, sur le brasier allumé, tous seuls, ou plustost avec du son, les demenant toujours & secouant, iusques à ce que

que toute l'humidité superflue, qui les fait rancir soit ostée: car autrement ils nuisent à l'estomach, & font roussir, à cause de leur qualité rance.

Les Prunes, les Figues, les Raisins, les Iuiubes, les Sebestes, les Poires, & plusieurs autres fruits demandent estre seichez au cœur du Soleil, & au defaut du soleil, on les fait seicher au feu: mais les fruits d'Aubespın veulent estre seichez à l'ombre.

Les fruits de Ronce qui ne sont pas encores meurs, demandent estre seichez au four, à fin qu'ils en soyent plus astringens, & les fruits verds de Meurier aussi, ou quand ils commencēt à rougir.

Les siels, on les fait vn peu cuire en eau chaude, dans leur vescuie mesme, & puis on les fait seicher à l'ombre.

Les Caillees ou presures des animaux, apres les auoir vn bien peu salez, on les fait seicher au Soleil pour les garder.

*De la maniere d'humecter les medicamens.*

#### CHAP. XXIII.

**O**N humecte les medicamens: tantost avec eau, tantost avec lait, vne fois avec vinaigre, l'autre avec huile, ou



auec quelqu'autre humeur, non pas seulement les simples, à fin de les mieux pouuoir mesler és compositions, & auec moins de nuisance : mais mesme bien souuent les compositions, cōme quand nous destrempons ceux qui sont gros & espez, auec quelque chose liquide, à fin que plus facilement & auec moins de fascherie on les puisse aualler.

Mesues au commencement de son liure des Antidotes, & en son liure des Simples, enseigne comme il faut humecter les Gyroffes, le Gingembre, & les Mirabolās, chebules & Embliques, pour les confire.

Le Mastie, l'Ambre gris, & le Musc, veulēt estre humectez & arrousez avec eau Rose, pendant qu'on les pile.

La gomme Arabique, & la gōme Diagragant, s'arrousent aussi avec eau de vie : les Myrabolans, la Scammonee, la Coloquinte, le Camfre, le Turbith, la Soye, le Saffran, l'Euforbe, & plusieurs autres, demandent d'estre arrousez & humectez avec huile d'Amandes douces, en les pilant.

Les Amandes, Pignolats, Pistaches, s'arrousent vn bien peu avec eau douce ou eau rose, à fin de les mieux piler, & à

fin

fin que le goust en soit plus plaisant & delicat, quand on veut faire des Marce-pains & Amandes, autrement ils rancissent, & ont vn goust fort mal-plaisant, & faschent l'estomac, tellemēt que mesme ils font venir appetit de vomir.

*La maniere d'infuser, ou mettre en infusion.*

CHAP. XXIIII.

**L'**Infusion approche fort de l'humectation: car en l'infusion on met tremper les medicamens, apres qu'ils sont grossierement pilez, ou taillez, sinon qu'ils soyent d'eux mesmes assez menus, & les laisse-on ainsi treper quelque espace, en quelque humeur propre à nostre intention, & le plus souuēt nous faisons que cest humeur est chauffé au soleil ou au feu, plus ou moins, plustost que froid. Il est vray que le temps qu'on les fait tremper est diuers, car quelque-fois on les met infuser demie heure, d'autres vne heure, d'autres plusieurs heures, plusieurs iours, plusieurs moys, selon la diuerse nature du medicament qu'on veut infuser, & autres intentions que le Medecin peut auoir. Car comme il y a des medicamens, qui ne deman-

dent pas d'estre pilez ou cuits longuement, aussi en'y a il qui ne veulent pas estre laissez longuement en infusion, à cause que leur vertu & faculté est foible & debile, ou qu'elle est seulement en la superficie, ou qu'ils sont de substance rare & lasche, les autres qui sont au contraire, veulent estre infusez plus longuement.

La diuersité aussi des intentions des Medecins, est cause que nous infusions plus longuement les vns medicamens que les autres, & que nous faisons (comme i'ay dit) l'humeur ou nous les voulons faire tréper, plus ou moins chaud.

Or la fin pour laquelle nous infusions les medicamens, est pour oster, ou pour le moins corriger la mauuaise qualité, & pour augmenter la bonne qualité: ou pour transférer leur vertu & faculté, à l'humeur dans lequel nous les infusions: lesquelles trois fins principales de l'infusion, Mesues a fort bié enseignées en son premier liure: si auons nous bien aussi en nostre troisieme liure de la Methode de composer les medicamens.

De nostre temps on vse de l'infusion, principalement és medicamens laxatifs: toutesfois on en vse aussi és autres,  
pour

pour faire les apozemes, Sirops, huiles, & autres compositions.

L'humeur dans lequel on les met infuser est diuers, pour la diuersité des intentions: toutesfois le plus souuent, on met infuser les medicamens laxatifs en petit laiët, à cause qu'il est aussi laxatif, & si est plaisant à la bouche: les autres on les met infuser en autre humeur, comme il sera dit cy apres.

Si on met le Turbith en infusion dans du laiët fraichement tiré, & puis qu'on le face seicher, il ne troublera plus le ventre.

Si on met l'Aloës tremper dans la decoction des choses Aromatiques, ou de la poudre de Hiera, & de quelques autres choses chaudes, il euacuera plustost les mauuaises humeurs qui sont imbibeés es tuniques de l'estomach: & si on met dans la decoction, quelque peu de Coloquinte, ou de Turbith, l'Aloës qui y aura trépé tirera les humeurs lointains, non pas de sa propre faculté & vertu, mais par vne vertu acquise.

Nous mettons en infusion le fruit & *Mesmes.*  
les fueilles de Thymelea, des Tithymales, & autres herbes à laiët, en fort vinaigre.

*Ibidem.* Les Myrabolans perdrôt la vertu que ils ont d'opiler, si on les met en infusion dans du petit laiët, ou dans du suc de Fumeterre, principalement si on met vn peu d'Aluine, ou d'Agaric, ou de Rhabarbe parmy.

On met le Sené en infusion, dans les sacs, l'espace de vingt & quatre heures, apres l'auoir pilé, puis on le fait bouillir vn bouillon ou deux, & le coule on & le presse, quand on veut faire le Sirop Saporis.

Nous faisons aussi infuser la Manne en suc d'Endiuie', puis la frottons avec les mains, & la coulons, quâd nous voulons faire le Sirop aigre ex Manna.

*Ibidem.* Quant au Rhabarbe, on le met infuser en eau de Cicoree, ou d'Endiuie, ou d'Ache, ou de Plantain, y adioustant par fois quelque peu de vin blanc, & Mesué est d'aduis d'y adioster vn peu de Spica, selon la diuerse intention des Medecins: Mais auant que le mettre en infusion, il le faut coupper en pieces delices comme fueilles, plustost que de le piler comme on fait communemët, à fin que sa vertu ne se perde.

*Ibidem.* Les Tamarins, on les met en infusion en petit laiët de Chicure, ou en iüs de Fume

Fume-terre, ou d'Oublon: si tu veux sçauoir les diuerses manieres de les mettre en infusion, tu pourras lire ce que Mesue en dit, traitant des simples.

On met les Roses & les Violettes en infusion, dans de l'eau, plusieurs & diuerses fois, à fin de faire le Sirop laxatif: on les met aussi en infusion en vinaigre pour faire le Vinaigre Rosat, & Violat.

Et quasi tous les autres simples laxatifs se peuuent infuser diuersemēt, comme Mesues enseigne fort bien, traitant des simples.

On fait tremper vingt & quatre heures en vinaigre, le Cumin, quand on veut faire le Diacyminum, apres qu'il à trempé, on le fait seicher sur le feu en vn pot de terre neuf & bien cuit, & fait on cela à fin qu'il puisse penetrer plus auant, & inciser les humeurs avec moindre chaleur. *lib. 4. sanit. tuend.*

Et par mesme raison, on met tremper les racines diuretiques vingt & quatre heures en vinaigre auant que s'en seruir: vray est que si on les veut faire cuire en eau, apres les auoir faites tremper, ce sera assez qu'elles trempent six heures au vinaigre. Pour mesme cause la semence d'Anis, d'Anet, d'Ache, d'Ammi, d'Amo

d'Anomum, de Carui, & de Fenoil, se mettent en infusion tout de mesme.

Mesues pour faire son oximel qui purge la melancolie, fait tremper les simples 24. heures en vinaigre blanc, en eau, & ius de Buglosse.

*Gal. lib. 6.* Le Coriandre sera fort bien corrigé, si on le fait tremper quelque téps en vinaigre de la decoction de Mariolaine.

*Simpl.*

Mesues pour faire le Diaphenicum, fait tremper les Dattes trois iours en vinaigre.

La semence d'Erysimũ doit estre trempée quelque temps en eau, auant que la mesler parmy les Eclegmes, à fin de rabatre sa trop vehemente chaleur.

Les Pignolaz verds, doiuent estre trepez en eau, à fin d'oster leur acrimonie.

En la composition de la Confection Hamech, on met les simples en infusiõ, dás du petit lait, l'espace de cinq iours, selon l'aduis de Mesues.

Les Lupins mis en infusion dedans l'eau de Riuiere, six, sept, ou huit iours, perdent leur amertume, & deuiennent doux: comme ils font aussi, si on les fait cuire en deux eaux, iettant la premiere.

Mesues pour faire la poudre qui à ver-  
tu de

en de refaire, & mettre en bon point ceux qui sont extenués, fait tremper les Chiches, le froment, & l'orge, dans du lait, à diuerses fois. On fait aussi cuire les poix chiches en eau, pour faire la seconde composition de Diasatirion: or l'un & l'autre se fait, à fin que la vertu nitreuse & deterſiue qu'ils ont, soit ostee par le moyen du lait & de l'eau, & que le reste de leur substance demeure.

Galien met en infusion en huile, l'espace de quarante iours, & quelquefois, trois, quatre, ou plusieurs mois, la semence de Sapin, & les fleurs de Peuplier, puis les exprime, & par ce moyen l'huile est reduit fort digestif, & propre à oster les lassitudes.

La Soye crüe teinte en escarlate, se met en infusion en ius de Pommes, de Grenades, en decoction d'escorce de Citron, & es autres Sirops qu'on fait de sucres simples ou composez, & la laisse-on tremper iusques à ce que les sucres rougissent, & qu'ils aient attiré la vertu de la Soye & de l'escarlate.

L'infusion est lors acheuée, quand le medicament a perdu, ou pour le moins corrigé sa mauuaise qualité, ou que sa bonne qualité est augmenté, ou bien que



que l'humeur a attiré sa faculté comme nous pretendons : toutesfois bien souvent l'infusion sert seulement de preparation pour cuire apres, & voila d'où vient qu'en lisant tu trouueras bien souvent qu'il faut faire tremper les simples quelque temps, auant que les faire cuire, voire mesme apres estre cuits, auant que les couler, principalement quand la vertu que nous demãdons, est mal-aisée à tirer pour la transporter à l'humeur, à cause que la matiere est dure, grosse, & massiue, & ainsi faisons nous du bois de Guaiac, d'Ebene, de Bouys, de Fresne, de Genest, & de Geneure, à sçauoir apres que nous l'auons pilé ou rapé, nous le faisons tremper longuement, mesme iusques à trois iours en quelque humeur propre, auant que faire la decoction, à fin que par la longue infusion, finalement leur vertu incisive, attenuative, & detersiue soit communiquee à la decoction.

Quelquefois au lieu de l'infusion, nous lions dans vn petit linge le simple que nous voulons, puis nous le faisons quelque peu cuire dans du bouillon, ou dans quelque autre chose.

Et quant à ce que nous mettons en  
infu

infusion le plus souvent, on le fait apres bouillir vn bouillon ou deux, auât que l'exprimer ou couler.

Il y à aussi quelques simples que nous faisons tremper, seulement pour les attendrir, à fin de les confire apres, ou à fin qu'ils soyent plustost cuits.

A ceste cause Mesues arrouse les Myrabolans, avec eau & eau-miel, & *Mesues.*  
les fait tremper huit iours, en petit *in sum. &*  
laiët de Chicure, & puis leur fait faire *con dit.*  
vn bouillon, pour les confire.

On fait aussi tremper vn iour entier, en eau de pluye, ou eau de fontaine, les *Lib. 7.*  
testes de Pauot, taillees menu avec ci- *comp,*  
seaux, semence & tout: & mesme si el- *phar. part.*  
les sont fort seiches, on les laissera *& Mes. in*  
tremper deux & trois iours, à fin de les *Antidot.*  
rendre tendres, pour la composition du  
Diacodium.

Les Myrabolans, on les abreue & arrouse avec huile d'Amandes douces, ou huile Violat, ou Rosat, ou huile de Iugioline, & apres on les fait seicher: ce que nous pouons nommer infusion, arrousement, ou abreuement. Côme aussi quand apres estre pilez on les frotte trois iours entiers en esté, avec huile d'Amâdes douces, versant l'hui-

le peu à peu, toutes les fois qu'il en est besoin, & puis on les fait seicher. On les frotte aussi semblablement trois iours au Soleil, avec eau sucrée, ou petit laiët sucré, à fin de les former apres en Trochisques selon le dire de Mesues (sinon que tu aimasses mieux appeller ceste façon de faire, Nutrition, de laquelle nous traicterôs incontinēt apres) comme aussi quand il veut qu'o couure lespoudre de la Hiera Hermetis avec suc de Cocôbre sauvage, deux fois, & les faire seicher apres, afin que la poudre attire la vertu de ce suc.

Il y en à des autres qu'on met en infusion, à fin de les pouuoir dissoudre apres: cōme l'Ammoniac, l'Opopanax, le Galbanum, le Sagapenum, & les autres liqueurs, se mettēt le plus souent en infusion dans du vin-aigre, ou dās quelque autre humeur, sur les cendres chaudes, à fin de les pouuoir dissoudre.

On fait tréper les mesmes liqueurs, en eau miel, apres les auoir rompues, pour faire la composition de hiera Archigenis, selon la doctrine & enseignement de Paulus: mais en la hiera Hermetis on les met en infusion en vin: & la hiera Diacolocyncicos de Rufus il  
met

met la Myrrhe seulement, en infusion dás du vin, & pile le Sagapenū & l'Opopanax, avec le reste: cōme nous faisons aussi aujourdhuy, en la hiera Diacolocynthidos Pacciij, en laquelle neātmoins Scribonius pile l'Opopanax & le Sagapenum dans le mortier, y adioustant du miel bien cler & liquide.

Par mesme cause on fait tremper la Gomme, & la col'e de Poisson, à fin de les pouuoir dissoudre, ou pour les conuertir en mucilage: & à ceste mesme fin nous mettons tremper, les sēmenes & les racines qui ont quelque viscosité & lenteur, dans quelque humeur chaud, asçauoir pour'en tirer le mucilage: mais il sera parlé vapeu apres de cecy, quand nous traicterons de l'extraction des suc.

Nous pouuons rapporter à l'infusiō la teinture, comme on fait estat de la Soye teinte en escarlate) qui se fait du suc du Vermillon) pour la confection Aikermes, & pour le Sirop de Pomis, & de Granatis, & de Corticibus citri: encores que la mesme soye ainsi teinte, se met ainsi en infusion dans ces suc, iusques à ce qu'ils en deuiennent rouges, & qu'ils ayent attiré la faculté &

vertu de la soye. & de la graine du vermillon.

Si on estrangle vne vipere avec vn fillet teint en pourpre (qui est la liqueur d'un poissõ de mer) ce fillet fera vn souuerain remede pour guerir l'inflammation des amigdalles qui sont dessous la langue, si on veut croire ce que Galien en dit.

*La maniere & façon de nourrir les medicamens, qu'on appelle.*

C H A P. X X V.

**L**A nutrition, qu'on appelle, est aussi comme vne espeece d'infusion: & ceste façon de preparation est appelée nutrition, abusiuement & non pas proprement. car tout ainsi que par la nourriture proprement appelée, ce qui est vuide est rempli, & ce qui est nourri est augmente, entant que cela se peut faire par la mollesse des parties, & tant qu'elles obeissent: pareillement les medicamens semblent augmenter & acroistre, quand on les abreue, qu'on les fait tremper, qu'on les remue, ou frotte avec quelque humeur, mesmement quand l'humeur est chaud.

La Sarcocolla blanche, qui est amassée en

see en grosses briques, se nourrit avec  
 laiët de fême mais il n'en faut pas met-  
 tre beaucoup: car si on fait noyer la Sar-  
 cocola dâs le laiët, elle se fond, & d'a-  
 uantage le laiët s'enaigrit auât qu'ô la  
 puisse auoir seichee: il faut d'ôc y me-  
 tre le laiët à mesure qu'on le tire des  
 mâmelles de la femme: & la faire incô-  
 tinent seicher au soleil: & faudra rei-  
 terer cela, trois ou quatre fois, voire  
 cinq, l'arroufant tousiours, & la faisant  
 seicher: finalement estant bien seiche,  
 la fermer pour garder. On la pourra bié  
 aussi arrouser avec laiët d'Aneſſe de  
 chieure, de iument, ou quelque autre.

Aucuns ſont nourrir la ſemence de  
 Carü chauffee, en laiët de chieure. l'es-  
 pace de deux heures, dans vn pot bien  
 net, puis la ſont ſeicher pour la garder,  
 & diſent qu'elle ſert au flux de ventre.

Auſſi quand Meſues ordonne d'ar-  
 rouſer, faire tremper, froter, & fricaſ-  
 ſer tout doucement les Myrabolans,  
 avec huile, petit laiët ſucré, Beurre de  
 vache, ſuc de coings, ou autre humeur,  
 & qu'il diët qu'il les faut abreuuer de  
 ces humeurs: ſoit que cela ſe face ou  
 pour les cōſire apres, ou pour corriger  
 ce qui eſt en iceux qui nous nuit, ſoit

qu'on s'en vueille seruir tous seuls, ou bien qu'on les vueille mettre en composition, comme en la Triphera Sarracénica, Persica, en la triphera de Galié, en l'electu stomachicum de Mesué, on l'elec. alhari, & en l'autre qui suit apres, c'est cōme vne espeece de nutrition. Pareillemēt le mesme autheur veut q' on frotte en huile d'Amandes, toutes les poudres q' entrēt en l'ele. Indi maioris.

On préd aussi la Coloquinte & oste-on les semences de dedans seulement, puis on la remplit d'eau avec vn peu de Spica & de Mastie, & la faict-on cuire sur les cēdres chaude, iusques à ce qu'elle reuienne au tiers: de ceste decoction on abreue le sagapenum, l'arrousans petit à petit, iusques à ce qu'il cōmence à s'égraisser: on appelle cela nourrir le Sagapenu: on fait de mesme de l'Opopanax. On en peut faire autāt de la decoctiō de Myrabolās, ou de suc d'Aunee, ou de Rue, ou de Fenail, avec vn biē peu de fiel de q'que oiseau de rapine, & vn peu de Spica & de Mastie, les faisant cuire à demi & les passant par l'estamine. On nourrit aussi les fueilles de Thymelea en vinaigre, pour faire la cōpositiō de l'elect. Diaphisalidō, qu'o appelle

pele autrement de Aikakégi. De mesme quâd on veut faire les pilules de Thy-melea, on met en infusion les mesmes fuielles en vin-aigre, & puis on les fait seicher, tellement que nous pouvons dire que infuser & nourrir sont mesmes choses, ou pour le moins qu'elles ne sont gueres differentes: car & l'une & l'autre se fait avec humeur, & avec chaleur tiede, cômme elle est aussi ppte pour la vraye nourriture, car celle qui est trop violente bruste, & quand elle est trop foible, elle n'a point de vertu.

Toutesfois les Metaliques pour la plupart se nourrissent à l'aer chaud, & non pas sur le feu.

Quelquefois aussi on nourrit les Metaliques, avec quelque humeur, à fin qu'ils se puissent apres dissoudre plu-stost, ou mesme à fin de les fondre, ou pour les engraisser & augmenter, comme si on y en avoit adiousté.

On nourrit le Machefer cinq iours entiers, dans le vin-aigre pour faire la petite Triphera de Mesues, & la Triphera Moschata, & la Triphera de Galien.

On nourrit la Litarge avec huile tellement que quatre onces de Litarge



pilee, boyuent vne liure d'huile, & cinq quarterons de vin-aigre, ou plus: ce qu'il faut, seulement demenât fort longuement le pilon, par dedans le mortier: car vne once seulement de litarge, fait assez grosse se monte, tellement qu'on le pourroit bié mettre en forme d'emplastre, sans y adiouster point de Cire: mais quand tu commence à le broyer, il le faut broyer, longuement avec vn bien peu d'huile, & apres y mettre vn peu de vin-aigre, l'vn apres l'autre: car si on y met beaucoup d'huile ou de vin-aigre à la fois, il se noyera de façon qu'il sera apres malaisé de luy donner corps: mais si dés le cōmencement il est nourri peu à peu, tellement qu'en le broyant il se rende espez, il boyra beaucoup plus grāde quantité d'huile & de vin-aigre: mais il le faut continuellement broyer, l'espace de deux ou trois heures sans cesser, sinon qu'au commencement on se peut bien vn peu reposer, à fin que ce pendant il boyue l'humeur à loisir. L'ay souvente fois reduit en forme d'onguent, la Chalcitis, le Machefer, le Verd de gris, & les autres metaliques les arroustant avec huile & vin-aigre, & les broyant

yant longuement: bien est vray qu'il n'y en à point qui boyue plus d'humeur que la Litarge, & croy que cela ne viét d'ailleurs sinon de ce qu'elle est fort seiche, & vn peu rare.

*De la façon d'exprimer ou pressurer.*

C H A P. X X V I.

**E**Xprimer ou pressurer, n'est autre chose que separer la substance humide & subtile, d'auec la seiche grosse & terrestre, par le moyé de quelque forte presse. Or l'instrument duquel on se sert pour faire vne telle action, est le plus souuent vn pressoir, lequel peut estre fait diuersement, comme est celuy ou on presse la vendange pour entirer le vin, ou comme celuy que Mesues a descript, parlant de l'huile d'Amandes douces, ou comme celuy duquel nous nous seruons pour tirer les huiles & les suc, & pour pressurer les decoctiōs, la chair, & choses semblables: soit que ce soit vn pressoir, ou vne presse comme est celle des libraires, cōme nous l'auons enseigné, en ce que nous auons fait sur Mesues, traitant de l'huile d'Amandes douces: mais aussi à fin que ce que nous voulōs pressu-

rer ne s'escoule, ou tressaille, nous l'en-  
 ueloppôs le p'us souuent avec vn drap  
 fort, comme avec vn linge, avec vn  
 drap tissu de poil de Cheure, ou de  
 Soye. Il aduient neantmoins quelque  
 fois, q nous ne faisons que les mettre  
 dans vn linge, & puis les mains & les  
 doigts nous seruent de presser, cômme,  
 quand nous exprimons les medicamês  
 laxatifs, apres les auoir mis en infusiô.  
 Dauantage nous les pressurons quel-  
 que fois, avec vn linge cler, & d'autres  
 avec vn linge espez & serré: par fois  
 nous les sermons & pressurons fort, &  
 d'autres fois legerement, selon que l'in-  
 tention des Medecins est diuerse: pa-  
 reillemêt nous presuiôs les vns chauds  
 les autres froids: mesme il y en a qui ne  
 se peuvent espraindre s'ils ne sont  
 chauds, comme l'huile d'Amandes dou-  
 ces, & semblables que tu trouueras en  
 Mesué. Aussi les sucz de Pourpier, d'Es-  
 cudez, de Ioubarbe, & de Buglosse ven-  
 lent estre espraints tous chauds, autre-  
 ment il y faudra metre quelque chose  
 plus liquide parmi: mais il sera parlé  
 de c'cy, quand nous traicterons de l'e-  
 xtraction des sucz.

L'vsage d'oc d'espraindre sert à beau-  
 coup

coup de choses, car on s'en sert és infusions, apozemes, & presque en toutes decoctions, és sirops, huiles, & autres sortes de compositions: de dire avec quel instrument chacun doit estre es-  
 print, & combien, & s'il doit estre es-  
 print chaud ou froid, tu le pourras  
 beaucoup mieux aprédre en la descri-  
 ption de chacune sorte de cōposition.

Or on à accoustumé d'espraindre &  
 pressurer, non seulement apres auoir  
 coulé, mais bié souuent auant que cou-  
 ler: bien est vray que quand on coule  
 apres auoir pressuré, il faut couler tout  
 doucement, de peur que la crasse & or-  
 dure qui tient à la couloire, ne passe à  
 trauers, dás l'humeur qui est desia cou-  
 lé, si on le coule avec force.

*De la maniere de frotter les medicamens.*

CHAP. XXVII.

SI on frote avec les mains ce qu'on  
 Sauoit mis en infusion, ou ce qu'on  
 à fait cuire, cela seruira & aidera beau-  
 coup à couler & espraindre, & voila  
 pourquoy bien souuent on frotte &  
 fraye les medicamens, auant que les  
 couler n'y espraindre: mesme bien sou-  
 uent il sera au lieu de l'expression: &  
 pourtant en la composition du Sirop

Sapo

Saporis de pomis, on frotte le Saffrá lié dans vn linge, & en quelques autres cōpositiōs aussi, pēdant que le Sirop cuit.

Aussi en la cōposition du Sirop aigre ex manna, on frotte la manne, entre les mains, apres l'auoir laissée en infusion dās du suc d'endiue, auant q̄ la couler.

Parcillement on frotte le Khabarbe, lié dans vn linge: & l'espriant-vn, en la cōposition du Sirop de cicoree cōposé.

On lie aussi la Scāmonee dās vn linge cler, & la frotte-on pour faire le Sirop aigre, qui ait vertu de purger la colere.

Semblablement on lie l'Elebore noir dans vn linge, & le frotte-on quand on veut faire l'oximel qui ait vertu de purger la Melancholie.

Aussi frotte-on bien souuent, la mouëlle de Castame, le Turbith, & le Gimgembre, les liāt dans vn linge, pour faire l'oximel qui ait vertu de purger la phlegme.

Mesmes en la composition de l'apozeme Epithimi, commande de frotter l'Elebore noir, l'Agaric, & le Sel indique. Aussi en la composition de l'Apozeme de Cappilli veneris. il veut qu'on frotte la Casse avec les mains, auant que la couler. Cōme aussi il faut frotter  
en huil

en huile rosat, la coloquinte taillee menu avec des Ciseaux, quand on la met en Trochisques, selon que Mesué enseigne traittant des Trochisques & des simples. Aussi en la confectiō Hamech, on frotte premierement les simples avec la main, auant que les couler.

En l'electuaire aussi nōmé Diaphysalidon autrement de Alkakengi, on frotte les simples avec la main, apres les auoir mis en infusion dās les sucs, & puis on les passe par l'estamine. Semblablement en le cōposition despilules aromatiques apres auoir faict cuire les simples on les coule, & les frotte-on.

Or ce neud duquel nous parlons, se met pour la pluspart dans le medicament humide: comme on met la Scammonee liee dans vn linge bien cler, & le pend-on dans le Sirop de fumeterre: pareillement les petis neuds des choses Aromatiques, qu'on faict pour donner bonne odeur aux compositions, se met tremper dedans, le tenant pendu, comme il sera dict icy apres, quand nous traiçterons de la façon d'Aromatizer: laquelle façon de faire est aujour d'huy practiquee de plusieurs és sirops laxatifs, principalement quādyne c'est  
lon

longue maladie, ou bien pour complaire à ceux qui sont delicats.

Or quelque fois, apres que toute la vertu de ce qui est dans ce neud, est demeuree en la composition à force de frotter, on le iette là: & voila comme Soranus en faisoit, à sçauoir il faisoit cuire dans du Mie & restes de Painot, la Myrrhe, le Saffran, l'hypocistis, & l'Acacia liez en vn linge, & puis qu'ad leur vertu estoit toute demeuree au Diacodium, il l'ostoit: l'ay mis c'est exēpie en auāt, à fin qu'on n'estime pas ceste maniere de faire nouvelle, & cōme si les Arabes en estoyēt les premiers inuēteurs.

Il y à toutesfois vne autre maniere de frotter, laquelle sert plustost pour abreuer, amolir, & humecter: comme quand on frotte toutes les especes de Myrabolans, avec beurre frez: & toutes les autres poudres sōt abreuees d'huile d'Amādes douces, en la cōposition de la Triphera Sarracemica, & Phenonis.

Aussi quand on abreut, & qu'on frotte les mesmes Myrabolans, avec huile d'Amādes douces, ou avec huile Rosat, ou violat, ou huile de Iugioline, ou quelque autre huile lenitif, à fin que par leur trop grande astuiction, ils n'of-

fencēt les parties qui seruēt à la nour-  
 riture. Il est aussi loisible non seulemēt  
 de les frotter avec les mains, mais mes-  
 me de les fricasser au Soleil, ou à vn  
 petit feu : car autrement, il ne se peut  
 faire que les myrabolans deuiennēt ra-  
 res pour recevoir l'humeur, ny que le  
 beurre ou l'huile se fonde, q̄lque huile  
 que ce soit, pour penetrer promptemēt  
 par toute la substance des Myrabolans :  
 & pourtant en la Triphera Phenonis  
 furnōmee petite, nous lisons, q̄ les My-  
 rabolans soyent rostis avec beurre de  
 vache : pareillement en la Triphera sui-  
 uante, au lieu qu'il y auoit, que les My-  
 rabolans estans couuerts de beurre de  
 vache soyent frottez nous auons mis,  
 soyent fricassez, & en quelques autres  
 lieux aussi : la ou (cōme i'ay dit) on peut  
 bien aussi lire, qu'ils soyent frottes, veu  
 qu'il faut faire & l'vn & l'autre, à sça-  
 uoir les frotter avec les mains, & les  
 frir tout doucement dans la poile ou  
 dans quelque autre aise.

Et en l'electuaire inuenté par nous,  
 en deux lieux, nous auons traduiēt fri-  
 ge, c'est à dire fricasse, au lieu de frica,  
 c'est à dire frote : tu pourras toutefois si  
 tu veaux, retenir la premiere lecture, ou  
 l'autre



l'autre, veu mesmes qu'en vn autre electuaire semblable à cestuy-cy, à sçauoir en l'electuaire Alcanzi, il est ordonné de faire bouillir deux fois les Myrabolās, & les autres simples aussi.

Toutesfois il y à des simples qu'on fricasse à la verité: comme le Cumin, que Galien au 4. liure de sanit. tuend. ordonne de fricasser, apres l'auoir fait tremper quelque temps en vin-aigre, dans vn pot de terre bien cuit: Tu auras plusieurs tels exemples, quād nous traiterons de la façon de rostir les medicamens.

*De la maniere d'extraire les suc.*

#### CHAP. XXVIII.

ENcores qu'il semble que l'ordre requeroit, de traiter de la coction apres auoir discoursu de l'infusiō, à cause (cōme i'ay desia dit) qu'elles ont quasi mesme faculté, & se font quasi de mesme façon: neantmoins pource que par la suite des propos nous sommes venus iusques à parler de l'expressiō, & des suc se fait par le moyen de la triture, & de l'expressiō, il m'est aduis qu'à bonne oecasion, nous auons icy inseré la tractation de l'extraction des suc.

Or ce

Or ce que nous appellons suc, & les Grecs Chylos (cōme nous l'auōs mon-  
stré biē au long en nostre liure des sim-  
ples, selō la doctrine de Galien) n'est au-  
tre chose que l'humeur qu'on tire par  
expression des herbes vertes, des fruits  
humides, ou des semences huileuses, a-  
pres les auoir pilees : il se prend aussi  
pour la viscosité & mucilage qu'on ti-  
re des semences & racines visqueuses,  
des gommes, & des racleurs des par-  
ties nerueuses, les faisant tremper en  
quelque humeur chaud. J'ay donc deli-  
beré de traicter à present de tous ces  
sucs.

On peut donc tirer du suc, de toutes  
fueilles vertes, les pilant à par elles, &  
les espraignant : hors mis qu'il y en à  
quelques vnes, desquelles difficilemēt  
on peut-on tirer aucun suc, à cause de  
leur grande siccité, si on les pile toutes  
seules, comme les fueilles de Laurier,  
de Thym, de Rosmarin, de Sauinier: les  
herbes sauvages aussi qu'on cueillit en  
lieux esleuez & secs, en plein esté, & en  
temps sec, & apres Midy iettent moins  
de suc beaucoup: D'autres aussi à cause  
de leur viscosité, comme les deux Bu-  
glosses, les Escudez, & quelques autres

desquelles sera parlé cy apres, parquoy si on veut tirer du suc & des vins & des autres, il faudra mesler quelque hûmeur liquide parmy.

Or Galien, traitant des simples, & au liure de comp. pharm. part. se sert pour les maladies des oreilles, & des autres parties aussi, des sucs freschement tirez de Cheuaine, de Courge, de Chanure verd, de Lierre, de Renouée mâle, de Marrube, de Stebé, d'Absinthe, de Fenoi, de Serpentiné, de Lactue scavage, de Fumeterre, de la petite Centauree, de Chelidoine, des Rosmarins, des Mourrons, des especes d'Anemonés, de Peucedané, de Blette, de Choux, de Calamintha, des fueilles de Figuier, & de Cynoglossum: des fleurs de Peuplier blanc, de Spondylium, de Roses, & de Violettes, des racines d'Oignons, Ails. Pourreaux, Ciclamen; & Squiles.

Des fruiçts pareillement, comme des Pommes, Coings, Grenades, Raisins, & plusieurs autres, desquels nous auons parlé bien au long (l'ayans prins de Galien) en ce que nous auons fait sur la premiere & seconde section de Mesué.

Quant à la façon de tirer la Scammonee, le Glaucium, l'Hypocistis, l'Acacia, & les

& les autres sucs qu'on tire des plantes  
 estrangeres, il me semble qu'il n'est ia  
 grãd besoin de s'y arrester pour la mon  
 strer, veu que nous n'auons pas les plan  
 tes, avec ce q̃ si quelqu'vn est curieux  
 de le sçauoir, il le pourra apprendre de  
 Dioscoride: il est bien vray qu'on recou  
 ure assez de plantes d'Aloës, mais elles  
 ne seruent que de monstre & parade és  
 boutiques des Apoticaire, là où on les  
 trouue pendues, mais de plantes pour  
 nourrir il ne s'en trouue point, & qui  
 plus est, toute plâte d'Aloës ne produit  
 pas bon suc, comme Galien & Dioscori  
 de l'ont fort bien enseigné.

L'Acacia duquel nous vsons, est fait  
 de Prunelles sauvages trempées en eau  
 & cuites à petit feu, iusques à ce. qu'el  
 les se dissoluent, & apres auoir coulé  
 ceste decoction, on la fait Seicher au  
 Soleil, ou au feu; & la polit-on sur vne  
 table, puis on la met comme en tablet  
 tes, lesquelles seront de couleur rou  
 geastre, & si seront plus astringentes  
 beaucoup, si on cueillit les Prunelles en  
 cores vertes, mais seront plus noires,  
 & plus douces, tant plus que les Prunel  
 les seront meures

Noſtre Lycium se fait en la maniere

qui s'ensuit , comme il est enseigné au liure intitulé de Dynamibus, c'est à dire des facultez , lequel on attribue à Galien : asçauoir , on cueillit au moys de Septembre , le fruiet de Periclimenos, autrement appellé Cheure-fueil , & le pile-on, puis on l'espraint en tordant, & fait-on seicher au Soleil ce qu'on en a tiré, & le serre-on pour le garder. Quant au vray Lyciū, on ne sçait auiourd'huy que c'est.

On prend aussi les Racines de Regalisse , & choisit-on les plus fresches , & pi<sup>3</sup> humides, lesquelles on pile au moys de Iuillet , & les fait-on cuire dans de l'eau, iusques à ce que l'eau commence à s'espeffir , & les ayant espraintes , on fait seicher ce qui en sort, au feu ou au Soleil.

On tire l'huile appellé Omphacin, des Oliues vertes, & l'huile doux, des Oliues meures, quand à la façon, elle est assez commune en Prouence & Languedoc.

Comme aussi on tire le verius des raisins verds , & qui sont naturellement bruscs & aspres au goust: mais le vin on le tire des raisins bien meurs & les plus doux; ce qui est assez cogneu de tous,

Vray

Vray est que la pluspart de ceux qui habitent es regions Septentrionales, se seruent du ius qu'ils tirent des pōmes sauvages, lequel ils salent vn bien peu à fin de le mieux garder, au lieu de verius d'aigras. Quant aux fueilles qui sont naturellement seiches, si on en veut tirer du ius, il faudra mesler parmy pendant qu'on les pilera, ou du vin, ou quelque autre humeur propre à nostre intétion, comme i'ay dict: lequel hnmeur sortira presque tout apres, avec quelque partie de suc, quand on l'espraindra.

On tire de mesme le suc de Pourpier, d'Escudes, de Ioubarbe, des deux Buglosses, & les autres qui ont ainsi le suc gluant & visqueux, selon la doctrine de Galien, à sçauoir les arroufant avec quelque humeur propre & cōuenable. Toutesfois on pourra bien tirer le suc de ces herbes. sans y point mettre d'humeur, si seulement on les chauffe vn petit, & le mortier aussi, le pilon, le suc, & la presse: ou biē sans les chauffer, après les auoir pilees les mettre dans vn panier d'ozieres, en quelque lieu froid, comme dans la Caue: car mettant vn plat dessous, il y rumbera assez bonne quantité de suc, petit à petit, & goutte à

goute. Il est bien vray que le Pourpier lauuage, qui se trouue fort frequemment parmy les vignes, rend plus facilement son ius que celuy des iardins, si fait bien la ieune & rendre Buglosse, plus aisement que celle qui est desia trop grasse de vieillesse, & les fucilles de Borrache, plus aisement que non pas la tige.

Mesmes pour faire le Sirop de Cucurbita, ordonne d'entourner & couvrir vne Courle avec de la paste bié pestrie, & la faire cuire au four, apres il la faut espraindre, & en tirer le ius, duquel on fait le Sirop.

Le suc de la Squille se tire fort bien en la maniere suyuant: On la met en pieces avec les mains, puis on la met dans vn pot, où il y ait eu au parauant du Miel, lequel on couure fort bien, & l'enuironne-on de peau, & apres on le met en quelque lieu au Soleil, qui regarde droit au Midy, és iours Caniculaires, l'espace de quarante iours, mais il faut estre soigneux de le tourner bié souuēt, à fin que la Squille sente la chaleur du Soleil de toutes parts: apres cela on oste la Squille, qui est comme si on l'auoit rostie, & serre-on le suc qui se

se treuve au fond, pour le confire apres  
 avec du Miel D'autres font autrement,  
 ils choisissent vne Squille qui ait esté  
 nourrie entre plusieurs autres, & avec  
 vn cousteau de bois, la despouillent de  
 toutes les pelures de dehors, puis l'en-  
 ueloppent de paste, & la font cuire dans  
 vn four, qui ne soit pas par trop chaud,  
 & apres l'auoir tiree, la pilét toute chau-  
 de, dás vn mortier de pierre, qu'ils font  
 chauffer, avec vn piló de fer aussi chauf-  
 fé, & l'ayant mise dans vn linge cler &  
 delié, qu'ils font aussi chauffer, ils la  
 pressent bien fort: Dioscoride enseigne  
 bié à rostit la Squille, disant qu'il la faut  
 laisser dans le four, iusques á ce que la  
 paste, ou l'Argille de laquelle elle est  
 enveloppee, soit competemment cuite,  
 mais il ne fait point de mention du suc.  
 D'autres sans la rien faire rostit, l'ayant  
 bien nettée dehors & dedans, la pilent  
 dans vn mortier de pierre ou de bois,  
 fort chaud, avec vn piló de mesme ma-  
 tiere, & l'ayant pilee, ils la mettent sou-  
 dain dans vn linge chaud, & l'esprai-  
 gnent en vne presse chaude, & par ce  
 moyen, ils en tirent le suc fort facile-  
 ment, & mesme ce qui en sort est fort  
 cler & net. Que si la Squille est toute



froide, & qu'on l'ait pilee en vn mortier froid, il ne faudra que la faire vn peu frire, dans vne poisse-de terre, & incontinent l'espraindre, entre deux ais chaudes, ou en vne presse chaude, en quelque lieu chaud.

Toutes ces choses peuvent estre tirees du dire de Galiën, commandant de tirer le ius de la Squille, és iours Caniculiers, qui sont ordinairement les plus chauds, pour le moins selon le cours ordinaire. D'autres la couppent menu, & l'espraignent apres, pource disent-ils, que quand on la pile, elle deuient grasse: de sorte qu'il est bien difficile apres d'en tirer le suc, sinon (comme i'ay dit) qu'on la chauffe. Il y en à des autres qui apres l'auoir pilee, la mettent dans vn panier de linc ou d'Oziere, & la pendent en la caue, ou en quelque autre lieu frais, & mettent quelque pot dessous, pour receuoir ce qui distilera.

Les liqueurs, Gommcs, & Resines, distilent en chastrant, perçant avec vn terriere, couppant, ou esgratignant, la racine, la tige, ou les branches des plantes: vray est qu'on ne les recueilleit gueres en noz quartiers, mais on les apporte de pays estrange, qui voudra sçauoir  
comme

comme ils les tirent, qu'il lise Dioscoride traitant particulièrement de chascune: toutefois nous pouvons bien recueillir le suc qui sort du Saux, quand on le coupe lors qu'il est en fleur, & nous en servir aux vsages que Galien enseigne: pareillement nous pouvons bien recueillir l'Opium, des testes de Pautot noir, enuiron les moys de Iuin, ou Iuillet: & de quelques autres plâtes que nous auons aussi,

Quant à l'Elatarium, si tu as enuie de sçauoir comme on le tire du fruiet des Cocombres sauvages, regarde ce que Dioscoride en a dit: mais prens toy bié garde, que tu ne preannes le suc pour la liqueur, car le suc des plantes n'est pas de telle vertu que la liqueur, comme il se peut voir en la Scammonee, & és autres, comme Dioscoride & Galien l'enseignent bien au long.

Et ainsi il sort vne certaine liqueur de la racine de Mandragore coupee, percee, & cauee, laquelle est beaucoup plus efficace, que n'est pas le suc qu'on tire des mesmes racines pilees & espraintes: semblablement le Figuier, l'Espurge, & la Chelidoine, iettent vn certain lait, si seulement on arrache vne

fucille, ou vn reiet:õ, à ſçauoir les deux premiers, & les Titinales le iettent blâc, mais la Chelidoine le iette iaune.

De la ſeconde forte de ſucs: que nous auons dit eſtre extraits des ſemences huileuſes pilees, comme des Amandes tant douces qu'ameres, des Noiſettes, des noix communes, des Piſtaches, des Pignolas, des Ben, des Noix muſcates, des ſemences de Courles, de Cocombre, de Melon, de Citrulle, de Chanure, de Nauets, de Mouſtarde, de Palma Chriſti, de Tymelea, de Lin, de Pauot, de Iuſquiame, de Pommes & de Poires, nous en auons diſcours bien au long avec Meſues, ſur la neuſieme ſectiõ, ou il eſt parlẽ des huiles: à cauſe que Dioſcoride meſme & Galien appelleẽt bien ſouuent ce ſuc, huile: & le peut-on extraire de toutes ſemẽces qui ont mouẽle, de ſorte que meſme on en tire des petits pepins qui ſont dans les Raiſins, qui dure plus ẽs lampes qu'aucun autre huile.

On peut auſſi tirer du Miel des Anacardi, ſi ſeulement on oſte la queue, & puis on les fait bouillir en eau, recueillant ce qui nagera par deſſus, avec vn creillier, qui reſſẽble fort au Miel: vray  
eſt

est qu'on le peut aussi faire autrement.

La troisieme espece de suc, s'extrait des semences, racines, & autres choses gluantes & visqueuses, les faisant tremper quelque temps en eau chaude : Or les semences sont communement, les semences de Coings, de Marrube, d'Ortie, de Lin, de Fenugrec, de l'herbe aux Puces, de Malue, de Guymauue, & de Citron.

Des racines, celles de Malues, Guymauues, de Consyre, de Cheure-sueil, & de Squile.

Des Gommes, La Gomme Arabique, le Diagragant couppé menu : pareillement on peut tirer de Mucilage, de la colle de poisson, de la colle forte, des figues & raisins : il faudra donc mettre tremper trois onces de ces choses, en vne liure d'eau chaude, & les laisser tremper toute vne nuit, lendemain les faut mettre dans vn sachet, ou dás vne seruiette de toile neufue & forte, & les fort espraindre en tordant, les battant avec vne petite baguette, avec laquelle aussi tu pourras raicler le suc qui en sortira : & faudra faire ainsi, iusques à ce qu'il ne sorte plus de suc, & que la semence, ou la racine, demeure seiche & sans

sans aucun suc.

D'autres mettent trois liures d'eau, pour chascune liure de semées, ou de racines.

D'autres mettent vne liure d'eau cõmune, ou de quelqu'autre humeur, s'il est besoin, sur quatre onces de semences, ou autres choses. Mais il faut seulement aduiser si tu veux le suc fort liquide, il faudra augmenter la quantité de l'eau, ou diminuer la quantité de semence, & si tu le veux plus espais, faut faire au contraire.

Quelquesfois aussi nous les laissons tremper trois iours, comme en la composition du Diachylon commũ, lequel a prins son nom de Chylos, qui signifie suc, ou Mucilage, comme nous l'auons monstré sur la section 12. de Mesues, & au troisieme liure de la Methode de composer les medicamens.

Or les Arabes sont d'opinion, que le dedans de la semée de l'herbe aux Puc es est chaud, mais que le dehors est froid, parquoy quand ils veulent refroidir, ils ne font point longuement tremper ceste semée, ny avec beaucoup de chaleur, & si ne l'espraignent pas aussi beaucoup, de peur que la substance interieure,

terieure, qui est chaude, ne sorte: ce  
 qu'aucuns affirment auoir manifeste-  
 stement cogneu, pour auoir mis du suc  
 de Psyllium extraict avec eau douce,  
 sur vne playe, la ou il causa mordica-  
 tion avec chaleur, laquelle ils amorti-  
 rent apres, comme ils disent, y mettant  
 du suc de la mesme semence, 'espraint  
 tout doucement: Mais les Grecs tien-  
 nent que toute la semence est froide  
 sans point de chaleur. Et pourtant Me-  
 sues dit, que si on met tremper la semē-  
 ce de Psyllium en eau de fontaine froi-  
 de, la remuant souuent, & qu'on baille  
 à boire le suc qui en sort, qu'il laschera  
 commodement le ventre: Il dit aussi  
 qu'il faut mettre la semēce de Psyllium  
 en infusion, dans la decoction, l'espace  
 de 24. heures, la remuant à chascune  
 heure avec vn baston, ou vne espatule,  
 & apres espraindre tout le suc, pour fai-  
 re l'huile de Psyllio: & semble bien en  
 cela, qu'il ne craint pas par trop ceste  
 qualité veneneuse, qui est cachee en la  
 partie interieure de la semence, & la-  
 quelle on dit estre chaude au quatrie-  
 me degré: & peut estre que ceste cha-  
 leur est amoindrie & corrigee par la  
 decoction.

On peut aussi tirer de la Mucilage, de la Colle forte, de la Colle de Poisson, des racineuses de cuirs, & de toutes les parties nerveuses, apres les auoir taillees en petites pieces: vray est que les medecins vsent le plus de celle qu'on tire de la Colle de poisson, laquelle se fait principalement des Moulues, que nous appelons: Le meilleur toutesfois est, de les raper, ou limer, & les faire cuire à petit feu, dâs de l'eau, iusques à ce que elles soyent quasi consumees: car si on les pense cuire à grand feu dès le commencement, on les brusle, tellement que il est impossible de les cuire apres.

La Colle de Poisson se dissoudra aussi dans de l'vrine, dans d'eau salee, dans de l'eau ou on aura esteint de la chaux, & dans du vinaigre.

En l'Emplastre Diachylon magnum, on fait cuire à petit feu, ou sur les cendres chaudes, dans de l'eau commune, la Colle de Poisson, & l'ayant faite cuire petit à petit, elle se cōuertit toute en ius espes comme cresse.

Aussi quant on fait cuire la peau de Belier, iusques à ce qu'elle se dissolue, pour faire l'emplastre cōtra rupturam, on en tire aussi la Mucilage.

On extrait aussi bien souvent la Mucilage des Gommés, principalement de l'Arabique & du Diagrégant, mettant deux drachmes de ces Gommés, en 5.6.7.onces d'eau Rose, comme on fait en la composition de l'Elegma sanum, à fin de le rendre plus blanc & plus lenitif.

On tire aussi la Mucilage du Diagrégant, destrempant deux drachmes de Gomme, en sept ou huit onces d'eau Rose, & dans ce mucilage, on fait fondre quatre liures de Sucre, pour faire les pilules blanches sub lingua, qu'on appelle. Or d'une drachme de la gomme Diagrégant seulement, on pourra bien tirer trois & quatre onces, voire davantage de Mucilage, si seulement tu la veux battre & agiter longuement avec un petit baston, ou avec un cuillier.

Nous pouvons mettre entre ces Mucilages, les geles qui se font de quelques us gluants; qu'on fait congeler par le moyen du froid. Car on fait cuire les pieds de veau, les cols de Mouton, les Chappôs, Perdrix, & autres chairs, mesmement celles qui sont fort nerveuses, dans de l'eau, au commencement à pe-  
tit



tit feu, & apres on l'augmente, iusques à ce que la chair se desface & dissolue: ou bien iusques à ce qu'on voye que prenant vne petite goutte de la decoction avec vn cueillier, & la laissant refroidir, elle fait coller apres les doigts ensemble, si on la manie. Alors il faut mettre le tout dans vne seruiette ou autre linge biē net, & qui ne soit pas trop espes & serré, & mettre vn grand plat dessus, pour receuoir ce qui passera, & oster les os avec vn crochet, ou avec vne forchette, le reste il le faudra presser tout bellement, tordant la seruiette: Car si on l'espraint par trop, la gelee en sera trouble, comme aussi les pieds de Mouton la font noire, sinon qu'on les laue & nettoie bien fort: l'ayant passée, il faut oster la graisse en soufflant, ou biē la racler avec vn cuillier, & puis la clarifier avec blancs d'œufs: apres cela il y faut adiouster vne liure de Sucre, & vne once de Canelle bonne, & la piler grossierement en cinq liures ou six de decoction: & si tu la veux faire iaune, il y faudra mettre du Saffran, ou bien vn linge trempé en ius de fleur de Cicoree, ou autre: & croy que de la est venu qu'on à appellé ce drappeau Tornesol, comme

comme aussi on appelle la fleur de Cicoree Solsequiũ, ou Gira solis, ou Sponsa solis, pource qu'elle tourne avec le Soleil, comme font aussi plusieurs autres fleurs: Apres tout cela, on passe le tout par la chausse de l'hypocras, tout chaudemēt & au pres du feu, car si on attend par trop il se congelle, & est impossible de le passer. Apres que tout ce qui a voulu passer de soy-mesme est passé, à sçauoir tout ce qui estoit liquide, on le met dans des plats, & le laisse on en quelque lieu froid à fin qu'il se prenne & congele ensemble. Il y en a qui mettent parmi ce que dessus, vn peu de Colle de Poisson, à fin que la decoction deuienne plustost gluante, & q̃ la gelee en soit plus ferme & visqueuse.

*De la maniere de distiller.*

C H A P. X X I X.

**I**L me semble que voici le propre lieu où il faut traiter de la distillation, qui n'est autre chose qu'vne extractiō de l'humeur la plus subtile qui soit au suc, & se fait par le moyē de la chaleur.

Quant à la façon & maniere de distiller, de ses vertus & facultez, & des instrumēs, & du feu avec lequel il faut distiller, nous en auōs fait vn ample di-

scours au troisieme liure de nostre Methode de composer les medicamés. Pour le present, ay deliberé d'ésceigner au Lecteur quelques distillations des plus difficiles.

Au mesme lieu preallegué, & sur la neuuiesme sectiō de Mesué, nous auōs traité de la quatriesme sorte d'huiles, & de la distilation qui se fait per ascensum, ainsi nommee à cause que les vapeurs qui montēt en haut, par la force du feu, s'assemblent au dessus, & se conuertissēt en eau, laquelle distille apres: & ceste façon de distiller est auourd'huy le plus en vsage. Si on remplit vn pot de pieces de Pin à larges fucilles, & les arrose on avec eau Rose, & apres qu'on les face distiler en double vaisseau, la liqueur qui en sortira, qui sera huileuse, sera d'vne odeur merueilleusemēt plaisante, & appelle-on communemēt ceste liqueur, eau de Cásre.

Si aussi on prend des Roses incarnates seiches, & qu'on les face distiller à la vapeur de l'eau chaude, apres les auoir humectees, elles rendront vne eau rose qui sera fort exquise.

Les eaux qu'on fait distiller à la vapeur de l'eau chaude, retiennent les fa  
cultez

cultez & qualitez des plantes d'où on  
 les tire , mais elles ne se peuuent pas  
 garder longuement , à cause qu'elles  
 ont beaucoup de superfluitez & ordu-  
 res:celles qu'on distille à la chaleur des  
 cendres,ou du sable , ou du machefer  
 puluerizé,dans des vaisseaux de pier-  
 re,ou de verre ( encores qu'il y en ait  
 plusieurs sur vn mesme fourneau , soit  
 long ou rond,couvert de tuiles,qui re-  
 tiennent le sable en haut, enuironnee  
 de plomb ) se gardent bien mieux , &  
 plus longuement: mais il se faut bien  
 prendre garde,de faire eschauffer petit  
 à petit ces vaisseaux desquels on se  
 sert pour distiller , & refroidir aussi,  
 auant que les mettre à l'aër froid:autre-  
 ment ils se rompront incontînét. Quand  
 à celles qu'on fait distiller en rosaires  
 de plôb,ie suis d'auis de n'en tenir au-  
 cun compte , ni en vser aucunement , à  
 cause de la Ceruse & des autres mau-  
 uaises qualitez qu'elles peuuent tirer  
 du plomb,veu mesme que Galien con-  
 damne l'eau qui ne fait que passer par  
 tuyaux de plomb pource, dit-il,qu'elle  
 cause la dissenterie.

Quant à la distillation que nous ap-  
 peliôs per descensum, & ce qu'o y peut

distiller, nous en auons traitté sur Mesue, quand il parle de la troisiésme sorte d'hailes.

Pareillement si on met les Squilles fresches, apres les auoir mises en pieces, dans vn pot pertuisé au fond, & bié clos par dessus avec d'Argille, lequel on enuironnera de flamme, il distillera vne eau en vn autre pot qu'on mettra dessous, lequel on luttera bien, avec le fond de l'autre: ceste eau meslee avec de la farine ou du pain: fait soudain mourir les rats, comme aucuns tiennent: mais elle les fera bien mourir plus soudain, si on y mesle vn peu de Litharge.

Si on met des Roses toutes fresches sur vn linge qu'on aura tendu sur la bouche d'un bassin ou d'un pot, & puis qu'on mette vn autre vaisseau plein de braise sur les roses, il distillera dans le pot de dessous beaucoup d'eau & de bonne odeur: on en peut faire autant des autres fleurs: & ceste façon de distiller est aussi appellee Per descensum.

Si aussi on met deux pots à pisser l'un contre l'autre, & qu'on remplisse de roses celuy de dessus, & puis qu'on les mette au cœur du Soleil, il distillera  
en celuy

celuy de deſſous, vne eau fort odorâte.

*De là maniere de cuire.*

C H A P. X X X.

P Ource qu'é toute diſtilatiõ il y à cõ me vne certaine forme de coction, d'où vient auſſi q l'eau diſtillee, eſt toujours plus delice que non pas le ſuc:& auſſi qu'en toute coction il y a comme quelque diſtilation, comme on le peut biẽ remarquer au couuercle du pot où on met cuire, qui ſe trouue toujours plein de vapeur. Dauantage q l'vne&l'autre s'accõpliſſẽt par la chaleur: il me ſemble que l'ordre requiert de traiter de la Coction: il eſt bien vray que nous auons traité la plus part de ce qui concerne ceſte matiere au troiſieſme liure de noſtre Methode de compoſer les medicamens: parquoy tu le pourras chercher là, à fin que nous ne perdions le temps, de traiter d'vne meſme choſe deux fois.

Le plus ſouuent pour cuire les medicamens, on les fait bouillir en quelque humeur chaud: mais biẽ peu ſouuẽt on les fait roſtir. Or biẽ ſouuẽt on cuir les ſimples tous enſẽble, ou chacũ à part:& quelquesfois aucunes compoſitions.

L'humeur auquel on a accoustumé de les faire cuire, est le plus souvent de l'eau laquelle peut estre simple, ou medicinale: la simple peut estre ou en eau de pluye, ou de fontaine, ou bien eau distillee: la medicinale, c'óme eau salee eau de mer, eau Alumineuse, Sulphureuse, Bitumineuse, sentant le Vitriol, ou le charbon de pierre.

On peut mettre au nombre des eaux composees, la Lessive, l'Vrine, le Vin, Vin-aigre, Verius, Ceruoise, Eau-miel, Vin-miel, Apomel, Vinaigre-miel, Oxycrat, Lait, Petit lait, le jus liquide des plantes, l'huyle, les resines toutes fresches, les graisses, le Beurre, le Miel, le sucre fondu en quelque peu d'humeur avec plusieurs & diverses manieres de chacun de ceux-cy, selon les diverses intentiós des Medecins: tellement que bien souvent il faut mesler deux voire trois de ces humeurs ensemble: comme on prend la decoction des Pois chiches, le lait de Vache, ou de Brebis, pour faire cuire les racines de Panicaut, de Ressort domestique, & de Serpentine, selon le dire de Mesué.

Mais la quantité de c'est humeur est diverse, selon la diversité des intentiós:  
comme

comme en la composition du Diasaty-  
 rion, il est ordonné que le laiët de Va-  
 che ou de Brebis, passe deux doigts par  
 dessus les racines : que si cela ne suffit  
 pour faire cuire les racines, il y en fau-  
 dra mettre d'avantage, mais il le faut  
 mettre tout chaud, comme il faut faire  
 en toutes choses qui veulët cuire deux  
 fois, selon l'enseignement de Galien, au  
 liure de Alimëtis, ce que les cuisiniers  
 obseruent fort bien.

Quant aux Syrops & autres qui veu-  
 lent estre cuits, combien il y faut met-  
 tre d'humeur, tu le pourras voir au troi-  
 sieme liure.

Or la chaleur moderee est le princi-  
 pal instrument pour cuire toutes cho-  
 ses (car aussi la coëtion ne se fait que  
 par la seule chaleur moderee) ie dy la  
 chaleur, nō pas seulement du feu, mais  
 aussi du Soleil, & des animaux : il est  
 biē vray que la chaleur de la chaux, de  
 la fumee, du fumiier pourri, & des escor-  
 ces, peut bien quelquesfois servir : mais  
 c'est seulement es choses qu'on appli-  
 que au dehors, comme en la cōpositiō  
 du Psoricum de Galien : car quant aux  
 choses qu'on veut faire prendre par la  
 bouche, il seroit dōmageable : comme



aussi si on les fait cuire avec charbons non allumez, ny à demi bruslez, ou avec bois pourri:& de fait vne telle chaleur (comme aussi quand il y a de la fumee) acquiert vne estrange qualité aux choses qu'on fait cuire, avec ce qu'elles sentent le feu.

Aussi Mesué dit, qu'il faut cuire l'*Ectuarium rosatum*, à petit feu & cler: pareillement aussi tous les Syrops veulent estre cuits à petit feu.

Il faut donc que la matiere de laquelle on veut entretenir le feu, soit seiche & de bonne odeur, comme sont les Sarmens de la vigne, avec lesquels Galien veut qu'on face cuire la Teriaque: ou des charbons à demi bruslez, & qui ont desia perdu leur mauuaise odeur: or au commencement il faut faire petit feu, & puis petit à petit s'il est besoin l'augmenter: car si on fait trop grand feu du commencement cela nuit, car il brusle, & si fait perdre la vertu, avec ce que la chose n'est pas cuite à demi, qu'elle sent le bruslé à plaine gorge.

Et comme i'ay dit, on ne cuit pas les medicamés au feu seulement, mais aussi au Soleil: comme la Squille, & le Vinaigre

aigre Squilitique qu'on en fait, veulent estre mis au Soleil l'espace de quarante iours, les remuant tousiours, selon que dit Mesué.

L'Hydromel aussi, & l'autre Syrop de Calamintha, veulent estre laissez au Soleil autât de tēps, ou mesme deux & trois mois, ou d'avantage: Galien fait tréper en huyle les fleurs de Peuplier, & la semence de Sapin, ce qui est cōme vne espeece de coction, principalemēt si on les met au Soleil: mais aussi on le peut faire, en toute saison de l'annee, cōme aussi le Psoricum, qui est cōposé de deux parties de Vitriol, & vne de Lytharhe, mis en vn pot neuf, & enterrez dās le fumier es iours Caniculiers & au cœur de l'Esté, l'espace de quarante iours. Séblablement quand on garde la Teriaque, & semblables opiates, plusieurs mois, voire mesme quelques annees, cela leur est comme vne coction, qu'on appelle vulgairemēt fermētatiō.

La fin pour laquelle nous faisons cuire les medicamens, est ou pour augmenter leurs facultez, qui autrement sont foibles, cuisāt ensemble avec eux, ceux qui ont plus de faculté & vertu: ou biē pour amoindrir la faculté de ceux qui

l'ont par trop violente & forte: ou pour  
 oster entieremēt vne mauuaise & estrā  
 ge qualité qu'ils peuuent auoir: ou biē  
 pour faire que de plusieurs & diuers  
 medicamens, & qui semblent auoir di  
 uerses facultez, les faisant cuire ensem  
 ble, on en produise vne certaine faculté  
 & vertu. D'auantage nous les faisons  
 cuire bien souuēt pour leur faire auoir  
 telle forme que nous voulons: ou pour  
 complaire aux malades, qui sont quel  
 quesfois delicats: quelquesfois à cause  
 de la nature des simples, & d'autrefois  
 pour les pouuoir garder plus longue  
 ment, nous les rendōs secs par la coctiō  
 lōgue, cōme nous auōs aussi quelques  
 fois esgard à l'humidité du temps.

Outre toutes ces causes, nous fai  
 sons par fois cuire les medicamēs, pour  
 en oster la crasse & orduce: car le feu  
 (comme aussi toute autre chaleur, as  
 semble tout ce qui est de mesme natu  
 re, & separe les choses diuerses: sembla  
 blement à fin de faire q̄ l'humour, dans  
 lequel nous faisons la decoction, attire  
 la faculté & vertu de ce qu'on y fait cui  
 re, & pour ceste raison on fait cuire  
 tous Syrops, Apozemes, & huyles de la  
 quātesme espee.

Nous

Nous mettrons donc icy quelques exemples de tout ceci.

On fait cuire les Choux & les Létill-  
les en deux eaux, iettant la premiere  
eau, & les Huystres aussi, & y remettât  
de l'eau chaude, quand nous voulons  
reserrer le ventre: mais quãd nous vou-  
lons qu'elles laschent le ventre, nous  
les faisons cuire en vne eau seulement:  
pareillement les Ails, Oignons, Pour-  
reaux, Vigne-porrete, & toute autre  
chose que nous voulons luy oster sa  
premiere nature, & luy en faire auoir  
vne autre comme toute nouuelle, il la  
faudra cuire en deux eaus: tellement  
toutesfois qu'elle ne sente point l'aër  
froid, & qu'on n'y mette point d'eau  
froide: car autrement il sera impossible  
apres de la faire cuire parfaitement, en-  
cores qu'on la face cuire longuement:  
ce qui se doit aussi estre gardé & obser-  
ué, quand nous faisons cuire vn medi-  
cament, & que le premier humeur est  
tout consumé, tellement qu'il en faut  
mettre d'autre.

On fait cuire la Guymaue avec  
quelque suif, & puis la broye-on en-  
semble, pour faire mourir les abscez &  
tumeurs difficiles à mourir.

L'Eau-

L'Eau-miel a diuerſes facultez, ſelon qu'elle eſt plus ou moins cuite, comme

*Lib 2. Ali-  
ment.*

Auſſi l'Oximel cuit longuement, diſ-

*Li. 6 ſimp.* ſipe les ventofitez.

On fait auſſi cuire les ſcieures ou rabouteures d'Alifier, en eau ou vin, cõtre la pelade & cheute de poil, ſelon Galien au ſeptieſme liure des ſimples.

Le meſme auteur faiſoit cuire d'Alun dans du Miel, la racine de Tithymale, ou de Bouillon dans du vin, ou vinaigre, contre la douleur des dents.

Il faiſoit auſſi cuire avec du Miel, le verius d'Aigras, le ſuc des meures de Meurier, ou de Ronce, le ius de Grenades, du Rhus, de Coings, de Poires fauuaes, ou de Noix verdes, pour faire les compositions qui ſeruent à renforcer l'eſtomach : & la racine & ſemence d'Arction, il les faiſoit cuire en vin.

Il dit auſſi qu'il faut faire bouillir la racine de Serpentine en deux ou trois eaus, pour luy oſter ſon acrimonie, & pour la rendre propre à mettre es electuaires.

La racine d'Afrodilles auſſi veut eſtre ainſi cuite, à fin de luy faire perdre ſon amertume, laquelle la Squille perd fort

diffici

difficilement.

La racine du Bulbe cruë est propre aux electuaires, ou bien si elle est cuite vne fois seulement, mais cuite en deux eaus, elle perd entierement son amertume, tellement qu'elle ne sert de rien és electuaires.

Les Oignons, Ails, pourreaux, & vigne-porrete, estans cuits deux ou trois fois, perdent bien leur acrimonie, mais ils ne laissent pas pourtant de servir à nettoyer la poitrine.

La racine de vit de Chien, boullie en eau, ou cuite sous la cendre, s'adoucit, comme il est dit au second liure de Alimentis.

La Buglosse cuite en eau-miel, est propre à nettier la Cane du poulmon.

Le ius de Chous cuit avec miel, sert d'Electuaire.

Les Dattes aussi cuites en vin miel, ou vin cuit.

On faict aussi cuire le lait, ou bien on y met dedans des pierres fort chaudes, ou vn carreau de fer ou Acier bien alumé, à fin de consumer la substance du lait-cler, qui est acre, & le rendre propre contre la Disenterie & flux de ventre.

Et

Et à ceste mesme fin on fait cuire la Cheualine, en eau si il y a fieur, & avec avec du vin brusc quād il n'y a point de

*Oxycrat* fieur. On fait aussi cuire les feues en *est d'eau Oxycrat*. Quant aux instrumens des-  
*meslee a-* quels on se sert, pour cuire les medica-  
*ment du vin-* mens, ils peuuent estre vaisseau de tou-  
*aigre.* tes matieres, comme d'Or, argēt, Erain,

Estain, Fer, ou Terre: il est biē vray que les pots de terre doyēt estre biē cuits, à fin que le medicament n'en tire quelque mauuaise qualité: & doyuent aussi estre de Caillou, ou comme Mesues les appelle, de Pierre, ou bien Plombes & Vernis: mais les meilleurs de tous, sont ceux de verre.

Or ces vaisseaux, dās lesquels on fait les decoctions, sont ou simples, & composez & doubles (appelez communement *Balneum mariæ*) lesquels Galien recommande fort pour faire les huiles chauds, & beaucoup d'autres compositions; & toutesfois aujourd'huy l'auarice, la negligence, & la mauuaistié cōmande de telle façon aux hōmes, qu'on n'en vse point du tout, ou bien peu. Il faut donc faire deux vaisseaux, l'un dās l'autre, mais qu'ils soyent distans l'un de l'autre, d'un bon doigt tout à l'en-  
 cour,

tout, tellement que celuy de dehors  
 puisse contenir bonne quantité d'eau:  
 sinon que l'on aime mieux faire com-  
 me Galie, asçavoir mettre le petit vais-  
 seau, d'as lequel on a mis ce qu'on veut  
 faire cuire, dans vn autre vaisseau plein  
 d'eau bouillante, qui est immediate-  
 ment sur le feu.

On fait donc cuire la Miua simple,  
 & les Citrons confits, par le conseil de  
 Mesues, en vn vaisseau de pierre, ou cō-  
 me nous l'appellons, de Gailloul.

Le mesme autheur fait cuire en dou-  
 ble vaisseau, l'huyle Rosat, l'huyle Vio-  
 lat, l'huyle de Nenuphar, l'huyle de  
 Coings, de Pauot, l'huile Martin, de Pō-  
 mes de Mādragore, d'Aneth, de Camo-  
 mile, l'huyle appellé Sicyonium, l'huy-  
 le de Flambe, de Ruë, le Nardin, le Ma-  
 stichin, & i'estime qu'il seroit fort bon  
 de faire ainsi cuire tous les autres hui-  
 les: car l'huyle cuit en simple vaisseau  
 acquiert vne fort mauuaise odeur &  
 mal plaisante, avec ce que la faculté  
 d'eschauffer acroist, & la faculté refri-  
 geratiue diminue: Aussi Heras faisoit  
 cuire le Diacodium en double vaisseau  
 sur vn feu bien vif & sans fume.

La crouste de paste ou d'argille, de  
 laquelle



laquelle on couure la Squille, ou la Scammonée, & autres semblables, leur sert de vaisseau pour les faire cuire: cōme aussi la mesme crouste, & le Coing, ou autre pomme aspre, dans laquelle on met la Scāmonee pour la preparer, luy sert comme de double vaisseau.

Il nous faut mettre fin à la decoctiō, lors que nous auons obtenu ce que nous demandions, soit que nous eussions vne simple intention, ou plusieurs comme si nous faisons cuire le médicament, pour acroistre sa vertu & faculté, ou pour la diminuer, ou pour l'oster du tout: quād nous l'aurōs augmentee autant qu'il sera besoin, ou diminuee, ou ostee, nous faudra cesser de le cuire: de mesme és autres intentions. Et de lā vient que nous cuisons les vns iusques à la moitié, iusques au tiers, ou bien iusques au quart: ou iusques à ce qu'il soit diminué d'vne liure de deux, ou de trois: les autres iusques à ce que le tout soit bien incorporé, & de bōne espaisseur, cōme de l'espaisseur du miel, ou de la fange, ou de la cōsistence d'vn cerat liquide, ou d'vn Empastre. Nous faisons dōc cuire le Refiné, iusques à ce qu'il soit assez espez, tellement

ment qu'il se puisse garder:pareillemēt les syrops , eclegmes , electuaires, onguents, cerats , & emplastres , nous les faisons cuire,iusques à ce qu'ils soyent de l'espeſſeur & conſiſtence qu'ils doyuent eſtre : mais il ſera traicté de cecy plus amplement , au troiſieme liure, quand nous enſeignerons la façon de faire chaſcune compoſition.

Le Diamorum nous le faisons cuire avec Miel , iusques à ce qu'il ſoit plaiſant à la bouche, & que toute l'humidité ſuperflue eſtant conſumee ( laquelle ſeroit cauſe de le faire trop chaud , & de le faire pourrir ) on le puisse garder vn an entier:ce que ne peut pas faire le Miel, quand il eſt meſlé avec le ſuc des meures , s'il n'eſt cuit competemment: encareſ que ſi on met le fruit du meurier , enſemble avec ſa queuë, dans du Miel , ſans qu'un fruit touche l'autre, mais qu'il y ait quelque diſtance de l'un à l'autre,& puis qu'on les mette en quelque lieu froid,ils ſe pourront bien garder vn an, ſans ſe gaſter.

Les Bulbes & Racines, qui entrent en *Galien.* la compoſition du Diaſatyron.

Les teſtes de Pautot, dequoy on fait le *Mefes.* Diacodium.

Les testes de Grenoilles, pour faire l'huile de Ranis.

Le Renard, dequoy on fait l'huile vulpin.

Les Viperes, dequoy on fait les Trochisques qui entrent en la Theriaque, & l'huile de Viperes: toutes ces choses dy ie, veulent estre cuittes, iusques à ce qu'elles se dissoluent en l'eau, à force de cuire.

Les medicamens qu'on fait pour l'estomach, & pour les maux de bouche, doyuent estre cuits iusques à ce qu'ils ayent la consistance de miel, ou de la bouë.

Les electuaires mols, iusques à mesme consistance: mais pour faire les electuaires solides, il faut bien faire cuire plus longuement le Sucre.

Quant aux Sirops nous les faisons cuire avec Sucre ou Miel, ou avec les deux ensemble, iusques à ce qu'on puisse cognoistre par leur viscosité & lenteur, laquelle on pourra essayer avec les doigts, que toute l'humidité superflue est consumée: tu cognoistras donc que le Sirop sera assez cuit, quand il commencera à filer, soit que tu en verses vn peu avec vn cuillier, ou que tu en manies

manies quelq̃ goutte entre tes doigts. ou bien quand mettant vne goutte sur vn marbre, ou sur l'ongle, elle ne s'es-  
pand point, ny ne coule comme eau,  
mais demeure vnie & assemblee.

Les choses qui estans pleines sont meilleures, empirét si on les fait cuire, comme la Casse noire, & les Tamarins. Mesues ordonne de dissoudre la Manne, les Tamarins, & la mouëlle de Casse, dans quelques sucz purifiez, & puis les faire cuire avec les autres, quand ils sont desia demy cuits, iusques à ce que ils ayent la consistance de Miel, à sçauoir en la composition de Diamanna, en la composition de Triphera perfica, & en la composition de Alkakengi. Et en la confection Hamech, il ordonne que ces trois choses, ayans esté dissoutes en l'infusion apres qu'elle est coulee, qu'on les frotte avec les mains, & qu'on les coule aussi, & puis qu'on les face cuire avec Sucre, iusques à la consistance de Miel.

En la confection de Manne, qu'on attribue à Galien, il est ordonné de faire cuire la Manne à petit feu, en vne suffisante quantité de suc de Roses, iusques à ce qu'elle soit assez cuite: en la

composition furnommee Teromatū, on la fait cuire en eau rose: & en la cōposition suiuate, il la faut cuire avec Sucre, iusques à ce qu'elle ait la consistance de Miel.

Quant aux emplastres, nous les faisons cuire iusques à ce qu'ils ne souillent plus les mains, si on les manie, & qu'ils soyent fort tenax & gluants.

Le Miel que nous faisons cuire, en eau, en vin, ou en quelque autre liqueur, pour mettre és Antidotes, & autres compositions, est lors assez cuit, quand le mettant sur vn marbre, il ne se prend du tout rien au marbre.

Il y à presque mesme raison en la coction, qu'en la maniere de piler, quant aux medicameus, à sçauoir que ceux qui endurent bien d'estre pilez longuement, sans diminuer leur vertu, porteront bien aussi d'estre cuits longuement: Car ceux qui sont gros, espez, gluants, secs, durs, massifs, de substāce nerueuse & membraneuse, ayans vne faculté forte, & bien meslee parmy leur substāce, porteront d'estre cuits longuement, parquoy aussi il les faudra mettre les premiers en la decoction: nous pouuōs mettre en ce rang tous les metaliques, les

les medicamens terrestres, ceux qui sont astringens, entant qu'ils sont tels, (car les roses, l'aluine, le Rhabarbe, l'aloës, les Mirabolans, l'Agaric, ont aussi quelque amertume en la superficie, à cause de laquelle ils sont laxatifs, parquoy ils ne veulent pas estre cuits si longuement que la vertu astringente requerroit) quasi toutes les racines, à cause de leur substance terrestre. Vray est qu'il les faut couppet ou rôpre premierement, comme la Sarrasine, le Cocombre sauvage, l'hermodacte, le Polyode, & les autres: mesme quelquefois on les pile après qu'elles sont cuites à fin de les pouvoir mieux faire passer par le crible, comme Mesues en la composition de Diasatyrion.

Et ainsi faisons longuement cuire le Rhabarbe, & tous les Myrabolans, quand nous auons volonté de restraindre & reserrer: mais au cōtraire, si nous voulōs purger, nettoyer, & ouurir, il ne les faut cuire que bien peu, ou plustost les mettre en infusion.

Il me semble bien toutesfois, qu'il ne faut pas cuire longuement la racine de Regalisse, car à cause qu'elle est fort douce, il seroit à craindre que la faisant

*Mesues.*

cuire longuement, elle ne deuint amere, comme font les autres choses douces : principalement quand elle à desia acquis quelque amertume par sa vieillesse, mais quād elle est encores fresche & recente, d'autant qu'elle a beaucoup d'humidité superflue, on la pourra bien mettre dès le commencement, avec les autres racines, comme en la composition du Syrop d'Hysope, de Iuiubes, de Regalisse, & autres qu'on fait pour la poëtrine.

Les choses acres & piquantes au goust, veulent aussi estre longuement cuites, si nous leur voulōs faire perdre leur acrimonie: sinon qu'elles eussent leur vertu fort foible & debile & aisee à resoudre.

La Coloquinte, la petite Centauree, avec ses fleurs & sa semence, endurent bien d'estre pleinement cuits.

Au contraire les choses menues, delices & subtiles, liquides, fraisses, humides, molles, rares, qui ont leur vertu foible en la superficie, & non pas meslee parmy leur substance, ne peuuent pas souffrir d'estre longuement cuits, parquoy il les faudra mettre en la decoction, lors que les autres sont presque cuits:

cuits: nous pouuôs mettre en ce nombre les Roses, les violettes recentes, car quand elles sont seiches, & mesme leur suc, peuuent bien estre cuits plus longuement.

Le Gingidium, selon que dit Galien au second liure d'Alimētis, ne veut pas estre cuit longuement.

Les Bulbes, seront assez cuits, pour ueu qu'on les face bouillir.

Le Daucus ou Panais sauuage quand on le veut manger, il le faut cuire plus longuement qu'on ne feroit pas les Pastenailles de Iardin.

Il n'y à pas vne fleur qui vueille estre cuitte, & cela est cause que pour faire des huiles avec les fleurs, on les met seulement au soleil: que si les fleurs ont vne odeur forte & plaisante, cōme ont les Roses & la Camomile, & qui soit de longue duree, l'huile sera plus subtil & plus vtile, pour auoir esté au Soleil longuement: mais les fleurs qui n'ont pas grande vertu, & qui s'esuanouit facilement, ne veulent pas estre laissées si longuement au Soleil, à cause que leur vertu se perd soudain, comme le Lis, & les Violettes.

*Paul. li. 7.  
cap. 20.*

On ne peut pas faire cuire longue *Mesue.*



ment, sans beaucoup diminuer de leur vertu, l'Epithime, & les fleurs de Stechas Arabique: bien est vray que les fueilles, pourront bien estre cuittes vn peu plus longuement.

Mesucs. Mais les medicamés qui ont ces qualitez encores plus manifestes, ne peuvent souffrir aucune coction: mais apres qu'on a osté le reste de dessus le feu, on melle ceux-cy parmy: quelquefois tout chaudement, quand ils ne sont pas du tout si foibles, & par fois on attend qu'ils soyent refroidis de beaucoup, asçauoir quand nous craignons que la vertu du medicament, qui est subtile, & aisée à s'euaporer, estant dissoute par la chaleur, ne se perde & s'en aille en fumee.

Les medicamens qui laschent le ventre, rendât les parties glissantes, ne demandent pas beaucoup d'estre cuits: toutesfois la Casse, la Manne, les Tamarins, sont bien quelquefois cuits par le mesme auteur, mais bien peu, & non pas tellement que leur vertu glissante se puisse perdre.

Ceux qui sont comme moyens entre ceux desquels nous auons parlé, pourront aussi estre moyennement cuits:  
comme

comme sont l'Aluine, le Cabaret, l'Agaric, le fruit de Tymelea, la Fumeterre, le Sené, la Squille, le Glayeul, l'Hysope, le Thym, le Turbith, toutes les semences, hormis les semences de Cocombre, de Courle, Melon, & Citrulle.

Le Rhabarbe qui n'est point brouillé *Mesues.*  
ny sophistiqué, portera bié d'estre cuit assez longuement, & pilé aussi, mais à celui qui est rare & lasche, tant peu qu'on le cuise, c'est beaucoup, car sa vertu se resout.

On peut aussi bien cuire moyenne- *Ibidem.*  
ment les Tamarins : mais si on les fait cuire longuement, ils perdront enriement leur vertu : voila pourquoy on destrempe en quelque humeur conuenable, & les Tamarins, & la Casse, & les ayant coulez, on les met avec du Sucre ou avec du Miel, qui est desia cuit, iusques à ce que l'humeur soit consumé, & les fait-on cuire ensemble iusques à ce qu'ils soyent de bonne consistance : puis les ayans ostez de dessus le feu, & qu'ils seront vn peu refroidis, on melle les poudres parmy.

Des plantes donc, il faut premierement faire cuire les racines, apres toutesfois les auoir taillees en pieces ou

rompues, comme i'ay dit, & lors qu'elles commenceront à cuire, il faut mettre les semences (horsmis les semences de Cocombre, de Courle, Melon, & Citrulle, qui ont leur substâce plus tenue, qui est propre à prouoquer l'vrine) & par mesme moyen les escorces, & les bois quelque peu rôpus & brisez: apres tout cela, il faut mettre les herbes seiches, vn peu hachees, ou bien si elles sont grosses, il les faut rompre & briser: apres il faut mettre les herbes verdes, tailles menu, ou rompues en tordant avec les mains, horsmistoutes les especes de Capilli veneris, & la Laiçtue sauuage, qu'on appelle Endiuie.

Apres il faut mettre les fruiçts, ostant premierement le Noyau, les semences, & l'escorce, & mesme s'ils sont gros les faudra couper, comme sont les Prunes, Figues, Sebesten, Iuiubes, & raisins secs.

Finalement, il faut mettre les fleurs, l'Epithymum, & la Stœchas: mais la Camomile, encore qu'elle soit d'essence subtile, neantmoins à cause que sa vertu est fort meslee avec sa substance, on la peut cuire plus longuement, si fait-on bien aussi la fleur de Ienc, si on la pouuoit

pouuoit recouurer, & l'Helichryson, qu'on appelle communemēt Schechas citrine.

Aussi les sucs seichez, les liqueurs, Gommcs, Resines, la Māne, & la Casse, apres les auoir dissoutes en quelque humeur, on les pourra mettre sur la fin de la decoction. Car il y en a qui apres auoir dissous les liqueurs, en vinaigre, ou en vin, & les auoir coulez & cuits iusques à ce que l'humeur avec lequel on les a dissous soit consumé, ils les meslent parmy le reste apres qu'il est hors de dessus le feu, en les remuant tousiours avec vne espatule.

Le Musc, l'Ambre gris, le Camfre, les pierres precieuses, les poudres aromatiques & cordiales, se doyuent mettre dans la decoction, lors que le reste est osté de dessus le feu, & qu'il est encores tiede.

Mais les Roses, le Rhabarbe, l'Aloës, l'Agaric, & les Myrabolās, il ne les faut pas beaucoup faire cuire, comme i'ay dit, si on veut faire vn medicament laxatif: car si on les fait cuire longuemēt, leur vertu laxatiue, qui est en la persi- cie, & qui n'est pas fort meslee avec la substance, se perdra & dissipera: mais si

tu veux faire vn medicament qui restraigne & resserre, il les faut longuement cuire, à fin que la vertu laxatiue estant ostee, la substance terrestre qui est astringente, soit attirée par la coction.

Pareillemēt il ne faut pas faire beaucoup cuire les Violettes, quand nostre intention est de purger, en rendant les parties glissantes, mais si nous voulons qu'elles purgent par attraction, il les faut fort faire cuire, à fin que la force de la coction, la vertu & faculté qui est comme cachée au dedans, soit attirée au dehors.

Quand la Scammonée est cuite dans vn Coing, il ne la faut mettre qu'à la fin de la decoction : mais si elle est toute crüe, il la faut piler grossierement, & la mettre quand la decoction est à demy faite : mais il se faut bien garder de la piler trop delié, de peur que sa vertu laxatiue ne s'en aille : ce qui peut aduenir si on la fait cuire vne fois seulement, mais longuement, ou bien si on la fait cuire deux fois, ou bien si on garde longuement le medicament auant que s'en seruir, ou bien si on la pile trop exactement, auant que la faire cuire.

Aussi

Aussi si la Scāmonee sent la chaleur, elle s'amasse en petits morceaux, tellement qu'une partie du medicamēt aura beaucoup de Scammonée, & l'autre n'en aura point ou bien peu, & ainsi le medicament ne sera pas esgal: parquoy le meilleur est de la mettre à la fin.

Or il faut entendre sainement ce que j'ay dit, que la coctiō avoit meſmes verus que la triture: car la chaleur du feu est bien plus grande que n'est pas celle qui s'engendre par le frayement du pilon contre le mortier, & les choses dures qu'on pile: parquoy aussi la coction dissipe bien plus soudain la vertu des medicamens, qui ne fait pas la triture.

Aussi les choses Aromatiques se peuvent bien piler, non pas tant toutesfois que les autres choses, encores qu'il les faille tousiours piler autant qu'il est besoin: mais on n'a garde de les faire cuire, seulement quand le reste est desia cuit, & qu'on l'a osté de dessus le feu, comme j'ay dit, on les mesle parmy les Antidotes mols, qui estoient fort en usage entre les anciens, ou secs & solides, qui sont aujourdhuy fort en usage: com: la Cannelle, & le bois d'Aloës.

Quant au fin or en fucille, & à l'argēt aussi

aussi en fueille, il n'est pas besoin de les faire cuire longuement : car encores qu'ils puissent bien porter d'estre cuits longuemēt, il n'ont pas toutesfois plus de force cuits que cruds. Pareillement les perles, le lapis Lazuli préparé, l'Am-bre, & le Musc, n'ont que faire d'estre cuits.

Quand la decoction est faite iusques à la moitié, au tiers, au quart, ou iusques à quelqu'autre mesure, le plus souuent on la laisse rasseoir, ou bien on la clarifie avec blâcs d'œufs, & puis on la coule, apres tout cela on la fait bouillir de rechef, ce qui doit estre bien souuēt obserué es sirops. Il y a aussi plusieurs compositions qu'il faut cuire deux fois, cōme sont les deux antidotes surnōmez Alcanzi, le Catholicum, & l'une & l'autre composition du Diasatyrion.

Aussi auant que cuire les medicamens, bien souuent on les prepare en plusieurs autres façons: les vns nous les nettions premierement dedās, nous les pilons, lauons, rostissons, brussons, ou mettons en infusion.

D'autres estans mis cuire avec aucunes choses, ils en sont plustost cuits: cōme si on fait cuire les racines d'Ortie  
avec

avec la chair, la chair en est beaucoup plus cuite : comme au contraire, si on met vne racine de Nenuphar parmy les pois, lors qu'ils cuisent, il ne demeurera pas vn pois dans le pot, qui ne se iette dehors.

La colle de Poisson cuite avec chaux viue, se dissoudra soudainement : mais il faut bien regarder si la chaux viue sera point dommageable à la maladie.

*De l'usage & façon d'escumer.*

C H A P. X X X I.

EScumer n'est autre chose qu'oster l'escume, la matiere de l'escume, comme ie la prens en ce lieu icy, n'est pas seulement vn certain suc gluant, qui contient du vent dedans soy, cōme Galien l'enseigne au liure des Aphorismes, mais est toute ordure, laquelle à cause de sa legereté est separee par la force du feu, ou mesme encores qu'elle soit pesante, toutesfois elle se peut amasser & assembler avec blâcs d'œufs: or nous escumons quelquesfois les simples, comme les suc, le sucre, ou le miel, & quelquesfois les composez, comme sont les apozemes & les sirops.

Pour



*Quand on* Pour escumer le Miel, on le fait bouil-  
*veut escu-* lir avec eau, ou avec vin, ou avec vin-  
*mer le miel* aigre, selon la diuerse intécion à laquel  
*on met au* le nous pretendõs: car si on le fait bouil  
*double d'-* lir tout seul, il espanche incontinent, &  
*eau, sinon* bouillit iusques par dessus, & estant al-  
*qu'on y ex-* lumé, est en danger de mettre le feu en  
*prime quel* la maison. Dauantage, si on le faisoit  
*que autre* bouillir tout seul, à cause qu'il est fort  
*humour.* doux, il deuiendrait amer, auant qu'il  
 fust assez escumé. Pour l'escumer, au-  
 cuns mettent pareille quantité d'hu-  
 meur que de Miel, les autres en mettét  
 au double: & cependant qu'ils bouillét  
 à petit feu, on oste l'escume avec vn  
 cuillier percé: & quand il est à demy  
 cuit, & qu'il bouillit fort, on met parmy  
 les blâcs d'œufs, à sçauoir vn pour cha-  
 cune liure de miel: apres cela on le cou-  
 le tout chaudement, & puis on le fait  
 cuire tout seul, ou bien avec ce qu'on  
 veut confire, ou faire cuire: & mesme  
 lors s'il iette encores quelque escume,  
 il la faut oster diligemment, mesmemét  
 quand on le veut garder tout seul: ou  
 bien quand on s'en veut seruir pour la  
 composition qui se presente à fin d'in-  
 corporer les poudres, comme és anti-  
 dotes composéz avec miel, soit avec  
 Opium,

Opium, ou sans Opium. Vray est que si le Miel n'est pas par trop sale, il suffira d'y mettre autant d'eau que de miel, & si n'y faudra pas si grande quantité de blancs d'eufs: & si le miel estoit bié fort net, il ne sera ia besoin de l'escumer, ni de le clarifier. Mais nostre miel, qui viét en ces quartiers, à cause qu'il est cru, & fort plein d'ordures, il iette beaucoup d'escume, tellement qu'il reuiet bien à la moitié, quand on l'escume & le coule: & pourtant il faudra mettre au commencement au double de l'ordonnance, si tu le veux escumer ensemble avec le reste, sinon il t'y faudra mettre de celuy qui est de sia escumé.

Aucuns tiennent qu'il faut mettre fin à escumer, quand on a fait bouillir à petit feu, ce qu'on veut escumer, enuiron deux heures: mais ceux là font mieux, qui escument tousiours iusques à ce qu'il ne iette plus d'escume: d'autres tiennent qu'il le faut escumer, iusques à ce que l'eau soit consumée (ce qu'on peut cognoistre par les bouteilles qu'il iette en bouillant) & que le Miel soit competement espez.

Je n'approuue point aussi l'opinion de Seruitor, qui dit qu'il faut faire cui-

re vne liure demiel en dix liures, d'eau, & l'escumer continuellement, & quand l'eau est presque cōsumee, qu'il en faut mettre encores cinq, & derechef quād ces cinq sont quasi cōsumees, y en mettre autres cinq: car par ce moyen il faut necessairemēt ou que le miel brusle, ou qu'il deuiēne à rien, encoies qu'il y ait beaucoup d'eau.

Or on escume le miel, quelquefois à part, à sçauoir quand i' ne peut pas porter d'estre cuit si longuement, comme seroyēt les autres choses avec lesquelles on le feroit cuire: d'autres fois aussi on l'escume ensemble avec le reste, à sçauoir quand ils peuvent bien porter d'estre cuits longuement, sans diminuer de leur vertu: cōme en la cōpositiō de Diacidonion, on fait cuire le miel avec le suc de Coings, & en bouillant on l'escume souuent, & semblablement en plusieurs autres cōpositiōs. Toutes-fois le plus souuent, comme i'ay dit, on l'escume à part, & puis estant escumé, on le mesle parmi les Condits, Syrops, & Antidotes, Il aduēt bien peu souuēt qu'ō le mette és cōpositiōs tout cru, principalement le nostre: il est biē vray que celuy qu'en recueillit en Prouēce

& Lan

& Lāguedoc, là où croist à force Thym, est fort exquis, & ne doit gueres à ce-  
 luy d'Athenes, ni au miel surnommé  
 Hyblæum: car la temperature des regi-  
 ons, & l'abondance du Thym, sont sem-  
 blables, en l'vn & en l'autre.

Il faut faire de mesme au Sucre,  
 qu'au miel, aussi Dioscoride & Galien  
 mettent le Sucre entre les especes de  
 Miel. Car pour escumer le Suc: e qui est  
 noir & fort sale, on y met trois fois au-  
 tant d'eau que de Sucre: & quand il est  
 cuir à demi, & qu'il bouillit à grand'for-  
 ce, on met vn blanc d'œuf pour chacu-  
 ne liure de Sucre, puis, on le coule tout  
 chaudemēt, & apres on le cuit derechef  
 fort diligēment, ostāt toutesfois tous-  
 iours l'escume si point il en sort. Il est  
 biē vray q̄ si le sucre n'est pas par trop  
 sale, ce sera assez d'y mettre au double  
 d'eau, ou bien seulement pareille quan-  
 tité (cōme il se fait quasi ordinaiemēt)  
 & si ne faudra pas aussi tant de blancs  
 d'œufs: que s'il est fort bien net & pur,  
 il ne le faudra ni escumer ni clarifier.

Les sucz liquides qui entrentés si-  
 rups, Apozemes, & Electuaires, quel-  
 quesfois on les escume sur le feu, puis  
 on les laisse rasseoir afin qu'ils denien-

nent clers, & finalement on les passe par vne couloire de laine, afin d'oster la fondraillie, y adioustant toutesfois premierement quelques blancs d'œuf: & puis pour en faire quelque sirop ou Apozeme, on y met du miel ou du sucre, & les fait-on cuire: comme au Sirop de Bisantiis, & autres, & en l'elect. de Psyllio. Mais les suc qui entrent és emplastres, apres les auoir meslez, on les fait seicher au Soleil, ou au feu, sans qu'il soit besoin de les escumer.

Quant aux liqueurs, apres les auoir dissoutes, il ne faut que les passer par l'estamine pour les nettier, & ne les faut point escumer, tant s'en faut qu'il soit besoin de les clarifier: il faut faire de mesme des metalliques, & des parties des animaux

Si donc tous les simples qui entrent en vne composition sont nets & purs, il ne faudra sinon faire passer la decoction vne fois ou deux par vne couloire de laine, ou de mylaine, sans rien esprounder: & mesme s'il fait besoin, on pourra chager de couloire: & apres cela mettre la colature dans le sucre qu'õ aura clarifié, s'il est sale, ou bien s'il est assez net sans clarifier: puis faut faire  
cuire

cuire tout ensemble, iusques à ce qu'il ne demeure que deux onces ou enuiron d'humeur, soit decoction ou suc, ou autre chose, sur chacune liure de sucre: il est bien vray que si c'est quelque suc gluant, on en pourra bien laisser trois, voire quatre onces, sur chacune liure de sucre: que si c'est quelque ius aigre, lors que le sucre est pres de coit, on le laisse quasi tout dedans, comme nous dirons au commencement de la tractation des Sirops.

*De l'usage & maniere de clarifier.*

C H A P. XXXII.

**T**Raittant de la maniere d'escumer, i'ay parlé par occasion & comme en passant, de clarification: mais maintenant me delibere d'ę traiter en brief, car elle sert pour nettier la decoction des choses liquides, comme aussi la despumation & colature, afin qu'ayāt ostę toute la crasse & ordure, elles soyent plus plaisantes à prendre, & qu'elles soyent plus faciles à distribuer par le corps, & avec plus de profit.

Or on clarifie les vns à part, les laissant rasseoir & reposer iusques à ce que la crasse aille au fond comme le suc de Roses, de Limões, de Coings, de Citrões,

de Ribettes, de fruit d'Espine vinete, & de Grenades, soit que pour les faire rasseoir, on les mette incōtinent en quelque lieu frez, ou bien qu'on les garde quelque temps en la boutique. D'autres on les fait cuire avant que les clarifier, ou au feu ou au Soleil, comme on fait cuire le suc de pommes douces & aigres iusques à la moitié, & puis on le laisse reposer deux iours, iusques à tāt qu'il soit cler & purifié, pour en faire apres le Syrop de pomis, selon que Mesmes l'a descrit. Pareillement le suc aigre de citron, on le fait cuire iusques à ce qu'il n'en demeure que les deux tiers, puis le coule-on, & estāt coulé on le laisse reposer deux iours, iusques à ce qu'il soit cler & purifié: & le suc de Grenades, apres l'auoir fait cuire iusqu'à ce q̄ le tiers soit cōsumé, on le laisse rasseoir deux iours, iusques à ce qu'il soit cler, quand on veut faire le Syrop du suc des fruiçts aigres: toutesfois au iourd'huy les sucz aigres, entrent bien d'une autre façon en la cōposition des Syrops, cōme i'ay desia dit, & diray encores cy apres, quand ie parleray des Syrops Or c'est à bōne raison qu'on fait cuire ceux-cy afin q̄ la chaleur assemble

les choses q̄ sont de mesme nature, separāt les choses de diuerse nature: cōme nous voyons q̄ les vrines qui ont prins quelque commencemēt de coction en nous, si elles sortent troubles, eiles se subtilient apres, la crasse allant au fons.

Mais à cause que la vertu du feu n'est pas assez forte pour separer entiere-ment toute l'ordure qui peut estre es- sues, cōme nostre chaleur naturelle se- pare par vne coctiō entiere & parfaite les choses estranges: & que nous auons crainte que la trop longue coction ne diminuē beaucoup, ou corrompe la ver- tu des sucs: les Medecins ont estimē meilleur de parfaire par art ce q̄ estoit desia commencē par la coction, ce qui se peut faire en plusieurs & diuerses fa- çons: quelques fois on les laisse seule- mēt rasseoir & reposer apresqu'ils sont euits, comme i'ay dit vn peu auparauāt d'autres fois on fait cuire vn peu de vin-aigre p̄may: & d'autres fois nous les battōs bien fort avec blācs d'œufs; ie laisse la colature & la despumation, desquels nous-nous aidons bien sou- uent, pour nettier parfaitemēt les sucs & les decoctions.

Quāt à la clarification q̄ se fait d'elle



mesme, laissant reposer ce qu'on veut clarifier apres qu'il est cuit, nous en auons ( ce me semble ) assez parlé: il ne reste que de traiter de celle maniere qui se fait avec vin-aigre, & de l'autre qui se fait avec blancs d'œufs.

Si donc en la composition des decoctions, & des Syrops, y entre du vin-aigre ils se purifieront aucunement d'eux-mesme, par la vertu du vin-aigre: mais ils se purifieront bien encores mieux, si outre cela on y met aussi des blancs d'œufs, encores qu'on y mette le vin-aigre apres les auoir coutez, neâtmoins il faut tousiours & sans cesse escumer: car le vin-aigre ne laisse pas de ietter tousiours quelque escume & ordure, encores que la decoction fut bien nette au parauant.

Quant à la clarification qui se fait avec blanc d'œufs, voicy comme il faut faire, Il faut prendre vn blanc d'œuf, & le fort battre en eau froide, avec des vergettes, iusques à ce qu'il soit tout cōuert en escume, laquelle il faut mettre dans le Syrop ou dans quelqu'autre decoction, lors qu'elle bouillira, & quād elle sera deuenüë noire, il la faut oster avec vn cuillier percé, & en mettre d'autre,

tre, & faut retirer celz, iusqu'à ce que tu voyes que le Syrop deuiene cler. D'autres font autrement, asçauoir quād ils cognoissent par les bouteilles, q̄ le Syrop est aucunemēt clarifié par la force du feu, ils le retirent du feu, & quand il est tiede, ils iettent dedās vn blāc d'œuf pour chacune liure de Syrop (ils ne le mettent pas tout chaud, afin que l'œuf ne cuise, ny tout froid aussi: car il ne seroit pas si tost ny si bien nettié), & mesme quelquesfois d'auātage, puis ils les battent fort avec des vergettes, afin de lesfaire escumer: apres tout cela ils iettent dedās, le sucre rōpu en pieces, & le font recuire: apres que l'escume est passee, ils l'ostent de dessus le feu & le passent par la chausse de l'hypocras: que s'il est gros espez & mal-aisé à couler, ils le passent tout chaud: mais s'il est aisé & facile à couler on le laisse tiedir ou refroidir du tout auant que le passer: il est bien vray qu'il est beaucoup plus aisé & facile de le passer par vn drap, attaché avec des cloux aux quatre bouts. Or pour le iédre bié cler, on le pourra passer trois, voire quatre fois, iusqu'à ce qu'il le soit assez: Que s'il n'est pas assez clarifié pour tout celà, il faudra

mettre vn blanc d'œuf à part avec de l'eau, & le bié battre avec vergettes, & le mettre petit à petit dedans la decoctiō, la remettāt sur le feu, & quād ceste escume qu'on aura mis dedās la decoctiō, sera bruslee, il y en faudra mettre de l'autre, & faire celà si souuent, qu'ō s'aperçoynie par le moyé des bouteilles q̄ le Sirop est assez cler: & lorson le passe aussi souuēt qu'il en est besoin.

*De l'vsage & maniere de couler.*

C H A P. X X X I I I.

**I**L n'y à pas grande difference entre cribler & couler, comme i'ay dit cy deuant, vray est que le premier apartiēt propremēt aux choses seiches, & le dernier aux choses liquides: l'un sert pour empescher q̄ les choses trop grosses ne passēt, & l'autre que la crasse & ordure des choses liquides ne passe point aussi.

La difference de la colature consiste en cecy, qu'ō coule les vns tous chauds les autres du tout froids, & les autres tièdes: pareillemēt il y en à qui ont assez d'vne couloire, aux autres il en faut deux, & à d'autres trois: d'auantage les vns demādent estre coulez en du drap, les autres en couloires de Laine, les autres de Mylaine, les autres en couloires

loires de Soye ou d'Estamine qu'on appelle : les vns en vne couloire neufue, les autres en vne vsee : les vns en couloire clere, & les autres en vne serree & espessee: les vns sont assez coulez d'une fois, les autres le veullēt estre deux fois, voire trois, iusques à ce qu'ils soyēt assez clers à nostre fâtasie, cōme tu pourras voir amplemēt, en la cōpositiō des Syrops qu'on fait de suc de fruiets, & herbages, & leurs decoctions.

Les choses qui sont grosses, gluâtes & visqueuses, veullēt estre coulees fort chaudement, & si faut qu'il y ait plus grande quâtité d'humeur pour les dissoudre lors qu'on les veut couler, ou qu'on en ait mis des le commencement qu'on les a fait bouillir, à fin qu'ils coulent plus facilement: ils passeront bien aussi plus soudain, si la couloire est rare & vsee, mais la colature n'en sera pas si nette : & pour supleer à cela, il la faudra passer par la couloire tant plus souuēt: car cela fera que la colature sera aussi nette cōme si on l'auoit passée en vne couloire bien serree.

Le Vin-Miel veut estre coulé, en vn drap rare & cler.

Mais les choses tenues, comme sont  
le suc

le suc de Limons, & de Citron, peuuent estre coulez iors qu'ils sont tiedes, en vn couloir biẽ serré & neuf: ou biẽ si tu les veux passer par trois couloirs, il faut que le premier soit vne estamine le second vn linge qui soit desia vsé, & le plus bas vn drap neuf, ou autrement serré.

Si on fait dissoudre vne liure de Sucre, en huict onces d'eau seulement, & qu'il soit cuit & clarifié, il le faudra apres couler en vn drap cler & rare.

Ceux qui nous ont precedé, ont souvent vsé de trois couloirs, l'vn sur l'autre: le plus haut estoit le plus petit & le plus cler: le plus bas estoit le plus large, & le plus espez & serré: & celuy du milieu comme il estoit moyen en situatõ, aussi estoit il en largeur & espaisseur: & les disposoyent de sorte qu'il y auoit tousiours quatre doigts de distance de l'vn à l'autre.

Or il les faisoient ainsi differens en grãdeur, & espaisseur, afin que celuy qui estoit le plus haut, retint seulement la grosse crasse & ordure, & le second la moyenne crasse qui estoit passée par le premier, & le dernier & plus bas retint les ordures les plus delices tellement  
que

que ce qui estoit passé par le plus bas,  
 fut sans aucune fondraillie ny ordure:  
 que s'ils se fussent seruis seulement du  
 plus cler, la colature fut esté sale & cō-  
 me si on ne l'eust point passée, comme  
 si tu fais seulement passer quelque de-  
 coction à trauers vn linge: Si aussi ils  
 eussent seulement vsé de celuy qui est  
 le plus ferré, il fut incōtinent esté estou-  
 pé par la grosse crasse, tellement que le  
 reste n'eust sceu passer, ou il l'eust fallu  
 changer, ou lauer bien souuent: de sor-  
 te q̄ s'ils n'eussent voulu auoir qu'un  
 couloir, ils se fussent plustost seruis de  
 celuy du milieu que de point d'autre,  
 & à bōne cause. Ils auoyent aussi fait le  
 plus haut plus petit, à cause que l'hu-  
 meur s'essargit tousiours, vers lesbords  
 du couloir, comme il se peut voir non  
 seulement és draps de laine, mais mes-  
 me au linge: car si on verse seulement  
 vne goutte, elle s'espand incōtinent  
 tout à l'entour: & de tous les lieux qui  
 en sont abreuez il decoule q̄que cho-  
 se, tellement que ce qui degoutte au se-  
 cōd, est bien plus large que n'estoit pas  
 quand nous l'auons versé au premier:  
 & pareillement le second distille plus  
 large, que le premier ne distille pas: ce  
 seroit

seroit d'oc faire au rebours de bié, si on mettoit le plus large le premier, vray est qu'il n'y auroit pas grand danger: mais celle largeur ne seruiroit de rien: car c'est assez que le premier puisse cōtenir l'humeur qu'on veut couler: aussi quād ie dis le plus petit ie ne veux pas dire qu'il soit si petit qu'il ne la puisse cōtenir, mais seulement qu'il soit plus petit que les autres deux, & si on est si mal apris que de mettre le plus petit dessous, il y aura beaucoup de decoctiō qui versera par les bors, sans estre coulee aucunement.

Auiourd'huy nous vsons seulement d'un couloir, qui est de moyenne largeur, & de moyenne texture aussi: mais auāt que couler nous preparons & aidons la colature, par la clarificatiō faite avec blancs d'œufs, par laquelle nous amassons en vn toutes les ordures, avec l'aide du froid: car quād nous voulons que quelque chose soit bien clere, nous la coulons toute froide: ou bien si elle ne peut passer toute froide nous la coulōs quand elle est tiede, & si l'ayāt coulee vne fois, nous ne la trouuons pas assez claire, nous la coulerōs derechef, voire trois fois: & pour mieux faire

faire nous lauerons le couloir, ou en  
 prendrons vn autre, ce qu'il faudra fai-  
 re aussi quād il demeure par trop à pas-  
 ser: il est bien vray que quand il demeu-  
 re trop à passer, pour estre trop espez  
 & giuant, nous passons la decoctiō plus  
 chaudement, ou bien nous prenons vn  
 couloir plus c'er, ou bien si la compo-  
 sition n'en deuient pire, nous la destré-  
 pons avec quelque chose de plus liqui-  
 de: comme quand pour passer la creme  
 d'Orge, nous mettons par-my la deco-  
 ction de Pois, ou de Feues, ou vne au-  
 tre semblable, mais il se faut bien gar-  
 der de rien remuer le fond du couloir,  
 pour la faire plustost passer, soit avec  
 l'espatule, ou avec les doigts: car tu ré-  
 drois la colature trouble, mais le meil-  
 leur est de chāger de couloir, comme  
 i'ay desia dit, ou bien lauer celuy-la, ou  
 bien rendre ce qu'on veut couler plus  
 liquide, soit ou par le feu, ou y mellant  
 quelque autre humeur.

Il y a bien aussi des choses que nous  
 pouuons couler sans les rien faire cui-  
 re, cōme le laiēt freschement tiré, à fin  
 d'oster les poils & les autres ordures q  
 peuēt estre tūbees: ce que les villageois  
 & gardiens ont accoustumé de faire,

&amp;



& mesme se seruent du Gratteron bien souuent.

Ainsi aussi aujourdhuy, on passe par vn couloir de drap de laine, fait en forme de Pyramide (qu'on appelle manche ou chausse d'Hypocras) le Vin meslé avec Sucre & Cannelle, & le passe-on trois ou quatre fois, iusques à ce qu'il soit assez cler, & appelle on ce Vin Hypocras, comme si Hypocrates en estoit l'inuenteur. On en peut bien autāt faire avec Miel & les autres choses, & le couler iusques à ce qu'il soit cler, &

*Oenomeli*, puis on appelle celā *Oenomelli*, ou *Me*  
*c'est à dire* *lites claretum*.  
*vin miel.*

C'est aussi de mesme façon qu'on coule la gelee, que nous appellons, comme il a esté dit cideuāt. On peut bien aussi quelquefois mettre des choses par-my ce qu'on veut couler, qui ferōt qu'il en sera bien plustost cler, comme si sur vne quarre de vin blanc on messe seulement deux doigts de lait, auant que le couler, il sera incontinent cler.

On à bien encores d'autres moyens pour couler les choses troubles & meslees: cōme est ce que Galien dit que les Egyptiens coulent l'eau du Nil, quand elle est trouble, dans des pots de terre

crüe,

crue , tellement que le plus clair passe par les petis pertuis des vaisseaux, voire mesme à trauers de la substance des dits vaisseaux, à cause qu'elle est molle & tendre. Mais on fait esclaircir à Paris l'eau de la Seine, & à Rome celle du Tibre, la mettant dans des grands pots de terre cuitte , principalement faits de Caillous, en quelque lieu frais, comme en la caue , à fin de la faire rafraischir, & pour la laisser rasseoir, tellement que la crasse aille au fond du pot.

L'eau trouble se peut bien aussi couler , mettant du sable bien net dans vn pot, qui aura force petis trous au fond, par lesquels l'eau passera aisement, mais le sable n'y pourra pas passer.

Si aussi on melle de l'eau avec le vin, puis qu'on les mette dās vn hanap fait de bois de Lierre (que les Latins appellent Cissimbium) bien delié, le vin passera incontinent à trauers, & l'eau demeurera dedans, ce que i'ay souuent experimenté, l'ayant aprins de Caton.

*L'vsage & maniere d'Aromatizer.*

CHAP. XXXIII.

**N**Ous appelons aromatiser, assaisonner & dōner saueur à quelque

chose: on en vse le plus souuent pour donner vne odeur aux cōpositions, par laquelle odeur les esprits animaux & vitaux, voire le cœur mesme, foyent, resiouys & renforcez, ce que nous faisons y meslant quelque chose aromatique & de senteur: comme sont entre les simples le Musc, l'Ambre gris, le Camfre, le Gingembre, la Canelle, le Macis, le Saffran, le Calamus aromatique, la Spica, le Poyure blanc, le noir, & le lōg, les Gyroflēs, le Mastic, le bois d'Aloës, l'escorce de Citron, & les Santals: & entre les compositions, la Gallia aromatique, & la Gallia fabelina. Et ainsi Mesues aromatize le Diasatyron avec Musc, destrempé & dissous en eau Rose: mais il le demesle avec autre chose, quand il veut aromatiser l'Electuaire, appelé Sarboteng: le second Diasatyrium, & l'Aromaticum rosatum Stomachicum.

Aussi il aromatize le sirop d'escorce de Citron, les Coings confits, & les Citrons confits, avec Musc & Ambre gris: & le Sirop aigre de Pomis, avec Cāfre: les Trochisques de Galia fabelina, avec Musc, Ambre, & Camfre.

Aucūs aussi aromatisent l'hydromel,  
avec

avec espèces: comme avec Gingembre, Saffran, Cannelle, Macis, & semblables.

On fait aussi vn nœud, avec vn linge cler, dans lequel on met de Saffran, Cannelle, Calamus aromatique, Spica, Gingembre, Poyure noir, & Poyure lōg, de chascun vne drachme & demie, lequel on pend dedans le Sirop de Stecade, à fin de luy dōner goust & l'aromatizer. Semblablement la Miua aromatique, on luy donne odeur, avec vn nœud de choses aromatiques, le suspendant dedans, & le frottant souuent, comme i'ay desia dit cy deuant, traictant de la friction.

Le Sirop de Mentha, veut estre aromatisé, avec Gallia aromatique.

La confiture de Citrons, avec Gallia, Musc, Saffran, & Mastice.

La confiture de Buglosse avec musc, & Gallia.

Le Sirop de verius, avec Gyrosles.

Le Syrop d'Endiuie, surnommé composé, avec Sātals, Cannelle, bois d'Aloës, & escorce de Citron.

Et semblablement plusieurs autres compositions, auxquelles on met ces choses, non tant pour leur donner consistence ou goust, comme pour les ren-

dre de bonne odeur, & quelquefois pour leur faire auoir plaisante couleur, comme il en sera parlé incontinent apres : dequoy nous auons assez amplement discoursu en nostre liure de la Methode de composer les medicamens, la ou nous auons môstré, à quoy ces choses seruent és rædicamens, quelques-fois que sans icelles le medicament ne pourroit faire son operation : & d'autres fois elles aident à faire mieux leur æction.

Les Iuleps que l'on fait aujourd'huy pour la plus-part avec Sirops & eaux distillees meslez ensemble, les Apozemes s'arromatizent avec Canelle, ou avec Santal, mettant ces choses dans le couloir ou nous voulons passer le reste, à sçauoir enuiron deux drachmes, pour chascune liure d'humeur, ou dauantage, ou moins, selon la diuersé intention du Medecin. Nous aromatisons aussi le vin aromatique, dit vulgairement Hy pocras, & plusieurs autres choses.

*De l'vsage & façon de coulourer les Medicamens.*      C H A P.   X X X V.

**B**ien souuent nous dônons couleur aux medicamens, plus pour les rendre

dre plaisans & moins horribles , que pour quelque autre raison, cōme nous auons monstré au second liure de nostre Methode de composer les medicamens.

Aucuns meslent du Boliarmeni commun, d'autres de l'Ocre, en la composition du Cerat de Galien , nommé Diacuphorbiu, à fin de desguiser par la couleur, ce de quoy il est composé, mais il vaudra mieux y mettre vn peu de fleur de sel, ou quelque chose de semblable, qui changeant la couleur, ne diminue point sa force & vertu. Lesquelles paroles de Galien sont biē à noter, à fin que nous prenions garde que voulans changer la couleur, nous ne changions aussi la faculté, ou que nous n'augmentions celle qui y estoit desia , ou que nous ne la diminuons: soit que nous voulions faire ce changement, de couleur, y adioustant quelque chose de nouueau: comme on fait en l'Oxicroccum : ou bien que preparant vn mesme simple diuersement, il donne aussi diuerle couleur à la composition: comme le Cerat de Galien fait avec Verdet crud, est verd , & fait peur aux' patiens: mais la mesme composition faite avec verdet

*Gal. lib. 6.  
Method.*

brulé, est de couleur blanche, comme Galien le monstre au second liure de Comp. pharmac. general. Comme aussi l'emplastre fait de Ceruse crue, est blâc: & celuy qu'on fait d'Ocre crue est pasle: mais l'emplastre fait de l'vn & de l'autre bruslez, est rouge.

Mesme bien souuent le seul mouuement fait que la composition aura la couleur que nous demandons: comme le Nutritum qu'on fait de Litharge, sera beaucoup plus blanc, si on le remue longuement avec le pilon.

Aussi les Penides, tant plus on les remuera avec l'espatule & avec les mains, tant plus elles seront blanches, encores qu'elles soyent faites de bié petit sucre & bien sale. De mesme les Pilules blanches, le Diarisis simple, le Diatragacanthum frigidum, le Sucre rosat, & les autres choses faites avec sucre.

Le miel crud & le cuit, qui entrétés antidotes & compositions, deuiédront beaucoup plus blancs, si on les messe longuement ensemble, si sont bié aussi toutes les autres choses qu'on fait avec miel.

Les Iuleps qu'on fait cuire és Sirops, à fin de receuoir les sucs, veulent estre  
longue

longuement demenez avec vn baston, si on veut qu'ils deuiennent blancs. Il se trouuera encore plusieurs autres choses qui deuiennent blanches, pour estre ainsi demenees, & croy que cela ne vient d'ailleurs, sinon qu'en remuant il se mesle beaucoup d'air parmy, qui les rend ainsi blanches.

Comme aussi l'Vnguentum album de Rasis, l'onguent Citrin, l'emplastre Diachylon, & le Cerat refrigerant blanc de Galié, de Ceruse, & de gratia Dei, estās malaxe & tirez longuement ils blanchissent d'auantage, & l'Oxicroccu deuient plus passe.

Le Suin de laine, encores que de soy il soit noir, neantmoins demené, longuement il rend les emplastres blancs, comme font aussi les autres choses gluantes.

*L'vsage & façon d'incorporer les  
medicamens.*

# C H A P. XXXVI.

**N**Ous auons accoustumé de recevoir, assembler, lier (ou comme le vulgaire appelle) incorporer les medicamens, avec quelque humeur, pour



plusieurs & diuerſes cauſes : c'eſt à ſçauoir, ou à fin qu'ils ſoyent de meilleur gouſt, ou pour les pouuoir garder plus longuement, ou pour mieux conſeruer leur vertu, ou pour les faire leuer ou fermenter, qu'on appelle, ou bien pour donner la forme au médicament que nous voulons garder, ou bien pour en pouuoir vſer mieux & plus commodement.

Comme l'electuaire qu'on fait pour les Aſthmatiques & pouſſifs, veut eſtre incorporé avec miel, à fin qu'il en ſoit plus plaiſant à la bouche, & qu'on en puiſſe mieux vſer.

L'Ecleme d'Amandes, ſ'incorpore avec miel & ius de Fenoil.

Auſſi preſque tous les electuaires, principalement les Electuaires mols, ſ'incorporent avec miel, pour les meſmes cauſes & raiſons que nous auons dit : les electuaires durs avec ſuc de ſtrempé & diſſous en quelque humeur : & les poudres qui entrent en la hiera Hermetis, ſ'incorporent avec ſuc de Cocombre ſauage.

La matiere de laquelle les pilules ſont compoſees, ſe lie & aſſemble avec vin, ſuc d'Aluine, ius de Morelle, ius de  
Aeur

fleur de Citron, ius de Choux, d'Ache, d'Endiuie.

Les pilules qu'on appelle Aurees, s'incorporent avec mucilage de Diagrangant: les cochees de Rasis & de Mesues, avec ius d'Aluine.

Les poudres des pilules d'Hermes, doyuent estre incorporees avec Ladanum, dissous avec vn pilon chaud.

On lie & assemble les Trochisques de Galia moscata, avec mucilage de Gomme Diagragât, extraite en eau rose, ou bien avec Ambre dissous en huile de Ben.

Le miel duquel on vse pour lier & assembler les medicamés laxatifs, doit estre cuit & escumé plustost en vin qu'en eau, sinon que quelque chose empesche.

Qui desirera d'auoir d'auantage d'exemples, de la façon de lier & incorporer les medicamens, qu'il lise Mesues traitant des electuaires, & des autres antidotes, des Cerats & emplastres, & il en aura là tant qu'il voudra: aussi ne me suis ie pas voulu amuser à en mettre beaucoup, de peur d'estre trop long & ennuyeux.

*L'usage & façon de former les medicamens.*

C H A P. X X X V I I.

**L'**Ordre requiert , qu'apres auoir traité de la maniere de lier' & incorporer les medicamens, nous adiouſtons le moyen de donner à chacun la forme cōuenable à ſa compoſition: veu que chacun a ſa forme propre, laquelle ne ſemble eſtre gueres differente en pluſieurs quant à la conſiſtence: comme és Cōdits, Reſinez, Sirops, Elegmes, Apozemes , Antidotes compoſez avec miel, Piſules, Trochiſques, Onguens, Cerats, Emplaſtres.

Nous appellōs la forme, la conſiſtence du medicament , laquelle peut eſtre ſolide , ou liquide plus ou moins , ou moyenne. Bien eſt vray qu'en pluſieurs, meſmement és ſolides , outre la conſiſtence, nous leur donnōns vne certaine forme avec les mains, ou avec quelque'autre inſtrument: cōme nous voyōs que le ſucre, pour auoir eſté mis dans des pots incontinent apres qu'il eſt cuit , il a la forme de ces pots à ſçauoir forme pyramidale , qui eſt large par le bas montant en pointe : & combien voyons nous d'images qu'on fait avec ſucre,

sucre, ou avec cire, & avec autres choses, lors qu'elles sont chaudes & fonduës: car lors elles prennent telle forme qu'on veut, laquelle elles retiennent apres estre endurcies & refroidies: & voila comme nous formons les electuaires solides & tablettes, tantost en lozange, tantost toutes carrees, & tantost vn peu plus longues que larges, comme on fait celles qu'on appelle communement manus Christi, & quelquesfois en triangle, les pilules, nous les faisons toutes rondes, ayans la forme & grosseur d'un Ers, ou d'un pois chiche, i'entēs des chiches faits en forme d'ers & non pas des chiches qu'on appelle chiches de Belier, lesquels sont faits en pointe, parquoy leur forme ne seroit aucunemēt propre aux pilules. Aussi les pilules cochees, c'est à dire, faites comme petis grains, & petites (d'où ie croy que Rasus & le vulgaire ont pris le nom comme il sera dit au troisieme liure) sont formees par Paulus, à la forme & grosseur de petis grains.

Pareillement les Trochisques, nous les aplanissons premierement, & les faisons vn peu caues au milieu, & apres cela nous y engraçons quelque marque  
 & cara

& caractere (mais de cela il en sera parlé incontinent apres ) aussi ils ont prins leur nom de là, car Trochisque, signifie petite rouë : comme aussi les pilules à cause qu'elles sont comme petites boulettes que les Latins appellent pilæ, & ainsi plusieurs autres compositions: car les Grecs appellent Cyclisci les compositions faites en forme de petit cercle, & Pastilli celles qui sont comme petits pains: car les Trochisques, qui ont ceste forme, sont comme petits cercles, c'est à dire superficies plaines, ayâs leur circonference & rondeur distant egale- ment du centre ou milieu, & non pas que ce soyent corps esphériques & ronds, comme sont les pilules.

Quant aux Cerats & emplastres, nous les mettons en petites masses, que Galien a appelé Magdaleæ ( d'où ie croy que le vulgaire a prins le nom corrompu de Magdalcones) c'est à dire fait en forme longue & ronde comme vn Cylindre.

Il ya aussi des compositions qu'on tire avec vn petit crochet de fer, & puis on les entortille, & leur baille-on telle forme qu'on veut, comme les Penides, & ce qu'on appelle Alpheni.

Comme

Comme aucuns tirent ainsi les emplastres Diachilō, & de gratia Dei, mais ils les mettent apres en masses.

*Del'vsage & façon de sceller & marquer  
les medicaments.*

C H A P. XXXVIII.

Nous pouuons mettre entre les especes de preparation, quand on scelle ou engraue quelque marque & signet aux compositions: Vray est qu'il semble que cela n'importe pas beaucoup, comme quand d'un medicament formé comme de pilules, on en fait des Trochisques par le moyen d'un cachet de bois qu'on y appose: neantmoins les Anciens en ont fait grand cas, tant à cause d'elle mesme, que par accident, à cause d'elle, comme quand on cachettoit la terre Lemnia avec vn seau auquel l'image de Diane estoit engrauee, il estimoÿet que ceste terre prenoit de là, partie de sa vertu: cōme aussi le Roy Nichepsos, vouloit que le laspe verd qu'on porte enchassé en vn anneau, ait graué la figure d'un dragon enuironné de rayons, ce que Galien toutesfois reiette comme vain. Je confesse bien que  
le

le cachet ou estoit engrauee l'image de Diane , qu'on apposoit à la terre Lemnia , y proufisoit, mais c'estoit par accident, car par ceste marque on cognoissoit la vraye terre seelee , mais non pas cōme on fait auiourd'huy, qu'on scelle toute terre , & la vend-on pour terre seelee, encores que la pluspart de celle dont nous vsons soit sophistiquee , & mesme prinse en noz quartiers. Il est bien vray aussi , que moy estant à Constantinoble , i'en ay recouré de marquee de diuerses marques, par le Ture.

Et à la mienne volonté que les Trochisques Theriacaux, & tous les autres medicamens que nous assemblons des nations estrangeres , fussent marquez de quelque marque digne de foy, comme de quelque seau publique , ou du seau Royal : ce qui est auiourd'huy obserué en plusieurs lieux, és draps de laine & de soye: cela seroit cause que nous n'acheterions pas si souuent bien cher, des choses fausses & brouillees au lieu des vrayes: ou pour le moins que celuy qui les védroit aux premiers marchés attestast par son signet manuel , ou par quelque autre forme de serment solennel, que ce qu'il vend est vrayement ce  
pour

pourquoy il le vend, & ceux-là aux autres, & ainsi consecutiuellement, mais ie croy que nostre lourdisse, negligence, & paresse, les rend plus hardis larrons: car nous ne cognoissons point bien fouuét les vrais, & noz Apoticairez aussi ne s'en donnent pas grand peine, aussi est-il bien aisé de les tromper: trauallez donc trauallez diligemment, à recouurer desormais les vrais & legitimes. Il n'y a pas encores beaucoup de moys passez, que i'ay fait vfer à vn ladre, pres de deux liures de Trochisques de Viperes, & toutesfois il n'en a senty nō plus de proufit que s'il eusse prins de nostre terre seelee, & cependant celuy qui les a vendus affermoit qu'on les auoit apportez de Montpellier, & que c'estoyét des vrais, ce que ie luy monstray estre faux, par l'autorité de Galien: toutesfois la necessité nous contraignit à les acheter bien chèrement, sans qu'ils proufitaissent de rien, comme i'ay dit: laquelle tromperie est assez commune és autres medicamens aussi, si on ne s'y prend bien garde, ce qui est bien digne d'vne alpre correction & chastement.



*De l'usage & maniere de serrer pour  
garder les medicaments.*

C H A P. XXXIX.

**I**L importe beaucoup, & est merueilleusement necessaire de sçauoir comme il faut serrer, & en quel lieu, les medicamens, tant simples que composez, non pas seulement le lieu commun & general, mais mesmes particulieremēt en quel lieu chascun doit estre gardé (dequoy il sera parlé incōtinent apres) pareillement de ce que les vns veulent estre serrez à part & tous seuls, les autres se gardent mieux en leur vertu quand on les met ensemble avec quelques autres choses, ou mesme leur vertu s'augmente, ou pour le moins leur vertu se diminue biē peu. Nous auons parlé de cecy en general, au troisieme liure de nostre methode de composer les medicamēs, mais i'en traicteray icy vn peu plus amplement.

Nous ferrons donc ce que nous voulons garder: mais il n'y a rien qui soit occasion de faire diuersemēt serrer les choses, q̄ la putrefaction: laquelle vient souuent de la trop grande chaleur, froidur, ou corruption de l'air, ou bien de

l'humid

l'humidité superflue de la chose qu'on veut serrer, ou de la foiblesse de chaleur: & voila d'où vient que nous faisons bien seicher, ce que nous voulons longuement garder en son entier, non seulement faisant consumer son humidité superflue, mais aussi meslant parmi que'que chose qui ait vertu de desseicher: & bien souuent des choses qui ont vertu de restreindre; & c'est ainsi que nous faisons seicher au Soleil ou au feu, les Resinez, Sirops, Antidotes, principalement ceux qui sont composez avec choses humides, les Pillules, Trochisques, quelques Onguens, Cérats, & emplâstres: y meslant toutesfois (dans les medicamens internes & qu'on prend par la bouche) du Sucre ou du miel, ou bien de l'un & de l'autre, qui seruēt de remede pour les seicher: mesme en quelques vns il est bon d'y mettre du vin-aigre & du Sel: mais es autres on y met des choses metaliques, & terrestres, lesquelles par leur siccité resistent longuement à la putrefaction.

Il est donc besoing que les choses qu'on veut garder, soit simples ou compositions, soyent competamment seiches.

Et ainsi le vin bouillissant dás la cuue, ou dans le toneau, consume l'humidité, qui seroit cause de le faire gaster & perd aussi sa ferueur, s'il est fort & puissant, & que l'humidité ne soit pas grande.

Nous cuiterós la chaleur, si nous serós les choses en lieu ou le Soleil ne dóne point, mais en quelque lieu qui ne soit pas trop chaud, ains froid.

Nous gardons du froid & de la gelee tāt que nous pouuons, les choses qui estás humides se pourroyét geler, comme sont les eaus distillees.

Nous conseruons la chaleur interieure, quand elle est foible & debile, gardant qu'elle ne s'esuente: & voila pourquoy nous serrós dans des boittes, coffrets, & pots bien estoupez, tout ce que nous voulós garder, sinó que ce soyent choses de grāde force & vertu: car Galien mesme veut qu'on tienne le pot de la Theriaque bien souuét ouuert, à fin qu'elle prenne vn peu d'aer.

Le Rhabarbe, qui le voudra longuement garder en sa force, il le faut couvrir de Cire seule, ou de Cire meslee avec Terebentine, ou avec miel blanc, ou l'enterrer en la semence de l'herbe

aux Puces ou dās du Millet, selon la doctrine de Mesues. Lequel veut aussi que pour biē garder l'Agarie, & faire que sa faculté soit plus viue, il le faut mettre avec du Gingēbre, du Daucus, du liguſticum, ou de Polypode de Chesne.

L'Aloës veut estre serré parmi les choses aromatiques, ou avec du Bdelliū: & ainsi plusieurs autres, q̄ tu pourras voir en Mesue, quād il traicte des simples.

Quād à la Casse, le plus expedient & meilleur moyē pour la garder est de la laisser dans la gouſſe, & ne l'extraire point, sinō quād on s'en veut seruir: il est biē vray, qu'il est bō d'enterrer les gouſſes dās du sable, en la Caue, car ce la les gardera de seicher si tost.

La Coloquinte se garde plus longue mēt entiere, q̄ si on luy a osté la Mouēlle: & est meilleure & plus salutaire, si on la garde avec Mastic, Galanga, & autres medicamēs propres à l'estomac, au foye, & au cœur.

Il est bon aussi q̄ le pot ou la phiole, dās laquelle on tiēt le suc de Roses, de Grenades, de Coings, & autres semblables, ait vn cōduit ou Canal embas, par lequel on puisse tirer du suc quād on voudra, car si on est cōttaint de le rēuer

ser, pour eiter l'huile qui est par dessus, on troublera tout le suc, tellement que la foudraille sortira avec le cler, & ainsi tu trouueras vn suc trouble & mal net, au lieu de l'auoir dur & net.

La crouste qui vient avec le temps au Miel, & à quelques autres medicamens, doit estre laissée en son entier, si on veut que ces medicamens se gardēt longuemēt entiers, comme dit Galien au 2.liure de Alimentis : laquelle preuoyance est aussi commune aux suc desquels nous auons ci-deuant parlé, & au vin aussi, & aux autres choses.

Heras, comme il est dit au 8. liure de compos pharma. part. de Galien, commandoit de garder la compositiō qu'il appelle Diabesasa, en vn pot d'Estain.

Au mesme liure est ordonné que les medicamens faits pour l'estomac, doyuent estre gardez en pots de Corne.

La Terbentine veut estre gardee en, vn pot de fer blanc, ou de Verre, ou de Caillou, la ou elle se garde beaucoup mieux que non pas en vn pot de bois, ou de terre, sinon qu'il soit verni.

Galien pour garder le Teriaque, ne la mettoit pas dans vn pot de bois, comme on fait auionr d'huy, mais plustost  
en quel

en quelque pot de pretieuse matiere.

Quant à l'huile, si on le met en la Caue en vn vaisseau de Caillou, ou de Pierre, ou de Plomb, il se garde fort bien, & long temps.

Les poudres cordiales, on les tient dans des pots de verre qui ont l'entree estroite, & les couure on bien.

Les fleurs, & toute autres choses de bonne odeur, dans des coffrets de Tillet.

Les semences se gardent bien dans des sachets faits de papier, & mesmes bien souuēt pour les mieux garder, on les laisse dans leurs gousses.

Mais les medicamens liquides veulent estre ferrez & tenus en des pots de matiere plus solide: cōme en pots d'Argent, de Verre, de Corne, & quelquefois de terre, poutueu, qu'elle ne soit trop rare d'autresfois autli en pots de bois mesmement de Bouis.

Les medicamens qu'on fait pour les yeux, & les autres ou il entre de vin-aigre, de poix liquide, & de Resine de Cedre, il les faut serrer en pots d'Erain.

Les gresses & mouëlles en pots d'Etain, ou Plomb blanc: voila ce que Dioscoride en dit.

Que donc on face bien seicher les herbes, puis qu'on les mette en poignées ou fardeaux.

Quant aux choses qui pour les composer les à fallu cuire, ou autrement chauffer, il ne les faut iamais serrer qu'elles ne soyent refroidies.

Democrates comme dit Galien au 7. liure de comp. pharmac. part. serroit le Diacodium apres l'auoir laissé refroidir: comme aussi Mesues presque toutes les autres compositiōs ainsi faites.

Il se faut bien aussi garder de serrer les medicamens, en lieu moitte & humide ( hormis quelques vns ) ains au lieu le plus sec de la maison.

Si apres auoir serré vn medicament, tu veux qu'il bouille encores en son pot, il ne faudra pas remplir du tout le pot: mais y faudra laisser quelque espace, afin qu'il puisse prédre quelque peu d'aër: & c'est ainsi qu'on fait au vin, asçauoir on le met au commencement dâs des tonneaux, qu'on ne remplit pas du tout: semblablement les cōserues qu'on veut faire cuire au Soleil, on ne réplit pas les pots entieremēt: aussi Galien ne faisoit pas remplir entieremēt les pots, ou il mettoit la Teriaque, quand il la

vouloit encores laisser cuire & bouillir à sa propre chaleur.

*De l'usage & maniere de conseruer & bien garder les medicamens.*

CHAP. XL.

**I**L'Ay dit sommairement de l'usage de seruer les medicamens : & mesme en passant i'ay esté comme cōtraint par la vicinité, de toucher quelque chose de la garde & cōseruatiō d'iceux, en quoy nous entendons aussi de parler, de la duree tant des simples que des cōpositions: car tout ainli qu'on n'estime pas moins, sçauoir bien cōseruer & garder ce qu'on à acquis, que de sçauoir bien acquerir: aussi n'est ce pas assez d'auoir bien sceu choisir les medicamens qu'o veut garder: mais il les faut sçauoir biē conseruer, & sçauoir aussi combien ils peuuent durer en leur entier: car puis qu'il est ainli que toutes choses prennent fin, voire mesme les pierres, & les choses qu'on estime comme diuines, à plus forte raison les simples & les cōpositions se corrompent quelquefois, il est vray que les vns sont plustost corrompus que les autres, & celà vient ou de la nature de chacun d'iceux, ou de la dispositiō de l'air & du temps, ou du



lieu où on les à ferrez pour les garder.

Les herbes donc , & les fleurs veulent estre changees tous les ans , & les eaus aussi qu'on en tire par distillatiō, principalement celles qu'on à fait distiler en double vaisseau, ou à la vapeur de l'eau bouillante: car elles ont beaucoup plus d'humidité que non pas celles qu'on fait distiler à la flâme du feu, avec du charbō, ou avec du sable chauffé, ou avec cendres, ou avec Machefer en poudre.

Toutesfois l'eau qu'on fait du vin, distilee & passée par l'Alébic plusieurs fois se gardera plus iōguement, à cause qu'elle est mieux purgee par la reiteration des distilatiōs: mais il la faudra mettre dans vn pot de verre bien estouffé.

Or pour bié garder les herbes, apres qu'elles sont seiches, il les faut mettre dans des sacs de toile clere, comme seroit du Canauar, à fin qu'elles ne pourrissent, & que aussi elles ne se remplissent de poussiere.

Quāt aux racines, ils'en treuve plusieurs qui se garderont bien plus d'vne annee, comme nous auons dit au premier liure traictans du chois des simples, là où nous auons aussi amplemēt  
discouru.

discouru, de la duree des autres: apres qu'elles sont seichees, on les peut garder toutes seules, ou les confire avec Sucre ou Miel: si on les veut garder à part, & elles sont grosses, il les faudra tenir pendues, en quelque lieu b' éouuert & aéré: mais si elles sont petites on les pourra mettre dans des sachets de toile. Quât aux fruiëts, si on les met dans du miel, de sorte que l'vn ne touche pas l'autre, & puis qu'on les mette en lieu frez, ils se garderont vn an entier, qu'issemblerôt encores tous frez.

Aussi les fueilles des herbes, se gardent fort lôguement en leur entier, & sans se changer, si on les sette entre deux fueilles de papier: toutesfois il ne les faut pas presser, mesmement celles qui sont grasses, & ont beaucoup de suc: car si on les presse, incontînet elles moyriront, & se pourriront.

L'Ai oës pendu au plancher se gardera trois & quatre ans en vie, & si germera, si fera bié aussi le Telephium, & la Ioubarbe, à cause de la grande abondâce de suc gros & visqueux qu'ils ont.

Si vous enfermez les fruiëts, & les fleurs, en vn pot bien estoupé, & puis que vous les mettiez en quelque eau

courâte, tellement que l'eau couure le potils se garderont vn an entier.

Si aussi vous mettez du Moust dans vn tonneau enduit de poix, & le bouchez bien apres, & l'enseuelissez par quarante iours en eau courante, ou en quelque autre eau pure & nette, il sera doux toute l'annee, si ce que dit Caton est vray. Les fruits aussi couuerts de Cire, & enterrez dans vn monceau de bled, ou dans du son, se garderont longuemēt qu'on diroit qu'on ne fait que venir de les cueillir.

Mesmes les Oignons, Ails, Squilles, vits de Chien, Serpentine, Escudez, Satyriū, & les racines bulbeuses de quelques autres plantes, à cause qu'elles sont pleines d'vn certain gros suc & gluât, se garderōt fort lôguement encores qu'on ne les ait rien faites secher.

Quāt aux Metaliqs & Pierres, qu'on les mette où on voudra, elles se garderont assez: mais il est bon de les preseruer de la poussiere, & de l'ordure.

Mais les compositions nous les gardons aujourd'huy diuersement: car les condits qui sont humides, les Eclegmes, Syrops, Electuaires mols, nous les mettons plustost en pots de verre, ou  
de

de Caillous, ou de terre bien forte & massive, que non pas en pots d'Etain: car il tié: tousiours quelque chose du Plomb. Mais les electuaires solides, nous les mettons en boittes de Hestre, ou de verre: comme aussi les Poudres & Trochisques. Quant aux Pillules, le plus souvent, nous les enueloppons de peau, & puis les serrons en pots d'Etain. Les huiles, onguents, Cerats liquides, nous les mettōs en pots de verre, de Caillous, ou d'Etain.

Les emplastres, apres qu'on les a mis en magdaleōs, qu'on appelle, il ne faut que les couvrir de papier tout au tour, hormis le milieu de l'vn des bouts.

*De l'usage & maniere de confire.*

C H A P. X L I.

**I**L est tēps de parler maintenant de la cōfiture, à cause que le plus souvent c'est comme vne espeece de coction (de laquelle coction, & des autres sortes de preparation qui la suyuent, nous en auōs fait vn assez ample discours) avec ce que la cōfiture est bien souvent necessaire pour la conseruation.

Les confitures se font pour la plupart de racines, herbes, tiges, reietons, fleurs, fruiēt, semences, & quelque fois d'escorces.

et scorces. Pareillement on les fait le plus souvent avec Sucre, ou Miel, ou avec les deux ensemble, quelquefois avec des Syrops, Iuleps, Sel, eau salée, vin-aigre, & autres, qui ayans vertu de dessécher, & consumer l'humidité superflue, & de restreindre, preseruent les choses de corruption & pourriture car aussi on confit pour la pluspart ces choses afin de les mieux garder. Il est vray que bien souvent on le fait pour leur donner goust & saveur, & quelquefois pour tous les deux, cōme on cōfit le suc de Meures avec Miel, en la cōpositiō du Diamorō. Et qui voudroit prédre le mot de Confiture largement, on y pourroit biē aussi cōprendre les Syrops, & plusieurs Antidotes, & les Pilules, & Trochisques, à cause qu'on incorpore bien souvent ces compositiōs avec quelque humeur plaisante & de bon goust, afin de les rédre de meilleur goust, & plus aisées à aualler : & ainsi on confit les Roses, & les Violettes, & les autres fleurs, avec Miel ou Sucre, & en fait-on le Miel Rosat ou Violat : cōme nous auons dit en ce q̄ nous auons fait sur Mesué, parlant des condits : & comme nous en parlerons encores au  
troisi

troisième liure.

Les confitures se font, faisant departir & arrouser de cest humeur plaisant toute la substance de ce que nous voulons confire: cōme quand nous mettōs en confiture les fleurs, fruiçts, escorces de Citron, & de Courle, les tiges de Laiçtuës, & plusieurs autres: semblablement on confit les Myrabolās frez, ou bien on les humecte premieremēt s'ils estoient trop secs, comme Mesues l'enseigne traictant des simples, & des condit: quelquefois nous les couvrons de Sucre, comme d'une crouste, ce que nous faisons plustost pour le goust, que pour augmenter ou cōserver leur faculté & vertu: comme on confit les semences de Coriandre, de Pavoit blāc, d'Absinte marin, d'Anis, de Fenoi, d'Ache, pareillement les Noiaux de Pesche, les Pignolats, Pistaches, Amandes douces, & mesme les ameres qui voudra, & les escorces de Citron & de Cannelle, nous les couurons seulement de Sucre:

D'autrefois pour faire vne confiture, on y met quelque chose aromatique, cōme Mesues escrit, que pour cōfrire les Myrabolans Embliques, il les faut

faut mettre avec choses aromatiques, & quelques autres cōpositions semblablement: mais confire se prend lors plustost pour aromatiser, encores que cela se fasse aussi pour donner goust & faueur, comme ie diray incontinent apres, traictant de l'vsage de farcir.

Siles choses que nous voulons confire sont grosses, nous les mettons volontiers en pieces & quartiers, afin que l'humeur paruiene plustost à toutes les parties: & voila cōme on fait pour confire les Coings, les Pesches, & les racines qui sont grosses, asçauoir on les met en pieces auant que les confire.

Toutesfois la Cassie en cane, quand elle est tendre, se confit toute entiere, & la Noix muscate avec son escorce verte, cōme est celle de nos Noix communes, les petis Citrons, aussi les petites Oranges, les Melons quand ils sont encores petis & tendres.

Quant à la quantité de Miel, de Sucre, ou autre matiere pour cōfire: & par quel moyen & comment il les faut cōfire, c'est à dire donner crouste, principalement aux semences & noiaux, tu le pourras voir au troisieme liure, en la premiere section.

Nous

Nous confifions les fleurs de Capre, les faupoudrant de fel , auant qu'elles foyent eſpannies & ouuertes : car ſi on les penſe garder ſeulles , elles ſe pourriſſent : On en fait autant des fleurs de Geneſt , & meſme des fleurs de Geneſt d'Eſpagne qui ſont de meilleur odeur, touteſois nous y mettons du vin-aigre iuſques à ce qu'elles trempent dedans.

*De l'vſage & façon de farcir.*

C H A P. X L I I.

**L**A farciſſure eſt quaſi vne certaine façon de corſiture : elle ſe fait quâd on remplit quelque cavitè vuide & toute apparente, avec choſes de ſenteur , ou autres qui conuiennent à neſtre but & intention: cōme nous voyōs que les cuiſiniers farciſſent les poulets, oyſons , cochons , & quelques autres, avec des herbes qui ſe treuuent en nos iardins, qui ſont aromatiques & odorātes, avec fleurs, laiſſues, & autres herbes telles qu'on veut, & quelqueſois ils y meſlent des poudres aromatiques, & de celà ils répliffent toute la cavitè du vêtre, & meſme bien ſouuēt les eſpaces vuides qui ſe treuuent entre la chair & la



la peau, lesquels ils separent par force.

Et de mesmes, on oste le cœur des racines de Panicaut, puis on les coupe, & apres au lieu du cœur qu'on en a osté, on y met de Gyrosles & de la Cannelle, les ayant faites vn peu tremper premierement:& ainsi on les farcit, selon l'aduis & ordonnance de Mesues.

Aussi on prend vne Oye, & luy tire-on toutes les entrailles, au lieu desquelles on la farcit de la chair d'un vieil chat, & d'herbes nerueuses & lors la graisse qui en decoule est bien de plus grande vertu, qu'autrement.

Semblablement on fait des sachets de Cotton en formé de petit bonnets, qui seruent pour appliquer à la teste, lesquels on farcit:comme on en fait aussi pour l'estomach, qu'on farcit de choses aromatiques, ou d'autres choses propres au cerueau ou à l'estomach.

Au reste comme nous voyôs que les cuisiniers entrelardēt les oiseaux qu'ils veulent mettre rostir, avec clous de Gyrosles, & pieces de Cannelle, afin qu'ils soyent de meilleur odeur, & de meilleur goust:ainsi nous entrelardôs avec Gyrosles & pieces de Cannelle, les Noix verdes, apres les auoir faites tremper  
& cuire

& cuire, iusques à deuenir tendres : & les racines de Satyrion aussi , apres qu'elles seront cuittes en la seconde decoction de Pois , chiches , iusques à ce qu'elles soyent assez tendres: pareillement les Coins que nous voulons confire en quartiers: & nous pouuons appeler cela , farcir , ou aromatiser, ou tous les deux , comme il nous semblera bon.

*L'usage & façon de faire pourrir les  
medicamens.*

C H A P. XLIII.

**L**A putrefaction est fort semblable à la coction, i'entens de la putrefaction de laquelle ie parle à present : car ie ne veux pas entendre de la pourriture prise absolument & en sa propre signification , mais seulement d'un certain changement qui se fait par la chaleur extreme , mesme des choses pourries, comme d'un fumier, & des escorces pourries. Comme pour exéple, l'huile qui se treuve dans les vescies qui sont ordinairement és Ormes, mis dans vne phiole bien forte, vescies & tout, & puis bien estouppee, & enterree dans du fumier de cheual bien fort chaud , l'espace de quinze iours : apres

tirée & mise au Soleil, & ce qui se trouuera nager par dessus, qui sera cler, mis en vn autre pot, ce sera vn singulier & fouuerain remede contre tous vlceres.

Par ce moyen aussi nous rendrons le vinaigre fait de vin, beaucoup plus fort, plus subtil, & plus acré: ce qu'on peut pareillement faire, ou le mettant au Soleil, ou mettant du vinaigre bien fort dans du vin, ou bien les fucilles, reiettons, & rabotteures de Sorbier: ou bien le ius aigre de Citron, comme dit Galien au 2. liure de Alimentis. Aucuns y mettēt des langues de noz Lâproyes, pour ceste mesme fin.

Pareillement de la paste on fait le lenain: & du laiēt qui se treuve au ventricule des animaux nourris de laiēt, se fait la presure ou caillé: & l'vn & l'autre pour estre acrés de pourriture, ayans perdu leur chaleur naturelle, & acquis vne chaleur nouvelle.

Et ainsi Galiē destrempoit deux parties de Chalcitis, & vne partie de Litharge (ou selon Dioscoride de Cadmie) en fort vinaigre, & au cœur de l'Esté, oués iours les plus chauds, il le mettoit dans vn pot neuf, & l'enterroit dās vn fumier, par l'espace de quarante iours,

iours, & par ce moyen il auoit vn medicament fort propre contre la galle & rongne.

Galien aussi en la composition de Diachalciteos, demande qu'on y mette de la gresse desia pourrie de vieillesse, & d'huile fort vieil & à demy pourry, aussi est il de fort mauuaise odeur & mal plaisante. Pareillemēt il faisoit cuire vn vieil fromage pourry de vieillesse, dans la decoction d'vn ismbon salé, pour faire vn medicament propre contre les nodositez & durtez qui suruiennent principalement es iointures.

Mesmes quand le vin & les autres sucz bouillent, & par ce moyen se purgent de leur humidité superflue, c'est comme vne espeece de pourriture: & les fleurs ensucrees, ou emmiellees, les mettant au Soleil: & les antidotes où entre du miel, quand on les fait bouillir.

Aussi quand Galien vouloit faire des *Lib. 4. Samedicamens propres à oster les lassitudines, avec semence de Sapin, & fleurs de Peuplier, il les laissoit tréper plusieurs mois, ce qui estoit comme vne espeece de putrefaction.* *nit. tuend.*

*De l'usage & maniere de frire, & rostir  
les medicamens.*

C H A P. X L I I I I.

**F**Ricasser & rostir ne sont pas seulement choses qui approchent fort de la coction, mais bien souuēt ce sont especes de coction, comme és viandes: toutesfois il aduient bien peu souuent qu'on face frire ou rostir les medicamens, pour faire cuire l'humidité crue & superflue, ains pour la consumer du tout.

Or on fricasse le plus souuent en vne poille, aussi à elle prins de là le nom de poille à frire. Les medicamens qu'on prepare ainsi dans la poille, perdent beaucoup de leur violēte qualité, comme dit Galien, au liure de Alimentis, traitant de la Serpentine. Mais on rostit les medicamens sur vne tuile rouge, ou dans le four, ou mesme sur les charbons allumez: & d'autant que ces deux ne sont gueres differens l'un de l'autre, & aussi qu'ils se font par le moyen de la chaleur, nous les auōs aussi voulus traiter ensemble.

Comme Galien dit que pour rendre la semence de Melanthium propre contre

tre les catharres & de fluxions, il la faut  
frire: & la seméce d'Agnus castus, pour  
garder qu'elle ne caule pas tant de mal  
de teste, comme il dit au secôd liure de  
Alimentis.

Aussi Mesues ordonne de rostir la se- *Mesue*  
mence de Lin & de Nasitort, pour faire *Ibidem.*  
l'elegme pour les Phrissiques: & la se-  
mence de Porreaux & de Nasitort, en  
la composition qu'il appelle Electua-  
rium nostrum.

Le Cumín apres l'auoir laissé trem-  
per en vinaigre, le lendemain on le fait  
seichèr, & le fricasse-on en vn pot de  
terre bien cuit, comme dit Galien par-  
lant de la compositiō du Diaciminum,  
au 4. liure de sanit. tuend.

Ordinairement on fait rostir le Co-  
riandre, apres l'auoir fait tremper quel-  
que téps en vinaigre: car par ce moyen,  
on tient qu'il laisse sa trop vehemente  
chaleur, qu'il a en sa superficie, telle-  
ment qu'apres il refroidit seulement.

Aussi fait on rostir les grains de Gre-  
nade, en l'autre electuaire de Mesué.

Pareillement, les semences de Pour-  
pier, de Raisin, d'herbe aux Pucés, de  
Plantain, de Guymauue, d'Anis, de Mar-  
rube, doyuent estre rosties, quād on les

veut faire seruir contre le flux de ventre, selon le dire de Galien.

Les fruiçts de Meurte, & les Galles rompues en cinq ou six piéces, veulent estre rosties, apres les auoir faiçtes tréper vne heure en huile, quand on veut qu'elles seruent contre la pelade : mais il faut que l'huile soit quelque huile astringent, où bien en son lieu on pourra mettre quelque autre suc, quand il est besoin de plus grande astriction.

Tous les Myrabolans apres les auoir faits tremper en quelque suc astringét, & les auoir seichez avec vn linge, veulent estre rostis, mais il les faut retirer auant qu'ils deuiennent noirs, & qu'ils soyent bruslez, à fin que leur vertu ne se perdede dy, si on les brusloit, de façõ qu'ils deuinsent en cendre. Car les Myrabolãs & le Rhabarbe, sont beaucoup plus astringens quãd ils sont rostis, que s'ils estoient simplemēt cuits : & bruslez plus que rostis, comme dit Mesué.

Les Ben estans rostis, perdent partie de leur humidité superflue : & l'autre se cuit, qui est cause qu'estãs rostis ils laschent seulement le ventre, & ne sont point vomitifs.

On fait aussi rostir les Noisettes, pour  
faire

faire l'eclegme de Pino.

Aussi quand il en est besoin, on fait rostir la Gomme Arabique, le Diagragāt, l'Ambre à Patinostres, & les autres gommes, rompues en petites pieces de la grosseur d'un Ers, iusques à ce qu'elles deuiennent blanches.

Semblablement on fait rostir l'Amidon, quand on veut faire les Trochisques de Terra sigillata: & des Trochisques de Spodio, seconds de Mesué.

Or le moyen de frire & rostir les choses susdites, est: el: on prend vne poille, vn autre vaisseau de fer, & quand il est biē chaud, mesmes iusques à estre tout rouge, si besoin fait, on le retire de dessus le feu, & met-on dedans les fruiets, semences, racines, ou autres choses, mais il les faut tousiours remuer avec vne espatule de fer, à fin qu'ils ne brulent. Que s'ils ne sont encores assez rostis, on les oste, & fait-on chauffer derechef la poille ou autre vaisseau, puis on les fait rostir, iusques à ce qu'on voye que c'est assez.

Les choses donc qui sont grosses, espesses, humides & gluâtes, veulent estre rosties plus longuement, & celles qui sont contraires, veulent estre moins ro



sties, comme sont la semence d'Anis, de Cumin, & de Nasitort: Quant à la semence de Lin, & de l'herbe aux puces, pource qu'elles ont abondance d'humidité gluante, on les peut bien rostir vn peu plus longuement.

Il se treuve bien des medicamens qu'on peut rostir dans le four, ou sur la voute du four, ou sous la cendre: & mesme quelquesfois on les y met tous seuls, & d'autresfois on les met dans vn pot de terre neuf: que s'ils sont de moyenne grosseur, on les peut mettre tous entiers, mais s'ils sont gros, il les faudra rompre premierement: mesme il y en a qu'on couure de paste, & puis on les fait rostir dans le four.

La Squille sert à beaucoup d'vsages apres qu'elle est rostie, seló que dit Dioscoride, car estât rostie ou bouillie, elle perd beaucoup de son acrimonie, selon que dit Galien: & au contraire si on en prend de toute crue, elle nuit grandement aux entrailles, comme dit Mesué. On choisit donc vne Squille, & la nettoie-on, & puis on la couure avec de la farine pestree, ou avec de terre grasse, ou argille (vray est que Galien trouue cela vilain, traitant de la Theriaque) & fait

fait-on la crouste de l'espeſſeur d'un doigt, & puis on la fait roſtir ſous la cède chaude, ou ſous les charbons, ou dans le four. Aucuns la font roſtir dans vn pot couuert, dás le four, & eſtát ainſi accouſtree elle purge plus ſoudainement & plus doucement.

Pareillement on fait cuire l'Ellebore blanc, & la Scammonee, apres les auoir couuerts de paſte, ou mis dás vn coing, ſelon la doctrine de Dioſcoride & de Galien, & ainſi le pain, le Coing, & les ſimples meſmes, purgent plus benigne-ment. Auſſi ils mettent l'Opium dás vn vaiſſeau chaud, retiré hors du feu : & quand l'Opium eſt fondu, ils le retirent auant qu'il ſoit tellement ſec qu'il ſe puiſſe eſmier.

Auſſi Bulcaſis en ſon liure intitulé Seruitor. fait roſtir noſtre Acacia artiſcielle, ſur les charbons allumez.

Il aduient quelquesfois qu'on fait frire les medicamens avec quelque humeur, comme on fricaſſe les viâdes: car les Chaſtaignes ſe fricaſſent bien ſans aucune humeur: mais les Febues, Poys, la Chair, & les Champignons ou Potirons, ſe fricaſſent avec quelque humeur, comme avec huile, ou beurre. Et

ainsi en la composition de la Triphera Persique, on fricasse & frotte-on les Myrabolans iaunes , les Cepules , & les Noirs , en huile Violat , ou huile d'Amandes douces. Et tous les Myrabolâs apres qu'ils sont bien pilez & broyez, on les fricasse en verius, & suc de Meurte , & en vinaigre , puis les fait-on seicher en vn certain electuaire pour l'estomach, de Mesues. Pareillement en l'electuaire de Mesues, qu'il appelle Electuarium nostrum, il les faut tous fricasser en bon vinaigre odoriferant , & apres en ius de Coings. Et apres il adiouste , & feruefiant, c'est à dire, qu'on les fasse bouillir , tellement qu'on peut entendre cela qu'il les faut fricasser sur le feu, les remuant tousiours, & les frot tant , & non pas qu'il les faille frotter simplement en ces liqueurs , comme nous auons dit traitant de la maniere de frotter.

*Del'vsage & maniere de brusler  
les medicamens.*

C H A P. X L V.

**R**Ostir & brusler ne sont gueres differens l'vn de l'autre, & n'y a autre  
diffé

difference que du plus au moins : car les choses qu'on rostit par trop , sont bruslees , & celles qu'on ne brusle pas assez, ne sont que rosties. Or on a accoustumé de brusler les parties des plantes & animaux , mesme les animaux tous entiers, les simples metaliques, & les terrestres. Mais l'intention & la fin pourquoy on les brusle, est bien diuerse: car on brusle les vns , à fin de les pouuoir mettre plus aisement en poudre, comme les Poils, la laine Sours, la Soye, les coquilles des Huîtres , & des Pourpres, les ongles d'Asne, les cornes de Cheures, Cerfs, & Licorne, l'Ôz, Cuirs, & autres choses qui à cause de leur dureté, ou pour estre grosses & massiuës, ou gluantes, & autrement trop humides, ne se peuuent pas aisement mettre en poudre.

Les autres on les brusle, à fin de leur faire perdre leur grosse substance, & les rendre plus subtils, ou leur acquerir quelque autre qualité qui suit necessairemēt la chaleur du feu: & encores que cela aduiēne à toutes les choses qu'on brusle, ce n'est pas toutesfois tousiours la fin pourquoy on les brusle. Et ainsi tous les metaliques & Terrestres, deuiennent

uiennét plus subtils, pour estre bruslez, & ceux qui estoient par trop acres, sont moderez & adouciz : & ceux qui n'auoyent aucune acrimonie, l'acquierent en les bruslant, comme dit Galien au quatrieme & neuvieme des Simples parlant de la Chalcitis.

Par cela on peut bien cognoistre, qu'en bruslant, les vnes facultés s'adoucissent, comme le Verdet, le Chalcitis, le Misy, Sori, Vitriol, & Melanteria, sont rendus plus moderez : & en d'autres en les bruslant on leur acquiert nouvelles facultez, ou on les augmente: comme ils acquierent vertu de subtilizer, & causer les autres effectz que le goust a accoustumé de faire.

Il y en a des autres qu'on brusle, à fin d'attirer au dehors & à la superficie, quelque faculté qu'ils ont repugnanté à nostre intention, à fin de l'oster apres en les lauuant: & voila pourquoy Galien faisoit lauer la pierre Phrigienne apres l'auoir bruslee, & la pierre Ematite, es affectiōs & maladies des yeux.

On en brusle des autres, à fin de leur faire perdre leur premiere couleur, & leur en faire auoir vne autre qui soit plus plaisante au malade, ou bien pour desguiser

desguiser & couvrir les simples qui entrent en vne composition: & ainsi le verdet bruslé moderément fera les emplastres rous:mais si on le brusle par trop, les emplastres où on le mettra seront noirs.

La Ceruse estant pilee, & demenee avec vne espatule de fer, en la bruslant elle deuient rouge, 'commel'Ochre & l'Orpin.

Les Os & les Coquilles, quand on commence à les brusler, sont aucunement noirs, mais apres ils deuiennent bien fort blancs.

Il y en a aussi qu'en les bruslant, changent d'espee:comme la vipere bruslee se change en Sel Thesiaca: la Ceruse bruslee iusques à tant qu'elle rougisse, se change en Sandix:L'encens bruslé se conuertit en Suye, le Souffre, se cōuertit en huile: la Cadmia en pierre, se cōuertit en Cadmia de Fourneaux: & la Pompholix bruslee, se cōuertit en Spodium.

La façon aussi de brusler n'est pas semblable en tous: car il y en a qui ont vn humeur gras, qu'on brusle tous seuls, comme sont les Poils, la Laine Sourge, la Soye, les Cornes, Ongles, les Cuirs, les

les Hirundelles, ces Oiseaux qui remuent tousiours la queue, les Alouëttes, & quelques autres petits oyseaux, les Cigales, Scorpiõs, Viperes, Lieures, & quelques autres animaux à quatre pieds. Or pour brusler ces choses, il les faut mettre en vn pot neuf, & vn couuercle pertuisé par dessus, & puis les mettre sur les charbõs, ou dans le four: principalement ceux qui estans presque reduits en cendre, se peuuent perdre: Mais ceux qui mesme apres qu'ils sont bruslez demeurēt entiers, comme sont les Os, Ongles, Cornes, les coquilles d'Huystrs, les Pierres dequoy on fait le Plastre & la Chaux, & semblables, on les pourra couvrir de charbons allumez, ou bien les mettre dessus ces charbons, ou bien les brusler à la flamme ardente: sinon qu'on y voult adiouster quelque chose pour chāger leur vertu, car lors il les faudroit brusler en vn pot neuf.

Comme Galien pour faire le Sel Theriacal, brusloit les Viperes, mettant dessous quelques medicamēs: & ainsi aussi fait-on brusler la Ceruse, la Chalcitis, le Misy, le Sori, le Victriol, l'Orpin, la Sandaracha, & le Piomb, les enfermant dans

vn pot neuf, ou en vne poile.

D'autres pour les brusler, on les met en vn pot de terre crud, & puis met on ce pot au feu, & l'y laisse on iusques à ce qu'il soit cuit, comme la Cadmia, & l'Erain.

Mesmes des autres, on les met dans vn pot de Cuyure ou de fer, comme le Plomb.

D'autres on les fait brusler dans vne poille, comme sont le Verdet, le Borax, & la Litharge.

D'autres dans vn petit pot fait de Cendres d'Os ( qu'on appelle communément crezeul) à la forge des Orfeures: D'autres au feu: d'autres au four où on cuit le pain: d'autres en la fornaisie des potiers de terre: & d'autres au fourneau des Alchimistes.

Les vns, comme j'ay desia dit, peuuent estre bruslez tous seuls & à part, ou couuers de charbons, ou mis dans vn pot neuf, ou dans vn pot de terre tout crud, ou dans vn bassin, sans y adiouster aucune chose avec, pour les faire allumer, ou changer leur vertu & faculté: comme sont les os, cornes & Coquilles d'Huystres.

Mais il y en a que pour les faire allumer,



mer, il faut mettre parmy quelque matiere propre à cela, comme du Souffre, d'Alun, du Sel, ou del'Orge : comme Dioscoride l'a fort bien enseigné, traitant du Plomb bruslé, & d'autres,

Or si le pot dans lequel nous mettons ces choses pour les brusler, est de matiere fraille & aisee à rompre, comme de verre, auant que le mettre au feu, nous le courrôs tout de terre de Beauuois, & s'il est de pierre ou de caillou, nous le luttons avec de l'argille des Alchymistes, & le faisons seicher de peu à peu: & bien souuent nous luttôs le couuercle contre le pot, avec la mesme argille, à fin qu'il n'y demeure point d'ouverture, par laquelle les charbons ou la cendre puissent entrer, ou la matiere s'espancher. Ceste bouë ou fange se fait avec l'argille de laquelle les potiers de terre font leurs pots, destrempee avec eau, longuement broyee, & pestrie avec fiente de cheual, & qui vouldra on y pourra mettre du poil de quelque beste : les Alchymistes appellent ceste argille ainsi accoustree, *Lutum sapientiæ*: vray est que bien souuent, on se contente de la simple terre des potiers de terre, ou bien on met en son lieu du pla  
stre

estre destrempé en eau, ou bien de la farine peitrie avec blancs d'œufs.

Aussi les Alchymistes biē souuēt ferment le pot, faisant fondre & joindre les deux costez de l'emboucheure, lors que les choses qu'on veut calciner sont pretieuses, & qu'ils ne veulent pas aussi qu'elles s'ēsuentent: ce qu'ils font seulement és pots de verre qui ont le col long & appellé cela le Seau d'Hermes.

Mais il y a bien des choses où il n'y a pas grand danger encores que le pot ne soit pas couuert, si on les veut brusler dans le four: mais si pour les brusler on veut couvrir le pot de cendres ou de charbons: l fera bon de le couvrir, afin d'empescher qu'aucune ordure ne tombe dedans: ou bien afin que la matiere qu'on brusle ne saute & le perde: comme on peut voir au sel: & en quelques pierres.

Or le couuercle est quelquefois solide & tout entier: & d'autresfois il est pertuisé en plusieurs endroits ce qui est fait, afin q̄ les vapeurs grosses puissent mieux & plus aisément passer: desquelles il se faut bien garder, principalement quand c'est de quelque animal venimeux, cōme sont les Viperes, Scor

piôs, & semblables, ensemble aussi des metalliques.

Il faut donc brusler ces choses avec charbons desia à demi bruslez, mesme-mét si ce sont choses pretieuses, ou bié matieres desquelles on se veut seruir pour les yeux, afin qu'elles ne sentent aucunement la fumée: comme Galien avoit de coustume de brusler la pierre Phrygienne.

Il est aussi besoin bien souvent d'allumer le feu avec des soufflets, ou avec vn esuëtoir, afin que les choses soyent plustost bruslees, comme Galien traittant de la façon de brusler la pierre Phrygiëne au 4. lieu de Cōp pharm. part. le commande.

Aussi pour les brusler plus comodément, on met les vns en poudre, & les autres on les romp seulement en pieces de la grosseur d'une noix, cōme le Licharge; ou d'une noisette, comme on fait les carrons desquels on veut faire l'eleum Philosophorum, & comme aussi Galien faisoit de la pierre Phrygiëne, quand il la vouloit mettre en la cōposition qu'il faisoit pour les yeux.

Il y en a mesme qu'auât q̃ les brusler, il les faut broyer plusieurs iours dans du vin.

du vin, ou du vin-aigre au soleil au cœur de l'esté, comme il est dit au liure de Comp. pharm. gener.

Toutes ces choses seront rendues plus cleres & manifestes par les exemples que nous produirons de Dioscori de, de Galien, de Mesué, & autres.

Les fueilles de l'Olinier sauuagemi *Des parties des plantes.*  
 ses en vn pot de terre cru, bié bouché & lutté, & mis en vn fourneau de potier de terre iusques à ce q̃ le pot soit cuit, & par ce moyen bruslees, apres lauer avec eau, & seichees au soleil, elles effa cét toutes macules, raches & toiles des yeux avec plus grāde efficace q̃ Phospholix aucune, selon que dit Alcubasis.

Quand on brusle les sarmés, bois, es- corces: & autres parties des plantes, on laisse tousiours quelque trou où ouuer- ture au couuercle, afin que la fume s'en aille.

Galien se fait bien souuent des cen- dres d'Auronne, d'Affrodilles, de vit de Chien, d'Arifarum, & de Serpentine bruslez.

Pareillement on choisit les Choux qui n'ont esté replantez, & les ayant bié mondifiez de la terre, on les hache bié menu, puis on les met en vn pot, avec

vn couuercle pertuisé, dans le four, afin de les faire brusler & cōuertir en charbons: apres cela on pile ces charbons, & les met-on en vn autre pot, & l'ayant bié couuert on les fait brusler, iusques à ce qu'il soyent reduits en cendre bien blanche.

Les Myrabolans & le Rhabarbe bruslez, restraignét beaucoup plus que s'ils estoient seulement rostis, comme dit Mesues.

Aucuns font rostir l'Aloës en vn pot neuf, sur les charbons, quand c'est pour faire la composition du Diamoschum amer: afin que la substance gluëte estât consumée, il ne soit plus laxatif, & qu'il conforte & renforce d'auantage, & pour la mesme cause on le laue.

La lie du vin estant seichee, on la fait brusler au feu, iusques à tant qu'elle deuienne blanche, & qu'elle pique & brusle fort la langue.

Pour brusler l'Ambre à patinostres, on le met dans vn pot, & le couure-on, & le fait on brusler toute vne nuit au feu, selon l'enseignement de Bulcasis.

On trouue aussi en la cōposition Cephalique, d'Isis, qu'il y faut de l'encens bruslé, cōme il est escrit au quatriesme liure

liure de comp pharm. general.

Quant à la maniere de recueillir la suye d'encens, apres que l'encens est bûlé, il la faut apprêdre de Discoride.

Pour se servir de la cêdre d'un liure, *Des ani-*  
pour rompre la pierre aux reins ou à *manx &*  
la vesic. Il faut prendre vn liure en *leurs par-*  
vie, & l'estragler sans point luy oster de *ties.*  
sang, & puis le metre tout entier peau  
& tout, dans vn pot de terre neuf, & le  
bien couvrir, & le metre apres dans  
le four, & l'y laisser iusques à tant que  
le liure se puisse metre en poudre.

Et ceste mesme façon doit estre ob-  
seruee quand on veut brusler les Ciga-  
les, Grenouilles, Sangsues, & les Heris-  
sons, selon l'enseignement de Galien en  
l'onzième des simples.

Le veillard Æschrion faisoit brusler  
les Cancres tous vifs, en vne poille d'e-  
rain rouge, iusques à ce qu'on les peust  
mettre en poudre fort delicee, pour s'é-  
servir contre la rage de ceux qui ont  
esté mordus des chiens enragez.

*Gal. lib.*

Les coquilles des Huystres, des Li- *11. simp.*  
maces: des œufs, apres que le poussin  
est esclôs, la Soye, les Os, les Cornes, &  
Ongles, veulent estre bruslez ou sur le  
braher, ou bié mis sur vne tuille, ou en

vn pot d'as le four, ou au foyer, iusques à ce qu'ils blanchissent, & qu'on les puisse mettre en poudre. Mais il faut bien se garder de brusler ces choses sinon que le Medecin l'ordonne: car en les bruslant elles changent de faculté: car on s'en peut bien seruir sans les brusler, les limant avec vne lime, ou les rasclant, comme on fait la corne de Licorne, la verge d'un Cerf, ou d'un Taureau, & puis les mettant en poudre bien deliée, ou bien estant seulement bien limez: la Soye aussi qu'on met es compositions cordiales, doit estre crüe, & hachée menu, afin de la mettre en poudre avec le reste: mais il la faut brusler, quand on veut mesler parmy les compositions qui sont faites pour consumer les matieres, comme en la composition du Diasme de Nicolas.

Galié aussi au liure onzieme des simples, dit qu'on peut brusler l'esponge, *Cal. lib. 6.* l'ayât premierement faite tréper en Bitume ou à faute de Bitume en de la poix.

Pour brusler aussi la laine ensuyée, on la met en vn pot de terre qui soit large, & qui ait l'estree large, puis on le couure, & le luite on bien avec du Plastre, ou de colle, ou de la terre de potier

¶ bien

bien pestrie & bröyee avec eau : apres cela on la fait brusler en la fornäise, ou à la cheminee.

On met aussi les scorpions tous en vie, dans vn pot neuf, lequel on couure bien, & le lutte-on avec de la paste ou Argille, puis on le met dans le four avec feu de Sarmés, & par ce moyé on brusle les Scorpions, de sorte q̃ si on pröd seulement six grains de ceste poudre, avec Syrop de quinqu radicibus, elle röpra la Pierre aux reins.

On brusle de mesme les Viperes, & les Couleures, & leur cendre enduite avec huile fait fondre les Escronelles.

La litharge surnömee Chrysitis, c'est à dire litharge d'or, bien pesante, bien nettooyee de Piomb, & de toute autre matiere, mise en pieces de la grosseur d'une noix, veut estre mise sur le braiser, & la faut tellement allumer avec des soufflets, qu'elle brusle & soit tourè en feu: & apres qu'elle est refroidie, il la faut nettier de toute l'ordure qu'y survient, & la serret pour garder: D'autres l'esteignent avec du vin-aigre, ou du vin par deux ou trois fois, la bruslant derechef, puis là serrent.

Pour brusler la Cadmie, il la faut cou

*Des Meta  
liques &  
terrestres.*



urir de charbons, & l'y laisser iusques à ce qu'elle soit transparente & reluisante, & qu'elle soit amassée en bouteilles, comme le machefer, & lors il la faut amortir avec du vin Aminéen, si on en veut faire emplastrer: mais si on la veut mettre és medicamens propres pour la gale, il la faudra esteindre avec du vinaigre: Aucuns apres qu'elle est ainsi bruslée, la broyēt avec du vin, & la brulent derechef, en vn pot de terre cruë, iusqu'à ce qu'elle soit spōgieuse & trouëe comme vne pierre ponce: & encores la broyent avec du vin, & la brulēt pour la troisieme fois, iusqu'à ce qu'elle soit entieremēt en poudre, sans qu'il y demeure rien d'aspre ou rude à manier. Pour bruler le Plomb il faut faire en ceste sorte, à sçauoir il faut prendre des lames de Plomb biē deliees, ou mesme de la limaille de Plōb & du soufre, & les mettre dās vn pot l'vn apres l'autre, iusqu'à ce que le pot soit plein, puis le biē couvrir, y laissant seulemēt vn petit soupirail par leq̃l il faut mettre le feu, & durant que le Plomb bruslera, il le faut tousiours remuer avec vne verge ou espatule de fer iusques à ceq̃ le tout soit bruslé & reduit en poudre:

dre: mais il te faut bien estouper le nez, quand tu l'osteras, car la vapeur en est fort dommageable & dangereuse.

Pour rostir l'Antimoine, il le faut *Ibidem.* couvrir de paste, puis l'enfevelir dans les charbons, & le laisser là, iusques à ce que la crouste deuienne rouge comme charbon: & l'ayât retiré il le faut amortir avec lait de femme, qui ait enfanté vn masse ou bien avec vin vieil: on le peut bien aussi brusler sur les charbons allumés, & les peut-on souffler, iusques à tant que l'Antimoine brusle: car si on le brusle tant soit peu d'auantage, il se conuertit en Plomb.

Quand on veut brusler la Cereuse, on la met premierement en poudre, & puis on la met dās vn pot de terre tout neuf, lequel on met sur les charbons allumez, remuant tousiours la Cereuse, iusques à ce qu'elle soit de couleur cédree: ou bien apres l'auoir pilee on la met dans des grans plats neufs, sur le brasier, la remuant tousiours avec vne baguette ou verge, iusques à ce qu'elle soit de couleur de Sandarach, estant ainsi accoustree, elle prend le nom de Sandix, & l'ayant laissée refroidir on la serre pour la garder. On fait tout de

mesme pour brusler le Borax pilé, toutesfois aucuns l'arrousent de vin aigre afin qu'il en deuienne rouge : car quand il est iaune, on l'appelle communemēt Macicot.

*Ibidem.* L'Erain bruslé se fait de Clous d'erain, tirez de quelque vieil nauiue, agécez & arrangez dâs vn pot de terre cru, iettant par dessus pareille quantité de Souffre & de Sel : & les ayans ainsi mis l'vn apres l'autre quand le pot est à demy plein, on le couure bien, & lutte-on avec d'argille de potier, apres celà on les met dans le fourneau, ou il les faut laisser, iusques à tant que le pot soit cuit. Dioscoride enseigne aussi quelques autres moyens de les brusler.

Pour brusler le verdet, il le faut mettre en biē petites pieces, & puis le mettre dans vn grand plat de terre large, sur le brasier ardent, le remuant tousiours, iusques à ce qu'ayât perdu sa premiere couleur, il deuienne de couleur cendree : & lors on le laisse refroidir, & le serre-on. Si on le fait brusler en vn pot de terre cru, il n'aura pas la mesme couleur. La Chalcitis doit estre mise en vn pot de terre neuf, sur les charbōs alumez, quand on la veut brusler, & la  
laisser

laisser là iusques à ce qu'elle ne iette plus de bouteillies, & qu'elle soit entièrement seichee, si elle estoit trop humide: mais si elle estoit autre, il faut attendre qu'elle ait acquis vne naïfue couleur sanguine, ou couleur de Minium: puis l'ayât ostee de dessus le feu, il faut oster & racler toute l'ordure qui y sera. On la peut biē aussi brusler sur les charbōs alumez, iusques à ce quelle ait la couleur iaune palissante.

Le Misy, le Sory, & le Calcanthum, se bruslent tout de mesme: vray est que le Calcanthum est de telle nature, qu'ē le bruslant il vient de soy mesme rouge: comme dit Dioscoride traictant du Verd de gris.

Pour brusler l'Orpin, il le faut mettre dans vn pot de terre neuf, sur les charbons alumez, le remuant continuellemēt, iusques à tant qu'il soit embrasé, & qu'il ait changé de couleur, assçauoir qu'il soit de couleur d'argent au dehors, & rouge au dedans: puis l'ayant fait refroidir, & l'ayant pilé, on le serre. On brusle de mesme la Sandarach, & l'Alum.

*Gal. lib. 4.*

Pour brusler la Pierre Phrigienne, il cōp. phar.  
la faut mettre en pieces, de la grosseur part.  
d'vne

d'une Noisette, dans vn pot neuf, lutté tout autour, & couuert d'un couuercle pertuisé ou au milieu seulement ou en plusieurs lieux, ce qui est meilleur, afin que les fumees, & la fuye de ce qu'on brusle, passent plus aisément par là: estât ainsi le tout préparé, il le faut mettre sur les charbons allumés, iusques à ce que le tout soit embrasé: ce qu'il faut faire au reste, tu le trouueras en Galie. Il faut aussi ainsi brusler le lapis Lazuli, & les autres.

On brusle le Sel dans vn pot de terre, bien couuert, afin qu'il ne petille & saute l'ayant couuert de brasier, on le laisse là iusques à tant qu'il bouille iusques par dessus. Il faudroit brusler de mesme le Nitre, & la Spuma nitri, si on les pouuoit recouurer.

Le verre se peut brusler, comme dit Auenzoar, le pilant, & mettant de la poix par my, & apres qu'il est bruslé on l'amortit avec eau fort froide: toutefois il ne deuiant point fraisse.

Nous eussions peu amener beaucoup d'autres exemples, prins tant de Dioscoride q̃ de plusieurs autres auteurs: mais ceux mesme q̃ nous auons mis ne sont pas beaucoup en vsage de nostre temps

temps ains sont pour la pluspart negligez & mesprisez.

Nous disons les vns estre assez bruslez quand ils sont bien embrasez, comme quād on brusle par trois fois la pierre Phrygienne : d'autres quand ils ne iettent plus de fumee, & qu'il n'en sort aucune fuye : d'autres quand ils ne iettēt plus de bouteilles. Ceux qu'on brusle en vn pot de terre cru, sōt assez bruslez quand le pot est cuit. Ceux qu'on couure de P. ste ou d'Argille, quand la croute est assez cuitte, ou bruslee.

*De l'vsage & façon d'amortir ou  
esteindre les medicamens.*

C H A P. XLVI.

**O**N à accoustumé d'esteindre & amortir les medicamens, ou apres qu'ils sont bruslez, ou quand ils sont seulement bien eschauffez & embrasez : ce qui se fait, non pas seulement pour oster la mauuaise qualite qu'ils pourroyēt auoir du feu, quo les Grecs appellent *Empyreuma* : mais aussi afin que la qualite ou froidure de l'humeur puisse penetrer dans la substance de la chose, laquelle par la chaleur est rēdue plus rare, comme le fer ardent esteint :

en

en eau de Piloselle, ou en quelque autre eau astringente, est rendu fort dur & solide.

Quelquefois aussi on les amortit, pour les mieux nettier, comme le Plôb fondu, & souuēt esteint en suc de mercuriale tout chaud, & fort remué, deviendra pur & solide comme Estain.

On les esteint aussi afin qu'ils attirēt la vertu & faculté de l'humeur, ou on les trempe & amortit: voila pourquoy on esteint la Cadmie en vin amineen, quand on la veut faire seruir és emplâstres, & en vin-aigre quand on veut qu'elle serue és medicamens qu'on fait pour la galle ou rogne, comme Diosc. l'enseigne. Pour la mesme raison Galiē veut qu'on esteigne la pierre Phrygiēne premierement en Beurre frez, secondement en vin falernien, ou autre vin clair et odorant, tiercement en Miel attique, afin que le medicament ne soit pas si sec & aride: mais qu'il soit quelque peu gluant & visqueux.

Les Noix de galle, desquelles on se veut seruir pour arrester le flux de sâg, pour ceste fin on les met sur les charbons, iusques à ce qu'elles soyent allumées de toutes pars, doyuēt aussi estre esteintes

esteintes en vin aigre, ou vin brusc & rude.

L'Antimoine doibt estre esteint en laiët de sème, qui ait enfanté vn maïsle.

La Limaille d'acier souuent embrassee, s'esteint en vin-aigre, & par ce moyen on la peut ausi mettre en poudre.

Par ces exemples nous voulons monstrer, que quelquefois les medicamens que nous esteignons, attirent la vertu & faculté de l'humeur ou nous les esteignons. Mais ausi quelquefois nous esteignons les choses alumees, en quel queumeur, afin de changer la qualité de l'humeur: comme quand nous esteignons plusieurs fois, des pierres, ou vn cercle ou barreau de fer alumez dans du laiët, afin de consumer la substance si brile, laquelle est mordante, & que par ce moyē ce laiët soit rendu propre cōtre la disenterie. Ausi nous esteignons plusieurs fois dans de l'eau, vn carreau d'Acier ou vn billō d'Or alumez, afin q l'eau ne soit pas si humide: mais qu'elle soit plus terrestre, la substance la plus subtile estant consumee.

Nous disons ausi que nous esteignons ou amortissons l'argēte vif, encores qu'il ne soit poit embrasé au feu, le demenant



menant avec suc de Saugz, ou ius de limons, ou salive humaine, d'autant que sa faculté maligne s'adoucit aucunement, par le moyen de ces humeurs, laquelle autrement rongeroit tout, cōme Pline l'a fort bien monstré.

*De l'vsage & maniere de parfumer  
les medicamens.*

C H A P. XLVII.

**N**OUS parfumons bien souuent les medicamens (qui n'est autre chose que leur faire receuoir quelque vapeur, esleuee par leur chaleur) lors que nous les preparons, ou bruslons.

Le parfum des choses aromatiques prouoque les mois aux femmes, & attire l'Amaris en bas, si elles le reçoient par dessous; & au contraire il attire l'Amaris en haut si elles le reçoient par la bouche & par le nez.

Le parfum des plumes de Perdrix, de vieux souliers, ou de quelqu'autre chose de mauuaise & mal pla: fāte senteur, receu par le nez, faiēt retourner l'Amaris en son lieu, qui montoit en haut.

Le parfum de la racine & semēce de Pineyne, de Poyurette, de Styrax, de Mastic, de Roses, est fort propre és maladies

dies de la teste procedantes de flegme:  
 mesme les estoupes parfumees du  
 mesme parfum, ou autres, mises autour  
 de la teste, y seruent. On fait aussi des  
 frontals de Roses, Violettes, fleurs de  
 Nymphaea, semences de lactuë, de pour-  
 pier, & semblables, lesquels on parfume  
 à la vapeur d'eau de Verueine, de Betoï-  
 ne, de Roses, ou semblables, pour se cou-  
 rir à diuerses maladies de la teste.

Les Epithemes aussi pour l'estomach,  
 lesquels on fait de Cotton farcy de cho-  
 ses aromatiques, on les parfume avec  
 quelque vapeur propre à l'estomach.

On fait aussi vn parfum des racines,  
 ou des feuilles de pas d'asne, mises sur  
 vne tuille rouge, lequel receu par la  
 bouche avec vn entonnoir, est fort pro-  
 pre à ceux qui sont tourmentez de la  
 toux.

Le parfum fait de Souffre bië purgé,  
 d'Orpin brulé & lauë, est avec bonne  
 raison appliqué aux asthmatiques &  
 poussifs, par quelques praticiens.

Dioscoride aussi dit qu'il faut faire  
 mourir les Cantharides, à la vapeur de  
 quelque fort vinaigre.

*L'usage & maniere de nettoyer les  
medicamens.*

## C H A P. XLVIII.

**L'**Ordre requeroit que 'apres auoir traicté de la façon de brusler les medicamés, nous traictissions la façon de les lauer, car en les lauuant on oste la mauuaise qualité qu'ils pourroyent auoir prise du feu (que nous appellons empyreuma) & l'acrimonie qu'ils ont acquis par la bruslure, voire mesme on oste l'acrimonie naturelle, & mondifie on les choses bruslees: neantmoins pour ce que la lotion ou lauement est vne espece de nettoiyemét, il m'a semblé bon de traiter premierement de la façon & maniere de nettier & purger, car la cognoissance de cestuy-cy eclarcira fort l'autre. Quand nous parlons de la purgation des medicamens, nous entendons le mot de purgation passiuemét, & non pas actiuement, c'est à dire entant qu'on les purge & nettoye, & non pas entant qu'ils purgent & euacuét les humeurs qui leur sont familiares en nostre corps.

On purge donc & nettie les medicamens de toutes ordures & autres matieres

tieres estranges, en les escumant, clarifiant, coulant, les laissant rasseoir, les cuisant, lauuant, couppant, ostant la peau ou escorce, & en plusieurs autres façons desquelles sera parlé cy-après.

Les racines apres qu'elles sont arrachees & nettoiees des petites racines qui sont autour, on les laue plustost deux ou trois fois, que non pas de les racler: que si elles sont grosses, & ont le cœur de dedás dur comme bois, il les faut vn peu casser, & oster le cœur de dedans, & apres les faire seicher, & les serer: voila comme il faut accoustre les racines de Cicótee, d'Ache, de Fenoil, de Persil, de Panicaut, de Giroles, de Carui, de Pastenailles sauvages, & des pastenades domestiques.

Quelquefois aussi nous retráchons s'il y á quelque chose de pourry, côme en la racine de Glayeul, d'Aunee, de Coulourée, de Genouillet, & de Rhabarbe.

Quant aux racines de vit de Chien, de Serpentine, & d'Affrodilles, ce sera assez d'oster les petites racines, & puis les lauer, á cause qu'elles ont l'escorce fort deliée, comme ont aussi les racines de la petite Chelidoine, des Escu-

dés,& du Satyrium.

Aucuns oillēt les premieres escorces de la Squille, avec vn cousteau de boys de Ciprez: ie m'estonne comme ils craignent de le faire, avec vn cousteau de fer, veu qu'on la pile biē avec vn pilon de fer, quand on en veut tirer le ius.

On ne nettie gueres souuent les herbes, sinon qu'il y ait quelque feuille sèche, ou quelque tige dure: vray est que si elles sont terreües ou bourbeuses, il sera bon de les lauer, comme Dioscoride le commande.

Quant aux semences, il les faut bien souuent nettier deux voire trois fois: comme les Legumes, il les faut premiere remēt nettier de leurs escosses ou gousfes: les blez, de leurs espis: les fruiets de baguenaudier, de leurs vescies: les semences des fruiets, de leur poulpe: la semēce de Palma Christi, d'Ortie masle, & les chastaignes de leurs herissons: les semences de Pauot, de Iusquiamē, de l'espurge, & de Palinurus, de leurs calices: & ainsi les autres, chascune selō son espee: & outre cela, toutes ces semences veulent encores estre mōdees bien souuent, de leur petite peau & escorce interieure, comme il sera dit incontinent

nent apres.

Les Noix, les Amandes, & les Noisettes, veulent premierement estre mondées de l'escorce verte qu'elles ont au dessus, apres de l'escorce dure, & en troisieme lieu de la petite peau delicee qu'elles ont apres l'escorce dure: il se treuve beaucoup d'autres qui sont de mesme. Pour le present nous ne voulôs traicter que de la troisieme purgation, car les deux premieres sont si communes, q̃ mesme le peuple vend les fruicts nettoiez de la premiere & seconde purgation, mesme ils vendent l'Espeautre & le Ris nettoiez de la petite peau de laquelle le grain est reuesta, les faisant passer sous la meule.

Nous nettoions donc de leur escorce ou peau, les semences de Carthame, de Courle, de Cocombre, de Melon, de Citrulle, de Citron, tellement qu'il n'y demeure que la mouëlle: ce qu'on peut faire en plusieurs sortes & manieres: car les vns les tiennent au Soleil, & apres cassent l'escorce tout doucement, dans le mortier, & frottent la semence entre les mains, iusques à tant que l'escorce soit separée de la mouëlle: & lors on le crible en quelque crible propre, qui

puisse retenir l'escorce, & laisser passer la mouëlle: d'autres au lieu de les mettre au Soleil les fricassant vn bien peu à la chaleur du feu: il est bien vray que quand on les accoustre ainsi, la mouëlle est apres de fort mauuaise odeur, & mal plaisante au goust de celuy qui la prend, comme nous voyons de l'huile chauffé, D'autres nettoient vne semence apres l'autre, avec de ciseaux, mais cela est fort laborieux, cōme aussi quand on oste l'escorce avec les ongles, ou les dents, outre ce que cela est vilain & sale: & toutesfois c'est anjourd'huy l'ordinaire. Il y en a aussi qui apres auoir bien fait seicher les semences au Soleil, en prennent assez bonne quantité, & les brisent en frottant, avec vn pilon de bois, puis les passent par vn crible cler, les pilēt derechef & les passent, que si l'escorce passe avec le reste, ils les vannent.

Pour nettoier la semēce de Sisame ou Iugioline, on oste toutes autres semences, & puis on l'arrose d'eau vn biē peu salee, & la frotte on entre les mains: puis on l'arrose derechef, iusques à tāt qu'elle soit bien trempee: apres tout cela on l'estēd sur vn linge, pour la faire  
seicher,

feicher, & apres l'auoir vn peu faite ro-  
 stir, on la met dans vn sachet bié aspre  
 & rude, & la frotte on, iusques à ce que  
 la peau ou escorce soit toute ostee, &  
 puis on separe les escorces au vent, ou  
 en soufflant, ou bien on les met dans  
 d'eau froide, & oste on les peaux & es-  
 corces qui nagent par dessus. De mes-  
 me façon faut-il oster les escorces des  
 semences de Cocombre, Courle, Me-  
 lons, & Citrules, quand on en veut faire  
 d'huile, comme dit Mesues, mais non  
 pas pour autre vsage.

Quant aux Amandes, Pistaches, Pi-  
 gnolats, Noix, & semblables, si on les  
 fait seulement tremper vne nuit en eau  
 froide, ou quelque petite espace, en eau  
 tiède, elles laisseront incontinent leur  
 peau. Ou bien si on les fait rostir en la  
 poille, iusqu'à tant qu'elles laissent leur  
 peau, mais par ce moyen elles sont ren-  
 dues de mauuaise odeur, & deuiennēt  
 plus huileuses. Aucuns courent les  
 noyaux de ces fruitz, quand ils sont  
 encores frais, dans de la paille de fro-  
 ment, & par ce moyen l'escorce s'en va.  
 D'autres les aiment mieux peler avec  
 vn couteau, principalement quand ils  
 veulent tirer l'huile d'Amandes dou-



ces pour donner tout fraiz à ceux qui ont la Colique ou la Grauelle. D'autres les pilent sans peler, & ne laissent pas d'en tirer l'huile bien pur & plaisant à la bouche.

L'Orge, le fromét, & les autres bleds & legumes, se peleront assez, si seulement on les arrose à plusieurs & diuerses fois, avec eau chaude: & si on les bat avec vn pilon de bois, puis qu'on les face seicher, qu'on les euent: sinon que ce soit en esté, qu'on les seiche apres du tout, & qu'on les serre pour garder.

Toutesfois il aduient bien souuent que le principal vsage est en l'escorce, comme és pois, febues, & autres: voire mesme bien souuent on ne demande que l'escorce, comme on voit au Sumach, en la racine d'Ache, de Fenail, d'Elleboire, de Turbith, de Canelle, & autres escorces, desquelles nous auons parlé au premier liure de la methode de composer les medicamens.

La semence de Palma Christi laisse facilement son Herisson, si seulement on la tient quelque temps au Soleil, ou qu'on la fricasse, ou qu'on la frotte: mais pour peler apres la semence, il la faut peler comme il à esté dit, vray est qu'il

qu'il ne la faut pas piler si fort que les autres, à fin qu'elles ne s'entretiennent pour leur trop grande humidité: semblablement les fruiçts de Lautier. Ou bien si on veut, on en pourra tirer l'huile, sans les peler ou oster l'escorce.

La Coioquinte veut estre emondée de son escorce & semence, car les Medecins se seruent de la mouëlle seule.

Les Coings & autres fruiçts q'u'on veut confire, doyuent estre nettiez & dehors & dedans.

Pour nettier la Casse & la separer des semētes, apres l'auoir tiree de ses gous ses, & des Cartilages qui sont entredeux, il la faut passer par vn crible de soyes de cheval, avec vne espatule, ou avec vne cuilliere, ou mesme avec la main: mais il y en à qui font cela, à la vapeur de quelque decoction medicinale, ce qui est meilleur & plus aisé: quelquefois aussi on la dissout en quelque humeur, comme en la composition de Diamanna de Mesué. Nous pur geons de mesme les Tamarins, vray est que pour les faire passer par le crible, il y faut le plus souuent mesler quelque humeur: pareillement la manne, si on la dissout en quelque humeur chaud, elle

laissera au crible les fueilles de Meleze ( sur laquelle on la cueillit le plus souvent ) & toutes autres ordures & vilenies.

Les Dattes veulent estre mondees avec vn couteau, & dehors & dedans, comme nous auons amplement discou ru, au troisieme liure de la Methode de composer les medicamens. Quant aux fucs on les peut nettier diuersement , à sçauoir les faisant bouillir, les laissant rasseoir, les clarifiant, ou les coulant, comme nous enseignerons parlant des Sirops, & cōme nous auons desia mon stré, parlant de la clarification, & de la colature.

Pour nettier la Gomme Arabique, le Diagragant, & semblables, il les faut piler grossieremēt, si elles sont seiches, puis les mettre tremper dans vn pot de verre, en eau pure, ou en eau rose, toute vne nuict, lēdemain il les faut mesler avec la main , iusques à ce qu'elles soyent fondues, & puis les passer par vn crible biē net, les remuant mesme avec la main: & ainsi on s'en peut seruir, ou bien les faire seicher, & les serrer pour garder.

Le Galbanum encores que ce soit du  
plus

plus exquis, il a toutesfois tousiours quelque chose de son bois & de la semence meslé parmy : parquoy auãt que s'en seruir, il le faut nettier en la maniere sayuãte: il le faut ietter en eau bouillante, & quand il sera fondu, il le faut passer par vn linge net & cler: ou bien faudra oster les ordures qui uageront par dessus, avec vn bassin ou autre vaisseau creux.

Toutes les autres liqueurs aussi, se pourront nettier les semences, esclats de bois, & autres ordures qui se treuuent parmy, soit qu'elles y soyent par negligence, ou par la malice des reueurs, les faisant fondre & destréper en quelque humeur propre & cõuenable.

Quant à la façon de nettier les Craissies, Ceruelles, Sang, & autres parties des animaux, desquelles on se sert en medecine, il en sera parlé incõtinẽt apres, quand nous traicterons des medicamens qui requierẽt plusieurs sortes de preparation tout à la fois.

*De l'usage & façon de lauer les medicamens.*

CHAP. XLIX.

**L**A lotion ou lauement, comme i'ay dit, est vne espeece de purgation, ou  
nettie

nettiement, laquelle se fait le plus souvent, pour oster quelques ordures & immôdices: toutesfois Mesues & quelques autres autheurs, abusans du mot de lauer, l'aproprient à ce qu'on abreue quelque medicamēt d'vn humeur medicinal. Qui voudra sçauoir les vertus & facultez de la lotion, lise Mesues.

On laue donc en eau de fontaine, les racines, herbes, fruiſts, ſemēces, ſi elles ſont ſouillees de bouë, de pouſſiere, ou de quelque autre ordure: & faut changer d'eau, iuſques à tant que l'eau en ſorte toute clere & nette, & que ce que nous voulons lauer ſoit bien net, encores que ce ſoyent Roſes, Violettes, Endiuie, ou quelque autre eſpece de Cichor. ou de Capilli veneris: mais apres il les faut faire ſeicher, les eſſuyāt avec des linges, ou les mettant au vent, au Soleil, ou deuant le feu, mais qu'il ſoit petit, de peur qu'il ne diſſippe la faculté & vertu du medicament. Mais d'autant que ceſte ſorte de lauement, qui eſt connue & en cōmun vſage de chacū, n'eſt pas de grāde importance, ſi on en veut faire conference avec celle de laquelle ie veux traiter incontinent apres, auſſi ne ſuis ie pas deliberé de m'y arreſter d'auan

d'avantage. L'autre espece de lauemét, se fait & dehors & dedans, c'est à dire par toute la substance de la chose que nous voulons laver.

Il y à plusieurs choses qui veulent ainsi estre lauees & dehors & dedans, c'est à dire en toute leur substâce, pour quatre raisons deduites par Mesué en son<sup>r</sup> premier liure, outre lesquelles nous en mettons aussi icy quelques vnes desqueiles nous auons aussi parlé comme en passant, au troisieme liure de nostre methode de composer les medicamens.

Or à fin que l'humeur puisse paruenir iusques aux parties les plus petites de ce que nous voulons laver, pour en oster quelque substance cōtraire à nostre intention, s'il est dur, ou de nature de Pierre, auant que le laver il le faut mettre en poudre tres-delicee : s'il se fond aisement, il le faut chauffer: s'il est de nature liquide, il le faut laver ainsi qu'il est : comme aussi quand il est de telle nature qu'il se fond & desfait si on le met en l'eau, ou en quelque autre humeur, comme font le Boliarmen & la chaux.

Les choses donc qui se fondent aisement,

ment, comme l'Huile, la Cire, la Poix, la Resine, qu'on les face vn peu chauffer, & puis qu'on les iette dans quelque vaisseau à large entree, qui soit à demy plein d'eau bien nette, laquelle n'ait aucun odeur, ou aucun goust, ne couleur aucune, pour le moins qu'on puisse sentir, laquelle sera tiedie au soleil ou au feu: Lors il les faut longuement demener & remuer avec la main, & puis arrester iusques à ce que tout le gras vienne au dessus: ce qui se fait bien tost en telles choses, à cause de leur naturelle legereté, horsmis à l'huile, quand il est trop meslé à cause de la lógue agitation, avec l'eau, comme il sera dit incessamment apres: Cela estant fait, il faut ietter là celle eau, & en mettre d'autre, qui soit de mesme qualité, & repeter cela trois, quatre fois, ou iusques à ce que le medicament ait du tout perdu en l'eau, celle substance ou qualité qui repugnoit à nostre incétion: ou bien que l'eau ne tienne rien de celle qualité ou substance, comme la couleur, odeur, ou saueur, ce qu'on pourra aisement cognoistre à l'œil, à l'odeur, & au goust.

Mais pour verser & oster l'eau, il faut qu'il y ait vn trou au fond, lequel on  
pourra

pourra boucher avec d'Argile, pendãt qu'on lauera: ou bien on pourra verser premierement le gras qui est par dessus, en vn autre pot, & puis ietter la l'eau: D'autres meslẽt le gras avec l'eau pour le lauer, en vn pot percẽ de deux costez, & quand ils les veulent remuer ils fermẽt les deux trous avec le doigt, puis l'ayant laissẽ rassẽoir enuiron vne heure, ils versent l'eau par vn des trous, & y en mettent d'autre: ce qu'ils reitent tant de fois, que l'huile ayant perdu son acrimonie & sa couleur iaune, soit deuenu plus doux & plus blanc. Vray est qu'en lauant l'huile, il se faut bien garder de le remuer ou battre trop longuement parmy l'eau, car s'il est par trop meslẽ, il est apres malaisẽ de le separer: il le faudra donc battre de sorte, que le laissant vn peu rassẽoir & reposer, on le puisse tout cueillir par dessus: vn tel huile ainsi laué est propre pour faire huiles & autres compositiõs blanches, ou qui ont vertu de refroidir, & c'est d'iceluy qu'il faut se seruir en telles choses.

Quant aux choses dures & pierreuses, comme sont les metaliques, pierres, os, coquilles, sucs seichez, & larmes seichees,



seichees, il les faut premierement mettre en poudre tres-deliée, puis les ietter dans de l'eau bien nette, laquelle il faudra incontinent changer, & les demener avec la main, ou avec vne espatule, & faudra faire cela iusques à tant qu'il ne vienne plus rien de sale au dessus de l'eau, & que l'eau sorte sans rien tenir de la qualité du medicament, cōme de la couleur, odeur, ou saueur: mais il se faut bien garder de verser de l'eau, iusques à ce que le medicamēt soit rassis, & tout allé au fond du pot: ce qui aduient aisement aux metaliques & corps terrestres, à cause de leur naturelle pesanteur, cōme à ceux dont nous auons cy deuant parlé, de nager par dessus, à cause de leur legereté naturelle. Quand on veut verser l'eau, il faut tout bellement baisser l'entree du pot, de peur que le baissant trop rudement on ne mesle derechef parmy l'eau, ce qui estoit desia laué, & qu'on verse tout ensemble: car il vaut beaucoup mieux qu'il y demeure quelque peu de la premiere eau, que de respendre ce que nous voulons lauer.

Quant au vaisseau percé dessous, que nous auons dit estre propre es choses qui

se peuuēt fondre ne peut aucunement seruir en ceux-ci: car les choses pesantes vōt tousiours au fond, tellement que que si ce pot est percé au fons, pendant vuidet l'eau ces matieres boucheront le trou, ou bien en vuidant l'eau, le reste passera. On les peut aussi passer par vn tissu, qu'on appelle vulgairement vn feutre: faisant couler petit à petit l'eau, principalement quand ce qu'on veut lauer est precieux & de grand pris: car par ce moyen bien peu ou rien du tout passe avec l'eau, mais l'eau sort plus pure, & tient moins de la substance de ce qu'on lue.

Voita comme il faut lauer le Plomb, la Ceruse, le Litharge, la crasse de Piōb, l'Erain, le Verdet, la Chalcitis, & les autres de mesme genre, la Cadmie, le Spodium, la Tatie, l'Antimoine, le lapis Lazuli, la Chaux, & les autres metaliques & les pierres, les Os, comme l'os de Seiche, les cornes de Cerf, de Chieure, les Ongles de chieure, les coquilles d'Huystres, & semblables.

Mais à cause que ces choses ainsi dures, veulent estre mises en poudre auāt que les lauer, pour les reduire en poudre il les faut premierement brasser.

vray est qu'il y en a plusieurs qui sans brusler se peuuent bien puluerizer, cōme la Cadmie, principalemēt celle qu'ō appelle pierreuse, la Chalcitis, le Vitriol, la Ceruse, & la Turie.

Dauātage les choses qui se peuuent fōdre doyēt estre hastiuemēt lauées: mais les choses dures, ou les moyēnes, si on les laue en quelque humeur medicinal, il les faut faire tréper dedās, mesme vne nuiēt entiere, afin qu'elles en retirēt plus de vertu & faculté: car pour les biē lauer, il les faut lauer en plein iour, & mesme au cœur du Soleil, principalemēt quād nous voulons qu'elles soyēt biē seches, biē subtiles & bien blāches. Or on a accoustumé de les lauer non pas seulemēt en eau de fontaine pure, mais aussi en eau de mer, en eau sulfureuse, ou bitumineuse, en vin, vinaigre leēt, en q̄!que mucilage, en q̄!que suc de plāte, en la decoctiō des choses aromatiques, ou de quelques autres medicamēts, mesme des laxatifs, cōme on peut voir par ce que Mesues en dit traittant des simples: bref on les peut lauer en q̄!que humeur q̄ ce soit pourueu qu'un Medecin sçauāt & bien expert l'ait ordonné, lequel a la puissance de

ce de choisir tel humeur qu'il voudra, afin que l'Apoticaire ne pèse pas auoir ceste autorité & puissance. Car quelque fois encores que ce qu'on veut lauer soit chaud, le Medecin veut augmenter sa chaleur, parquoy il commande de le lauer en vn humeur qui soit encores plus chaud: ou bien le refroidir, le faisant lauer en quelque humeur froid: parquoy aussi il veut chager les autres vertus & facultez.

Il est bien vray qu'il n'y a point de mal que l'Apoticaire change la couleur du medicamēt à son plaisir, pourueu que cela ne change riē en la faculté & vertu, comme si le Medecin a ordonné de lauer ceci ou cela, en gros vin rude, & que l'Apoticaire vueille que son medicamēt soit bien blanc & beau, il le pourra lauer en vin blāc, pourueu qu'il soit brusc & rude.

Quant à l'odeur, ie ne suis pas de mesme auis, asçauoir que cela demeure au choix & en la voulonté de l'Apoticaire, de luy donner telle odeur qu'il voudra: car la substance en laquelle l'odeur consiste, est bien de plus grande vertu que non pas la couleur: & qui plus est l'odeur qu'on y pourroit met-

tre, ne seroit pas peut estre conuenable  
au naturel du malade, ou à la guerison  
de la maladie qui pourra estre au cœur  
ou au cerueau, ou en l'amaris.

Encores moins consentiray-je qu'il  
puisse donner ce goust, ou celuy-là à  
son plaisir, à vn medicament, ou quel-  
qu'autre manifeste & importâte qualité  
choisisât l'humeur pour lauer le medi-  
camēt, tel qu'il vouldra, pour ce faire.

*Gal. in fi-  
ne lib. I.  
comp. phar-  
maceut. lib. I.  
general.*

Donc les choses metaliques, apres  
estre mises en poudre tres delicee, veu-  
lēt estre lauees en vin-aigre, ou en eau  
de mer, quād les playes où on les veut  
faire seruir sont enflées, ayans leurs  
bords gros, & durs, à cause dequoy el-  
les demādēt estre bien fort atteneues:  
mais si les humeurs qui abondent és  
playes sont acres & mordans, il les fau-  
dra lauer en vin: il faudra donc deme-  
ner par plusieurs iours les choses meta-  
liques en ces humeurs, iusques à ce q̃  
ces metaliques soiēt purs, blācs & c'ers.

Tous les metaliques dōt nous vsons  
à la pointure des nerfs, & és autres  
playes d'iceux, veulent tous estre pre-  
mieremēt lauez, si nous voulons qu'ils  
desseichēt sans aucune mordicatio: pa-  
reillement la Cire & la Terbentine, qui  
entrent

entrent en telles compositions doyuent estre lauees,& à plus forte raison les autres Resines,si on y en veut mettre: car tous les medicamens qu'on laue perdent leur qualité acree & mordante.

Voila ce que nous auions à dire du lauement des choses dures,des molles,& des moyēnes,en general:il reste que nous propositions le moyen de lauer quelques vns en particulier,premiere-ment de quelques parties des plantes,& apres des metaliques.

Quand on veut lauer l'Aloës ,il faut choisir du meilleur,& apres l'auoir pilé & lassé,le faut mettre dans de l'eau de fontaine, au double ou enuiron , & le demener quelque temps avec vne espatule de fer ou de bois,dans vn grand plat d'estain,ou de terre,ou de quelque autre matiere: apres cela il le faut couvrir & le laisser là reposer vn quart d'heure,ou quelque peu dauantage : & quād il est rassis,il faut mettre tout bellement en vn autre vaisseau,ce qui est de plus cler par dessus,le faisant passer par vn couloir de soyes : ou bien si tu veux que l'Aloës soit bien pur (vray est que tu n'en auras pas tant ) il le faut passer par vn feutre , ou bien le laisser

rasseoir plus longuement, principalement en vn pot de verre, qui ait plusieurs petis pertuis, lesquels on pourra clorre avec vne espine, ou avec de la cire, & tāt q̄ tu verras q̄ ce qui coulera par ces petis pertuis sera cler, il le faudra laisser couler, de peur qu'en remuant le pot il ne se tournast troubler: puis tu y pourras mettre de nouvelle eau, le remuer cōme au paravant, le laisser reposer, & mettre le plus cler en vn autre vaisseau & faudra reiterer cela quatre ou cinq fois, iusques à tant qu'il ne demeure de l'Aloës que la crasse & le sable. Cela fait il sera bon que tu faces seicher la premiere au Soleil toute seule, laquelle sera plus exquisse: & toutes les autres, on les pourra faire seicher ensemble: Que si c'est en hyuer, ou bien qu'on ait affaire soudainement d'Aloës lauë, on le pourra bien faire seicher à petit feu. Mais quā l'Aloës est presque sec, il le faut oster de dedans le pot, & pour l'oster plus facilement, il faut faire chauffer le pot vn bien peu: & l'ayant osté, il faut rascier le dessous, à cause que toute la crasse y est assemblee, comme nous voyons qu'on fait aux pains de cire.

Que si l'Aloës n'est pas encores assez pur,

pur, ny assez cler à ta fantasie, il le faudra piler derechef, & le lauer cōme au parauant: mesme si bon te semble tu le pourras reiterer trois fois, si l'ordonnance du Medecin le porte: car l'Aloes qui est ainsi laué tant de fois, perd quasi toute son acrimonie & sa vertu laxative, & mesme sa chaleur, encores qu'icelle la plus subtile partie de l'Aloes soit conteneue, de sorte qu'estant despouillé de ces qualitez, il fortifie d'auantage, & n'est pas si laxatif.

Dioscoride au cinquiesme liure, enseigne plusieurs façons de lauer le Litharge surnommé Christsis, & en son deffaut l'Argintis, ou autre, afin de le blanchir: mais on le peut lauer comme les autres metaliques, asçauoir le pilāt premierement, le passant par vn erible, puis le demenāt dans de l'eau pure, laquelle il faudra changer quelques fois le laissant rasseoir, & versant tout doucement l'eau, & y en mettant d'autre, comme i'ay dit cy deuant.

La Cadmie pierreuse, pour la redre plus desicative. Galie la faisoit lauer au cœur de l'esté au Soleil, par plusieurs iours la broyāt en fort vin-aigre, ou en vin qui soit entierement faue, & de



substance bien clere, comme sont entre les vins François, le vin d'Orleans, & le vin de Beaune, lequel est beaucoup plus delicatif apres qu'elle est ainsi lauee, il la faut faire seicher, & la serrer pour garder, & d'icelle on peut saupoudrer les vlceres malins. Mais selõ Dioscoride, elle veut estre lauee dans le mortier, apres qu'elle est pilee, ostant tousiours l'eau, iusques à ce, qu'il n'en sorte plus d'ordure: & apres on la met en trochisques, pour la garder. D'autres la lauent comme la Tutie.

*Lib. 9. ad  
Almâsoré.  
Diosc.*

Le Machefer, apres l'auoir pilé, il le faut faire tremper en vin-aigre, l'espace de huit iours, changeant tous les iours de vin-aigre, le neuuesime iour on le met sur vne lame ardente, pour le faire rostir: estant ainsi préparé, il sert pour faire la composition de Rasis, pour arrester tout flux de sang immodéré.

Le Plomb apres qu'il est bruslé, veut estre laué à la façon commune des autres choses dures, ou bien en la maniere suyuant. Mettez vn bien peu d'eau en vn mortier de Plomb, & la demenez avec vn pilõ de plomb, iusques à ce qu'elle deuieue noire, & cõmence à s'espessir, & lors coulés ceste eau par vn linge  
trois

trois ou quatre fois, & la laissez rassoir, & laué la fondraillé en eau claire, iusques à ce que l'eau n'é sorte plus noire. Ou bien pilez à plusieurs & diuerses fois la limaille de Plomb, avec eau dans le mortier, iusques à ce que l'eau qu'il faudra souuent changer, en sorte toute pure & clere, sans estre rien noircie.

Pour lauer la Tutie, on la lie dans vn linge moyennemét cler & rare, puis on la demeine dans vn pot, réply d'eau de pluye, ou d'eau de fontaine, afin que la partie la plus subtile, qui est la plus necessaire, s'en aille dans l'eau, & que toute la crasse & ordure demeure dans le linge: puis il faut laisser rassoir ceste eau, & verser tout doucement le dessus, & ymettre d'autre eau: & faudra reiterer le mesme, iusques à ce qu'il ne demeure dans le linge rien de bon. Il y à bien d'autres moyés de la lauer: mais qui les vouldra sçauoir qui les aprenne de Dioscoride.

On laue le Spodium de mesme façon, vray est qu'il à plus de crasse & ordure: ainsi aussi laue-on quelquefois la Cadmie en pierre: mais la Cadmie qui se treuve és fourneaux (qu'on appelle

communement Tutie , & mal proprement Pompholix ) doit estre lauce à la façon des autres metaliques. La crasse du Piôb, veut estre lauce avec can clere, dans le mortier , & faudra changer d'eau si souuent qu'elle en sorte toute clere, sans estre aucunement iaunie de la couleur de la crasse: celà fait, il la faut mettre en Trochisques, selon Diosco.

L'Antimoine , la Cerase , & l'Érain brulé, selon le mesme auteur, veulent estre lauez comme la Cadmia , ou la crasse de Plomb.

Alexâder Trallianus enseigne comme il faut lauer le Lapis Lazuli , & la pierre Armenienne , asçauoir en eau cômune, trente ou quarante fois, changeant l'eau à chascune fois: puis en eau de Buglosse , ou en eau Rose dix fois, côme en la confection Aikermes. & és pilules qu'on fait de ces Pierres.

*Gal. lib. 6.* La chaux lauce deux ou trois fois en  
*meth.* eau de mer, en esté, és iours Caniculai-  
*Diosc.* res, est vn medicamēt fort propre pour les nerfs piqz, si on la messe avec huile.

Pour lauer le Borrax, il le faut piler, puis ietter de l'eau par dessus dans le mortier mesme, & le bien frotter cōtre le mortier, avec la paume de la main,  
& apres

& apres qu'il sera rassis il le faut ebuier: ce qu'il faudra reiterer iusques à tant qu'il soit assez pur & net: cela fait, il le faut faire seicher au Soleil, & le serrer pour s'en seruir au besoin.

Le prestre de Diane lauoit la terre Lemniene qu'il amassoit en Ephestias, ville en l'Isle de Lemnos, en la maniere suyuante: Il la faisoit destremper en eau, & quand elle estoit reduite en Limon, il la demenoit fort, puis la laissoit vn peu rasseoir, & lors il ostoit l'eau qui nageoit dessus, & la boue qui se trouuoit au fons, il la recuilloit, & ostoit ce qui se trouuoit de sablonneux & pierreux au dessous, gardant & faisant seicher ce limon gras, iusques à ce qu'il fust de la consistance de cire, & lors il en faisoit des petits Trochisques, sur lesquels il esgrauoit le sacré seau de Diane. Voila comme Galien l'enseigne au neuuiesme des Simples. Et quelque peu apres il dit: Toute sorte de terre se doit lauer en la mesme façon, asçauoir, il la faut premierement destremper en eau qui n'ait aucune faculté medicinale: apres que le limon est rassis, il faut verser l'eau qui est par dessus, & separer la boue d'auec ce qui est sablonneux

blōneux & pierreux qui se trouue tout au fons. Mais pour sçauoir quelle terre doit estre lauee & quelle non, il ne faut autre iuge que le goust: car non seulement entre les eſpeces de terre, mais meſme des autres choses, il s'en trouue qui ne veulent point estre lauees: d'autres le veulent estre vne fois seulement, comme est la terre Lemniane, d'autres deux fois, comme vne certaine terre Erithreenne.

Le Boli Armeny se peut bien aussi lauer ainsi: toutefois aucuns le lauent trois fois en eau rose, & le font seicher autant de fois.

On s'en peut bien aussi seruir sans le lauer, veu qu'on ne s'apperçoit point qu'il ait quelque qualite apparente: mais il fait son operation par vne faculte cachee, & par sa vertu delicatiue.

*De plusieurs & diuerses manieres de preparation tout ensemble.*

C H A P. L.

ENCores que plusieurs des medicamens dont nous auons cy-deuant parle demandent plusieurs sortes de preparation: si est ce qu'il m'a semblé bon

bon de traicter à part de ceux qui ont befoing de diuerſes ſortes de preparation tout à la fois.

La pierre de laquelle on fait les verres qu'on dit verres de pierre ( qui eſt faite des cendres amassees d'une certaine herbe , qu'on appelle communement Soude laquelle on fait bruſler en vne fosse cauee en terre ) eſtant pilce, criblee & trépee en l'eau, de ſorte que l'eau paſſe deux ou trois doigts par deſſus , puis fort remuee , & apres cela qu'on la laiſſe r'asseoir, & ce qui ſera cler qu'on le face paſſer par vn drap ou vn tiſſu: apres celà qu'on l'ace ſeicher le cler dans le four , ou deuant le feu : on fera ce ſel , que les Arabes appellent Alkali, qui eſt fort blanc, & qui ſert à pluſieurs compositions.

La racine de Panicaut, on la nettoie premierement dehors, & dedans, puis on la coupe en pieces , lesquelles on farcit de Gyroſtes & de Canelle , & les fait-on cuire: aucuns preparent tout de meſme les racines de Satyrium.

L'Amidô ſe fait de froment du meilleur & plus net qu'on puiſſe trouuer, lequel on rompt groſſierement, puis on le fait tremper toute vne nuit en eau pure,

pure, & l'endemain on le presse: & quād l'Amidon est rassis, on verse tout doucement l'eau qui est dessus, & fait-on seicher hastiuement le reste, ou au feu, ou au vent, ou au Soleil, ou avec du Cotton, principalement en Hyuer, de peur qu'il ne s'en-aigrisse: estant seiché, il le faut serrer en vn pot bien net & bien couuert. La maniere de le faire auourd'huy est vn peu autre, mais il est de mesme vertu & faculté.

On en peut aussi faire avec Orge, Ris, & autres semblables.

L'Agarie estant pilé, on le reduit en trochisques le meslant avec du vin de l'infusion de Gingembre, lesquels on fait seicher, & les serre-on pour les garder: & quand on s'en veut seruir, on les pile & les mesle-on avec le reste.

On peut mettre en trochisques, tout de mesme, la Coloquinte & la Squille: & par ce moyen ils s'adoncissent.

Les Myrabolans reçoient plusieurs & diuerses sortes de preparation, selon que dit Mesues traitant des simples, en la composition de l'electuaire Alharil, qu'il appelle.

Les liqueurs, l'Ammoniac, le Galbanum, le Sagapenum, l'Opopanax, & les  
autres

autres liqueurs & gommes, veulent estre trempées en vin, ou vin-aigre, ou en quelqu'autre humeur que le Medecin ordonnera, toute vne nuict, & puis dissoutes & passées par vn crible de soyes, afin que les semences, les esclats & raboutteures de bois, & autres ordures demeurent dans le couloir, & apres tout cela on les fait cuire, iusqu'à ce q l'humeur soit consumé: & les mesle on avec le reste de la cōposition, hors du feu. On fait aussi tremper le Cotton dans du vin de la decoction des choses aromatiques, propres au cerueau, ou à l'estomach, ou à quelque autre partie, & apres avoir trempé vne nuict, on le fait seicher & carder, & se sert-on de ce cottō ainsi preparé au lieu de drap teint en escariatte, ou de la laine, à cause que ces choses acquierent quelque chose d'estrange en la teinture.

Aucuns farcissent ces mesmes applications, de mesmes medicamens, & les ayans couuertes d'un costé & d'autre les tapointent plus menu.

Les ceruelles des Passereaux occis au printéps, veulent estre lauees & netties Dix de ces ceruelles, bien meslees avec vn iaune d'œuf veulēt estre vn biē  
 peu



peu frites au feu, & puis seichees au Soleil ou au feu, & y pourra-on adioufter si on veut vn peu de Mich: est ainsi preparées, elles sont propres à redre hardis au ieu d'amours. D'autres les preparent de mesme que les graisses & mouëlles.

Le poulmon de Renard vent estre premieremēt laué du sang, puis seiché au four, & puis ferré pour le garder, & quād on s'en veut seruir, il le faut piler, & mesler avec le reste de la cōposition.

La peau interieure du ventricule des poules, doit estre premierement trempee enuiron vne heure, dans de la lessive chaude, puis lauee trois fois: apres trempee trois fois en vin, & autant de fois lauee: puis derechef lauee en lessive, & puis en vin: finalemēt seichee au four, apres que le pain en est tiré. Toutesfois Galien en l'onzieme des simples, tient qu'elle ne sert à rien, & n'a aucune vertu.

Le foye du Loup, afin de le rendre propre à quelques maladies du foye, on le laue avec bō vin b āc, puis on le saupoudre avec Santal Cirin puluerizé, & le fait-on seicher: apres cela on le met dās vne escuelle & l'environne-on  
avec.

avec d'Aluine, & chāge-on l'Aluine de huiēt en huiēt iours, le mettāt en quelque lieu sec.

Le boyau de Loup, qui est de fort grande vertu contre la Colique, veut estre premierement lauē en bon vin blanc, puis enflē & seichē en lieu qui ne soit point suiet à la fumee ou à la poussiere, puis couuert & enuveloppē d'Aluine.

On peut remarquer icy comme en passant, & tantost quand il sera parlé de la prezure ou caillé, qu'enuelopper est vne espee de preparation, comme on le peut aussi voir en Mesué traittant des simples & des cōpositions en plusieurs lieux: mais pource qu'elle n'est pas fort en vſage, ie la laisse expressement.

On fait cuire la peau des pieds & du museau des bœufs & des brebis, & la fait-on cuire longuemēt & à petit feu, iusques à ce qu'elle rende comme vn caillé, lequel estāt apres seichē en quelque lieu bien aērē, est fort propre aux hernies & descentes de boyaux.

Le caillé freschement tiré d'vn ieune & tendre animal, doit estre couuert de sel, seichē au Soleil, & apres gardé.

Pareillement on choisit vn Bouc de

quatre ans , qui soit bien sain & en bon point , lequel on nourrit au temps des plus grâdes chaleurs ( comme és iours Caniculaires ) de Saxifrage, Ache, Persil, Fenoil, Pouliot, Lierre, Squinantum, Genest, herbes Capillaires, Oublongs, & autres herbes ayans vertu de rompre la pierre , & luy fait-on boire de quelque vin qui soit fort bon & bien delicat , le laissant paistre à la chaleur du Soleil, l'espace de quarâte iours, tellemét que son vrine commence à deuenir noire: apres cela il le faut esgorger, & recueillir le sang qui en sortira, non pas toutes fois le premier nyle dernier , mais seulement celuy du milieu , & le mettre dans vn pot qui soit net, ou dâs vn bassin, estendant au dedâs des fueilles susdites : & quand il sera caillé & figé, il le faut coupper en large en deux parties, & le faire seicher au Soleil ou à la Lune, mais il le faudra couvrir avec quelque linge bien cler, & le garder de la rosee & de la pluye.

Quant aux graisses estans encores recentes , on les laue à diuerses fois en eau nette, en vn pot à demy plein, puis on les fait fondre au Soleil, ou en eau chaude en double vaisseau , ou à la tie-

deur,

deur, ou bien aux cendres : & quand il  
 y a quelque chose de fondu, on le verse  
 en vn autre pot Ou biẽ on les peut fai-  
 re fondre sur le feu , & apres les passer *Dioscor.*  
 par vn couloir bien delié , & les serrer  
 pour garder : & c'est ainsi que Galien en  
 la composition de l'emplastre Diacaley-  
 teos, nettoioit les gresses de leurs peaux  
 & autres ordures, les faisant couler.

Les Cantharides, il les faut cueillir  
 au printemps, & les prendre avec des  
 petites pinsettes, & les mettre en vne  
 phiole, puis les couvrir d'huile, & les  
 laisser au Soleil, iusques à tant qu'elles  
 pourrissent. Ou bien on les pourra met-  
 tre en vn pot de terre qui ne soit point  
 poissé, & puis couvrir le pot avec vn  
 linge cler, & le bien attacher: cela fait, il  
 faut tourner l'emboucheure du pot en  
 bas, & recevoir la fumee de quelque  
 fort vinaigre qui bouillira au dessous,  
 iusques à cẽ que les Cantharides soyẽt  
 mortes de chaleur: puis les faut enfiler,  
 & les serrer.

On peut remarquer icy & en ce que  
 nous auons dit parlant de la Squille,  
 qu'enfiler est vne espee de prepara-  
 tion, comme aussi quand il est question

de garder les racines auxquelles on a osté le cœur de dedans : mais elle est assez connue de chacun, & est bien souvent nécessaire pour faire seicher, & pour bien garder les simples.

La chair d'Erifson, de Lion, & autres animaux, lesquelles on a accoustumé de garder pour s'en servir en medecine, veut estre premierement lauee quatre ou cinq fois, & à chascque fois vne heure, en vin chaud & bien meur, puis l'ayant faite seicher au four, la ferrer pour garder.

La chair des Câcres veut estre lauee trois fois en lessive, ou en eau de mer, iusques à ce qu'elle ait perdu sa mauuaise odeur, quand on la veut mettre és antidotes surnômmez Analeptiques ou resolutifs secrets : puis cuitte en eau d'orge, ou en mesgue de beurre.

Pour rendre la Cire bien blanche, il la faut fondre en eau, & pour l'en tirer, il faut plonger des phioles de verre dedans, trempées premierement en eau. & faudra plonger & replonger la phiole, tant qu'il y aura vne seule goutte de Cire, & la mettre apres au Soleil, au cœur d'esté, comme au mois de Iuillet, iusques

iufques à ce qu'elle soit blanchie. Ou bien il faut lauer la cire en eau, & changer & rechanger tant qu'elle ne noircisse plus, puis la faire bouillir, iufques à tant que la cire soit blanchie.

Il fuffit de ce que nous auons difcours de la preparation des fimples, parquoy il eſt temps de faire fin.

*Fin du ſecond Livre.*

Li 3





L A  
FORME ET MA-  
NIERE DE MES-  
LER LES SIM-

ples pour faire  
les compo-  
sitions.

*Liure troisieme.*



A fin pour laquelle quel-  
que chose fait, est touf-  
iours plus à estimer que  
non pas ce qui la prece-  
de, & qui se fait pour y  
paruenir, parquoy on pourra aisément  
cognoistre que ce troisieme liure n'est  
pas seulement plus vtile, tant aux Me-  
decins, qu'aux Apoticaire, mais aussi  
plus necessaire que les deux precedens:  
car ce n'est pas assez d'auoir choisi les  
simples

simples propres à ceste maladie-cy, ou à celle là (sinon que la maladie fut simple, & pourtant qu'elle se peut guarir par un simple remede, ou bien que le remede qui semble estre simple fut composé de plusieurs facultés) & de les auoir bien preparez, si on ne les met apres en composition, par laquelle on a fait les autres deux, à sçauoir on a choisi & préparé les simples.

Nostre intétion donc est d'enseigner la façon & maniere de cōposer les medicamens: non pas tous, mais seulement ceux qu'on à accoustumé de composer & mettre en vsage en ceste ville de Paris. Quant à ceux qui sont en vsage és autres villes, il sera aisé de les substituer, à l'exēple & imitation de ceux cy.

Au reste nous suyurons en ceste traictation, le mesme ordre que Mesues à suivy: à sçauoir nous enseignerons premierement comme il faut faire les condits: apres les Resinez, Iuleps, & Sirops: en troisieme lieu les Eclegmes: pour le quatrieme les decoctions & infusions, i'entens de celles qu'on pratique de nostre temps: pour le cinquieme les Antidotes: pour le sixieme les pilules: pour le septieme, les Trochisques: pour le



huiſtieme les poudres: pour le neuſieme les huiles: pour le dixieme les onguets: pour l'onzieme les Cerats: pour le douzieme les emplastres. Il est bien vray qu'en la deduction de ces choses, nous prendrons bien souuent des compositions de Nicolas & autres auteurs, mettant chascune en son rang, de celles qui nous sont plus en vsage. Qui vouldra y pourra adiouster les compositions qui sont en vsage és autres villes: comme à Lyon la conserue de Méthe, de la Tannee commune, d'Euphrase, de Scolopendria, de Salette ou Ozeille, de Glayeul, de Stechas, d'Hisope, de Saulge, de Salvia vita, de Myrabolans, de Limons, de Pain de Cocu, de Genouillet, des summitez d'Orégier, & de Courge: les courges confites, le Sirop d'Oubelós, de Calamintha, le Sirop volatil avec la decoction de Courge, l'Electuaire de Bolo contre la peite, l'electuaire Indum maius, l'Electuaire rosarum de Mesué, au lieu de l'electuaire de succo rosat, vn certain electuaire lenitif, l'electuaire de Psyllio, l'electuaire letitiæ de Galien, l'electuaire lactificans du Conciliateur, l'Aurea alexandrina, la confection Anacardine, la Hiera de  
Ruffin,

Ruffio, de Logadius, de Hermes descrite par Mesué, la Requier magna de Nicolas, la Rubia Trochiscata du mesme autheur, la Triphera persique fort vñitee és fleurs contiques, & la Triphera sarrasinesque, le Phyloniú persique, & le Romain, & plusieurs autres compositions, lesquelles sont en vñage és autres villes, lesquelles ie laisse à vn autre à descrire, s'il veut.

*La premiere section ou il est traicté des  
condits & confitures.* ●

Pour confire les racines de Panicaut, il faut choisir des racines grosses, blanches, & tendres: puis les bien nettier dedans & dehors, asçauoir au dedans du cœur, & au dehors de l'escorce: apres que cela est fait, il les faut tailler en pieces de la grosseur du pouce, & mettre au dedãs, au lieu du cœur qu'on en a osté, vn clou de Girofle & vn peu de Gingembre, qu'on pourra faire tremper premieremēt: apres qu'elles sont ainsi preparees, il les faut faire cuire en mesme pois de Sucre, & au double de Miel: ou bien en trois fois autant de Miel seul: estans cuittes on y adioust vne suffisante quantité de choses aromatiques.

Pource que Racines, ie dis les plus tendres qu'on puisse trouuer, sont tousiours quelque peu dures, & si on les fait

cuire dans le Miel ou dans le Sucre, elles deuiennent encores plus dures, au lieu de s'attédrir, le meilleur seroit que apres estre mondees & nettiees, on les fit tréper toute vne nuict dans de l'eau qui les couurit seulement, sur les cendres chaudes, lendemain leur faire faire vn bouillon seulement, & de celle mesme eau (si on voit qu'elle soit nette, sinon en prendre d'autre) faire cuire le Sucre iusques à ce qu'il ait la consistance d'vn electuaire solide, ou des Penidos: & lors faut mettre dedans les racines amollies comme nous auons dit, il y faut mettre aussi des Girofles, ou de Cannelle, & de Gingébre secs, & moyennement puluerisez, de chascun demy once sur deux liures de confitures, & les faire cuire vn bien peu, & les peut-on mesler parmy, ou bien les lier dans vn linge, & les suspendre dans la composition, sans les autres choses aromatiques. Ceste mesme façon peut estre obseruee, quand on veut confire les racines de Girofles, de Cheruis, de Daucus, de Pastenailles, d'Ache, de Reffort, & semblables, à sçauoir si les faut lauer premierement, puis nettier le dedans ostant le cœur qui est dur comme bois, & le

& le dehors, les rasclant ou ostant l'escorce, puis les tailler en pieces, les farcir, & finalement les faire cuire en Miel, ou Sucre. Quant à nostre Acorus commun, ie ne suis pas d'aduis qu'on en face de la confiture, sinon qu'il fut ordonné par quelque docte Medecin & bien expert, comme i'ay monstré au commentaire que i'ay fait sur Mesues. Toutesfois il y à aucuns, qui apres auoir bien nettié les racines, les font cuire à petit feu, dans du Miel escumé, ou dans du Sucre clarifié, qu'ils ont au parauant fait cuire mediocrement, sans rien faire cuire les racines en eau, à fin qu'elles ne perdent leur faculté aromatique: toutesfois il faut tousiours faire bouillir la racine d'Aunee premiere-ment, à fin de luy faire perdre son amertume: & les racines de vit de Chien, de Serpentine, d'Ai's, d'Oignons, de Pourreaux & semblables, pour oster leur acrimonie: & apres cela il les faut faire cuire avec le Miel ou le Sucre, comme les autres.

En l'autre composition de Diasatyriion il y entre ce que s'ensuit: de racines de Panicaut vne liure, lesquelles il faut faire cuire en la seconde decoction de pois Ciches: de racines de  
Saty

Satyrium bien nourries & toutes fresches, huit onces, de racines de Refort de Iardin, trois onces, de racines de Serpentine, deux onces : & faut faire bouillir toutes ces racines, apres les auoir pilees, en vne suffisante quantité de laiët de vache, avec de Beurre de vache, & d'huile de Iugioline, de chascun quatre onces, & les faire cuire à petit feu, iusques à tant qu'elles soyent de bonne consistance : lors il y faut adiouster de Miel escumé six liures : de ius d'oignons tout frez, vne liure & demie : & quād toutes ces choses seront parfaitement cuites, & qu'on les aura ostées de dessus le feu, il y faut adiouster la poudre suiuite : de queuës & reins de Scincus, huit drachmes, des semences de Roquette, de Nastor, de Pastenailles, de Nauet, d'Asperges, de Fresne, de Poyure long, des deux especes de Behen, de Gingembre, & de Canelle, de chascun quatre drachmes, & mesler le tout avec le reste que nous auons dit au parauant. Finalement il y faut adiouster des Pignolats pelez vne liure & demie, de Pistaches pelez dix onces, de Cerveilles de passereaux deux onces, & mesler le tout bien ensemble : & l'aromatizer avec vne drachme de bon Musc, dissous en demy once d'eau rose, & le mesler avec le reste.

Les racines de Reffort, ne sont pas moins dures que celles de Panicaut, voire mesme le sont encores plus, parquoy ie seroys d'aduis de les faire cuire ensemble premierement. Le Laiët, le Beurre, & l'huile, rabatent l'acrimonie de la racine de Serpentine. Tu pourras faire

*On n'en  
met aujour  
d'huy que  
trois.*

faire cuire ces racines, non seulement en laiët de Vache, mais aussi en laiët de Brebis, en laiët de Femme, ou en laiët de Chieure, ou d'Asnesse, selon que l'intention du Medecin sera diuerse, mesme bien souuent à cause de cela, nous sommes contrains d'en oster les choses plus chaudes.

Au lieu del'huile de Iugioline, duquel on n'vse plus aujourd'huy, on pourra mettre l'huile d'amandes douces, fait comme ie diray cy apres, cōme en la composition du *Diasatyrium* sur-nommé *Analepticum*.

La bonne consistence & iuste espes-seur de ceste composition est, quād elle est de la cōsistence d'un cataplasme, ou d'une opiate, ou de la mouëlle de Casse, ou de la sorditie des oreilles, ou de miel vieil, ou bien escumé : & à cela mesme cognoit-on quand elle est parfaitement cuite, ce qui est requis apres en la composition : car le Miel & le suc d'oignons, font que la composition est rendue plus liquide qu'elle n'estoit apres auoir esté cuite, iusques à vne bonne consistence, mais quand on les fait cuire apres, & que par la coction l'humidité superflue du Miel, & du ius  
d'oignons

d'oignons sont consumées, elle recouvre sa premiere consistence, & lors elle est parfaictement cuite. Pour mesme raison il met en infusion ou il fait cuire en laiët, les pois Chiches, pour faire la poudre qui à faculté d'engraisser, & faire deuenir en bõ point, en la section haiëtieme.

Aucuns pour mesme fin, prennët les racines lauees, en quelque temps que ce soit ( car tousiours vne des racines est bien nourrie, encores que quelque fois plus, quelque fois moins ) & les font bouillir en la seconde decoction de Chiches, puis les entrelardent de Girofles & de pieces de Canelle, apres cela les font cuire vn bié peu, en du Sucre clarifié & coulé, & en baillent vne racine ou deux quand on se veut aller dormir, ce qui n'est pas mal à propos, ny sans vertu.

Pourquoy nous prenons plustost la secõde decoction des Ciches, que non pas la premiere, nous l'auons dit au cõmentaire sur Mesues.

Il dit qu'il faut choisir des racines bien nourries, principalement celles qui sont cueillies en lieu sablonneux, car celles qui sont flaves ont perdu leur

leur vigueur.

Il te faut bien aussi prédre garde, que tu ne sois trompé par la diuersité des especes de Satyrium.

La suffisante quantité de lait est, que il passe deux doigts par dessus les racines, que si ceste quantité estant consumée les racines ne sont assez cuites, il y faut adiouster d'autre lait, d'autre beurre, & d'autre huile.

J'ay aussi monstré sur Mesue, pourquoy ie suis d'aduis de mettre le Bulbe surnommé Ascalonite, au lieu de l'Oignon.

Les Been, & le Gingembre, doyuent estre pilez premierement, & quand ils feront à demy pilez, il y faut adiouster les semences, apres il faut mettre la Cannelle, & finalement la poudre des Scincus secs.

Aucuns sont d'aduis de faire tremper les Pignolats en eau tiède, vne demie heure deuant, à fin d'oster leur acrimonie, mais il me semble qu'il n'est ia besoin, veu que leur acrimonie n'est pas grande, & mesme il y en a qui ont bien d'auantage d'acrimonie.

Les ceruelles de passereaux doyuent estre preparees à la façon que nous  
auons



auons dit cy deuant au second liure, au chapitre des medicamens, qui requierent plusieurs sortes de preparation à la fois.

*c'est la con-*

*conserue de*

*serue de ro-*  
*ses de Me-*  
*sues.*

*la pluspart*  
*n'en met*  
*qu'au dou-*  
*ble.*

~~La~~ *Roses* se fait ainsi : on prend les fucilles des Roses qui ne sont encor du tout espannies, & les fait on seicher à l'öbre, iusqu'à ce que toute l'humidité superflue soit consumée : lors on les pile en vn mortier de Pierre, & y adioust on trois fois autant de Sucre blâc, puis on les serre en vn pot de verre ou de terre verni, & les couure on avec du parchemin, & les laisse on au Soleil trois mois, les remuant souuent tous les iours: apres cela on les oste du Soleil, & les garde on,

Il y faut mettre trois fois autant de Miel ou de Sucre, comme de Roses: comme si on y met deux onces de Roses vn peu seichees, il y faudra six onces de Miel escumé, ou de Sucre bien net en poudre.

Auiourd'huy on appelle Sucre Rosat, le Sucre qui estant dissous avec eau de Roses blâches, ou suc de Roses rouges, en mesme quantité que de Sucre, est apres cuit en forme d'electuaire solide, & apres on le met en poudre, ou bien on l'estend sur vn marbre, lequel on oinct premierement de Beurre, & quâd il est prins, on le met en tablettes, & l'ap

& l'appelle on communement Sucre rosat & tab'ettes.

Le Sucre violat se fait comme le Rosat: hormis qu'il faut faire seicher plus longuement les violettes, & à l'ombre, & les laisser plus long temps au Soleil avec le Sucre: le Sucre avec fleurs de Buglosse, & avec fleur de Rosmarin se font tout de mesme.

C'est vne grande bestise d'appeller le Sucre avec fleur de Rosmarin, Anthosatum: car Anthos ne signifie pas seulement la fleur de Rosmarin, mais toute autre fleur.

On peut aussi faire en ceste mesme sorte, des conserues (qu'on appelle) de fleur de Peschier, d'Orengier, de Genest, de genest d'Espagne, de Malue, de Guymaue, & semblables fleurs.

Aucuns mettent les fleurs toutes entieres dans vn pot, avec du Sucre en poudre, puis les mettent au Soleil, & estiment que par ce moyen les fleurs gardent leurs qualitez presque toutes entieres. D'autres iettent par dessus, du Sucre clarifié.

On fait tout de mesme les conserues de quelques herbes qui sont naturellement sans suc, comme sont toutes les especes de Capili veneris, desquelles nous vsons pour faire l'Ana-

lepticum destilaturn, la cōserue de Ceterach, de Salvia vita, de Phyllitis, & semblables: car on pile ces herbes toutes fresches en vn mortier de pierre, avec deux fois autant de Sucre, & puis on les met au Soleil.

Le Miel Rosat se fait en la façon suyuant: on prend vne liure de suc de Roses fresches, & dix liures de Miel bien blanc & bien net, & qui soit escumé, & les fait on bouillir ensemble en vn chauderon: lors qu'ils commenceront à bouillir, il y faut adiouster quatre liures de Roses fresches, taillees menu avec ciseaux, ou avec vn couteau, puis les faire cuire iusques à ce que le suc soit consumé, les remuant continuellement, & les mettre en vn autre por de terre, & les garder là longuement, car tant plus on le garde, tant meilleur il est. Le Miel Violat se fait tout de mesme.

Il faut mettre le Miel avec trois liures d'eau, & l'escumer mediocrement: apres quand il bouillira, il faut mesler les Roses & le Suc, soit sur le feu, ou hors du feu: & les laisser ainsi au Soleil, l'espace de quarante iours ou environ: apres cela il les faut faire cuire iusques à ce que le suc soit consumé, & la couler, & le faire cuire iusques à ce qu'il ait la consistance d'un Sirop.

Aucuns clarifient le Miel, quand ils  
s'en

s'en veulent seruir és medicamens intérieurs : car le premier est plus propre pour les clisteres.

Le Miel myrtin se fait d'une liure de suc de de Myrtilles, & deux liures de Miel, cuits ensemble a petit feu.

Le Miel qu'on fait communement de Raisins secs, qu'on appelle *passularum*, se fait Raisins secs nettoiez des petis pepins de dedans, & mis tremper vingt & quatre heures durant, puis bien cuits, & fort pressurez, & ceste expression on la fait cuire iusques à ce qu'elle soit de bonne consistance.

Le Miel qu'on appelle *Emblicarum*, est le Miel dans lequel les Myrabolans surnommez embliques sont confits & gardez.

Nous vsons de ces diuerses sortes de Miel, pour faire les autres compositions.

Pour faire le miel Anacardin, on pile les Anacardi, & les fait on tremper en vne suffisante quantité de vin-aigre, l'espace de sept iours, le huitiesme iour on les fait cuire, iusques à la consommation de la moitié, & les passe-on par vn linge. Le suc qui en prouient cuit avec Miel, iusqu'à ce qu'il soit espez, est le Miel Anacardin. Et le Marc seiché, est appellé Anacardi préparé; Nicolas Alexandrin in Theodoro, avec Miel Anacardin; d'autres prennent pour miel Anacardin, ce qui nage dessus l'eau quand on fait cuire les Anacardi, qui ressemble fort au Miel.

Quant aux fructs, on les confit, ou avec Sucre, ou avec Miel: ou avec les

deux ensemble : & les confit on quelquefois tous entiers , & avec leurs semences , mais le plus souuent deuant qu'ils soyent parfaits , & quelquefois on oste les semences.

De nos fruiſts on à acouſtumé de confire les pommes , les poires Muſcates , les Coings , Peſches , Abricots , Prunes principalement les prunes dattes , les Noix verdes , les Ceriſes , les Cornes ou Corneolles , les Raiſins d'outre-mer , les fruiſts de Berberis , & les Aigras ou Raiſins verds : & tous ceux là on les confit entiers , hormis ceux qui ſont gros , comme ſont les Coings & les Peſches : lesquelz il faut nettier & dehors & dedans , & les mettre en quatre quartiers , quand on les veut confire. Mais les Noix , apres les auoir pelees , on les fait tremper neuf iours en eau pure , & change on d'eau trois ou quatre fois le iour : apres cela on les fait cuire en eau iuſqu'à tant qu'elles deuiennent tendres , puis on les fait ſeicher au vent , ou entre deux linges , & les entrelarde on avec des Gyroſſes , & de petites pieces de Canelle : cela fait on les confit comme les autres fruiſts.

D'autres font mieux , car ils percent deux ou trois fois tout à trauers les Noix vertes , avec vn fuſeau , car ſi on les perçoit avec du fer , cela les rendroit plus noires , & les font tremper en eau laquelle ils changent ſouuent , puis les font bouillir : & quand elles ſont deuenues tendres , ils les jettent ſoudain en eau froide : puis les ayant tirees dehors , ils les pelent : & les eſſuyent avec vn linge , & les entrelardent de Gyroſſes & de pieces de Canelle , & finalement les couurent

de Sucre clarifié & cuit au parauant, lequel il faut faire recuire de deux en deux iours, ou de trois en trois iours, pource que il deuient cru, vray est qu'il faut oster les Noix,quâd on veur recuire le Sucre:& estant ainsi confites, elles se gardent plus vertes,& plus nettes beaucoup.

Les coings pareillement, apres qu'on les a nettiez,on les fait cuire en eau, iusques à ce qu'ils deuiennent tendres,& puis on les cōfit.

Quant à la façon de confire, elle est semblable en tous:car on les met dans du Sucre qu'on a fait premieremēt cuire iusques à la consistance de Sirop, & les recuit on ensemble, iusques à ce que le Sucre ait recouuré la forme de Sirop,car il s'estoit rendu liquide,à cause de l'humidité des fruiçts. Mesme en la confiture des Abricots, si nous voyons que le Sucre soit encores apres cōme rendu cru,il les faudra oster de dedans le Sucre,& faire cuire derechef le Sucre, puis remettre les Abricots dedās,car si on faisoit cuire les Abricots aussi,ils deuiendroyēt durs.Nous pourrions apprendre les autres manieres de confire les deux sortes de Pesches:en la premiere section de Mesues.

Pour faire la Gelee de Coings, aucuns prennent le suc des coings & le fōt cuire, d'autres la fōt de la partie la plus liquide du Cotignac:& pour la faire

plus rouge, tant les vns que les autres y adioustent vn peu de suc de Raisins d'outre-mer, ou d'espine vinette.

Quand on veut confire le coriandre, il le faut nettier premierement, & pour le nettier on le met sur vn ais bié lissé, & le secouë on souuët, tellement que la semence la plus ronde, & qui est la plus entiere, roule iusques au bas (car on fait que l'ais pêche vn peu d'vn costé) mais les grains rompus, & toutes les ordures qui sont parmi, demeurent pour la pluspart par le chemin, ou pour le moins descendēt bié lentemēt. Quand il est ainsi choisi, on le fait tremper en vin-aigre, enuiron 8. heures sans feu, puis on le fait frire & seicher au feu: & pour le couvrir de sucre, on prend 1. liure de ceste semēce & fait on cōme il s'ensuit. On met 9. liur. d'eau en vn chauderon garni d'estain, dedās ceste eau on met 3. blancs d'œufs, & à force de le demener avec vergettes, on le fait venir en escume: & lors on y met 9. liures de sucre, si le sucre n'est pas bien net (car quād il est pur & net il n'y en faut pas tant ni tāt d'eau) & les fait-on bouillir ensemble quelque peu, & les remuē-on avec l'espatule iusques à ce q̄ l'escume noircisse, ce qui aduiēt cōmunément quand la 6. partie de l'eau est cōsumee, & lors on le passe par vn couloir de drap. Puis on fait cuire enuiron la moitié, iusqu'à ce qu'il soit de la cōsistence d'vn sirop: cependāt on tient le Coriandre en vn grād bassin de cuiure, sur vn demi tōneau, dans lequel on met du feu, afin de seicher le coriandre, lequel on remuēt tousiours avec la main. Apres q̄ le Coriandre est sec, on met de ce sucre enuiron 1. once, par dessus avec vn cuillier, & le frotte-

on fort & longuement avec la main: & quand ceste couuerture est assez seichee, on y met d'autre sucre, & le frotte-on cōme deuāt, & faut repeter ceste besongne iusqu'à ce q̃ le sucre soit cōsumé: & lors il faut cuire l'autre moitié du sucre qui restoit, iusqu'à ce qu'elle ait la cōsistēce d'un sirop, & faire tout ainsi que deuant.

Mais pour le rendre perlé (ce qu'on appelle quand il y a de petis grains de sucre par dessus, qui ressemblent à petites perles) quand la crouste est desia assez espesse: mais lissée & polie, on met dessus le bassin où est le Coriandre, vu autre bassin percé au fond, dās lequel y a du sucre cuit cōme nous auōs dit, qui coule petit à petit cōme vn fil, dans le bassin où est le Coriandre, & cependant il faut remuēr cōtinuellement ce bassin du Coriandre, & le demener çà & là, & pour le faire plus aisement il le faut prēdre par les anses & le remuēr sur quelque corps rond, mettant entre deux vn linge en rond: Mais il se fera encōres plus aisēment, si on pend ce bassin par les anses, avec vne corde attachee au plancher a quelque souliueau qui baisse & hausse tantost d'un costé, tantost de l'autre. On cōst ainsi l'escorce de Canelle & d'Orenges.

S'il aduient ou à fante de trotter, ou par ignorance, que le sucre se prenne au fons de la chaudiere ou bassin, il faudra oster la semence, & verser de l'eau dedans le bassin, & le mettre sur le feu iusqu'à ce que le sucre s'amollisse, & qu'on le puisse raseler avec vne espatule de fer. Quād le bassin sera biē nettié, il faudra oster l'eau de dedās & la ferrer à



part, car on s'éporra bié seruir à qlqu'v sage, & essuyer bien le bassin avec vn linge net, & sur le feu, & puis remettre la seméce dedás, & paracheuer ce qu'õ auoit comméce. Vray est que tant plus la semence est menuë, tant plus est elle mal-aisée à couvrir de Sucre, & les mains en sont plus offencees, à cause qu'elles touchét la chaudiere, sãs qu'il y ait quasi rien entredeux, mais quand on a desia vn peu couuert, tellement q la semence en est vn peu engrossie, il est plus aisé à parfaire, frottât des maïs. Nous pouuõs mettre en ce rãgles seméces d'Anis, de Fenoil, d'Ache, de Carvi, la semence qu'on appelle Cõtre les vers, la seméce de Paur biãc, laq̃lle il faut premieremét passer par vn crible, cler ou serré, selon la quantité de la semence, afin de le rendre net, & puis le frotter plus exactemét que les autres.

On peut aussi couvrir tout de mesme, mais bien plustost les Pignolats, les Pistaches, les Noisettes, les Amandes douces, & les ameres aussi qui voudra, mais il les faudra premierement bien faire secher. Pareillement les iettons de Gyrosses, la Cancele, l'escorce d'Oranges, de Limons & de Courge.

La dragee musquee est composee de poudre de Glayeul, de sucre, d'eau Rose, & d'un peu de Musc, & se fait en ceste maniere : On met de la poudre de Glayeul, comme estant le fondement de la composition, dans la chaudiere ou bassin, & l'atrouse on avec vn bien peu de sucre, & les demesle-on bien : & quand elle est amallee en partie en petis grains, & l'autre partie en gros, on la passe par vn petit crible, & choisit-on ce qui est passé, & si besoin fait on le couure derechef, iusques à ce qu'il soit rond & de la grosseur de la semence de Pauot, mesme aucuns pour auoir plustost fait, mettét la semence de Pauot au lieu de la poudre de Glayeul : cela estant fait on dissout le Musc, avec vn bié peu d'eau rose, cōme s'il y a vne drachme de Musc, on y met demi once d'eau Rose, & le mesle-on avec vn peu de sucre, duquel on fait la derniere couuerture. Aucuns ne font autre chose qu'enterrer vne boite de Musc dans vn monceau de ceste cōfiture pour deux ou trois iours seulement, afin qu'elle prēne l'odeur du Musc, sans qu'il se consume rien de la substance, pour le moins qu'on puisse appercevoir.

### *La seconde section des Resinez*

#### *& Sirops.*

C E que nous appellons Resiné, & les Latins Sapa, n'est autre chose qu'un suc purgé par nous, & que nous faisons espessir, ou à la chaleur du soleil, ou du feu.

De nostre temps, on ne fait autre Resiné que de Raisins blācs bié meurs, lesquels on fait cuire en vne chaudiere

sans mettre aucune humeur parmi, & puis on les passe par vn linge & les presse-on bien fort; l'expression on la fait cuire iusques à ce qu'elle ait la cōsistence de miel. Aucuns pour le mieux garder y adioustent pareille quantité de sucre: il y en a aussi qui en font de raisins noirs.

Le Iulep rosat se fait avec pareille quantité d'eau rose & de sucre, cuits ensemble iusques à ce qu'ils approchent de la consistance de Sirop: ou quelque peu moins, principalement quand on s'en veut seruir soudain, ou, que le temps n'est pas fort chaud.

Le Iulep violat se fait de l'eau distillée des fleurs & feuilles de la Violette de Mars, avec pareille quantité de sucre, cuits ensemble iusques à ce qu'ils soyent plus espez qu'un apozeme, & moins espez qu'un sirop: car tant plus il sera cuit, tant plus longuement il se gardera, mais il ne sera pas si plaisant.

On fait les Iuleps quand la necessité le requiert, que si on ne les peut faire, on vse de sirops en leur lieu. Or d'autāt qu'on ne distile pas les Violettes, nous faisons le Iulep violat de l'infusion des Violettes seiches: aucuns font distiller le marc de l'infusiō des Violettes, qu'on fait pour faire le sirop violat de plusieurs infusiōs, apres l'auoir vn bien peu exprimé, & de ce qui en sort ils fōt leur Iulep

Tulep violat, mais ce n'est qu'un abus  
& me schanceré.

La matiere de laquelle les sirops sont  
composez, est toute prinse des plantes:  
côme entre les racines, les racines d'A-  
che, de Persil, de Fenail, d'Asperges, de  
Ruscus, de Cicoree, de Endiuie, de Gla-  
yeul, de Pyrethre, d'Espin blanc, de  
Espin Arabe, de Regalisse, de Po-  
lypode, d'Agaric, de Rhabarbe, d'Elle-  
bore noir, de Cabaret, de Galanga, &  
de Gingembre.

Les herbes, comme les deux Buglof-  
ses, l'Hyssoppe, la Menthe, le Calament,  
l'Eupatoire, l'Aluine, le Capilli veneris  
blanc, l'Origan, le Thim, la Tigne de  
Thym, la Cuscuta, l'Ozeille, la Fume-  
terre, la Germandree, le Chamepytis, &  
le Folium.

Pareillement les suc de plusieurs de  
ces herbes, mesmement de la Buglosse,  
de la Mente, de l'Eupatoire, de l'Ozeil-  
le, de la Fumeterre, de l'Endiuie & du  
Pourpier.

Des fruiets, comme sont les Pomes,  
Poires, Coings, Courges, Grenades, Ci-  
trons, Prunes, Dattes, Tamarins, Mira-  
bolás, Sebesté, Iuiubes, Figues, Raisins  
secs mondez, testes de Panot blanc,  
noir

noir ou rouge , & les gouffes de Sené.  
 Viay est que de plusieurs de ceux-cy  
 on prend le suc seulement, principale-  
 ment des Pômes, Poires, Coings, Cour-  
 ges, Grenades, Citrons (& les escorces  
 de ceux-cy aussi ) des Raisins verds &  
 meurs, le bon vin blanc, vieil, odorât,  
 le vin-aigre, & le vin cuit ou resiné Pa-  
 reillemēt le ius des Myrtilles, des Pru-  
 nes , Pesches , Raisins d'outremer , de  
 Berberis, des Canes de Sucre, le Su-  
 cre, & les Penides & leurs semblables,  
 comme sont la Manne , le Miel cru, &  
 le Miel qu'on a escumé en cuisant.

Des semences, celles de Coings, de  
 Melons , de Pavot blanc, ou noir ou  
 rouge, de Laiſtuë, de Pourpier, d'Ache,  
 de Persil, d'Endiuie, de Fenoil, d'Anis,  
 de Leuesche, de Daucus, de Carui, tou-  
 tes les especes de Poyure, le Cardamo-  
 mum, l'Orge, la semence de Malue, de  
 Lin, & de Fœnugrec.

Des fleurs, le Saffran, les Roses, les  
 Violettes, le Stœchas, le Schœnanthos,  
 l'Epithyme, la Cuscutha, le Nard indi-  
 que, les Gyroflès, la gomme Arabique,  
 le Diagragant, le Maltich, & la liqueur  
 de la Scammonée.

Et outre ceux-la , on y met le plus  
 souvent

souuent d'eau de fontaine pure & qui n'est point bouibeuse ny limonneuse, & qui est sans aucune qualité estrange, quelquesfois on y met d'eau de pluye: & y met on ces eaux, afin que les simples luy communiquent leur vertu & faculté en cuisant, ou les faisant tremper ou infuser dedâs, & puis qu'elles se communiquent aussi au sucre: ou bien afin qu'on puisse faire cuire le médicament plus longuement, tellement qu'il perde sa qualité estrange, & en acquiere vne toute nouvelle: ou bien afin que les sirops s'escument, clarifient, coulent & distribuēt par le corps, plus soudain, & qu'ils soyēt plus plaisans à ceux qui en vsent.

Au lieu de l'eau nous mettrons bien souuent les sucz, mais lors il faut clarifier & purifier les sucz en la maniere suyuant.

Les sucz donc soit des fruiets soit des herbes, desquels on veut faire des sirops, veulent estre cuits deux fois, la premiere iusques à la moitié comme le Sirop de Pomis, & presque tous les autres: quelquesfois neâtmoins on les fait cuire iusques à ce que le tiers seulement soit consumé, comme le sirop aigre de suc de Citron, & l'autre qu'on

fait du ius des fruiets: & d'autres on les fait seulement bouillir iusques à ce qu'une liure soit cōsumee, cōme au sirop qu'on appelle de Bizātiis: apres qu'ils sont ainsi bouillis, on les coule, & les laisse-on reposer & rasseoir, les vns deux iours, les autres trois, les vns plus les autres moins, iusques à ce q̄ la crasse & ordure soit ailee au fons, & q̄ le reste soit subtil, cler & pur: & puis on verse tout bellemēt en un autre pot ce q̄ est cler par dessus, le faisant passer par un couloir, & le fait-on apres cuire avec du sucre, iusques à ce qu'il soit en sirop.

Or entre les suc, les vns se rassient plustost, les autres plus tard, les vns ont beaucoup de fōdraille, les autres moins cōme on peut voir és vins (qu'on peut bien nōbrer entre les suc) & és vrines: car les vins blancs, d'autāt qu'ils n'ont point bouilli, ils ont beaucoup de lie: mais les rouges pource qu'en bouillissant ont beaucoup perdu de leur crasse n'ont pas beaucoup de lie: les vins clers sont cōme entre-deux. Ainsi aussi les suc de Pōmes, de Coings, & de Limōs, s'en vont une bonne partie en lie: le suc de Grenades n'en a pas tāt, tellement q̄ ceux là ont enuiron la sixiesme partie

partie de fondraïlle, & ceux-cy enuirō  
 la huitiesme, cōme il se peut voir clai-  
 rement en la cōpositiō du sirop aigre de  
 Citrons. Apres cela on les fait cuire de  
 rechef en Sirop, avec presque pareille  
 quātité de sucre, ou peu s'en faut: cōme  
 s'il y a quatre ou cinq liures de suc pu-  
 rifié, on y mettra trois ou quatre liures  
 de sucre, comme au Sirop de iuc de Pō-  
 mes, & de suc de Courges sept liures, de  
 sucre cinq liures; au sirop qu'on fait de  
 suc de Citrōs, sur dix liures d'humour,  
 on met 8. liures de sucre; toutesfois on  
 met beaucoup moins de sucre bié sou-  
 uent que non pas de ius, au sirop aigre  
 de Pomis, cōme au sirop Saporis, il y a  
 environ six liures de suc, & trois liures  
 de sucre seulement; & au sirop d'escor-  
 ce de Citrō, on fait cuire trois liures de  
 decoction avec vne liure de sucre.

Mesme au sirop aigre de Coïgs, pour  
 onze liures de Suc, on met seulement  
 deux liures de sucre. Quelquefois aussi  
 la quantité du sucre est incertaine, cō-  
 me il se peut voir au sirop aigre du suc  
 des fruiçts, en la composition duquel il  
 faut cuire trois liures de suc, avec deux  
 liures de Iulep, ou plus ou moins.

Encores qu'en vn sirop entre quelq  
 peu



peu de Manne, il n'y faut pas moins de Sucre pourtant, comme au Sirop aigre ex manna, auquel entre trois onces de Mâne, quatre liures de suc, & trois liures de Sucre.

Toutesfois en la composition du Sirop de Cannis sachati, on met bien le suc des Cānes de Sucre, ou les penides, au lieu du suc, sinō q̄ q̄l'un voulut dire, qu'au lieu de, aut, il faut qu'il y ait, &.

Voire mesme il est fort bon de mettre vn Iulep cler & bien net & purifié, au lieu de suc, priacipalemēt es sirops faits de suc froids, ou aromatiques, cōme nous voyons que Mesues fait en la composition du sirop aigre de suc des fruiets, & au sirop d'escoices de Citron.

Quant au suc on choisit du meilleur, & le fait-on cuire avec pareille quantité d'eau, on le purifie avec blanc d'œuf, & apres qu'il est coulé, on le fait derechef cuire, iusques à ce qu'il soit de la cōsistēce des Penides, ou du suc Rosat, ou d'un electuaire solide: quand aux suc incōinēt qu'ils sont extraicts, sans les rien faire cuire, ny couler, ny r'assoier, on les fait passer par l'escume q̄ le suc a laissé dās le couloir, & par ce moyen le suc qui en coule est bien fort pur

pur & cler, lequel on mesle apres en es-  
 gale quantité, avec le Sucre cuit, com-  
 me nous auons dit, versant petit à petit  
 & remuant tousiours avec vn baston,  
 comme on fait és electuaires solidés, &  
 Mesues appelle cela vn Iulep, & c'est  
 ainsi que plusieurs font aujourd'huy, le  
 Sirop aceteux simple de Mesues, & l'O-  
 xisacharum de Nicolas, & plusieurs au-  
 tres Sirops composez de suc, à fin di-  
 sent ils, que leur vigueur demeure plus  
 entiere, & qu'ils ne se candissent pas si  
 tost: pour à quoy obuier, aucuns y meslét  
 vn bien peu de Miel: laquelle façon de  
 faire, ie trouue bonne, pourueu que les  
 Sirops se puissent garder sans moisir ou  
 chanfir, pour raison de la crudité des  
 suc, ce qu'on euitera si on les tiét quel  
 que temps au Soleil, laquelle maniere  
 de cuire sert plus en cecy, que non pas  
 celle qu'on fait au feu. Que si on suit  
 ceste façon de faire, au sirop aigre de  
 Citrons, de Limons, & aceteux simple,  
 ils seront fort blancs: mais les Sirops de  
 Grenades, de Ribes, & de Berberis, à  
 cause qu'ils doyuent estre rouges, il ne  
 les faudra pas demener si longuemét,  
 à fin qu'ils ne perdent leur belle cou-  
 leur.

Quelquefois on melle le Sucre, & des penides ensemble, comme au Sirop de Pauot qui sert contre les Catarrhes, il y entre de Sucre & de penides de chacun quâtre onces, sur demie liure de decoction : & au Sirop de Pauot qu'on fait contre la toux, il y entre de Sucre & de penides, de chascun huiët onces, en deux liures de decoctiõ : vray est qu'en ce Sirop le Sucre est biẽ en petite quâti té, comme au Sirop de Capilli veneris, où entre de Sucre clarifié, & d'eau de capilli veneris, de chascun huiët onces, avec deux liures de decoction.

Or on les fait cuire plustost en vn pot de terre verny, que non pas de cuyure estamé : & à petit feu de charbon, ou à petit feu cler, sans'fumiẽre, mesme il est bon que les charbons soyent du tout alumez, auant que mettre le pot sur le feu : que s'il y faut dauantage de charbon, il faudra prédre de celuy du foyer, qui est desia à demy bruslé (cõme nous auons dit au troisieme liure de la Methode, de composer les medicamens) de peur qu'y mettât de nouveaux charbons, la composition n'en tire quelque mauuaise qualité à cause de leur odeur & vapeur mauuaise.

On fait donc cuire les Sirops, iusques à vne iuste consistance, ou bien iusqu'à ce qu'en prenant vne portion, & la laissant refroidir, elle file entre les doigts, & mise sur vn marbre, ou sur vn plat, s'arreste & ne coule point: ou bien qu'il demeure de l'humeur qu'on y a mis, soit decoction ou suc, environ deux onces pour liure de Sucre: ce qui se pourra aisement cognoistre par le nombre & façon des bouteilles qui se ferôt en bouillant: car tant qu'il y aura beaucoup d'humeur il ne se fait qu'une bouteille au milieu, qui est fort grosse, & quelques petites à l'entour: mais quand il approche d'estre cuit en Sirop, au lieu de la grosse bouteille qui se voyoit au milieu, il s'en fait plusieurs par tout qui sont de moyenne grosseur.

*Nicol. Alexand. in  
cirup. rosa.*

Quant aux Sirops qui se font de decoctions, & non pas de sucs, par chascune liure de Semences, ou Racines, il y faut quatre liures d'eau, ou environ: & pour quatre poignées d'herbes seiches deux liures d'eau, & si elles sont verdes, il y aura assez d'une liure: quant aux autres simples qui y peuuent entrer, pource qu'ils sont en petite quantité, on n'y a pas grand esgard: toutesfois Me-

fues en la composition du sirop Acetosus avec racines, fait cuire vne liure tât de racines q̄ de semences, en dix liures d'eau, iusques à la consommation de la moitié.

Pareillement, quand'il faut cuire d'orge ou quelque'autre chose longuement, ou il le faudra tremper à part, ou bien il faudra augmēter la quantité de l'eau, de tant plus qu'il le faudra faire cuire longuement: & pourtant s'il faut faire cuire des choses seiches, rares & gluantes, il faut augmenter la quantité d'eau, comme au Sirop d'Hysope, & de Iuibes, ou autrement il ne se pourra couler: sinon que tu fisses cuire ces choses gluantes, liees en vn linge, apres que la decoction sera coulee: ou bien que tu tires le mucilage de ces choses, avec vne partie de la decoction, & puis que tu le mesles avec le sucre, lors qu'il est presque cuit: car qui feroit cuire ces choses gluantes parmy le reste, feroit que la decoction ne se pourroit couler, à cause que par leur substance gluante & emplastique, elles estouppent le couloir, & gardent que la decoction ne peut passer. Il aduient le mesme inconuenient si on y met des Penides faits de quelque

quelque sucre gras, mal net, avec bonne quantité d'Amidon. Aucuns tiennēt que pour chaque liure de medicamens qui peuuent porter vne longue coctiō, il y faut six liures d'eau, & en ceux qui veulent estre le moins cuits, il y en faut vne liure & demie, & pour ceux qui sont moyens, trois liures.

Il faut donc premieremēt choisir les simples, & les mettre en des petits coffrets de papier chacun à part: & s'il est besoing de faire tremper quelques vns ou plusieurs à part, deuant que faire la decoction, il les faudra faire tremper, & quant à ceux qu'on veut faire cuire, il les faut mettre dans la chaudiere, lors que l'eau est desia chaude, mais non pas bouillante, & faut mettre premierement ceux qui sont difficiles à cuire, ou qui endurent bien d'estre cuits longuement sans perdre leur vertu, comme sont le plus souuent les racines, les semences, les fruiets & les escorces des bois: apres il y faut mettre ceux qui sont moyens: & finalement ceux qui pour la tenuitē de leur substance, ou debilité de leur force, perdent bien tost leur vigueur, encores qu'on ne les face cuire que mediocremēt: ce qui se peut

cognoistre à ce qu'ils perdent bien tost leur odeur, leur saueur & naïfue couleur. Vray est que la couleur verde és Capilli veneris, & la couleur rouge és Iuiubes, s'augmente plustost que diminuer quand on les fait cuire, à cause que la couleur rouge est fort meslee parmy la substance des Iuiubes, & les Capilli veneris sont tousiours verds: mais il a esté parlé assez au long de toutes ces choses au liure precedent, traitans de l'vsage & maniere de cuire. Ce pendant que ces choses bouillissent sur les charbons allumæz, il faut racler l'escume qui vient au dessus avec vne escumoire ou cuillier percé, & quant aux simples qui sont pesans, il les faut releuer avec vne espatule, à fin que touchans au fonds ils ne bruslent, & ceux qui par leur legereté nagent dessus, il les faut plonger, à fin qu'ils cuisent, & que l'eau attire leur vertu. Et quand le tout sera assez cuit ( qui pourra estre dans vne heure ) & que les medicamës auront laissé leur vertu autant qu'il est besoin, en l'eau laquelle sera assez diminuée ( ce qui se cognoit en plusieurs simples, quand ils ont perdu leur goust naturel, & sont deuenus insipides comme eau)

me eau) il les faudra retirer du feu, & s'il te semble bon, tu les pourras verser en vn autre bassin d'estain ou de cuyure garny d'estain, & les bien couvrir avec vn plat net, & les laisser ainsi tremper cinq ou six heures, toute vne nuit, ou vn iour, plus ou moins. Cela estât fait, il les faut remettre vn bien peu de temps sur le feu, pour les faire reschauffer seulement, & lors il les faudra passer par l'estamine, & les exprimer.

Dans l'expression, ou loin du feu, ou plustost sur le feu, il y faut mettre deux blancs d'œufs, sur huit ou neuf ou dix liures de decoction, & les bien battre avec des vergettes longuemét, iusqu'à ce qu'elle escume bien fort: & incontinent il faut mettre dedans le sucre en pieces, ou les Penides, ou le miel, & pareillemét ce qu'on pourroit auoir mis en infusion à part, ou dissous: comme les Tamarins, la Casse, & l'Agaric. Apres il les faut faire bouillir iusqu'à ce qu'ils s'en aillent quasi par dessus, & qu'en soufflant vn peu l'escume, la decoction apparaisse clere au dessous. Lors tout chaud comme il est, il les faudra passer par vn couloir de laine bien net, mesmement si la decoction est gluante: il



sera bon aussi de remettre dans le couloir ce qui estoit passé premierement, ou bien qui voudra, passer le tout deux ou trois fois, & changer à chacune fois de couloir, si on voit que le premier soit sale : car les choses qu'on coule ainsi chaudement, ne sont pas fort nettes estans passees, à cause que la chaleur les rend plus subtiles : mais si elles n'ont aucune viscosité, on les pourra laisser vn peu refroidir, auant que les couler. On pourra aussi exprimer tout doucement le drap, à fin qu'il n'y demeure rien de bon, ny parmy la crasse aussi, il ne le faut pas toutesfois presser si fort que l'ordure passe aussi, car si cela aduient il la faudroit couler derechef. Quand le tout sera bien nettié, il faudra nettier & bien seicher le chauderon, & remettre la colature dedans, & la remettre sur le feu, & la faire cuire iusqu'à tant qu'elle ait la cōsistence de Sirop, ou iusques à ce qu'il ne demeure que deux ou trois onces de decoction, pour chacune liure de sucre.

Mais s'il y faut par necessité faire cuire quelque chose mucilagineuse, comme sont les semences de Malue, de Coings, de Lin, de Fenugrec, le Mastic,

la Gomme Diagragant, la Gomme Arabique, & autres: il les faudra lier dās vn linge cler, & les faire bouillir avec le reste, apres que la decoction sera coulee, les attachant bien avec vn long fil & bien fort. Aucuns les font cuire seulement deuant que clarifier la decoction: d'autres deuant & apres aussi.

Finalement la decoction estant parfaite, aucuns apres auoir exprimé le neud, le iettent là, & d'autres le laissent encores tremper vn peu de temps en la decoction, mais il me semble qu'ils n'ont point de raison de ce faire, veu qu'elles ont laissé toute leur vertu en la decoction, sans qu'il y en demeure point, comme aussi quand on fait ce neud des choses aromatiques, ou de Rhabarbe, ou de Scammonée, ou d'Elebore noir, ou autres, comme il en a esté traité au liure precedent, quand nous auons parlé de l'usage & maniere d'exprimer.

Mais si on veut faire vn Sirop de l'infusion de quelques simples, faisant toutesfois cuire l'infusion apres qu'elle est faite, il faudra mettre tous les simples ensemble infuser, & puis les faire aussi cuire ensemble: car par ce moyen il sem

ble que leur vertu & faculté est empreinte plus fermement en l'eau , & pour plus long temps , de sorte que la vertu ne se peut dissiper les faisant cuire autant qu'il en est besoin. Il est bien vray que les choses seiches & rares, veulent estre infusees en plus grande quantité d'eau que non pas les choses verdes & massives : comme au sirop de Stecade, on met tremper vne liure des simples grossierement pilez , en sept liures d'eau , l'espace de 24. heures , que s'ils sont plus secs, on y mettra iusques à huit liures d'eau, de laquelle les simples boiront vne liure ou vn peu plus: apres on les fait cuire à petit feu , iusqu'à ce que le tiers soit cōsumé, ce qu'il faut faire aussi , encores qu'on les face cuire sans les mettre en infusion. Cela fait , il faut exprimer la decoction & le reste de la colature , comme s'il y en a quatre liures, il les faut faire cuire avec cinq liures de miel escumé, ou de sucre fin, iusqu'à ce qu'il ait la consistance de sirop , & il y aura enuiron six liures & demie de sirop: ou biē, si c'est en hyuer, il y en aura six liures, & en esté cinq & demy, car en esté il faut faire cuire les sirops dauantage que non pas en hyuer,

de

de peur que s'il y demeure quelque humidité superflue, ils ne bouillissent, ou soyent en danger de se pourrir, car ceste humidité superflue peut causer tout cela, principalement estant esmue par la chaleur exterieure.

Aucuns sont d'aduis que la quantité du miel ou du sucre, doit estre esgale à celle du suc ou de la decoction: mesmes il y en a qui estiment qu'il est meilleur que la quantité du miel ou du sucre surpasse quelque peu la quantité du suc ou de la decoction, à cause de la crudité de noz plâtes, qui est cause qu'il nous faut cuire les sirops plus longuement, voire iusques à ce qu'il ne demeure quasi que la seule quantité du sucre ou du miel, quand le sirop est cuit. Vray est que tant plus le suc ou la decoction surmonte la quantité du sucre ou du miel, tant plus longuement aussi le faudra-il faire cuire. Toutesfois Paulus en la composition qu'il appelle Rhodostacte, fait cuire vne partie de miel, avec les trois parts de suc ou d'eau, iusques à ce que les deux parties soyent du tout consumées: comme aussi il fait cuire deux sestiers de suc de Roses, avec vn sestier de miel, iusqu'à ce que la quatrie partie  
soit

soit consumée.

Quant au pot auquel on fait cuire les sirops, on peut prendre des pots de telle matiere qu'on voudra, horsmis pour les sirops où il entre du vinaigre, car ceux-là veulent estre cuits en pots de pierre, ou de terre, plombez: ce que Mesues a fort bien remarqué en la composition du sirop acetueux simple: car si on les faisoit cuire en cuyure ou crain, il seroit à craindre que le vinaigre netirast quelque enrouilleure, qui corromproit & gasteroit le sirop, ou pour le moins il faudra que ce pot de cuyure soit bien garny d'estain au dedans, comme sont communement ceux desquels on se sert es boutiques. Nous disons que ces sirops sont parfaitement cuits, quand ils ont leur consistance: toutes-fois, quand on les fait cuire bien peu, avant qu'y mettre le miel, cōme iusques à ce que le tiers soit consumé, apres que le miel y sera adiousté il les faudra faire cuire dauantage, comme on fait en la composition de l'Oximel de radicibus: il ne faudra pas tant faire cuire ceux qu'on fait bouillir au parauant, iusques à ce qu'il n'en demeure que le tiers, comme en l'oximel de Calamintha.

tha. Mais quand ils sont cuits iusques à la consommation de la moitié, on les dit estre mediocremēt cuits : il faudra que le miel qu'on meslera és premiers soit plus cuit que non pas aux seconds, & aux troisiemes mediocrement.

Pour faire le sirop rosat, il faut prendre des roses fresches, & les faire tremper en eau bouillante, en vn pot bien couuert; quand l'eau sera refroidie, il faut pressurer les roses, & les ietter là, & puis faire bouillir derechef ceste eau, & mettre d'autres roses tremper de-lans : & faut reiterer ceste besongne iusques à ce qu'elle rougisse. Cela estant fait, il faut clarifier ceste eau avec blancs d'œufs, & puis la faire bouillir avec pareille quantité de sucre, iusques à ce que le Sirop soit fait.

Si tu veux faire ton chef d'œuvre, & mesme si tu veux cōposer ce sirop pour toy, fay tremper six liures de roses, en quinze liures d'eau, comme fait Mesues, ou bien vingt liures, l'espace de huiët heures, & apres auoir pressuré ces roses, mets y en des autres, & reiterer ceste besongne iusques à neuf fois : ou bien, si tu n'y mets que quinze liures d'eau, pese l'expression, & si elle est diminuée, il faudra parfaire le pois par vne autre expression de trois ou quatre infusions.

Il est du tout necessaire de composer  
ce

ce sirop, ou bien faire cuire le Iulep rosat de Mesues en sirop: & nō pas en son lieu vser (comme on fait aujourd'huy) du sirop fait d'une infusion, ou deux de roses seiches, cuite avec pareille quantité ou vn peu moins de sucre, & puis coulee, qui est proprement le sirop de roses seiches. On fait aussi vn autre sirop du sac des Roses rouges, apres l'auoir purifié, le faisant cuire avec pareil le quantité de sucre. Il s'en fait aussi vn troisieme de neuf infusions de roses, principalement des incarnates, lequel est laxatif.

*Nimphaea  
ou Nenu-  
phar.*

Le Sirop violat, & le Sirop de blanc d'eau, & des autres fleurs se font tout de mesme que le rosat.

Le Sirop de Coings, se fait de dix liures de ius de Coings, cuites iusques à ce qu'il n'en demeure que la moitié: puis on les laisse reposer deux iours entiers iusques à ce qu'il soit cler, lors on les fait passer par vn couloir, & avec trois liures de sucre on les fait cuire en Sirop.

Si le sucre est bien pur & net, on en fait dissoudre vne liure en quatre onces d'eau, & le fait on cuire trois bouillons, iusques à ce qu'il soit en electuaire, & apres cela on melle tresbien le suc de Coings parmy, en le demenant avec vn pilon: aucuns font cuire vn biē peu le

le suc avec le sucre, lors qu'il est presque cuit. Mais si ce sucre n'est pas bien pur & net, on fait cuire vne liure de sucre en vne liure d'eau, on le purifie & le coule-on, & apres cela on le fait cuire en electuaire, & fait-on cōme nous auons dit au parauant.

Aucuns purifient les suc, les laissant seulement rasseoir, & les tenant au Soleil, sans les rien cuire:& puis les clarifient ensemble avec le sucre, les coulent, & les font aussi cuire ensemble: d'autres font autrement, comme il a esté ia dit cy deuant.

Le Sirop qu'on fait de ius de Grenades aigres, *Mesues.*  
& celuy de Grenades douces, & le sirop de verius d'Aigras, & celuy du suc d'Ozeille, & de Raisins d'outre mer, & d'Espine vinette, se font de mesme façon que le Sirop du ius de Coings.

On peut faire de mesme façon le Sirop du suc de tous les fruiçts & herbes, à sçauoir le faisant cuire iusques à la moitié, & le laissant reposer deux iours entiers, & apres le passant par le couloir, & finalement le faisant cuire avec esgale quantité de sucre ou bien pres, iusques à ce qu'il ait la consistance qu'un sirop doit auoir.

D'autres pour faire tous ces sirops, font



font dissoudre le sucre en pareille quantité d'eau, & le font cuire quelque peu, puis le clarifient avec blancs d'œufs, & le coulent, & apres cela le font cuire, iusques à ce qu'il soit en forme d'electuaire ou de penides : & lors quand il commence à se refroidir, on melle peu à peu, avec vn baston, les suc, lesquels on a premierement clarifiez, les faisant passer par les blâcs d'œufs qui sont demeurez dans le couloir en passant le sucre : & par ceste maniere de faire la vertu des suc demeure plus entiere, que si on les fait cuire, principalement quand c'est vne vertu refrigeratiue ou aromatique : d'autres laissent purifier ces suc, les laissant reposer au Soleil, puis les meslent avec le sucre, cuit premierement comme nous auons dit : laquelle façon de composer les sirops, ie trouue beaucoup meilleure, que de faire cuire les suc iusques à la moitié.

### *Des Sirops composez*

DAns le Sirop appellé Saporis de Pomis, y entre ce que s'ensuit, à sçauoir de ius de pomes odorantes, & de bonne senteur, trois liures : de suc de Buglossede iardins, & de la Lauage, de chascune deux liures : de gouffes de sené quatre

tre onces : de Saffran deux drachmes : de sucre blans trois liures.

Or la façon pour le faire est telle : on fait tréper le Sene, apres l'auoir pilé, dās les suc 24. heures durant, puis on le fait cuire vn bouillō ou deux, & le coule on : & l'expressiō, on la fait cuire avec le sucre, iusques à ce qu'il ait forme de sirop : quant au Saffran, il le faut lier en vn linge & pendant que le sirop cuira le frotter dedans.

Pour faite le Sirop de pourpier, il y faut mettre de semence de Pourpier pilee vne liure, & la faut faite tremper 24. heures en 4. liures de suc d'Endrui cuit & purifié : & apres le faire cuire à petit feu, iusques à la moitié, & apres qu'il sera coulé, il le faut faire cuire en Sirop, avec deux liures de sucre.

Le sirop adiantin se fait avec deux onces de Regalisse, d'Adiantos blâc cinq onces, lesquelles il faut faite tremper, en quatre liures d'eau de fontaine, l'espace de 24. heures, puis les faire cuire iusques à la moitié, & apres auoir exprimé la decoction, il la faut faite cuire avec huit onces de sucre clarifié, & autant d'eau d'Adiantos blanc.

En ces quartiers à faite d'Adiantos blanc, qui soit frez, nous faisons cuire vne liure d'Adiantos blâc, & deux onces de Regalisse mondée & pilee, en six liures d'eau, iusques à ce qu'il n'en demeure que les deux tiers : & puis de ce-

ite decoctiō avec trois liures de sucre. nous faisons cuire nostre sirop: d'autres font cuire le sirop avec vne liure de sucre, ou vne liure & demie, sans y point mettre d'eau d'Adiantos: d'autres font tremper vne bonne quantité d'Adiantos blanc recent & freschement cuilly, en eau, sans y point mettre de Regalisse, puis le pressent, & l'expression ils la clarifient & la font cuire avec le sucre.

Le Sirop de Iuiubes se fait de soixante Iuiubes, de violettes & de semence de malue, de chacun cinq onces: d'Adiantos blanc, de Regalisse, d'Orge mondé, de chacun vne once, de semences de Coings, de Pauot; de Melons, & de laiſuë, de gomme diagragant, de chacun trois drachmes, & faut cuire tout cela en quatre liures d'eau de fontaine, & deux liures de sucre.

La quantité d'eau est trop petite en ceste cōposition, pour la pouuoir couler, parquoy ou il la faudra augmenter, ou bien il faudra lier la semēce de malue & de Coings, & la gōme diagragāt, en vn linge, & les mettre dans le sirop apresqu'il sera clarifié: ou bien il en faudra mettre la moitié ainsi liée dans vn linge, auant que les clarifier, & le reste apres qu'il sera clarifié: car si on met la mucilage qu'on peut extraire de ces choses, dans le sirop auant qu'il soit clarifié, il sera fort malaisé à couler, & si on  
la met

la met apres que le sirop sera clarifié & coulé, le sirop en sera trouble & mal net, & par consequent mal plaisant.

Pour faire le Sirop de Pautot, il faut prendre *Ibidem.* les testes de Pautot blanc & de Pautot noir, de chacun soixante drachmes, & les faire cuire en 4. liures d'eau de pluye, iusques à ce que 2. liures & demie soyent consumées, & lors il les faudra cuire avec quatre onces de sucre & autant de penides.

Si en la cōpositiō de ce sirop on y met plus grande quantité de sucre, comme iusques à vne liute, voire iusques à deux, il en sera plus plaisant & si ne le faudra pas tant cuire (ce qui est fort cōtraire à la faculté refrigeratiue) encores qu'on le vueille garder longuement: mais fait avec petite quātité de sucre, qui soit pur & bien fin, & qu'on ne vueille pas garder le sirop lōguement, il sera beaucoup plus efficace. Quāt aux testes de pautot, il les faut choisir de moyenne grosseur, & avec leurs semences, & qui soyent à demy seiches, lesquelles il faut faire tréper 24. heures: q̄ si elles sont plus seiches, il les faudra faire tréper dauantage, & puis les faire cuire iusques à ce qu'elles se flectrissent: & lors il les faut pressurer, & faire cuire l'expression avec sucre ou miel,

selon la diuerse intention à laquelle on pretend, iusques à ce que le sirop soit fait. On peut veoir en Mesues la composition du Diacodium.

*Ibidem.* Pour faire le sirop aceteux simple il faut prendre quatre liures d'eau de fontaine, & les faire cuire avec cinq liures de sucre, en vn pot de pierre, iusques à ce qu'il se soit diminué de la moitié, l'escumant tousiours, & lors il y faut adiouster deux liures de vin-aigre blanc & bien cler.

Aucuns font dissoudre le sucre en eau, & le font cuire moyennement, & apres le purifient avec blancs d'œufs, le coulent, & puis le font cuire en forme d'electuaire solide, & quand il cōmence à se refroidir, ils meslēt le vin-aigre pur & net, le demenant tousiours avec vn baston, ou bien auant que le mesler ils le font passer par les blancs d'œufs, qui sont demeurés au couloir, ce qu'ils font afin que le sirop ne se cādisse. D'autres suyuant Nicolas, font cuire deux parties de vin aigre blanc, avec du sucre bien fin & net, & l'escument, sans le clarifier autrement.

Au sirop aceteux avec racines entre ce qui s'ensuit: à sçauoir de racines d'Ache de Fenoil, d'Endiuie, de chacun trois onces, de semences d'Ache, de Fenoil, d'Anis, de chacun vne once,  
de se

de seméce d'Endiuie demie once: il faut dōc faire cuire toutes ces choses, en dix liures d'eau de fontaine, iusques à la consommation de la moitié, & lors on y adioust trois liures de sucre, & le clarifie-on, & estant clarifié on y adioust le vin-aigre.

Le sirop qu'on appelle de Bizantiis ( qu'aucuns estiment auoir esté trouué, ou auoir esté fort en vsage en Constantinoble, que les Anciens appelloient Bisantium, d'autres à cause du pris du denier bisantin, d'ou viét aussi qu'aucuns l'appellent sirupus denarij) se fait de ius d'Endiuie & de ius d'Ache, de chacun deux liures, de suc d'Houbelon, & de Buglosse domestique, ou sauuage, de chacun vne liure, lesquels il faut faire bouillir vn bouillon & les purifier: ces sucs estans clarifiez, il en faut prendre quatre liures, & les faire cuire en sirop, avec deux liures, & demie de sucre, à petit feu: quelquefois on y adioust la moitié autant de vin-aigre, comme il y a des sucs purifiez: quelquefois aussi on y met deux onces de Roses, & demie once de Regalisse, de spica nardi 2. drachmes, de semence d'Anis, de Fenoil, & d'Ache, de chacune trois drachmes, & les fait on cuire avec les sucs.

Le sirop de quinque radicibus, se fait de racine d'Ache, de Fenoil, de Persil, d'Asperges, & de Ruscus, de chacune deux onces les faisant cuire en six liures d'eau de fontaine, iusques à la moitié, & l'expression il la faut faire cuire avec trois liures de sucre, iusques à ce qu'elle soit en sirop, adioustant sur la fin huit onces de vin-aigre.

Pour faire l'Oximel simple il faut prendre

vne partie de vin-aigre, deux parties de miel, & quatre parties d'eau, lesquelles il faut faire cuire iusques à ce qu'il ait la consistance d'un sirop, l'escumant tousiours.

Auiourd'huy on le fait cuire ainsi, quand c'est pour le garder longuemēt. Mais l'Oximel selon la description de Galiē, se fait d'une partie de vin-aigre, deux parties de Miel, & si c'est en hyuer, on y met huit parties d'eau, & en esté iusques à douze parties. Et premie remēt on escume le miel avec l'eau, & quand il ne iette plus d'escume, on le fait escumer derechef avec le vin-aigre, & apres l'auoir laissé refroidir, on le clarifie avec blancs d'œufs, & puis on le remet vn peu sur le feu, & en l'estāt de dessus le feu, on met vne drachme de Canelle pour chascune liure de sirop: & estant refroidy, on le passe par vn linge, deux ou trois fois: & mesme qui le voudra faire plus plaisant, y pourra encores lors adiouster de Canelle, puis le faut mettre pour qlques iours, en lieu frez: si on le fait avec du vin-aigre, & du miel qui soyent blancs, il en sera plus beau, & plaisant à voir.

Pour faire le vin-aigre squilitique il faut prendre les pelures de la Squille qui sont entre l'es-

corce

corce & le cœur du milieu, & les enfiler assez loin l'une de l'autre, tellement qu'elles ne se touchent point, & les faire seicher à l'ombre, par quarante iours: puis prendre vne liure de ces pelures ainsi seichees, & les hacher menu avec vn couteau de bois, & les mettre au Soleil par autres quarante iours, en huit liures de b<sup>e</sup> vinaigre, dâs vn pot verni, qui ait l'êtree estroite, lequel il faudra bien estouper: & au bout de quarante iours il le faudra couler, & le mettre en vn autre pot pour le garder.

Aucuns quand ils mettēt seicher les rouëlles de la squille, enfilent entre deux, des tiges de Fenoil verd ou sec, tant pour les garder de toucher l'une à l'autre, que pour leur donner bonne odeur.

L'Oximel squillitique, se fait de deux liures de vin-aigre squilitique, avec trois liures de miel escumé, lesquels il faut faire cuire ensemble, les escumant tousiours.

Il faut bien que le miel soit escumé au parauant, comme quand on veut faire le miel rosat, mais le vin-aigre Squilitique, luy fait encores ietter de l'escume, laquelle il faut oster.

En l'Oxysachara entre quatre onces de vin-aigre, vne liure de sucre, & demie liure de ius de Grenades aigres, bien meures.

Quâd le sucre est pur & fin, il ne faut q<sup>u'</sup> le faire dissoudre dâs le vin-aigre, & en deux ou trois bouillôs le reduire en



forme d'electuaire, & apres qu'il est vn peu refroidy, il faut mesler le suc de Grenades parmy, le remuant tousiours avec le pilon : mais si le sucre n'est pas pur, il le faut premieremēt cuire & clarifier avec eau, & puis le cuire derechef avec le vin-aigre & le suc de Grenades.

En la composition du sirop d'Absinté entre ce qui s'ensuit, à sçauoir d'Absinté ou Aluine Romain demie liure, de Roses rouges deux onces, de spicanardi trois drachmes, de vin vieil qui soit bon & odorant, de ius de coings, de chacun vneliure & demie. il faut donc faire tremper en ce vin, & en ce ius, le reste, à sçauoir l'Aluine, les Roses, & la Spica, l'espace de 24. heures, & les faire cuire à petit feu, iusques a ce que la moitié soit consumée, avec deux liures de miel, & en faire vn sirop.

Pour faire ce sirop il faut hacher menu l'Aluine, les Roses, & la Spica, & les faire tremper dās le vin, & dans le suc, puis les faire cuire & les exprimer, l'expression il la faut cuire avec du sucre clarifié, iusques à ce que le sirop soit fait. Mais il seroit meilleur de faire tremper l'Aluine à part, & les Roses avec la Spica, puis l'infusion de l'Aluine estant vn peu cuite, y mesler l'autre infusion, & les faire vn peu cuire ensemble, &

ble, & les exprimer: en l'expression faire dissoudre vne liure de sucre, & le clarifier avec blanc d'œufs, & apres l'auoir coulé, il y faudra adiouster l'autre liure de sucre: viay est qu'il faut que ce sucre soit bien pur & net, ou bien il le faudra clarifier à part: car si tu pensois clarifier toutes les deux liures de sucre, avec la decoction, il seroit impossible de le couler, à cause de la petite quantité de suc, sinon comme i'ay dit, que tu augmentes la quantité du suc, iusques à deux liures & demie.

Le sirop de Mente se fait de suc de Coings aigredoux, & doux, de ius de Grenades douces, aigres, & aigredouces, de chacun vne liure & demie, de feuilles de Roses deux onces, lesquelles choses il faut faire cuire à petit feu, iusques à la moitié, avec deux liures de sucre ou de miel, & en faire vn sirop, lequel on aromatisera avec de galia.

On peut purifier les sucz qui entrent en ce sirop, ou au Soleil, ou au feu, ou les laissant seulement rasseoir & reposer, & estans purifiez, faire infuser le reste dedās: ou bié sans les purifier, on pourra faire tréper le reste dedās, l'espace de 24. heures, puis les faire cuire à petit feu, & apres les auoir pressezz, faire cuire l'expressiō derechef & la clari-

fier avec le sucre, ou bien en y pourra mesler de sucre tout clarifié: cela fait il la faudra couler, & l'exprimer avec le sucre, & l'expression la clarifier: il est fort malaisé de la couler par vn drap, & si demeure fort long temps d'estre passé, mais il faut ou changer de couloir, ou partir le sucre en deux, à la façon que nous auons dit au sirop precedét.

Au lieu des sirops de fumeterre, tât grand que petit, nous faisons seulement cuire le suc de fumeterre, & le purifiõs le laissant rassleoir, & puis avec pareille quantité de sucre, en faisons vn sirop.

*Mesures.* En la composition du Sirop de Epithyme entre ce qui s'ensuit: de bon epithyme des iardins vingt drachmes: de Myrabolans Indes & Citrins, de chacun quinze drachmes: de Cassutha, de fumeterre, de chacun dix drachmes: de Thym, de Calamintha, de Buglosse, de stechas, de Regalisse, de Polypode, d'Agaric, de Myrabolans Embliques & Belleriques, de chacun six drachmes: de Roses, de semences de Fenoil, d'Anis, de chacun deux drachmes & demie: 20. prunes: de Raisins secs mondez, quatre onces: de Tamarins, 2. onces & demie: de sucre quatre liures, & de vin cuit deux liures: & de tout en faut faire vn sirop.

Il faut faire cuire les prunes, les Raisins, les semences, & le Polypode, en huit liures d'eau:  
lecon

secondement la Regalisse, la Buglosse & la fumeterre : apres cela, les Myrabolans, la Calamintha, & le Tym : & quand ils seront presque cuits, il faut adiouster l'Epityme, la Cassutha, le stechas, les Roses, & l'Agaric : & quand l'eau sera consumée iusques à la moitié, il les faut oster de dessus le feu, & les laisser tremper toute vne nuict, & apres les auoir faits reschauffer, il les faut presser, & clarifier l'expression avec le sucre, & les couler : cela estant fait il faut passer par le Tamis, les Tamarins, avec deux onces de la decoction, & sera bon de les peser, à fin que estans mondez la quantité requise y soit, & les mesler avec le sirop, les faisant cuire vn bien peu, à sçauoir iusques à ce que la decoction soit consumée : finalement il y faut adiouster le vin cuit, le destrempant avec le sirop, car il ne le faut pas faire recuire.

Sans ces deux qui sont de bon goust, ce sirop seroit beaucoup plus liquide, plus cler, & plus plaisant, & si seroit beaucoup plus efficace à toutes les choses qu'il promet.

Aucuns font autrement, & me semble qu'ils font mieux, car ils mettent les Myrabolans & l'Agaric, à part en infusion, & l'expression ils la mesient avec le reste, vn peu auant que le couler.

Le sirop de Stechas se fait de fleurs de stechas trente drachmes : de Tym, de Calamintha, d'Origan, de chacun dix drachmes : d'Anis, de Pyrethre, de chascun sept drachmes : de Poyure long trois drachmes : de Gingébre, deux drachmes : de Raisins secs mondez, quatre onces, de miel cinq liures : & faut confire ces choses

avec

avec de Canelle, de Calamus aromatique, de Spica nardi, de Safran, de Gingembre, de poyure noir & de poyure lôg, de chascū vne drachme & demie, les liant en vn petit linge cler, & le faisant pendre dans le sirop.

On fait cuire ce sirop, c'est à dire ce qu'y entre en sept ou huiët liures d'eau ou enuiron, iusques à ce qu'enuiron deux liures soyent consumees; & apres l'auoir coulé, on le clarifie avec cinq liures de sucre, & le coule-on, & quand il est presque cuit on trempe bien souvent dedans le neud des choses aromatiques, le pressant avec l'espatule, & finalement on le laisse pendu dedans, lors que sirop est du tout cuit.

Les Raisins, l'Origan, le Calament, le Pyrethre, le Gingembre, le Poyure, le Tym, & la Sthecas, doyent estre cuits au mesme ordre que nous les mettons icy.

Pour faire le sirop de Regalisse il faut prendre, de Regalisse deux onces: d'Adiantos blanc, vne once: d'hysope sec, demie once: & les faire tremper 24. heures en quatre liures d'eau, puis les faire cuire iusques à la moitié, & apres l'auoir exprimé, faire encores cuire l'expression avec de miel escumé, de sucre, & de penides, de chacun huiët onces, & d'eau Rose six onces.

Plusieurs font cuire ce sirop, sans le  
rien

rié faire tremper, pource disent ils que l'eau tire bien tost la vertu de ces choses, les faisant cuire.

L'eau Rose qui entre en ce sirop, y doit estre mise, lors q̃ le sirop est defia cuit, mais apres il le faut faire recuire, afin de consumer ceste eau: sinon que nous vueillons faire comme aucuns, qui mettent seulement six drachmes d'eau Rose, car lors il ne sera ia besoin de le faire recuire, pource que vne si petite quantité d'eau ne peut pas faire que le sucre redeuienne cru.

Aucuns font tremper ces choses toute la matinee, & quand ce vient apres midy, ils font cuire leur sirop.

Les Penides qu'y entrent doyuent estre faites avec du sucre bien net & bien pur, car s'il est mal net il est fort malaisé à couler, & faut entendre par les penides, du sucre cuit iusques à la consistance des penides, & pestri dás le vaisseau avec vn pilon de bois, & non pas de celles qu'on fait avec les mains engraissees d'huile, aux quelles entre force Amydon, & qui sont encores moins pures que le sucre mesme.

Le sirop d'hysope se fait, d'hysope moyennement sec, de racines de Fenail, d'Ache, de Re-

galiste, de chacun dix drachmes: d'Orge mōdē demie once: de semences de Malue, de Coings, & de gomme diagragāt, de chacun trois drachmes: d'Adiantos blanc, six drachmes, de Iuibes, de Sebeste, de chacune trēce: de Raisins secs mondez douze drachmes: de figues seiches, & de dattes bien chatnues, de chascū au nombre de dix: & avec deux liures de Penides biē blācs, faites vostre sirop.

Quand on veut faire ce sirop, il faut mettre l'Orge en six liures d'eau chaude, demie heure apres il faut mettre les racines recentes, si on les peut recouurer, & les faudra nettier du cœur de dedans, & les tailler en pieces: vn quart d'heure apres, il y faudra mettre tous les fruiets, & quant & quant les semences: quant au diagragant, il le faut lier en vn linge cler, avec vn long filet & le mettre dedans: finalement il faut mettre l'Adiantos, & les Penides, comme nous auons dit cy deuant.

Pour faire le sirop de Marube, il faut prendre deux onces de Marube: d'Adiantos biē & d'hysope, de chacun six drachmes: de Regalisse vne once: de Calament, d'Anis, de racines d'Ache, & de Feuail, de chacun cinq drachmes, de Glayeul, de semence de Malues, & de Fenugrec, de chacun trois drachmes: de semence de Lin, & de Coings, de chacū deux drachmes: de Raisins secs mondez, cinq onces: de Figues seiches biē grosses,

grosses, quinze en nombre: de Penides, & de bō miel escumé, de chacun deux liures.

Il faut mettre en huit liures d'eau, premierement les racines, secondemēt l'Anis, les Raisins & les Figues: apres le Marube, l'hysope, & le Calament: & à la fin l'Adiantos, & les faire cuire iusques à la cōsompitiō de la moitié: cela fait, il les faut laisser tremper six heures, puis les faire reschauffer, & les pressurer: puis il faut clarifier l'expression, avec les penides & le sucre, & apres les auoir coulez, faut faire cuire vostre sirop, & cependant il faut faire tremper & exprimer dans la coulature, le neud contenant les semences de Malue, de Lin, de Fenugrec, & de Coings.

Quand on veut faire le sirop d'Endiuie, il faut prendre huit liures de suc d'Endiuie, lequel on aura purifié le faisāt bouillir vn bouillon, & puis le laissant rasseoir: & puis mettre dedans peu à peu, du sucre apres l'auoir clarifié, s'il n'estoit assez net. Mais s'il est encores trop sale il le faut dissoudre avec le suc, & les faire cuire, apres les purifier avec blācs d'œufs, & apres les auoir coulez, les faire cuire en sirop: il faut estre aduertī que ce suc se corrompt bien tost, encores que les suc de limons, de Grenades, & de Coings, se puissent garder longuement, tous seuls sans se corrompre, & encores plus longuement, si on les fait cuire tant soit peu avec du sucre.



Pour l'Endiuie que les Latins appellent Intybus, il faut prendre la Cicoree sauuage, & non pas la laiëtue sauuage, que le vulgaire appelle Endiuie ou Intybus. Et ainsi faisant, il ne sera plus besoin de deux sirops, aſcauoir vn de Cicoree ſimple, & l'autre d'Endiuie ſimple. Que ſi on trouue en q̄iques cōpoſitions, que tous les deux y entrent, aſcauoir l'Intybus & la Cicoree, ou il faudra augmenter la quārité de l'vn, ou bien meſler la Cicoree de iardins, ou la ſauuage, ou celle à larges fueilles, ou à fueilles eſtroites, ou quelque autre eſpece de Cicoree.

Le ſirop d'Armoife ſelon que Matthieu Gradi l'a deſcrit, au neuueſime liure ad Almanſorem, au chap. de Menſibus ciendis, ſe fait de Armoife deux Manipules: de Pouliot, de Calament, d'Origan, de Meliſſe, de Cuirage, de Sauinier, de Mariolaine, de Germandree, de Milepertuis, de Chamepitis, de Matricaria avec ſa fleur, de la petite Centauree, de Ruë, de Beroine, de Bugloſſe, de chacun vn Manipule: de racines de Fenoiil, d'Ache, de Perſil, d'Asperges, de Ruſcus, de Saxifrage, d'Aunee, de Diſtam, de Souchet, de Garance, de Glayeul, & de Piuoine, de chacun vn Manipule: de ſemence de Geneure, de leuſche, de Perſil, d'Ache, d'Anis, de Barbut, de Carpobalaſamum, de Coſtus, de Cabaret, de Pyrethre, de Caſſia lignea, de Cardamomū,  
de Ca

de Calamus aromatique, de Valériëne, de chacun demie once. Il faut donc conquasser toutes ces choses, & les faire tremper en vne suffisante quantité d'eau de Riuiere, l'espace de 24. heures, puis les faire cuire iusques à ce que la moitié de l'eau soit consumée. Lors il le faut oster de dessus le feu, & quand il sera tiède, il faudra frotter le tout avec les mains, & puis le couler, & l'expression la faire cuire en Sirop, avec vne suffisante quantité de miel & de sucre. Vray est que quelquesfois on y adioust du vinaigre bien fort, ou du vinaigre squilitique, quelquesfois beaucoup, & d'autres fois peu, selon la diuerse intention où on pretend: on l'Aromatize aussi avec Canelle & Aspic.

Pour faire ce sirop, il faut premièrement cuire en huit liures d'eau, les racines qui se trouuent en nostre régiõ, & secondement les semences, apres les herbes, finalement le Pyrethre, & les choses aromatiques: quant au Costus, au Cabaret, Casse, Cardamomum, Calamus Aromatique, & la Valériëne, il les y faut mettre lors qu'il restera seulement quatre liures de decoction, & faire comme es autres: cela fait vous pourrez faire cuire vostre Sirop avec de sucre & de miel, de chacun vne liure & demie, à fin qu'il en soit plus efficace: car encores qu'il y entre plusieurs choses ameres, toutesfois on n'y met pas grande

quantité de sucre ny de miel, pour l'adoucir.

Aucuns mettent en la composition de ce sirop, la *Perficaria* ou Cuirage tachetee, laquelle est froide & astringente; mais quant à moy ie suis d'aduis d'y mettre celle espeece qui n'est point tachetee en ses fueilles, qui est acree & piquante au goust, à fin que toutes les choses qui entrent en ce sirop soyent acres, & prouoquantes les moys des femmes, sans qu'il y en ait aucune pour moderer les autres.

En la composition du Sirop de Cicoree, selõ la description de Guillaume Placentin, y entre de Cicoree deux Manipules: de fueilles des deux Buglosses, de Lactues, de Cicoree de iardin, d'Ozeille, de violettes de Mars, de la Cicoree qui se trouue parmy les bleds, de chacun vn Manipule: & de Rhabarbe deux drachmes. Il faut donc piler les herbes, & les faire cuire en deux liures d'eau, iusques à ce que la tierce partie soit consumee, & les couler: en l'expressiõ il faut adiouter deux liures de sucre, & les clarifier ensemble, & puis les couler derechef, & les remettre sur le feu: cela fait il y faut adiouter le Rhabarbe bien puluerizé & lié en vn linge fort cler, lequel il faudra frotter souuent, iusques à ce que le Sirop soit parfaitement cuit.

Il y a vn autre Sirop de Cicoree, de la description de Nicolas Florentin, dans lequel entre ce qui s'ensuit. à sçauoir d'Endinie domestique  
& de

& de sauuage , de chascune deux Manipules, de Courge, d'Hepatique, de Laiſſue sauuage , & de domeſtique, de Fumeterre , & de Lupules & de chacun vn Manipule: d'Orge entier, & de Ba- *Halicaca-*  
guenandier, de chacun quatre onces: de Rega- *bi.*  
liſſe , d'Adiantos blanc & noir, & du commun,  
de Ceterac, & de Cuscuta, de chascun ſix drach-  
mes: de racines de Fenoil, d'Ache, d'Asperges, de  
chascun deux onces: faites cuire le tout en vne  
ſuffiſante quantite d'eau , & les coulez , puis y  
adiouſtez le Sucre , & les clarifiez enſemble , &  
les coulez derechef , & le faites cuire en ſirop:  
pendant qu'il cuira liez en vn linge cler quatre  
drachmes de Rhabarbe , avec quatre ſcrupules  
de Spica nardi, pour chascune liure de Sirop, &  
les frottez dedans. On a accouſtumé d'en don-  
ner trois onces , avec l'emulſion des quatre ſe-  
mences froides ſurnommees grandes.

Ces deux ſirops , qui ſont propres à  
oſter les opilations du foye , & ſon in-  
téperie chaude, ont beaucoup de noms  
barbares & incognus à chacún , qui ont  
eſté occaſion d'engendrer vne infinité  
d'opinions. Car à grand' peine pourra-  
on coliger par les eſcrits de ces barba-  
res , qu'eſt ce qu'ils entendent par En-  
diuia ſilueſtris & domeſtica , par Tara-  
xacon , Batilloſere , ſcariola, & Cicho-  
rium, tant ſont ils remplis d'ignorance  
lourde. Parquoy à mon aduis le meil-  
leur & plus expedient eſt, puis que tou-  
tes les eſpeces de Cichoree ou Seris

ont mesme faculté, & que la Cichoree sauuage, est la plus vtile & profitable à l'estomach, qu'on face ce sirop de la Cichoree seule, ou de son suc, vray est qu'il faut augmenter la quantité, à fin qu'il soit fort simple: mais si quelcun pour brauade y veut mettre les autres especes de Seris, il y pourra mettre & la Laiëtue sauuage, & la domestique, & les deux especes de Laicteron, & les deux especes de Hieracium, & la Chondrilla iaune & la bleuë, & toutes les autres especes de Cichoree, soit domestiques ou sauuages, sans se beaucoup arrester à s'enquerir de ces mots que les Barbares ont corrompu, avec ce qu'ils signifient aussi: Le meilleur est de s'accoustumer au langage de Dioscoride, sans se rompre le cerueau en l'inquisition de ces vocables barbares, desquels ceux mesme qui ont descrit ces sirops, n'entendent pas la signification, tant s'en faut que les autres les puissent auoir expolez ny entendus.

Taraxacon ou Altaracon, mesme selon Gatinaria, est ou la Cicoree, ou la dent de Lion, ou Pissenliët, autrement dit Cicoree sauuage à larges fueilles, comme Plin l'appelle. Batussoferis cō-  
me il

me il semble à Hermolaus, est vn mot corrompu de Baptisecula, que le mesme auteur préd pour le Bluet ou Cyanus, & dit qu'il a prins ce nom entre les rustiques, à cause qu'il arreste la faucille dequoy on coupe les bleds. D'autres estiment plustost que Baptissoseris est le Seris, à sçauoir vne certaine espee de Cichoree sauuage, qui se trouue ordinairement parmy les bleds, qui a la fleur fort ressemblâte au Cyanus ou Bluet, de l'opinion desquels ie suis.

*La troisieme section des Eclegmes.*

**L**A matiere de laquelle on fait les Eclegmes ou lohoc, qui sont medicamens desquels on vse en lechant, est pour la pluspart selõ Mesué, les parties des plâtes. Les racines sont comme les racines de Regalisse, de Squille, de Glayeul, de Coulouuree, d'Ails, de vit de Chien, de Serpétine, de Canne bruslee, que les Arabes prennent pour Spodiũ.

Les herbes, comme l'Hysope, le Marube, l'Adiantos blanc, le Calament, les Choux. Les fleurs de Saffran. Entre les fruiets, les Raisins secs, les Figues seiches, Dattes, les Sebeste, les Iuibes, les

restes de Pavot blanc. Le suc des racines, comme de Regalisse, & de Squille. Le suc des herbes, comme de Choux, de Marube, de Fenail, des Cannes de sucre ( qui est le sucre mesme, duquel on fait aussi les Penides ) & le miel. Le suc des fruiets, comme des meures de Ronce, le suc des Noix, des Myrtilles, la mouëlle de Casse, & le vin cuit. Entre les gommess le Diagragant, la gomme Arabique, & la Myrrhe. Entre les semences, celle de Pavot blanc, de laquelle on fait le sirop, la semence de l'herbe aux Pucss, la semence de Coings, de Malues, de Melons, de Cocombres, de Citrules, les Amandes douces, les ameres, les Pignolats, les Noisettes, la semence de Lactues, de Pourpier, de Lin, de Fenugrec, de Fenail, d'Anis, de Nafitort, l'Amidon, & la farine de Febues.

Entre les escorces, comme la Canelle & les autres escorces des racines de Cappres, de Tamarix, d'Ellebore, de Persil, & les autres.

Outre cela, il y entre aussi de l'eau, dans laquelle on met bien souvent en infusiõ ces choses, où on les fait bouillir. Et des animaux, comme le poulmon de Renard, & le Beurre.

Entre

Entre les choses susdites, il faut piler les racinés & les herbes, si elles sont seiches, ou bien on les peut faire cuire dans de l'eau, puis les piler, & apres les auoir faisees les mesler avec le reste. Quant au Spodium, il s'esmie le demenant seulement.

Les fruiets apres qu'on les a mōdez, on a accoustumé de les piler, & puis les passer par vu crible: vray est que les Dattes, apres qu'on les a mondez & dehors & dedans, il les faut faire premierement tremper en quelque decoction pectoralle. Les testes de Pauot blanc, on les fait tremper, puis on les cuit, & apres les auoir pressurees, on iette là le marc.

La pluspart des sucs qui entrent en ces compositions, sont liquides, parquoy il n'y a pas grāde difficulté de les mesler avec le reste.

Quant au suc de Regalisse, ou on le dissout, ou on le met en petites pieces, & l'ayant ainsi fait seicher entre deux fueilles de papier, ou chauffé en quelque autre maniere, on le pile à diuerses fois dans le mortier.

Quant aux Gommēs, on les peut piler, si on fait seulement chauffer le mor



tier & le pilon, à fin de les seicher : ou bien on les reduit en mucilage.

Les semences, quand elles sont grosses, apres les auoir pecees, on les peut hacher avec vn cousteau : comme sont les Amandes, les Pignolats, les Pistaches, Noisettes, Febues, les semences de Melons, de Cocombres, & de Citrullles: mais si elles sont petites, on les met en poudre, & mesmes il y en a aucunes qu'on coupe apres, comme la semence de Pauot. Il y en a aussi desquelles on extrait le mucilage, lequel on mesle apres avec le reste, comme de la semence de Lin, de Fenugrec, de Coings, & de l'herbe aux Puces.

Les Eclegmes d'aujourd'huy sont pour la pluspart composez de Penides, de pilules blanches, bechiques, de la poudre ou Electuaire de Diatragant froid, de Diarris simple, ou Diarris Salomonis, Diacalaminthes, Diabyfopi, Diaprasij, de sucre Can li, de suc de Regalisse, ou de Iuiubes, ou quelqu'autre sirop propre à la poitrine, plus ou moins chaud, deterisif, incisif, ou propre à quelqu'autre intention que le medecin pourra auoir. Avec lesquelles choses on pourra mesler quelque chose de

ce que nous auons dit cy deuant, soit doux, ou amer, ou acré.

Vray est qu'entre les eclegmes des-  
crits par les anciens, on retient encores  
aujourd'huy en vsage, le Loch sanum,  
le Loch de poumon de Renard, le Dia-  
codion, le Diamoron, & le Diacarion:  
desquels nous n'auons pas fait mé-  
tion en ce lieu, pource que nous en auons  
traicté amplement sur la troisieme se-  
ction de Mesues, ce qu'il n'a pas esté be-  
soin de repeter icy.

Il y a aussi quelques vns qui font vne  
composition, laquelle ils appellent Loch,  
ou Eclegma de cassia, de laquelle ils se  
seruent és clisteres, & la font en ceste  
maniere: Ils font cuire demy liure de  
miel en vne liure de la decoction de  
Violettes, de Malue, de Mercuriale, de  
Blette, de Parietaire & d'Aluine, & sur  
la fin ils y adioustent de la mouëlle de  
Casse mondée, vne liure.

*La quatrieme section des Apozemes  
& Infusions.*

Nous auons à traiter en ceste qua-  
trieme section, des Apozemes &  
infusions, mais pource qu'elles ne sont

point auioird'huy en vsage, le meilleur sera que si quelcun prend enuie d'en vsfer, qu'il aille au conseil vers Mesues.

Quant aux apozemes, & infusions, desquelles nous vsons auioird'huy, quand nous en auons affaire tout sur le champ, elles sont fort diuerses de celles de Mesues, & la preparation en est si aisée, que les enfans mesmes sçauēt comme il les faut faire. Parquoy i'ay mieux aimé m'en taire, que de m'amuser à choses qui ne sont pas beaucoup necessaires, & qui ne feroient que fascher ceux qui les entendent desia assez: avec ce que nous auons deliberé de mettre quelque iour sur la presse, vn traité de noz remedes de medecine, tât de ceux qu'on préd par la bouche, que de ceux qu'on applique au dehors: entre lesquels nous auons mis & ramassé plusieurs exemples des apozemes ou infusions, qui sont auioird'huy en vsage, ce qui appartient plustost au Medecin qu'à l'Apoticaire.

*La cinquieme section des Antidotes  
ou Electuaires.*

**E**N ceste cinquieme section nous auons à traicter des antidotes ou electuaires

Quaires: la matiere desqueis se prend de toutes sortes de simples: Mais on en fait de quatre formes ou manieres, à sçauoir de secs, qui se font de quelque poudre incorporee avec miel, ou sucre ou autre humeur. Or d'autant que la poudre de ceux cy est la matiere des autres trois formes, i'ay deliberé de traiter premierement & bien au long des poudres, d'autant qu'elles se peuuent faire diuersemēt, comme tu pourras voir incontinent apres.

Mais pour entendre plus aisemēt ces choses, il est besoin de rapporter icy en brief, quelques preceptes sommaires de la façō de piler, à fin qu'il ne le faille reiterer en chacune composition.

Il faut donc piler premierement les racines d'Acorus, de Souchet, de Costus, de Valeriēne, de Gentiēne, de Regalisse, de Meu, de Gingembre, & semblables, & mesmes quelquesfois il les faut faire cuire, principalement quand on veut faire vn electuaire mol, vray est qu'il les faut premierement rompre grossierement.

Ces racines estant desia aucunement pilees, on y adioust les semences de Fenoi, d'Ache, de Persil, d'Anis, de Dau  
cub,

cus, d'Ameos, de Sermontain', d'Amomum, de Cardamomum, & semblables. Mais les semences de Cocombre, de Courle, Melon, Citrule, & Carthame, comme aussi les noyaux de Pommes de pin, & les Amandes, on les taille menu avec vn cousteau à part, ou mesmes on y adioust vn bien peu de sucre parmy, à fin qu'elles n'aigrissent.

Après on y adioust les herbes, mesmement si elles sont seiches: la Casse, la Canelle, l'Aspalathus, le Calamus aromaticus, les Gyrosles, la Spica nardi, & le Squinanthos.

Finalement les fleurs de Roses, de Saffran, l'Epithyme, après toutefois qu'on les aura coupez menu avec ciseaux.

Quant aux raisins, dattes, & semblables fruiets, on les pile à part, & puis on les passe par vn tamis, les remuant avec la main, ou avec vn cuillier, comme on fait de la Casse & des Tamarins, ou bien on les taille bien menu, & les mesle-on avec les autres choses plus seiches, & les pile-on ensemble.

Le Bdellium, l'Opoponax, l'Ammoniac, l'Opium, & la Myrrhe, on les dissout avec du vin, ou du miel, ou quelque autre

qu'autre humeur: ou bien si la quantité est petite, on les met avec grande quantité de choses plus seiches, & les pile-on ensemble (apres toutesfois les auoir mis en petites pieces) ainsi aussi l'os de cœur de Cerf, & la raboteure d'Yuoire. En la composition du Diaphe nicon, & es deux electuaires surnommez Indi, & semblables, apres que le Turbith est quelque peu rompu, il le faut messer avec les choses plus seiches, comme sont le Gingembre, le Poi ure & semblables, à fin qu'il se puisse re duire en poudre: car si vous le pësez pi ler tout seul, il s'eslargira plustost que se pulueriser, si c'est du bon & legitime: & ce secret & adresse est vtile en la Scā monee, Opium, & autres liqueurs, gom mes & resines, lesquelles s'eslargissent plustost quand on les pile, que de se pul ueriser: ou bien on les peut seicher en faisant chauffer le mortier & le pilon, mais il faut estre aduertty que cela dimi nue de la vertu & faculté du medica ment.

Outre ce, il faut que les choses chau des soyent pilees bien fort delié, quand nostre intention est de prouoquer les vrines: comme le Thim, le Cabaret, le

Cumin:

Cumin : en la composition d'Aurea, de Atanafia, d'Esdra, d'Hæmagogō, & Diacuraca, & Diacucurma, surnomez grands : & au contraire quand on veut purger, on les pile grossierement, comme és deux compositions Hamech, & en l'ectuaire Indum maius.

On pile tous seuls & à part le Rhabarbe, & la Scammonee, horsmis qu'aucuns y mettent vn peu d'huile d'Amandes douces : puis on les mesle en la composition tous les derniers, & de bien pres, & tout bellement, à fin qu'ils ne s'enuolent ou s'esuentent. On pile aussi à part l'encens masle, la Myrthe, le Musc, le Camfre, & l'Ambre, vray est que parmy ces trois derniers, on y met vn bien peu d'eau rose, & les met on aussi des derniers, & de bien pres, comme nous auons dict du Rhabarbe, & de la Scammonee: mais les premiers apres qu'ils sont en petits morceaux, il les faut mettre en vn mortier bien sec, comme l'Euforbe, le Stirax calamita, le salgemé, & la Soye : les Anacardi veulent aussi estre pilez tous seuls & à part.

Les perles, les deux especes de Corail, & les fragmens des pierres precieuses, veulent estre premierement pilez

lez en vn mortier de Marbre ou de bronze, & apres il les faut fort demener sur vn marbre ou porphire, ou sur quelque autre pierre fort dure, & par ce moyen les reduire en poudre bien deliée, les arroufant tousiours petit à petit, avec eau rose, ou eau de Buglose.

La terre seelee, comme le Bol Armenien aussi, sont assez aisez à mettre en poudre tous seuls: mesme si on les faict tremper en quelque humeur, ils se fondent incontinent comme la chaux.

On peut rapporter icy beaucoup de choses, de ce que nous auons escript au quatrieme liure de la methode de composer les medicamens, traictans de la composition de la Theriaque: comme est ce que nous auons là dict, que le mortier dans lequel on pile toutes ces choses, & autres, principalement les choses cheres & pretieuses, doit estre couuert d'un, voire de deux couuercles, à fin que le plus subtil ne s'enuole, ou s'euente: & par mesme raison il faut bien couurir & enuelopper ce qui est desia passé.

Si en la cōpositiō des electuaires entre quelque suc, ou autre chose humide il le faudra oster, si tu les veux garder  
secs



secs & en poudre, dans vn pot de verre, comme on fait aujourd'huy pour la pluspart : mais si tu veux faire vn electuaire mol, tu les y pourras laisser. Or ceste forme d'electuaires qu'on appelle aujourd'huy secs ou solides n'est pas fort en vsage, si ce n'est pour le goust.

Si aussi en la composition, entre des dattes, de raisins, & de figues, il les faut oster, si tu la veux faire en poudre, sinõ que la quantité fut si petite, & la quantité des choses seiches si grande, qu'il te semble qu'on les puisse mettre en poudre : mais si ton intétion est de faire vn electuaire liquide & mol, il les faut mōder, couper, piler, passer, & les mesler avec le reste.

Si dans la poudre de laquelle on veut faire apres vn electuaire solide, il entre des Amandes, des Pignolats, des semences froides surnommees grandes, ou semblables, il faudra attendre de les y mettre quand on en voudra vser, ou qu'on voudra former l'electuaire : car elles ne se peuuent garder longuement sans se rancir, tellement qu'elles gastét la composition.

Quand on veut faire vn electuaire solide, on met communemēt vne once  
de

de poudre, ou mesme six drachmes seulement, pour chascune liure de sucre: Il y en à qui en mettent moins, non pas pour redre l'electuaire plus espez, mais afin qu'il ne soit pas si cher, principalement quand il y entre des choses precieuses, comme en l'electuaire de Gemmis, Diambra, & Exhilarans.

Parcillement on met communement trois Onces de poudre, pour chascque liure de Miel escumé: de sorte toutesfois que lors le Sucre, les penides, les dattes, les Amandes, les Pignolats, & semblables, ne sont pas cõtez entre les poudres: Toutesfois Mesues en la cõposition de Diamoschus, ordonne de mettre quatre fois autant de Miel cru, comme de toutes les poudres.

Il faut aussi noter, que lors qu'on mesle les poudres parmy le miel, il faut que le miel soit tiede, de sorte qu'on puisse souffrir avec le doigt la chaleur du miel mesme, ou du fons de la poile ou chaudiere, & faut aussi faire que la poile tienne ferme, mettant le mortier dessus le manche, ou bien que quelcun autre le tienne, afin qu'on puisse tousiours remuer avec vn bastõ, quand on y mettra les poudres. Ce qu'il faut aussi

seruer és electuaires solides, lesquels on met premierement en monceau, cōme si c'estoit de paste, apres on l'aplanit avec la main & avec vn pilō de bois sur du papier blanc & net, cōme si on vouloit faire vn gasteau, & quāt & quāt on le met en lozanges, avec vn couteau, les vnes vn peu plus longues que larges, les autres toutes carrees, & les autres à trois quarrs, d'autres lōgues cōme le doigt, d'ou vient aussi qu'on les appelle Manuschrifti communement. Et outre ce on les fait d'vn certain pois cōme d'vne drachme, ou dauantage,

Au reste és entidotes mols, comme sont le Catholicon, le Diaprunis, & la confection Hamech, és quels il faut dissoudre les Tamarins & la casse, & puis les passer: il faudra faire tremper les Tamarins vne heure deuant que les passer: & l'vn & l'autre auāt que les dissoudre, il faut peser l'humeur auquel on les veut dissoudre, à fin qu'on puisse cognoistre, si la quātité des Tamarins & de la casse, qui doit estre en la composition, y est, apres les auoir sassez: Il faut obseruer le mesme en la Manne, & és autres semblables: comme aussi il sera dict cy apres, des Pilules, à

les , à sçauoir quand on fait dissoudre les larmes en quelque humeur, & qu'o les coule ou fait passer apres.

En la composition appellee Diambra , selon la descriptiõ de Mesues, y entre de Cinamome, de Dorocnicum, de Gyrosses, de Macis, de Noix muscate, de folium, de Galanga, de chacun trois drachmes: de Spica nardi, de grand & petit Cardamome, de chascun vne drachme: de Gingembre , vne drachme & demie: de santal iaune, de bois d'Aloes, de Poyure long, de chascun deux drachmes: d'Ambre , vn Aureum : de Musc demie drachme.

En la composition appellee de Gemmis de Mesues , entre des fragmens de Saphir , de Hiacinthe, de Sardes, de Grenats , & d'Esmeraudes, de chascun vne drachme & demie: de zedoaria, de Doronicum , de Macis, d'escorce de Citron, de semence de Basilic gentil, de chascun deux drachmes : de Corail rouge, d'Ambre à patin ostres, de limaille d'yuoire, de chascun deux scrupules : de Ben blanc & rouge , de Gyrosses , de Gingembre, de Poyure long, de Spica, de foliũ, de Saffran , de petit Cardamome , de chascun vne drachme : de trochisques Diathodon , de bois d'Aloes; de chascũ cinq drachmes: de Cinamome, de Galanga , de zurumbet , de chascun vne drachme & demie: d'argent & d'or en fueil le de chascun demy Aureum : de bon musc, demie drachme: d'Ambre deux drachmes.

L'Ambre & le musc doiuent estre pilez à part : le Corail & les pierres pretieuses, ou chacũ a part soy, ou tous ensemble

ble, à la façon que i'ay dict: le reste on le peut piler ensemble, gardant tousiours l'ordre qui doit estre gardé.

En la composition surnommee exhilarans qu'on attribue à Galien, entre selon Nicolas, de suc de pomes douces & odorantes, de suc de Coings, de suc de fleurs de Boraches, & de fleur de Basilic, de vin vieil, de Saffran, de Macis, de zedoaria, de bois de Baume, de Gyrofiles, d'escorce de Citron, de Galanga, de Noix muscate, de Stirax calamite, de chacun cinq drachmes: de Camfre, d'Ambre, & de musc, de chacun vne drachme: d'Anis, de Thym, d'Epithyme, de rasclure d'yuoire, de chacun deux drachmes: de perles, de l'oz du cœur de Cerf, de chacun vne drachme: d'or & d'argent fin, de chacun vn scrupule: de sucre autant qu'il y en faut.

*Aucuns y  
mettent la  
semence.*

Il est essez cler & euident, que ceste cōposition n'est pas de Galien, veu q̄ le macis, la zedoaria, les Gyrofiles, la Galanga, la noix muscate, le Camfre, l'Ambre, le musc, qui y entrent, luy estoient incogneus: & l'yuoire, les perles, l'oz de cœur de Cerf, l'or, l'argët, & le sucre, n'estoyët pas encores en vsage de son tēps, ou pour le moins biē peu.

Il faut faire cuire le sucre avec les sucs, & quand il sera cuit, & qu'il commencera à refroidir, il y faut mesler les poudres parmy.

Il faut en sept livres de sucre, dissou-  
tes

tes en eau & cuites, mettre sur la fin les sucs, & les faire cuire autant qu'il en sera besoin, & qu'on puisse incorporer parmy enuiron 7. onces de ceste poudre.

L'Electuaire Lactificans de Nicolas Alexandrin, est tout autre que cestui-cy.

Ces trois poudres desquelles ces Antidotes sont composez, sont principalement en vſage entre nous (encores que Mesues & Nicolas ordonnent de les incorporer avec quelque humeur, afin de les reduire en electuaire mol) desquelles nous formons vn electuaire solide, quand il en est besoin, faisant dissoudre le sucre en qlque humeur propre & cōuenable, mais en petite quantité, lequel nous faisons cuire premierement: Au reste pour vne once de poudre, on met douze onces de sucre: ou bien on mesle ces poudres parmy les bouillions ou sausses des maladies.

Nous ne faisons point mention des autres poudres, pource qu'elles ne sont pas beaucoup en vſage, & mesme que s'il aduient qu'on en demande à l'Apothicaire, il pourra prendre en Mesues & Nicolas la façõ de les faire: cõme sont l'Antidote, Diacalaminthes, Diatrion-

pipereon, Diospoliticó, diahyfopon dia  
sene diacostó Diacomeron, Diattaga-  
canthum calidum, Diamargariton cali-  
dum, & plusieurs autres semblables.

Il nous faus maintenant traicter des  
Antidotes, qui à cause que la pluspart  
reçoquent l'Opium en leurs compo-  
sitiōs, ont prins le nō d'Opiates, & les au-  
tres qui n'ont point d'Opiū, ont piins  
le mesme nom, pour auoir la forme &  
consistence de celles la.

En la cōposition surnōmee Catholicū de Ni-  
colas, qu'on attribue à Galié, entre des Gouffes,  
de Sene, de mouëlle de Cassé mōdee, de Tama-  
rins, de chacun 8. onces: de Rhabarbe, de Violet-  
tes, de Polypode, d'Anis, de chacun quatre on-  
ces: de Regalisse raselee, de Penides, de sucre cā-  
dy, de chacun quatre drachmes: des quatre se-  
mences froides mondees, de chacun vne once.  
On prend donc vne liure d'autre Polypode, la-  
quelle estant pilee, on la fait cuire longuement  
en eau, & apres l'auoir coulee, on fait de la cou-  
lature vn sirop, la faisant cuire avec huit li-  
ures de sucre, puis on dissout la Cassé, les Ta-  
marins en vne partie de la coulature, & la cou-  
le on derechef, & quand le sirop est presque  
cuit, on mesle cecy parmy, & finalement on y  
adiouste les poudres.

Il faut piler le Sene, le Polypode, la  
Regalisse, l'Anis, & les Violettes, tout  
ensemble: le Rhabarbe, il le faut piler  
tout seul à part: les quatre semences  
froides surnōmees grandes, apres estre

môdes de leur escorcés, il les faut hacher menu avec vn couteau avec le sucre & Penides, pour les garder de s'engraisser: quant aux Tamarins & la Casse, s'ils sont frez & recens, il sera beaucoup meilleur de les passer par l'Estamine à part, que de les dissoudre en vne partie de la decoction: afin qu'il ne soit besoin de les faire cuire, iusques à ce que l'humeur dans lequel on les aura dissoutes soit cōsumé. Mais si on dissout les Tamarins en la decoction, & puis qu'on les passe par l'estamine, il faudra peser la decoction, afin de sçauoir si les Tamarins estans passez pesent la quantité qu'ils doivent. Apres dōc que tu auras fait ton sirop de la decoction de Polypode, & que tu l'auras retiré de dessus le feu, tellement qu'il sera vn peu refroidi, il te faudra dissoudre la Casse & les Tamarins, desia passez, en vne partie du sirop, & incontinent les mesler avec le reste du sirop: apres il te faut mesler les poudres suldites parmi, & finalement le Rhabarbe & les semences hachees menu, les remuât tousiours & les meslât avec vn pilon de bois: mais si tu auois fait dissoudre la Casse & les Tamarins en



vne partie de la decoction , cōme en deux onces,& que tu les ayes coulez, il les faut faire cuire auāt que les mesles au sirop , afin qu'ē cuisant l'humeur se consume.

Aucuns composent auiourd'hay le Catolicū plus delicatement,& qui est plus efficace,mais aussi est il plus cher: car ils mettent seize onces de Sene en infusion,dās quatre liures de la decoctiō de Polypode,& huit onces de Rhubarbe,en demie liure de la mesme decoction:& apres auoir exprimé le Sené, ils le font cuire avec le sucre, iusques à ce qu'il ait presque la cōsistence d'un electuaire:& quāt à l'expressiō du Rhubarbe, ils la meslent peu à peu hors du feu: apres cela ils adioustent la Casse & les Tamarins passez, & les poudres aussi.

*Nicolas*

Le Diaprunis simple selon la description de

*Alexan-*

*drin appel*

*le ceste cō-*

*positiō Di-*

*annusée-*

*non, & di-*

*qu'il sint-*

*choisir les*

Nicolas se fait de prunes de damas meures, au nombre de cent,lesquelles on fait cuire en eau iusques à ce qu'elles soyent dissoutes,& quand elles seront vn peu refroidies, il les faut oster de la chaudiere, & les bien froter entre les mains, & les passer par vn crible ou estamine, & reietter les escorces & noyaux: ceste eau ainsi passée, il la faut faire recuire avec demie once de violettes, puis avec deux liures de sucre, la reduire

reduire en forme de sirop, y adioustant de la *prunes de*  
 poulpe de prunes que nous auons dict, vne li- *Damasc*  
 ure: & quand ces choses commenceront à s'es- *verdes.*  
 pesser par la coctiō, il faut dissoudre en vne pe-  
 tite portiō de l'eau susdite, de Casse freschemēt  
 extraicte, & de Tamarins, de chacun vne once,  
 & les couler, puis les mesler avec le reste, les  
 remuant tousiours avec l'espatule: & quand  
 ces choses seront parfaictement cuittes, il les  
 faut oster de dessus le feu, & y adioster la pou-  
 dre suuante, asçauoir de santal blanc & rouge,  
 de Spodium, de Rhabarbe, de chacun trois *Nicolas A*  
 drachmes: de Roses, de Violettes, de semence de *l' Alexandrin*  
 Pourpier, d'Endiue, de Betberis, de suc de Re- *mesle sept*  
 galisse, & de Gomme diagragant, de chacun *drachmes*  
 deux drachmes: des quatre grandes semences *de Scam-*  
 froides mondees, de chacune vne drachme: & *monce pour*  
 si tu la veux faire laxatiue, il ne faut qu'adiou- *chacune li-*  
 ster de Scammonce preparee, demie once pour *ure.*  
 chacune liure, mais il faut mettre hors du  
 feu.

Il y a aucuns qui meslent six drach-  
 mes, voyre vne once de Scammonce, sur  
 chacune liure de composition, & par ce  
 moyen trompent les Medecins, sans  
 qu'ils le sçachent: car ils trouuent que  
 le medicament qu'ils estimoyent estre  
 benin, a purgé avec violence.

En la composition du Diaphenicū de Mesue  
 entre de Dattes rousles trempces en vin-aigre,  
 l'espace de trois iours, cent parties: de Penides  
 cuittes en eau d'Orge, quarante parties: de Tur-

bith, trentecinq parties : d'Amandes mondées, trente parties : de Scammonee, douze parties : de Gingembre, de Poyure long, de feuilles de Ruë seiches, de Canelle, de Macis, de Galanga, de bois d'Aloes, d'Anis, de Fenoil, & de daucus, deux parties & demie. Toutes ces choses estās bien pilees, doyuent estre incorporees avec mielescumé.

Les dattes apres qu'elles sont mondées & dehors & dedans, tant plus elles seront seichees, tant plus longuement il les faudra laisser tréper au vin-aigre, & la quantité du vin-aigre sera aussi tāt plus grande : & au contraire tant plus recens & humides ils seront, tāt moins de temps, & en moindre quantité de vin-aigre les faudra il faire tremper : mesmes s'ils sont fort humides on les pourra piler sans les rien faire tréper, les arroufant toutesfois de vin-aigre petit à petit. Or pource que la pluspart de ceux que nous recouros sont secs, apres les auoir mondez, & mis en petites pieces, il les faut faire tremper, l'espace de trois iours, dās vn pot de Caillo, ou vn pot de terre verny & bié couuert, en vne moindre quantité de vin-aigre, sans point de feu, & apres cela les piler en vn mortier de pierre, avec vn pilon de bois, puis les passer avec la main

main, par vn crible, ou par vne estamine, ou biẽ oster les petites peaux qui restoyent: on peut biẽ aussi piler avec les Dattes des amãdes pelees, & les passer aussi ensemble, ou biẽ les hacher menu avec vn couteau, cõme aussi les Pignolats (qu'aucũs mettẽt au lieu des Penides) vray est q̃ d'autant qu'il faut faire cuire la chair des Dattes, iusques à la cõsompction du vin-aigre, si on mettoit les amã les parmi, elles s'ẽgraisseroyẽt & deviendroyent huileuses, parquoy le meilleur est de les hacher menu, & les meller avec le reste de la poudre.

Il faut puis prẽdre six liures de miel, avec le double d'eau & escumer le Miel, iusques à ce qu'il demeure seulement trois liures d'eau, & qu'ils ayent la consistence d'un coignat liquide, & lors il y faut meller les Dattes, & les faire vn peu bouillir apres, à fin de faire consumer le vin-aigre.

Aucuns incorporẽt les poudres avec du sucre, & en font vn electuaire solide, cõme aussi le Diacarthami, mais il les faut bien cuire, & les tenir en lieu bien sec, à fin qu'ils ne rancissent.

Le Diaphenicum de Nicolas Alexandrin à cent drachmes de chair de Dattes,

tes, & quant au reste, il est fort differēt à cestuy-cy.

La confection Hamech selon que Mesues l'a descrite, se fait de Myrabolans citrins, quatre onces: de Chepules d'Indes, de Rhabarbe, de chacun deux drachmes, d'Agaric, de Coloquinte, de Polypode de Chesne, de chacū seize drachmes: d'Aluine, de Thym, de Sene, de chacun vne once: de Violettes, quinze drachmes: d'Epithime, deux onces: d'Anis, de Roses, de Fenoil, de chacun six drachmes: de suc de fumeterre, vne liure: de prunes soixante en nombre: de Raisins secs mondez, six onces. Faites tremper le tout en petit lait, l'espace de cinq iours, en vn pot verny qui ait l'emboucheure estroite, & qui soit bien couuert & fermé. Apres les cinq iours il se faut faire bouillir vn bouillon, & le couler, en la coulature il faut dissoudre de Casse mondee, quatre onces: de Tamarins, cinq onces: de Manne, deux onces, & apres les auoir bien frottez avec les mains, les passer derechef: & en la coulature faut adiouster vne liure & demie de sucre: & de Scamonee, vne once & de mie, & les faire cuire iusques à ce qu'ils ayent le consistence du miel: & lors il y faut adiouster petit à petit ceste poudre: asçauoir de Myrabolans citrins, de Chepules d'Indes, de chacū demie once: de Myrabolās Embliques, Belleriques, de Rhabarbe, de semence d'Anis, de Spicacardi, de chacun deux drachmes.

Il faut piler grossierement le Polypode, le Sene, les Myrabolans, & l'Anis: quant à l'Agaric, il le faut rapper: la  
\_ Colo

Coloquinte, les Roses, le Thym, l'Epithyme, l'Aluine, il les faut couper menu avec des ciseaux, & le Rhabarbe le mettre en petites pieces avec vn couteau: quant aux prunes & Raisins, il les faut monder dedans, & les violettes les laisser toutes estieres, lesquelles avec l'Agarie, le Rhabarbe, la Coloquinte, & les autres, il les faut faire tremper cinq iours en suc de fumeterre purifié le laissant rasseoir, mesme au Soleil, voire luy faisant faire vn bouillon, & avec petit lait coulé, iusques à ce que couure le tout, cōme iusques à trois liures: vray est qu'il est meilleur de lier l'Agarie & la Coloquinte en vn petit ling. Le sixiesme iour il faut cuire le tout doucemēt, le couler, & l'exprimer mediocrement, car si on le pressuroit par trop, la crasse & la partie terrestre passeroit, à cause que les matieres sont presque pourries tant pour auoir trempé long temps, que pour auoir esté cuittes: en vne petite partie de la coulature, il faut dissoudre la Casse & les Tamarins, & en vne autre petite portion faut dissoudre la Manne, & le reste le faire cuire en sirop, avec vne liure & demie de sucre, puis mesler le  
tout

tout, & le faire cuire vn bié peu, car qui  
 les feroit cuire trop violement ou  
 trop longuement, leur force s'esua-  
 nouiroit, c'est aussi pourquoy aucuns  
 apres auoir mōdé la Casse & les Tama-  
 rins sans aucune humeur, les meslent  
 avec le sirop, lors qu'il est cuit & enco-  
 res tiède, au temps mesme qu'on y met  
 les poudres des autres choses, & la Scā  
 monee cuitte.

Il faut que le petit laiēt ou mesgue,  
 soit prins de laiēt de Chieure fresche-  
 ment tiré, & qu'ō ait caillé tout expres,  
 mettant dedans de la semence de Char  
 don nostre dame concassée. On prédra  
 donc six liures de ceste mesgue, & leur  
 fera faire vn bouillō, & les purifiera a-  
 uec 2. blancs d'œufs, & apres les auoir  
 laissées refroidir on les coulera: ou bié  
 si on est pressé, on les pourra couler  
 trois fois, mesme estant encores chau-  
 des. Aucuns practiciēs disent qu'il faut  
 prendre ce petit laiēt, d'une Chieure  
 noire, qui n'ait point de cornes: le laiēt  
 de laquelle ils estiment aussi estre pro-  
 pre pour rompre le Calcul.

En la composition appelee Benediā, selon  
 que Nicolas l'a descrite, entre de Turbith bien  
 choisi, de sucre, de chacun dix drachmes: de Scā  
 monee

monée cuite, d'Hermodactes, de Roses, de chacun cinq drachmes; de Gyrofle, de Spicanardi, de Gingembre, de Safran, de Saxifrage, Poyure long, d'Amomum, de Cardamomū, de semence d'Ache, de sal Gemmé, de Galanga, de macis, de Caruy, de Fenail, de semence d'Asperges, de Ruscus, d'herbe aux perles, de chascūne drachme: de miel autant qu'il est besoin. *℞ i 3 - vi 3 iij*

Le Turbith, la Scammonee, & les hermodactes, veulent estre pilez grossièrement, afin qu'ils purgent davantage: les autres choses, il les faut piler plus delié, afin qu'elles penetrent mieux par le corps, comme aucuns ont fort bien remarque, suyuant les preceptes de la triture.

Aucuns exemplaires mettent en ceste composition, de Turbith, d'Esula, & de sucre, de chacun dix drachmes: de Scammonee cinq drachmes: mais Nicolas Alexandrin ny met point d'Esula: le mesme met de Turbith & de sucre de chacun vingt drachmes: & de Scammonee dix drachmes: mais aussi il met deux drachmes de tout le reste, tellement que Nicolas Salernitan diminue toute la quantité, de la moitié. Aucuns aussi mettent seulement deux drachmes de Scammonee, d'autres deux drachmes & demie.

Pour



Pour faire la Hiera picra , c'est à dire sacree amere, de Galien, il faut prendre de Canelle, de Mastic, de Cabaret, de spica nardi, de bois de baume , de Saffran , de chacun six drachmes : d'Aloes, cent drachmes: de miel autant qu'il est besoin.

Galien escriit que de son temps on la composoit ainsi à Rome & qu'on y peut mettre l'Aloës lauë, ou non lauë, tâtost plus tantost moins, selon la diuersité des intentions des Medecins: & que c'est assez d'y mettre cinq drachmes de Saffrá. Tu pourras voir plus au long que c'est de ceste cõpositiõ, en Mesues.

En la composition de Hiera Diacolocyntidos selon Pæcius , entre de Stecas , du Marube, de Germandree, d'Agaric , de Coloquinte , de chacun dix drachmes: d'Opopanax, de Sagapenum , de Persil , de Sarasine ronde , de Poyure blanc, de chacun cinq drachmes: de Canelle, de Spica nardi , de Myrrhe, de Polium, de Saffran, de chacun quatre drachmes. Il faut piler le Sagapenum & l'Opopanax, en vn mortier , y adioustant du miel bien cler & liquide: & le reste estant bien pilé & sassé, doit estre incorporé avec vne suffisante quantité de miel.

Nous auõs diſcoursu assez amplemēt sur Mesué ce qui apartient à ceste composition, laquelle à este mise en vsage depuis peu de tēps au grād proufit des hommes.

Qui voudroit garder la Hiera en  
poudre.

poudre, il faudroit seulement menuiser les liqueurs, & les mettre petit à petit parmi le reste, car par ce moyen on les reduira en poudre : mais si on la veut metre en electuaire liquide, il les faut couler avec du miel fort liquide.

En la composition de l'Antidote surnommé Philonium, entre de Poyure blanc, de Iusquame blâc, de chacun vingt drachmes: d'Opiũ, 10. drachmes: de Saffran, cinq drachmes, de spica, de Pyrethre, de Castoreũ, de chacun vne drachme : de Miel escumé, quatre fois autant que de tout le reste, & avec iceluy, les faut incorporer: aucuns y adioustent vn scrupule de Musc.

Quivoudra voir plus amplement du Philonium, tant Romain que Persique, qu'il lise Mesues: quant à moy ie me contente de ceste description, prise des Anciens.

En ceste composition on met trois onces de poudres pour chacune liure de Miel, comme aussi en plusieurs autres: lesquelles ont prins leurs denominatiõ de Philo Juif Philosophe Platonique fort docte, comme Nicolas Alexandrin l'a escrit.

L'Antidote de Bacis lauri selon Rasis, est composé de feuilles de Ruë seiches, dix drachmes: de semence d'Ammy, de Cumin, de Barbuë, de leuesche, d'Origan, de Caruy, de Daucus, d'Amã

des ameres, de Poyure noir & du long, de Mentastre, d'Acorus, de Bayes de Laurier, de Castoreum, de chacun deux drachmes: d'Opopanax, 3. drachmes: de Sagapenu, quatre drachmes: de Miel cuit, autant que de tout le reste: ayant pilé ce qu'il faut piler, formez vostre electuaire mol.

Cest electuaire aura la cōsistence de Pilules, si on y met si petite quantité de miel, sinon qu'ō dissolue le Sagapenum & l'Opopanax en d'autre miel fort liquide, & qu'on les coule apres, comme nous auons dit en la Hiera diacolocynthidos.

Auiourd'huy ou met quatre fois autant de miel que de poudres, sans comprendre entre les poudres l'Opopanax & le Sagapenum, & par ce moyē la composition est plus plaisante, mais elle n'est pas de telle efficace & vertu.

L'Electuaire Diacarthamy est composé (selon Arnaud de villeneufue) de la poudre de l'Equaie Diatragagant froid, demie once: de chair de coings, vne once: de mouëlle de Carthame, d'hermodactes, de chascū quatre drachmes: de Gingembre blanc, deux drachmes: de scammonée cuite, trois drachmes: de Turbith blanc, six drachmes: de manne granee, deux drachmes: de miel rosat coulé, vne once: de sucre, formez vostre electuaire.

*En r. —*  
*candy* *Si*  
*4. m. acip. s. h. r. u. - 3 x II*  
*3 iij*  
*Et electuaire 64 de et*

Il faut mettre les Coings en quatre quartiers, plus ou moins, & comme ils sont confits au Sucre, il les faut piler, & les passer par l'estamine: au lieu de quoy si tu veux faire cōme on fait par deçà, à scauoir prendre du Corignat, en deux drachmes d'iccluy, il y en aura vne de sucre, ou de Miel, ou mesme dauantage: & lors il le faut dissoudre avec miel rosat, comme on fait aussi la manne, & les passer par l'estamine: quant à la semence de Carthame, apres luy auoir osté son escorce, ou on la coupe menu, ou bien on la pile avec du sucre, & la messe on avec la poudre de Turbith, d'Hermodactes, de Gingembre qu'il faut piler ensemble: mais la Scammonee, il la faut piler à part: apres que le sucre sera cuit vn peu dauantage qu'vn electuaire doit estre (à cause que les choses liquides qu'on y adioustera apres, le feront par maniere de dire redeuenir crud) il y faut adionster les Coings, & la Manne, & le miel rosat, broyez ensemble & coulez.

Aucuns laissent la poudre Diagrangant, & mettēt le Corignat pestry & demeslé avec miel, dans vne liure de Sucre, cuit en quatre ou six onces d'eau,

s'il est mal net, & qu'il le faille escumer, & apres y adioustēt les autres poudres: D'autres font autrement.

L'electuaire qu'on appelle de succo Rosarū, selon Nicolas, est composé de sucre, de suc de Roses rouges du tout espanies, de chacū vne liure & quatre onces: de Santal rouge, de blanc, & de Citrin, de chacun six drachmes: de Spodium, trois drachmes: de Scammonee cuite, douze drachmes: de Canfre, vn scrupule: & pour incorporer le tout, il faut faire cuire le suc avec le Sucre, iusques à ce qu'il soit reduit en Sirop.

Quand le Sucre & le suc sont cuits, comme il a esté dit, il y faut mesler les santals, & le Spodium en poudre: finalement la Scammonee, & le Canfre chacun pilez à part.

Encores que Mesues soit coustumier de mettre és compositions, où entre la Scammonee, enuiron vne scrupule de Scammonee cuite, sur chacune once de composition, neātmōins Nicolas en met icy pres de deux scrupules: parquoy aucūns ont fort bien regardé, que ce seroit assez de mettre en ceste composition, huiēt drachmes de Scammonee: vray est que mesme Nicolas Alexandrin en met douze drachmes au Chap. 309. du liure de la composition des medicamens locaux, d'oū Nicolas Salernitan,

Salernitan , & l'autre Nicolas surnommé Prepositus , ont prins leurs compositions. Ceste composition se feroit bié plus commodemét avec moins de suc. D'autres composent au lieu de cestuy-cy , l'electuaire rosat de Mesues , qui a vertu de purger la colere.

L'electuaire surnommé Diarrhodon abbatis , selon la description de Nicolas, se fait de Santals blanc & rouge , de chacun deux drachmes & demie : de gomme Diagragant, de gomme Arabe, de Spodium, de chacun deux scrupules : de Cabaret , de Mastic , de Spicard de Cardamomum , de suc de Regalisse, de Saffran, de bois d'Aloës , de Gyrosses, de Galia moschata, d'Anis, de Fenoil, de canelle, de Rhabarbe , de semence de Basilic, d'Aubespain, de Cichoree, de Pourpier, de Courle, de Cocombre , Melon, & Citrule , de chascun vn scrupule : de Perles , d'Oz de cœur de Cerf, de chacun demy scrupule : de sucre candi, & de Roses , de chascun vne once & trois drachmes : de Camfre sept grains : de Musc trois grains & de ray : formez vostre electuaire avec vn sirop fait d'eau rose.

On garde la poudre de laquelle on

fait cest electuaire, en vne boîte de verre, bien couuverte, comme les autres, & quand on en a affaire, on le forme avec sirop rosat entieremēt cuit. Ou bien on fait dissoudre vne liure de bon sucre, en demie liure d'eau rose, tirée par distillation de roses blanches toutes fresches, ou de la decoction de roses seiches, ou du suc tiré de roses rouges fresches, & le fait-on cuire iusques à ce qu'il soit assez espez: & quand il est desia refroidi, tellement qu'il commence à estre assez espez, on mesle parmy six drachmes de la poudre susdite, biē peu souuent y en met-on dauantage: puis on les mesle tresbien avec vn pilon de bois, comme i'ay desia dit: quant aux semences, pource qu'elles se rancissent bien tost, tellement qu'elles gastent le reste de la composition, ie suis d'aduis qu'on ne les y mette point, sinon quand on s'en voudra seruir. Je ne suis pas aussi d'aduis qu'on y mette le musc, à cause qu'aucuns l'ont en horreur, & qu'il cause douleur de teste: ny le Camfre aussi, sinon que cela soit commandé par quelque medecin sçauant & biē expert.

Pour faire l'electuaire appellé Aromaticum

maticum Rosatum de Gabriel, qui est  
 en Mesues, il faut pr  dre de Roses rou-  
 ges, quatorze drachmes: de Regalisse  
 rascelee, sept drachmes: de bois d'Alo  s,  
 de Santal citrin, de chacun trois drach-  
 mes: de Cannelle, cinq drachmes: de  
 Macis, de Gyro  s, de chacun deux  
 drachmes & demie: de gomme Arabi-  
 que, de Diagragant, de chacun deux  
 drachmes & deux parties d'une drach-  
 me: de Noix muscate, du grand Carda-  
 momum, de Galanga, de chacun une  
 drachme: de Spica nardi, d'Ambre gris,  
 de chacun deux scrupules: de M  le, un  
 scrupule: de sirop ros  t autant que be-  
 soin sera.

L'electuaire Diamargariton frigid  ,  
 est compos   des trois santals, de fleurs  
 de Violettes, de semence de Melons  
 m  dee de son escorce, de Trochisques  
 diarhodon, de chacun deux drachmes:  
 de foye crue, d'Oz de c  ur de Cerf, de  
 Spodium, de Doronicum Romain, de  
 Been blanc & rouge, de Spica nardi, de  
 Saffran, de chacun deux scrupules: de  
 perles entieres, & de pertuisces, de ras-  
 clure d'yuoire, de Saphirs, de Hyacin-  
 tes, d'Esmeraudes, de Iaspes verts, de  
 bois d'Alo  s, de semences d'Endive, &



d'Ozeille , d'Ambre gris, de chacun demie drachme : d'Or fin<sup>1</sup>, vne drachme : de Canfre , vn scrupule : de Musc deux grains.

Nicolas décrit ceste composition en vne autre façon, d'autres en vne autre, mais ceste descriptiō icy est le plus souuent en vſage entre nous.

En la composition de l'electuaire Diatrion ſantalon, ſelon la description de Nicolas, entre de ſantal blanc, de rouge, & de citrin, de Roſes, de Pſyllium, de chacun au poids de deux ſolz : de Rhabarbe , de Spodium, de ſuc de Regaliſſe, de ſemence de pourpier, de chacun au poids d'un ſou & demy : d'Amidon , de gomme Arabique, de gomme Diagragant , de ſemences de Melōs, de Citrulle, de Cocombre, de Courle, de Cichoree de iardin , de chacun au poids d'un ſou : de Canfre, vn scrupule & demy : de ſirop roſat, autant que beſoin ſera : d'autres y mettent quatre fois la quantité de Roſes.

En ceste composition y à ſeulement la moitié de la quantité qui eſt en celle de Nicolas Alexandrin , horsmis qu'il met du ſuc au lieu du Pſyllium , & qu'il ne fait point de mention de la cichoree de iardin. Il faut mettre auſſi que au lieu du ſirop roſat, on peut faire ceste composition avec ſucre diſſous en eau commune, ou en eau Roſe.

Pour

Pour faire l'electuaire appellé Diatragacanthum frigidum , selon Nicolas, il faut prendre, de Diatragant blanc , deux onces : de gomme Arabique, vne once & deux drachmes: d'Amidon, vne once: de Penides, trois onces: de Regalisse , de semence de Melons, de Courle, de Cocombre, de Citrulle , de chacun deux drachmes: de Camfre, demie scrupule: de Sirop violat , ou d'e Iulep violat, autant qu'il en sera besoin.

Auiourd'huy on forme cest electuaire avec sucre , dissous en eau commune , ou en eau Rose.

En l'electuaire appellé Diarisis simple , selon Mesue , entre de racine de flambe ou Glayeul, demie once: de sucre Candi, de l'electuaire Diatragant froid, de chacun deux drachmes.

Pour faire cest electuaire, on fait dissoudre d'autre sucre en eau Rose, avec lequel on incorpore & assemble les choses susdites : or si pour vne liure de sucre ( dans laquelle entre vne once de poudre ) lors qu'il commence à refroidir on y met vn blanc d'œuf, ou plustost deux onces de suc de Limons, & qu'on les demeine & remue longuement ensemble, tous ces deux electuaires en seront beaucoup plus blancs.

La composition qu'on appelle manus Christi perlata , se fait d'vne once de sucre, dissoute en eau Rose, & d'vne drachme de poudre de perl bien fort delice.

Quelle est la cause pourquoy nous formons quelquefois noz medicamens en pilules, il a esté discouru assez à plein par nous, sur le commencement de la sixieme section de Mesues: pour le present il nous faut enseigner ce qui appartient à la façon de former les pilules, ou plustost les masses ou magdaleons. Or comme les electuaires ont besoin de quelque humeur, à fin de les incorporer, principalement les electuaires mols, pareillement les pilules & trochisques: cest humeur donc avec lequel on incorpore les pilules, est le plus souuent du miel escumé, ou du miel rosat, ou du sirop rosat, ou quelque autre semblable, quelquefois aussi la mucilage de la gomme Diagrégant, de sorte q̃ telle humeur doit tousiours estre gluant & visqueux, à fin que les poudres puissent mieux estre reduites comme en paste, & qu'estant meslees & assemblees elles tiennēt mieux, à fin aussi que la vertu des simples ne s'esuauouisse pas si soudain, ce qui aduient si seient estoit creuassée pour estre trop  
 mais qu'ils se puissent mieux fermenter

menter estans bien vuis & ferrez: & voila pourquoy es compositions des masses de pilules, que Mesues & Nicolas ordonnent estre incorporees avec eau, ou avec quelque suc, nous les reduisons en masse avec miel, d'as lequel nous auons fait premierement cuire ce suc, iusques à ce qu'il soit consumé. Car quand elles sont incorporees avec suc, elles ne se tiennent point bien liees, mais s'esmient aisement, comme feroit du pain d'Orge, ou de pain de son, elles se seichent aussi bien tost, & si se chancissent & moisissent, qui est vn manifeste signe, voire vn commencement de corruption: & croy que pour ceste raison Nicolas ordonne, en la composition des pilules sine quibus, qui sont incorporees avec suc de Fenoiil, qu'en formant les masses, on ait les mains ointes d'huile rosat, ou d'huile commun: nous auons aussi de coustume d'en graisser d'huile, la peau avec laquelle nous enuelopons les masses de pilules.

Toutesfois si on veut faire des pilules, non pas pour garder, mais pour en vser incontinent, on les pourra incorporer & mettre en masse avec du suc, ce que semblent demonstrier plusieurs

crinains, quand ils commandent de former les pilules de la grosseur d'un pois ou d'un Ers, ou d'un grain de poyure. Il aduiët bien aussi que le suc rend la matiere emplastique & gluante, à sçauoir quand on dissout dedans quelque chose emplastique, comme l'Aloës, la Scammonée, le Sagapenum, l'Ammoniac, la gomme Arabique, & la gomme Diagragant, & lors il sera fort propre à incorporer les masses.

Il faut aussi qu'en la composition des pilules toutes choses soyent pilees plus grossierement qu'és electuaires, hors mis qu'en l'un & l'autre, il faut que les pierres precieuses, & les autres choses semblables, soyent pilees bien fort delié, comme aussi la Coloquinte, de peur qu'elle n'vlcere les parties par ou elle passera.

Quant aux Larmes, liqueurs, gommes, ou Resines, si elles sont encores fresches & molles, on les peut piler & mettre en poudre, faisant seulement chauffer le mortier & le pilon: ou bien on les peut dissoudre en quelque humeur propre, pour incorporer & assembler le reste. Des sucs freschement tirez a esté parlé, mais des sucs seiches

chez comme Refinez, il en est de mef-  
me que des Larmes : Il est bié vray que  
bien fouuent, on prend les Larmes des-  
quelles il a esté parlé, & fi elles font pu-  
res & nettes, on les pestrit en vn mor-  
tier chaud, avec vn pilon chaud, met-  
tant par dessus quelque peu d'humeur,  
& par ce moyen elles font rendues pro-  
pres à incorporer le reste des poudres,  
& c'est ainsi qu'on fait és pilules feti-  
des, de Sagapeno, & semblables : mais si  
ces larmes sont pleines d'ordures, on  
les dissout en l'humeur qui est ordon-  
né, & les coule-on, puis on les fait cuire  
iusques à ce que l'humeur soit consu-  
mé, & lors on y adioust les poudres, &  
les mesle-on. Le Magdaleon, ou paste,  
ou masse, estant faite, on la fait seicher,  
autant que besoin fait, auât quel'enue-  
lopper, & l'enveloppe-on lors avec  
peau blâche, plustost qu'avec peau rou-  
ge, à fin que la masse ne tire point la fa-  
culté de la teinture, ou bien on l'enue-  
loppe avec du parchemin : mais soit  
l'un, soit l'autre, il les faut premiere-  
ment oindre & tremper avec huile Ro-  
sat, ou avec huile commun, à fin que la  
masse se garde longuement molle, &  
aussi pour garder que la vertu n'en se

nouisse & perde, les pores & petis trous estans bouschez par le moyen de l'huile : non pas tellement toutesfois que cela puisse empescher, que l'humidité superflue, si point y en a, ne se puisse digerer & resoudre.

Dauantage il ne faut point mettre les pilules en vſage, s'il est possible, que elles ne soyent bien leuees & fermentees, qu'on appelle, non pas toutesfois tellement vieilles, qu'elles n'ayent plus de suc ny de force & vertu : ny tellement molles aussi, qu'elles se puissent fondre dans la bouche, mais il les faut faire de moyenne cōsistence, grosses ou petites, peu en nombre ou beaucoup, selon que le naturel de celuy qui les doit prendre sera diuers, ou selon quelque autre intention que le Medecin pourra auoir.

Que si celuy qui les doit aualler les aualle difficilement, il les faudra faire tant plus petites, puis les couvrir de quelque sirop dans vne cuilliere, & aualler tout ensemble. D'autres à fin de ne sentir le mauuais goust, les amolissent vn bien peu avec du sirop, puis les couvrent de sucre: d'autres les couurent d'or en feuille, & font beaucoup mieux  
que

que non pas ceux qui les enuellopent  
 de l'escorce d'un pruneau, ou de Raisin,  
 ou de quelque Cerat liquide : mais ie  
 ne trouue pas mauuais de les couvrir  
 de la chair des pruneaux, ou d'une pom  
 me cuite, non plus que du pain de la  
 Messe trempé en du vin. On peut aussi  
 laver la bouche deuant & apres, avec  
 du vin, ou d'eau, ou quelque autre cho  
 se, pour oster le goust & la facheuse sa  
 ueur qui pourroit demeurer en la bou  
 che : & s'il y en estoit demeuré quelque  
 chose de reste, on le pourra rascler ou  
 torcher : on peut bien aussi au lieu du  
 vin prendre un morceau de pomme,  
 & le macher, & aualler le ius, ou  
 quelque autre chose de bon goust, prin  
 cipalement qui soit adstringent. Il y en  
 a semblablement qui font emplir la  
 bouche de vin, ou de quelque autre  
 liqueur, puis prennent une des pilu  
 les, & la mettent aussi dans la bouche,  
 & auallent tout ensemble, & reiterent  
 cela iusque à ce qu'ils ayent auallé tou  
 tes les pilules, & cela fait que les pilu  
 les font plustost leur operation, mais  
 aussi elle ne dure pas tant : cela empes  
 che aussi que les pilules ne nuisent pas  
 à l'estomach, par leur atouchement,  
 mesme



mesmement si elles sont dures: il profite aussi à ceux qui ont l'estomac froid: comme à ceux qui ont l'estomac ou le foye chaud, il est bon de les leur faire prendre avec de ptisanne, ou quelque autre liqueur. Il est bon aussi de lier les mains à ceux qui veulent avaler des pilules, & les leur tremper avec vinaigre, ou eau froide, ou oxycrat, & les nasaux aussi: & ces observations peuvent mesmes estre practiquees en ceux qui ayās prins quelque autre forme de médicament, ont crainte qu'ils ne le vomissent. Outre cecy Mesues au premier liure a mis plusieurs autres doctes aduertissemens.

Les pilules qu'on appelle Aurees, selon Nicolas, sont composees d'Aloës, de Scammonee cuitte, de chacun cinq drachmes: de Roses, de semence d'Ache, de chacun deux drachmes & demie: d'Anis, de Fenail, de Mastic, de chacun vne drachme & demie: de Saffran, de mouëlle de Coloquinte, de chacun vne drachme: avec de l'eau de l'infusion de gomme Diagrégant, formez vostre masse.

On prend vne drachme de Gomme Diagrégant, & la fait on tremper en deux onces d'eau, iusques à ce que la gomme soit toute dissoute, sur les cendres chaudes, puis on la passe par vn linge

linge cler: de ce mucilage on incorpore les poudres, la mettant petit à petit: toutesfois au iourd'huy on n'y met point de Diagrágant, mais on les met en masse, avec du sirop ou du miel Rosat, & à mō aduis que ce n'est point mal à propos.

Il faut piler l'Aloës, la Scammonée, la Coloquinte, & le Mastic chacun à part en la maniere que j'ay desia dit si souvent: mais on peut piler ensemble les semences, les Roses, & le Saffran, vray est qu'il faut premierement tailler menu les Roses & le Saffiā. C'est ici la moitié de la composition de Nicolas Alexandrin, lequel n'y met point de Mastic.

En la composition des pilules cochees, selon Rasis & Mesues, entre de la poudre de Hierapicta de Galien, dix drachmes: de Coloquinte trois drachmes & vn scrupule: de Scammonée, deux drachmes & demie: de Turbith, de Stechas, de chacun cinq drachmes.

Il faut incorporer & mettre en masse ces pilules avec miel Rosat: il faut aussi piler & passer le Turbit & la Stechas ensemble, car encores que la Stechas soit comme vne fleur, neantmoins elle est fort malaisée à piler, sinon qu'on la face premierement seicher entre deux

papiers, mais faisant ainssi elle perd aisement la vertu & faculté.

*Ce sont les pilules* D'autres selon Nicolas, cōposent les pilules cochees de Galie, ainssi que s'en d'Aleës de finit, ils prenēt d'Aloës, d'Aluine, de *Col. lib. 1.* loquinte, de Scammonee, de chacun *comp. phar.* vne partie: de mastie, la moitié d'une *part.* parties: puis reduisent cela en masse, avec suc de Fenoil, ou d'Aluine, ou de morelle.

Nicolas Alexandrin ne fait point de mēcion de Galien, & les appelle pilules Diacolocyntidos, ausquelles il met d'Aloës & de Scammonee cuitte, de chacū quatre drachmes: de Coloquinte, & de Mastie, de chacun deux drachmes: de Bdellium vne drachme, avec du suc de Aluine: formez vos pilules de la grosseur d'un Ers.

Les pilules, qui sont apellees en Nicolas sine quibus esse nolo, sont composees d'Aloes laué, quatorze drachmes: de Myrabolans Citrins, Cepules, beleriques, embliques, & indes, de Rhubarbe, de Mastie, d'Aluine, de Roses, de Violettes, de Sené, d'Agarie, de Cuscuta, de chacun vne drachme: il faut donc faire tremper six drachmes & demie de Scammonee bien pilee, & puluerisee, en suc de Fenoil, la quantité duquel doit estre telle qu'elle soit suffisante pour faire passer la Scammonee par un linge, & pour incorporer

incorporer le reste des poudres pour faire la masse, laquelle il faut faire oignant premièrement les mains avec huile violat, ou huile commun, faisant au reste selon l'art, comme il a esté dit cy deuant.

Il faut piler le Sené, les Myrabolans, l'Aluine, les Reses, les Violettes, & la cuscuta ensemble: le Rhabarbe, l'Aloës, la Scammonee, chacun à part: or encores qu'õ les puisse bien reduire en masse, avec suc de Fenoil purifié par vne petite coction, & le laissant rasseoir, dás lequel on aura dissous & destrempé la Scammonee: toutesfois le plus souuent on mesle la Scammonee pilee à part soy & passée, avec le reste des poudres, puis on incorpore & assemble le tout estant meslé, avec miel, dans lequel on aura fait cuire le suc de Fenoil, iusques à ce que le suc soit tout consumé.

Les pilules de Rhabarbe, de Mesues, sont composées de Rhabarbe, trois drachmes: de suc de Regalisse, de suc d'Aluine, de Mastic, de chacun vne drachme: de Myrabolans citrins, deux drachmes & demie: de semence d'Ache, de Fenoil, de chacun demie drachme: de trochisques diarhodon, trois drachmes & demie: de hiera picra, dix drachmes; & faut former la masse avec suc de Fenoil.

Il faut faire cuire ce suc de Fenoil en

du miel, iusques à ce que le miel soit cōsumé, & avec ce miel former la masse : il faut aussi piler les Myrabolans & les sucs rompus en petis morceaux, tout ensemble ; mais le Rhabarbe, le Mastic, & les Trochisques, il les faut piler chacun à part.

Les pilules Aromatiques de Mesues, sont cōposees de Canelle, de Cubebes, de bois d'Aloes, de Calamus aromatique, de Macis, de Noix mulcate, de Cardamomum, de Gyroflès, de Cabaret, de Mastic, de fleur de ionc, de Spica, de Carpobalsamum, de chacun vne once : d'Aluine sec, de Roses, de chacun cinq drachmes : il faut donc piler ces choses grossierement, & les faire cuire en douze liures d'eau, iusques à ce qu'il n'en demeure qu'un tiers, les frotter, couler, & exprimer : en deux liures de ceste expression, il faut faire tremper vne liure d'Aloes (laquelle on aura premierement bien lauée & souuent, en eau de pluye & bien seichée) il la faut cribler & seicher : avec cest Aloes il faut mesler de Myrre, de Mastic, de chacun cinq drachmes : de Saffran, trois drachmes : faites tremper le tout, en ce qui est de reste de l'expressiō, & le remués tresbien, puis les faites seicher.

On fait premierement seicher l'Aloës à l'ombre, puis au Soleil, comme dit Mesues au chapitre de Aloë. Or il faudra concasser toutes ces choses ensemble, ou biē les choses dures & espesses à part, & les choses molles & delices

liees aussi à part: puis faut mettre le tout dās de l'eau, lors qu'elles sont seulement rompues grossierement, à fin que l'eau penetre plus soudain, & qu'elle attire mieux leur faculté. on les fait donc tremper, & les fait on cuire à petit feu, en huit liures d'eau, iusques à la consommation de la moitié, car si on y met plus grande quantité d'eau, il les faudra faire cuire plus longuement, & par ce moyen ces choses aromatiques diminuent ou mesme perdent du tout leur faculté & vertu: Des quatre liures qui restēt, il en faut faire boire la moitié à l'Aloës, apres toutesfois l'auoir liyé en eau de fontaine, & seiché: l'autre moitié il la faudra aussi faire boire à l'Aloës, meslé avec la myrrhe, mise en poudre tresdeliée, & le mastic & Saffrá, & faudra mettre ceste partie de decoction, ou tout à vn coup, ou peu à peu, & auant que elle soit seiche il faudra former la masse: il sera bon de la faire plustost en esté, qu'en autre saison de l'année, à fin que l'Aloës soit plustost sec.

Pour faire les pilules qu'on appelle lucis maiores, selon Mesues il faut prendre de Roses, de Violettes, d'Aluine, de Turbith, de Coloquinte,

de Cubebes, de Calamus aromatique, de Noix muscate, de Spica, d'Epithyme, de Carpobalsamum, de bois de baume, de Squinantos, de mastic, de Cabaret, de Gyrofiles, de Cannelle, de Cinamome, de Saffran, de semences de Ruë, d'Anis, d'Ache, de Fenoil, de chacun deux drachmes: des cinq especes de Myrabolans, de Rhabarbe, de chacun quatre drachmes: d'Agaric, de Sené, de chacun cinq drachmes: d'Eufraize, asçauoir ses summitez seichees avec ses fleurs, sept drachmes: de bon Aloes, autant que de tout le reste: formez vostre masse avec suc de Fenoil.

La Coloquinte, l'Agaric, l'Aloës, & le Mastic, veulēt estre pilez chacū à part, & tout le reste ensemble, puis mesler le tout, & les incorporer & mettre en masse avec du miel, dās lequel on aura fait cuire le suc de Fenoil, tant que le suc soit consumé, ou bien iusques à ce que le miel soit fort gluant & visqueux.

Les pilules apellees fetidæ maiores de Mesues, sont composees de Sagapenum, de Ammoniac, d'Opopanax, de Bdellium, de Coloquinte, de Ruë sauuage (au lieu de laquelle on peut mettre de celle des iardins seiche) d'Aloes, d'Epithyme, de chacun cinq drachmes: d'Hermodactes, d'Esula, de chacun deux drachmes: de Scammonée, trois drachmes: de Cinamome, de Spica, de Saffran, de Castoreum, de chacun vne drachme: de Turbith, quatre drachmes: de Gingembre, vne drachme & demie: d'Euforbe, les deux parties d'vne drachme: il faut dissoudre

les larmes en suc de Pourreau, & apres les auoir passees, avec icelles incorporer le tout.

Les quatre premieres liqueurs estã dissoutes en ius de pourreau, & coulees, les faut faire cuire iusques à ce q̃ vne bonne partie du suc soit consumé, puis y mesler tout le reste, & assembler le tout ensemble, toutesfois la Scammo-  
nee, & l'Euforbe, encores que ce soyẽt liqueurs, veulent neantmoins estre pil-  
lees à part, sinon qu'elles fussent recen-  
tes & molles, car estã telles on les pour-  
roit bien dissoudre.

Es pilules de Hermodactillis maiores entre ce qui s'ensuit, asçauoir d'Hermodactes, d'A-  
loes, de Turbith, de Coloquinte, de Myrabo-  
lans iaunes, de Bdellium mol, de Sagapenum,  
de chacun six drachmes: d'Opopanax, d'Eufor-  
be, de Sarcocolla, de Castoreum, de Ruë sauua-  
ge, d'Ache, de chacun trois drachmes: de Saffrã,  
deux drachmes & demie: & faut incorporer le  
tout avec suc de chous.

Après auoir mis toutes les choses  
qui entrent en ces pilules, en poudre,  
il les faut incorporer & mettre en mas-  
se, avec du miel, dans lequel on ait fait  
cuire ce suc de chous: car mesme les li-  
queurs qu'y entrent se peuuent mettre  
en poudre, si elles sont en petite quanti-  
té, & biẽ seiches, parmi bõne quantité de  
autres choses seiches: ou biẽ cõme il a



esté dit cy deuant , on pourra faire dissoudre ces liqueurs en ius de chous chaud, les couler , & les faire cuire de rechef, & avec icelles incorporer tout le reste.

Les pilules appellees Arthriticæ de Nicolas, sont composees d'Hermodactes , de Turbith, d'Agaric, de chacun quatre drachmes, de Cassé en bois ( qui est nostre Canelle commune ) de Spica, de Gyrosles, de bois de baume , de fruiët de baume ou Carpobalsamum, de Gingembre, de Maitic, de Fenoil, de semence de l'herbe aux perles, de semence d'Asperges, de Brusç, de Roses, de sel gemmé, de chacun demie drachme: d'Aloes autant que de tout le reste : & les faut mettre en masse avec ius de Fenoil.

On fait cuire ce suc en du miel, iusques à tât qu'il soit consumé, afin que le miel ayât attiré la vertu du suc, serue pour mettre le reste en masse. Nicolas Alexandrin dit que les pilules de la semence de Cocombre sauvage, & les Alexandrines, seruent és maladies des iointures, & és gourtes, mais il ne fait point de mention de cette description icy.

Les pilules de fumeterre d'Auicena, sont composées de Myrabolans citrins, de cepules, de Noirs, & de Scâmonee, de chacun cinq drachmes: d'Aloes, sept drachmes: il faut abreuver le tout avec ius de fumeterre, trois fois, & les faire secher autant de fois: & finalement en faire vne masse.

Il les faut bien abreuver de suc de fumeter

meterre, mais non pas les incorporer & mettre en masse, ains avec du miel d'as lequel on aura fait bouillir ce suc: elles sont plus aisees à seicher au soleil, que non pas les aromatiques, à cause de la siccité des Myrabolans.

En la composition des pilules Affaiaret d'Auicena, entre de la poudre de Hiera picra, vne once: de Mastic, de Myrabolans citrins, de chacun demie once: d'Aloes, deux onces, & faut former la masse avec sirop de Stechas.

Ce sirop, comme aussi tous autres, est fort propre à mettre les poudres en masse, & aussi pour les garder de moisir ou corrompre, à cause de sa viscosité.

Les pilules d'Agaric de Mesues, se font d'Agaric, trois drachmes: de racine de Glayeul, de Marube, de Myrrhe, de chacun vne drachme: de Turbith, cinq drachmes: de hiera picra, quatre drachmes: de Coloquinte, de Sarcocolla, de chacun deux drachmes: & les faut mettre en masse avec vin cuit.

Le vin cuit iusques à la moitié, ou iusques au tiers, que nous appellōs sapas, est propre pour incorporer ces pilules, à cause qu'il est espez & gluant, & aussi pour les garder de corrompre & s'esfuerter.

Les pilules de Hiera sont composees d'une once de la poudre de hiera picra de Galien, incorporee & reduitte en masse, avec Miel Rosat.

On peut semblablement faire des pilules, des autres hieres & Antidotes, mais il faut que la quantité du miel soit d'autant plus petite és pilules qu'ez electuaires, que les pilules sont plus seiches que les electuaires.

Les pilules mastichines du conciliateur, sont composées de mastic, quatre drachmes : d'Aloes, dix drachmes : & d'Agaric, trois drachmes : & faut faire la masse avec suc d'Armoyse.

Il faut piler le mastic à part avec vn peu d'eau douce si on veut, puis faut former la masse avec miel dans lequel on aura fait cuire du suc d'Armoyse.

Es pilules stomachiques de Mesues entre d'Aloes, six drachmes : de Mastic, de Roses, de chacun deux drachmes : & les faut incorporer avec sirop rosat.

Les pilules de Rufus ou communes, se font de Saffran, de Myrrhe, de chacun vne once. d'Aloes deux onces : lesquelles il faut mettre en masse avec vin aromatique.

En esté & en temps de peste il faut lauer l'Aloes.

Les pilules apellees bechicz de Mesues, sont composées de suc de Regalisse, de sucre, de chacun six aureos : d'Amidon, de gôme diagrafant, d'amandes douces, de chacun quatre aureos : & les faut mettre en masse avec la mucilage de la semence de l'herbe aux puces, ou de la semence de Coings.

On les peut reduire en masse avec la mucilage de gomme diagragant, comme les suyantes.

Les pilules blanches sont faites d'une liure de sucre, dissoute en une once de mucilage de gomme diagragant, & demeslee longuement.

*La septiesme section est des  
Trochisques.*

**Q**ue c'est que Trochisque, & pour quoy il a prins ce nom & plusieurs autres, nous en avons discoursé assez amplement sur la septiesme section de Mesues. Mais des trochisques, il y en a les uns que nous ne pouvons pas composer par deça, comme sont les trochisques de viperes : les autres ne sont plus en usage, tellement qu'on en fait bien peu des boutiques. Quant à la façon & maniere de les composer, d'autant qu'elle n'est pas beaucoup differente à celle des pilules (car en tous les deux on assemble les poudres avec quelque humeur) aussi ne me semble il pas besoin de m'y arrester beaucoup. Je deduiray donc en bref ceux qui sont encores iournellement en usage : q̄ si quelcū a affaire des autres, il les trouuera en Mesues, & en Nicolas Alexandrin.

Les Trochisques de Gallia moscata de Mesues  
sont

sont cōposez de bois d'Aloes cru, cinq parties: d'Ambre trois parties: de Musc, vne partie: de la mucilage de gomme Draganti, extraicte en eau Rose, autant qu'il en faudra pour incorporer toutes ces choses: il faut donc en former des trochisques de la grosseur d'une fucille de meurte, les marquer, & les serrer en vn pot de verre: d'autres font dissoudre l'Ambre en huile de Ben (qu'on appelle autrement *Oleum Balaninum* ou *Mustelinum*) en vn pot de verre, & avec cest huile ils incorporent le reste.

Mais les trochisques de *gallia moscata*, selon Nicolas Alexandrin, sont faits de Mastic deux onces: de gomme, vne once: de Camfre, vn scrupule: ces choses estans pilees bien deslié, il les faut reduire en trochisques avec eau Rose, les faire seicher à l'ombre, puis les piler de rechef bien deslié: apres il faut faire cuire ceste poudre en huile de Iasemin, qu'on appelle autrement *sambaceum* ou *sambacinum*, & y adiouster de Cannelle, de Gyroffes, de Noix muscate, de chacun demie once, & en former les trochisques, lesquels faudra oindre avec Musc dissous en eau Rose.

C'est mal entendu à Nicolas de mettre d'huile *sambucin* quatre Onces: & aussi de ce qu'il ordonne de le faire cuire iusqu'à la moitié. Auourd'huy on faict dissoudre le mastic en poudre, en vne drachme d'huile, sur les cendres chaudes, puis on y adioust la gôme en poudre, & le Camfre, y mettant vn bien peu d'eau Rose.

En la composition de Aipta moschata, selō Nicolas Alexādrin, entre de ladanum bien pur & net, trois onces: de Styrax calamite, vne once & demie: de Styrax rouge, vne once: de bois d'Aloes, deux drachmes: d'Ambrevne drachme: de Camfre, vn scrupule & demy: de Musc, demy scrupule: d'eau Rose, autant que besoin sera.

Il faut piler le Ladanum à part, & le piler grossierement: les deux styrax, il les faut piler ensemble vn bien peu, & les passer par vn crible bien cler, à fin de les nettier: puis il faut mettre tous les trois en vn plat, à l'ardeur du soleil, ou bien sans cella en double vaisseau, à fin de les faire fondre, plustost que non pas par la chaleur violente d'vn mortier & d'vn pilon: & lors qu'ils seront fondus, il les faut bien & longuement demener & piler, en vn mortier, faisant bien premierement seicher & le mortier & le pilon, au soleil ou au feu, y adioustāt petit à petit le bois d'Aloës en poudre: cela faict il faut piler en vn autre mortier quelque nombre d'amandes bien huileuses, & quand le mortier & le pilō seront bien enhuilez de cest huile, il faut ietter là les amandes, & y piler premieremēt l'Ambre, secondemēt le cāfre, & le musc, les arroufant avec vn peu d'eau rose, & mesler  
cecy

cecy avec le reste, & former les trochisques: toute la façon de faire ceste composition est presque prinse & tirée du même Nicolas.

Les trochisques d'Agaric, comme Mesues les décrit, sont composés d'Agaric choisi & mis en poudre, duquel on forme des trochisques, avec du vin de l'infusion de Gingembre.

Les trochisques de spodio, sont faits de spodium, quatre drachmes: de Rosés rouges, sept drachmes: de semence de pourpier, de suc de Regalisse, de chacun deux drachmes: & faut incorporer tout cela avec mucilage de la semence de l'herbe aux puces, & en former des trochisques de la pesanteur d'une drachme.

Le Spodium des Arabes qui entre en ceste composition, doit estre le vray, & non pas de l'yuoire brûlé: il se faut bien garder aussi de mettre le spodiū des Grecs, qui est vne chose qu'on trouue es fourneaux, fort semblable à la Pópholix ou Tutie, de laquelle il ne faut iamais vser es medicamens qu'on prend par la bouche, mais en ceux seulement qu'on applique en dehors.

Pour faire les trochisques de terra Sigillata, comme Mesues les a décrits, il faut prendre le sang de dragon, de gomme arabique rostie, de spodium, de Ramich, de Rosés, de semence de Rosés, d'Amidon rosti, d'Acacia, d'hypocistis, de fleurs de grenadier, de boli armeni, de terre scellée (qu'on dit sigillum lemnium) de Coral,  
de

de perles, d'Ambre à patinostres, de gôme diagragant, de Pauot noir, de chacun trois drachmes & demie: de semence de pourpier roly, de corne de Cerf bruslee, d'Encens, de noix de Ciprez, de chacun deux drachmes: & faut former les trochisques avec eau de Plantain.

Les trochisques de sucino ( qui est l'ambre à patinostres ) selon que Mesues les décrit sont composez d'Ambre à patinostres, six aureos: de Corne de Cerf bruslee, de gomme arabique rostie, de Coral bruslé, de gôme diagragant, d'Acacia, d'hypocistis, de fleur de grenadier, de mastic de lacca lauee, de Pauot noir rosty, de chacun deux aureos: d'Encens, de Safran, d'Opium, de chacun vn aureum & demy : & faut former les trochisques avec de mucilage de la semence de l'herbe aux puces.

*La huitiesme section est des poudres.*

Quand nous auons cōmencé à traiter des antidotes ou electuaires, nous auōs touché cōme en passant, quelque mot des poudres, quād nous auōs dit q̄ les poudres, de quoy on fait les antidotes, doyuēt estre gardees en boittes de verre: & que quelquefois, mesmement quand on s'en veut seruir, on les reduit en electuaires solides: mesmes bien souuent, des le commencement on les 'incorpore avec miel, ou quelque autre chose, & les garde on ainsi, les laissant cuire à leur propre



propre chaleur & naturelle, qu'on appelle communement fermenter.

Quant aux autres poudres, si quelcū en est curieux, il ne faut que voir Mesues en la huitiesme sectiō: i'ay delibere de parler seulement des poudres qui seruent es viandes & sausses.

La poudre qu'on dit de menues espices, est composee de Gingembre blanc, vne liure: de bon Poyure, quatre onces: de noix muscare, deux onces: de Gyrofiles de graine de paradis, de chacun vne once: de bonne Canelle, demie once. de tout cela il faut faire vne poudre.

La poudre qu'on appelle poudre blanche, est faite de Gingembre blanc & bien net, vne liure, lequel il faut mettre en poudre.

Mais la poudre qu'on appelle fine, qui est aussi la meilleur, se fait de Gingembre blanc, demie liure: de graine de paradis, deux onces. ces choses estans pilees il faut mesler parmy de Saffran deux drachmes, & les arrouser peu à peu de vin-aigre, afin qu'elle prenne la couleur du Saffran, & faut piler & demesler le tout ensemble longuement.

Pour faire la poudre de Duc qu'on appelle, il ne faut sinon mesler pour chacune liure de sucre, vne once de bonne Canelle.

*La neuuesme section est  
des huiles.*

**N**OUS auōs mōstré en ceq̃ no' auōs fait sur Mesues, qu'il y a en tout qua

quatre genres d'huiles : le premier est celuy qu'on tire des Oliues, soyét meures ou non, que nous appelons huile simplement, & le vulgaire l'appelle huile commun. Le second est celuy qu'on tire par expression des semences huileuses : le troisieme est celuy qu'on fait par la force du feu, soit en montant ou descédât. Le quatrieme est celuy qu'on fait avec huile, mais on fait cuire dedans quelques parties des plantes ou des animaux.

Quant au premier genre, il est assez connu de chacun, aussi le laisse-ie tout à escient : & m'arresteray à traicter des autres trois genres.

L'huile donc d'Amandes douces se *Secōd gen*  
 fait d'Amandes sans peler, pilees en vn *re a' m' ues.*  
 mortier de pierre, reduites en pains, les  
 quels on fait chauffer à la vapeur d'eau  
 chaude, la ou on les pestrit longuemēt  
 avec les mains : & quand ils sont assez  
 chauds, on les enuelope en vn cabas  
 de genest, ou en vn sac de caneuar que  
 on fait chauffer, puis on les met à la  
 presse chaude, & par ce moyen on en ti  
 re vn huile fort cler & fort doux. On le  
 peut bien aussi faire autrement, comme  
 nous l'auons monstré sur Mesues,

Par ceste mesme façon on fait l'huile d'Amandes ameres, de Pistaches, de Pignolats, de Noisettes, de Noix d'Inde, de Been, de noyaux de Pesches, de noyaux de Cerises, de semence de Courge, de Cocombre, de Melons, de Palma Christi, de Staphis agria ou herbe aux poux, de Carthame, de Chanure, de Lin, de Pavot, de Jusquiame, & autres semences huileuses : lesquels huiles peuuent aussi estre extraicts à la façon du troisieme genre d'huiles.

*Mesmes.*

L'huile laurin se fait des fruiçts du laurier meurs & freschement cueillis, lesquels on pile en vn mortier, & les fait-on cuire en eau, puis on les pressure au pressoir.

On peut tirer d'huile des fruiçts freschemēt cueillis de Murte, de Geneure, de Terebinthus, de Lentisque, tout en la mesme façon que l'huile Laurin.

Vray est que l'huile Laurin composé est plus en vſage que non pas ce simple duquel il sera tantost parlé au quatrieme genre. Mais l'huile Laurin simple, nous est apporté de Languedoc & Prouence, ou il y a grande quantité de ces

*Troisieme  
genre d'huiles.*

fruiçts de Laurier.  
L'huile d'œuf se fait de jaunes d'œufs, qu'on à saicts endurer & forcé de bouillir, au nombre de

de trente ou enuiron, & apres qu'ils sont bien durs on les esmie entre les mains, dâs vne poisse à frire plombée, & les fait-on la fricasser à feu moyen, les remuant rousiours avec vne cuilliere, iusques à ce qu'ils deuiennent rouges, & que *Mesues.* on en voye sortir & couler l'huile.

Quand nous auôs traité de cest hui le sur Mesues, nous auôs enseigné quel ques autres moyens de le faire: mesme aucuns apres qu'ils sont fricassez les mettent en vn sac, & les pressent au pres- soir.

L'huile de Geneure se fait des esciats & rabo- *Mesues.* tures de bois de Geneure, en clos en vn pot soli- de, autour duquel on fait du feu cler, & l'huile descéd en vn autre pot qu'on à agencé dessus.

Quant au reste qui appartient à la composition de cest huile, & autres qui se font en ceste mesme façõ, on le pour- ra voir en Mesues: semblablement la façõ de faire l'huile appellé des Philo- sophes, l'huile de tartre, & plusieurs au- tres semblables, desquels ie n'ay pas voulu faire plus grand discours, à cau- se qu'il en à esté parlé là assez ample- ment, avec ce qu'ils ne sont pas aujour- d'huy en grand vsage.

Le quatrieme genre d'huiles se fait *Quatric-* des parties de quelques plantes & ani- *me genre* maux, lesquels apres auoir laissé leur *d'huiles.*

vertu & faculté en l'huile, ou les faisant tremper seulement, ou les faisant bouillir, on les coule & les presse: & si dans l'huile demeure quelque humeur, on le fait cōsumer le faisant bouillir. Mesmes les huiles qu'on fait avec quelque suc liquide, ou bien avec quelque suc sec ou autre liqueur, qu'on fait dissoudre en quelque humeur, comme en du vin, il les faut faire cuire iusques à ce que l'humeur soit consumé; car autrement l'humeur superflu qu'y resteroit, feroit cause de faire pourrir ou moisir l'huile: pour cognoistre quand l'humeur sera tout consumé, il ne faut que prendre vn peu de cest huile avec la spatule, & le ietter dans le feu, car s'il brusle c'est signe qu'il est pur, mais s'il petille, c'est signe qu'il y à encores d'humeur de reste: dauantage pendant qu'il bouillit dans le chauderon avec l'humeur, il petille, & fait des bouteilles; mais quand le suc est tout consumé, il se tient coy; mesme si on en met vne goutte sur la main, on verra l'humeur au dessous, & l'huile nager par dessus.

Les huiles qu'on fait avec des fleurs, on les fait cuire pour la pluspart à la chaleur du Soleil en Esté, ou bien à petite

tit feu, ou à tous les deux.

Les huiles qui se font des animaux, se font de façon qu'on les met tous vivans en l'huile, à fin de les y faire mourir, comme les Scorpions, les Serpens, les Grenouilles, les Formis, & les Re-nards.

L'huile Rosat, selon Nicolas, se fait en ceste sorte : on fait cuire vne liure & demie de Roses pilées bien longuement, en deux liures d'huile lauée, en double vaisseau, & puis on les presse en vn linge blanc, au pressoir.

Auiourd'huy pour faire l'huile rosat, on prend les roses toutes fresches, mesme sans oster le blâc qui est au dessous, qu'on appelle ongles, & les fait-on tréper quelques iours, ou mesme quelques mois, en huile lauée ou huile fait d'Oliues verdes, qu'on appelle Omphacin, dans vn pot de verre ou de Caillou, les laissant au Soleil : & apres en hyuer quand on s'en veut servir on y adiouste quelque peu de suc de Roses ou de vin, & le fait-on cuire en double vaisseau, de peur qu'il ne brusle, & que par ce moyen il acquiere mauuaise odeur, estant ainsi fait on le serre pour garder : on fait de mesme façon l'huile avec fleurs de violettes : & avec fleurs de

Camomille on fait l'huile Camomelin, que Mesues commande de faire en huile doux, & de le faire cuire en double vaisseau: on en peut faire aussi de mesme avec fleurs de Melilot, d'Aneth, de Lis, de Glayeul, de Violier iaune, de blanc d'eau, ou lis d'Estan: mais il faut estre aduertis que quand on veut faire l'huile de fleurs de lis, il se faut souuenir d'oster les petits filamés iaunes qui sont au dedans.

L'huile de Coings, que les Latins appellient Melinum, ou oleum Cytoniorum, se fait de Coings aigres & bruscs pilez en vne suffisante quantité d'huile omphacin, lesquels on laisse au Soleil l'espace de quinze iours, & apres on les fait cuire avec ius de coings, en double vaisseau, l'espace d'environ quatre heures: cela estant fait on change & la chair de Coings & le suc, & les met-on derechef au Soleil: & puis on les fait cuire, comme au parauant: ce qu'il faut reiterer deux ou trois fois.

Aucuns ostent l'escorce & la semence aux Coings qu'ils veulent employer à faire l'huile, mais il me semble qu'il n'en est ia besoin, sinon que les Coings soyent sales ou à demy pourris qu'il faille

faille nettier.

Pour faire l'huile masticin, on prend d'huile *Mesuet.*  
le rosat douze onces: de Mastic, trois onces: de  
bon vin, huit onces: puis on fait cuire tout ce-  
la ensemble, iusques à ce que le vin soit con-  
sumé.

On fait aujourdhuy cest huile avec  
d'huile commun, au lieu qu'il le fau-  
droit faire avec huile rosat, ou huile  
omphacin, ou pour le moins avec hui-  
le laué, & le faire cuire en double vais-  
seau: quand le vin est presque cōsumé,  
on y met petit à petit le Mastic en pou-  
dre, le remuant cōtinuellemēt iusques  
à ce qu'il soit fondu & meslé avec l'hui-  
le: si on le fait cuire plus lōguement il  
perd sa force & vigueur.

L'huile Mirtin est fair de fruiçts de  
Meurte frez demie liure: d'huile om-  
phacin, c'est à dire tiré d'olives verdes,  
ou d'huile laué, vne liure & demie: met-  
tez les ensemble au soleil, ou bien fai-  
tes les cuire avec quatre onces de vin  
blanc, qui soit neātmoins rude & brusc,  
iusques à ce que le vin soit cōsumé. On  
le peut bien aussi faire par expressiō, ou  
bien le faisant cuire en eau, & recueil-  
lant l'huile qui nagera par dessus avec  
vn cuillier.



L'huile Nardin, selon que Mesues l'a décrit, est composé de Spica nardi, trois onces : de vin & d'eau, de chacun deux onces & demie : d'huile de Sisame demie liure : les faisant cuire en double vaisseau à petit feu, l'espace d'environ quatre heures, les remuant souuent.

On les pourra bien aussi faire cuire, iusques à ce que le vin & l'eau seront consumez : vray est qu'il faudra faire tréper la Spica dans l'eau & le vin, quelque temps au parauant. Il se peut bien faire aussi d'huile nardin, selon la description de Nicolas Alexádrin, qui est bien de grande vertu, mais aussi est il plus cher : qui voudra sçauoir comme il le faut faire, il le pourra apprendre de luy-mesme, car il l'enseigne bien au long.

*Mesues.*

Pour faire l'huile Costin il faut prendre de Costus amer, deux onces : de Cannelle, vne once : des summitez de Mar-

*On en peut mettre 8. onces, ou enui-ron.* iolaine, huiët onces : de vin odorant, autant que besoin sera, & faut faire tréper ces choses ensemble, l'espace de deux iours, & avec deux liures d'huile de Sisame ou Iugiolime, les faut faire bouillir sept heures entieres, ou iusques à ce que le vin soit consumé, puis le

le faut pressurer, & le serrer pour garder.

Pour le Costus, on peut prendre le vray, qui n'est autre chose que ce qu'on appelle aujourdhuy Galanga maior: ou bien en son lieu on pourra mettre la racine d'Aunee, ou de silphium, ou quelque autre semblable, plustost que de mettre le Costus vulgaire des boutiques, auquel n'y a aucune qualité appa-  
rante.

L'huile de Rue est fait de feuilles de Rue toutes fresches, lesquelles on laisse tremper en huile tout vn esté, au Soleil, & quand l'esté est passé on le fait cuire, & apres l'auoir pressuré, on le serre pour le garder. Les huiles de Men-  
the & d'Abînthé se font de mesme.

L'huile d'Euforbe se fait tout de mesme que l'huile de Mastic. Car on prend l'Euforbe en poudre, ou bien s'il est encores frez, recent, & mol, en bien petites pieces, & le met on peu à peu dans du vin & de l'huile tous bouillans, puis on les fait cuire iusques à ce que le vin soit consumé, les remuant tousiours.

L'huile de Castoreum selon Nicolas, est composé d'une once de Castoreum, cuite en vne liure d'huile, iusques à ce

que la tierce partie soit consumee, & laisse-on le Castoreum dedans, & le serre-on.

On peut bien aussi cuire cest huile avec vn petit de vin, comme enuiron deux onces, car à dire vray si on le fait cuire tout seul, l'huile se bruslé, & deuient noir, & si le Castoreum perd sa vertu. Mais aussi on le pourra bien faire sans vin, le faisant cuire à la chaleur du soleil, & le remuant souuent.

L'huile de vers de terre est fait de vers de terre bien lauez en vin blanc, puis cuits en huile & vn peu de vin rouge, iusques à ce que le vin soit consumé: ce qu'estant fait on le coule & le pressure-on legerement, puis on le serre pour garder.

Aucuns pilent les vers apres qu'ils sont cuits, & les meslent parmy l'huile, de sorte qu'il ressemble à vn onguent, ce que n'est pas mauuais, ny sans profit.

*La dixieme section est des Onguens.*

**L**Es Onguens lesquels ont ainsi esté appellez à cause qu'on en oinct les parties, sont de plus solide & plus espesse consistence que les huiles, mais aussi ils sont plus liquides que les cerats, comme cela se peut aisement congnoistre par les compositions des onguents  
tant

tant de Galiē que des autres autheurs. La matiere de laquelle on les faiēt, est prinſe des parties des plantes, & de pluſieurs parties des animaux, pareillement des metaliques, & de quelques vns terreſtres : ſi en la compoſition d'i-ceux y entre quelque ſuc freſchement tiré & liquide, on le faiēt conſumer en cuiſant, comme nous auōs enſeigné és huiles : mais ſi ces ſucs qu'y entrent ſont ſecs, il les faut diſſoudre en quelque humeur.

Si auſſi en la compoſition d'un onguent entre quelques herbes, ou il les faudra mettre en poudre, ſi elles ſont ſeiches, & les meſſer avec le reſte, comme on faiēt les metaliques & terreſtres & pluſieurs autres : ou bien on les met en infuſion, & les faiēt on tremper en quelque humeur, comme en du vin, encorès qu'elles ſoyent verdes, puis on les faiēt cuire, & les exprime on bien : apres on faiēt cuire ceſt humeur, ſoit vin ou autre, avec le reſte de la compoſition, iuſques à ce qu'un tel humeur ſoit conſumé.

Quāt aux liqueurs ſeiches, gommeſ, & Reſineſ, ou il les faut piler, à ſçauoir quand elles ſont bien ſeiches : ou bien

les dissoudre avec le pilon chaud, ou bien en quelque humeur propre & convenable, principalement quand elles sont fort humides.

Or en general on fait tous onguents, ou au feu, ou en les demenant fort longuement, comme on fait l'onguent de litharge, qu'on dict nutritum, avec huile, vinaigre, & autres choses : comme aussi les autres choses qui se font avec nutrition, comme nous en auons parlé au second liure.

Comme aussi l'argent vif, il le faut mesler avec le reste hors du feu, ou autrement si on le mettoit sur le feu, il s'en iroit soudain tout en fumee.

C'est aussi vne reigle generale, qu'es onguents, cerats, & emplastres, il faut mettre moins d'huile, de cire, & autres choses semblables qu'on y adioust pour dōner corps, tāt en esté qu'en hyuer: à cause q̄ la froidure de l'hyuer fait endurcir les choses, encores qu'elles soyent bien liquides : & au contraire la chaleur de l'esté fait fondre & liquesfier les choses dures, tellement qu'elles deviennent molles.

On fait donc fondre sur le feu, la cire ensemble avec l'huile, & quand ils sont  
fondus

fondus on les oste de dessus le feu, & pendant qu'ils refroidissent on les remue continuellement, & quand ils sont desia vn peu refroidis, tellement qu'ils commencent à se prendre, on y melle les poudres peu à peu, ce qu'on fait fin que longuent ne demeure grumeleux. D'autres laissent du tout refroidir l'huile & la cire dans la poille, & puis les rasclent avec vn cuillier ou vne spatule de fer en petites pieces, lesquelles ils mettent en vn mortier, dans lequel ils le demeinent longuement, y adioustant peu à peu les poudres: & ceste obseruation doit estre gardee en plusieurs de ces onguents.

L'Onguent appellé Aurcum, selon que Me- *Vnguent.*  
sues l'a décrit, est composé de cire iaune, six *regis.*  
onces: de bõ huile, deux liures & demie; de Tormentine, deux onces: de Resine de pin, & de Colophonienne, de chacun vne once & demie; d'Encens, de Mastic, de chacun vne once: de Saffran, vne drachme.

On fait fondre la Cire avec l'huile, & puis on y adiouste les resines en poudre, les resines estant fondues on y met la Tormentine, & soudain on l'oste de dessus le feu, & quand il est refroidy, on y adiouste les autres poudres.

L'onguent

L'Onguent Pompholigos bastard est composé d'huile rosat, dix onces : de cire blanche, cinq onces : de Ceruse lauee, quatre onces : de Plomb bruslé, de Pompholix, de chacun deux onces : d'Encens, vne once : il faut faire cuire l'huile Rosat avec suc de Morelle, iusques à ce que le suc soit tout consumé, & lors y faut adlouster la cire, & finalement tout le reste mis en poudre tres-delice, à sçauoir quand il sera refroidy dans le mortier, en la maniere que i'ay dit cy deuant.

En la composition de cest onguent, il suffit d'y mettre deux onces, ou deux onces & demie, de cire, car si on y met toute la quantité qui est mise en la description, ce sera plustost vn emplastre qu'un onguent. Il faut aussi se prendre garde qu'on y mette la vraye Pompholix, & non pas la Cadmie, cōme on fait auourd'huy pour la plupart.

L'Onguent qu'on appelle Basilicum, surnommé petit, selon Mesues, est composé de Resine, de Poix, de Cire, autant de l'un que de l'autre : & d'huile, autant que besoin sera.

Nous auons enseigné au commentaire que nous auons fait sur Mesues, que cest onguent, qu'on dict Tetrapharmacum, à cause qu'il est composé de quatre simples, est autrement fait, selon la description de Galien & de Paulus.

On

On fait d'oc fondre la cire avec l'huile, & estans fondus on y mesle la poix & la Resine en poudre, & apres qu'elles sont fondues, on les retire du feu: Mais si on y met la poix piler grossierement, elle se fond plus mal-aisement, à cause dequoy il la faut laisser plus longuement sur le feu, tellement que l'onguēt se brusle aucunemēt, & en deuīet noir. On le peut faire de cire & de Resine, demie once : d'huile, deux onces: de poix vne once.

Pour faire l'onguent nommé *Ægyptiac*, selon Mesues, il faut prendre du verdet, cinq aureos: de miel, quatorze aureos: de vinaigre bien fort, sept aureos: & faut faire bouillir le tout sur le feu, iusques à ce qu'il soit assez espez.

Il faut premierement faire cuire quelque peu, le Miel avec le vinaigre, & puis on y mesle le verdet, & l'achene on de cuire: pour cognoistre quand il sera assez cuit, nous auons enseigné cy deuant les marques & enseignes, à sçauoir si mettant vne goutte sur vn plat d'estain, ou sur vn marbre, estant refroidy il est prins, & ne coule point, & si ne s'attache pas au plat, ou au marbre. Si on  
faire



fait cuire le verdet, il en deuient rouge, & par ainsi il n'espouuante pas tant les malades comme s'il estoit verd.

*Vne once,*

L'onguent blanc de Rasis est composé de Cire blanche, vne once : de Ceruse lauee en eau rose, deux onces ; d'huile rosat, quatre onces. Aucuns y adioustent vn peu de vinaigre : d'autres y mettent aussi vne once de litharge : d'autres deux drachmes de Camfre : d'autres encores deux blanc d'œufs : & tous sont bien selon la diuersité des intentions du medecin.

Plusieurs mettent aujourdhuy toutes ces choses en la compositiō de cest onguent, horsmis le Litharge. D'autres y mettent d'huile, douze onces ; de Ceruse, & de cire blanche, de chacun quatre onces,

L'onguent dessicatif rouge bastard, est composé de Cadmie en pierre, de terre seelée, de chacun quatre onces : de litharge d'or, de Ceruse, de chacun trois onces ; de Camfre, vne drachme : de Cire, cinq onces ; d'huile rosat, & d'huile violat, de chacun six onces.

Il seroit bien meilleur si on y mettoit seulement d'huile rosat, qui fut fait avec huile omphacin, car il seroit plus adstringent & plus dessicatif.

Il faut nourrir le Litharge quelque tēps avec les huiles, sur le feu ; & apres cela on y fait fondre la cire ; finalement  
on y

on y met le reste en poudre delice petit à petit.

L'Onguent appellé Enulatum bastard, est composé de racines d'Aunee cuittes en vin-aigre, pilees & passees par le crible, vne liure de graisse de porc, d'huile commun, de chacun trois onces: de cire neufue, d'argent vif esteint en la salive humaine, prinse a ieun, de Tormentine lauee, de chacun deux onces: de sel commun en poudre, demie once.

Il faut faire fondre la cire avec l'huile, & puis la graisse: apres il y faut adiouster la chair de racine d'Aunee, puis l'argent vif, & le sel, & finalement la Tormentine. Aucuns mettent du souphre au lieu de l'argent vif, ce qui est bien plus salutaire: d'autres n'y mettent ny l'un ny l'autre.

Pour faire l'onguent qu'on nomme Populeum, selon la description de Nicolas, il faut prendre des ieunes reiettons de peuplier, demie liure: de feuilles de pauot noir, de Mandragore, de Iusquiamoche, de Morelle, de Ioubarbe grande & petite, de Laiſtue, de Gloutteron, d'Escudez, de Violettes de Mars, de sommitez de Ronces fort tendres, de chacun trois onces: de graisse de porc sans sel, trois liures.

En ces quatriers les ieunes bourgeõs de peuplier & les herbes ne viennent pas en mesme temps: car le peuplier commence à bourgeonner au mois de

Mars, & les herbes ne sont en vigueur que ne soit au mois de Iuin ou enuiron: parquoy nous prenons les reiettons de peuplier en leur saison, & les pilons tous seuls en vn mortier, puis nous y mettõs la moitié autãt de graisse de porc mondee (que nous appelõs communement suif doux) & les pilons longuement ensemble: & ainsi acoustrez nous les serõs en vn pot bien couuert, pour cinq ou six sepmaines ou deux mois, iusques à tant que les herbes soyent en vigueur: & lors nous les hachons & pilons chacune à part, avec vn pilõ de bois: car on ne les scauroit piler toutes ensemble, tant à cause de la multitude, que à cause de la viscosité: estans routes pilees nous les faisons cuire avec le suif & les bourgeons de peuplier, & les passons par le crible tout ensemble: mesme si besoin fait nous les faisons vn peu recuire, puis nous les serrons pour garder. Si tu veux que l'õguent soit bien verd, il ne faut que adiouster à la decoction deux poigees de Solanum ou Morelle pilee: & non pas comme font aucuns malicieux qui ne font point de cõscience d'y mettre du verd.

L'Onguent appelé Triapharmacum  
se lon

selon Mesues, est composé de litharge mis en poudre bié deliée, & puis demeslé longuement en vn mortier, iusques à ce qu'il soit de bonne consistance & espesseur, l'arroufant peu à peu d'huile & de vin-aigre, mettât tâtost l'vn & tantost l'autre: mais qui le feroit cuire iusques à ce que le vin-aigre soit consumé, & que le litharge fust fondu, pour le rendre plus espez, il en feroit vn emplastre.

L'Onguent qu'on dit Apostolorum, C'est on- que Auicena à descript au cinquiesme *guent est* canon, est composé de Tormentine, de *ainsi appel* Cire blâche, de Resine, d'Ammoniac, de *lé à cause* chacun quatorze drachmes: de verdet, *qu'il est cō* d'Opopanax, de chacū deux drachmes: *posé de dou* de Sarrafine longue, d'Encens masle, de *2e simples* Bdellium, de chacun six drachmes: de *qui estoit* Myrthe, de Galbanum, de chacun qua- *le nombre* tre drachmes: de litharge, neuf drach- *des Apo-* mes. Il faut faire tremper le Bdellium, *stres.* s'il est mol, l'ammoniac, & l'Opopanax, en bon vin-aigre, toute vne nuit, l'endemain il les faut faire chauffer & les couler, puis les peser derechef: & si le pois qui y doit estre y est, il y faut mesler la Tormentine, laquelle assemblera tellement le tout, qu'à

grande peine pourra on faillir apres: mais il faudra nourrir quelque  
*En Esté* il peu de tēps le Litharge en huile, hors  
*y faut met* du feu: puis le mettre sur le feu, & quād  
*tre deux* il commencera à s'eschauffer il y faut  
*livres* mettre la cire: laquelle estant fonduë  
*d'huile,* & il le faut retirer du feu, & y mesler les  
*en Hiver* liqueurs preparees comme i'ay dit, &  
*trois.*

quand il commencera à refroidir, il y faut adiouster peu à peu, tout le reste en poudre, mesme de Bdellium s'il est trop sec, comme est le nostre, qui est pour la pluspart sophistiqué.

On n'vse pas gueres de cest onguēt, mais à cause que la cōposition est malaisée, & que les simples sont difficiles à mesler, on le baille bien souuēt pour vn chef d'œuvre aux apoticairez qu'on veut esprouuer.

Il y a vn emplastre en Nicolas Alexandrin qui a aussi le nom d'Apostolicum, mais il est bien diuers de cestuy-cy, mesme il y entre vingt & vn simple.

Quant à l'onguent appellé Martiarum par Hermolaus, ou Martianū par d'autres, & de Althæa, Aregon, & Agrippa (qu'on dit vulgairement, les quatre onguents chauds) ie les ay laissez tout exprez, pource que on ne les compo-  
 se que

se gueres souuent: que si on en a affaire, on trouuera la façon de les composer en Nicolas: comme aussi l'onguent surnommé Comitissa, à cause qu'il fut inuenté pour vne certaine contesse, à fin de luy arrester ses mois, lequel est composé tout de choses astringentes, comme aussi l'Emplastre contrarupturam. Que si tu as enuie de sçauoir la façon, ou bien que tu ayes affaire, tu trouueras la description en ce que nous auons fait sur Mesué, sur la fin des onguens, là où nous auons aussi parlé de l'onguent citrin, & de plusieurs autres desquels l'usage est auourd'huy perdu. Il est bien vray qu'aucuns se veulent encores auourd'huy ingerer de faire l'onguent citrin, mais c'est sans sçauoir que Amentum dulce veut dire: car les uns le prennent pour la pierre du verre (qu'on appelle vulgairement Axungia vitri) d'autres pour le Gyp, ou plastre luisant: d'autres pour quelque autre chose: mais il se peut faire que ce mot d'Amētum, a esté corrompu de la pierre Amianthus de laquelle on falsifie de nostre tēps d'Alun scissile, pource que ils se ressemblent bien fort, mais il y a ceste differēce que l'Alun-brusle, & l'A-

miantus est doux. Ils sont autant ou plus empeschés à deuiner que c'est que la pierre Antali, & que c'est que Gersa serpentaria, lequel mot a esté prins par sincope, de cerusa, comme il est assez clair & euident: car c'est comme de la ceruse ou Amidon (car aucuns luy donnent aussi ce nom) qui est tiré de la racine de Vit de chien, ou de Serpentine, pilee & sechee sans lauer, selon aucuns, & selon d'autres, apres estre lauee en eau rose.

*La onzieme section est des Cerats.*

**L**A forme de medicament que nous appellons Cerat, & les Grecs Ceraxon, à cause de la Cire qui y entre, est comme moyen, quant à la consistance, entre les emplastres & onguens.

Le cerat refrigerant de Galien est composé de Cire blanche à force de lauer, vne once: d'hui le rosat fait avec huile omphacin, quatre onces formez vostre cerat en double vaisseau, lequel estant refroidi, veut estre batu longuement avec eau bien froide, & finalement avec vn peu de vin-aigre blanc bien cler.

Il faut bien noter, que ce Cerat ne veut pas estre imbibé d'eau & de vin-aigre, comme il a esté dit, sinon quand on s'en veut seruir: ce qu'on peut cognoistre par ce que i'en ay enseigné sur

Mefues en la onzième section, le prenant de Galien : mesme aujourd'huy sur la fin, on le laue en eau rose : ce que ie ne trouue pas mauuais : mais ie ne suis pas d'avis qu'on le garde gueres long temps , principalement en aer chaud, car il perd sa vertu, & si acquiert mauuaise odeur.

Le Cerat santalin de Mesues, est composé de cire blanche, trête drachmes : d'huile rosat , vne liure : de roses, douze drachmes : de santal rouge, dix drachmes : de santal blanc & iaune , de chacun six drachmes : de boli amerni, sept drachmes : de spodium , quatre drachmes : de camfre, deux drachmes.

*A sçauoir  
le spodium  
des Arabes  
nō pas,  
celuy des  
Grecs, qui  
est chaud.*

Quand ce Cerat est refroidi, & qu'o l'a rasclé de la casse, on y mesle les poudres dans vn mortier , petit à petit, plustost que non pas pendant qu'il refroidit , comme i'ay dit cy deuant es Onguens.

Le Cerat surnommé stomachicum de Galié, est composé d'onguent nardin exquis, de Cire odorante, grasse, & lauee , de chacun vne once, voire si c'est en hyuer : car en Esté il n'y faut que sept drachmes de Cire : il les faut donc faire fondre en double vaisseau, & les laisser apres refroidir, estant refroidy & rasclé, il y faut adiouster de Mastic & d'Aloës en poudre fort desliée, de chacun vne drachme.

I'ay monstré sur Mesues, quand il



y faut mesler du verius d'Aigrez, ou du ius d'Absinte. Mesues fait ceste composition autrement, selon Galien : mesme il y a changé quelques simples, & leur quantité aussi.

Il y a vn autre Cerat de Galien, qui est aussi appellé stomachicum, lequel est composé d'huile de Coings, de cire blanche lauee, de chacun vne once : d'hypocisti demie once : & de cela faut former vn Cerat.

Ie serois d'aduis qu'on vst de ces deux cerats surnommez stomachica, prins de Galie, plustost q̃ de ceux qui se font aujourdhuy, la composition desquels est prinse de Nicolas & de Mesues : encores q̃ l'vn soit bien benin, & de grãde vertu : & l'autre fort chaud, lequel n'est pas de Galien, cōme on peut aisément cōiecturer, par les Gyrosles, Noix muscate, Macis, Cubebes, & Galanga, qui estoient incogneus à Galien.

Le Cerat stomachicum de Galien selon la description de Nicolas, est composé de Menthe, d'Absinte, de Mariolaine, de Stechas arabique, de feuilles de Laurier, de Camomile, de Roses, de chacun vn Manipule : de Cinnamomum, de Spica nardi, de Noix muscate, de Gyrosles, de Macis, de Cubebes, de Galanga, de chacun demie once. d'Encens, de Mastic, de chacun vne once : ces choses estans mises en poudre veulent estre incorporees avec de Ladanũ, & de Cire, de chacun huiẽt onces : d'huile de Camomile, d'huile  
laurin

laurin, d'huile d'Aspic, d'huile de Mastic, & de huile rosat, de chacun vne once & demie.

Il faut faire fondre l'huile Laurin, l'huile de Camomile, l'huile Rosat, avec la Cire & le Ladanum ensemble, puis les oster de dessus le feu, & soudain les mettre dans le mortier, dans lequel il y faudra mesler le reste en poudre, les demenant longuement & bien fort, iusques à ce qu'il deuienne gluant & visqueux, y adioustant aussi l'huile d'Aspic, & l'huile de Mastic. Il y a vn autre Cerat de Mesues, qui est composé de Roses, de Mastic, de chacun vingt drachmes: de fueilles de Absinte seiches, quinze drachmes: de Spica indique, dix drachmes: lesquelles choses il faut incorporer & assembler avec quatre onces de Cire bien nette, & vne liure & demie l'huile rosat, les faisant fondre ensemble, puis les lauât à diuerses fois en eau rose, & finalement en vin vieil, ius de Coings, & vn bien peu de vin-aigre.

*La douzieme section: des Emplastres.*

**G**Alien appelle ceste forme de médicament Emplastreux avec vn r, au genre feminin: ou bien il en fait vn adiectif Emplastrū sans point de r. Mais

les Latins ont mieux aimé l'appeller Emplastrum, au genre neutre.

Qu'on luy donne tel nom qu'on voudra, emplastre n'est autre chose qu'un médicament qu'on applique au corps, qui est dur & solide, composé quasi de toutes especes de simples medicamens, principalement de ceux qui sont gras & des secs. Car és emplastres entrent toutes les parties des plantes, les simples metaliques, & les terrestres: pareillement plusieurs parties des animaux, mesme quelquefois des animaux tous entiers. Vray est que les vns ne font qu'y laisser leur vertu & faculté, cōme le vin, le vin-aigre, l'eau, & les sucres liquides, car on fait cuire en ces choses la cōposition des emplastres, iusques à ce qu'elles soyēt du tout consumées. Les autres n'y seruent que pour donner corps, & servir de matiere aux emplastres sans y donner aucune vertu ou faculté, ou pour le moins bien peu: cōme sont le Litharge, la Cire, l'huile cōmun recent, & bien souuent les Resines. Quant à toutes les autres choses qui entrent és emplastres, elles seruent non seulement de matiere, mais aussi donnent quelque vertu & faculté aux  
compo

compositiōs. Par là on peut cognoistre, qu'ē composant quelque emplastre on regarde à deux intentiōs & fins principales, asçauoir à la faculté, & à la cōsistence: car il doit estre de cōsistence espesse, dure, & gluāte. Il y a bien encores deux autres regars, asçauoir de l'odeur, & de la couleur, mais ils ne sont pas de telle importāce que les premiers: mesme on y regarde plus pour s'acōmoder aux malades, que pour necessité qu'il en soit en la cōpositiō, mais on a esgard que les malades sont par fois apprehensifs, ce qui est cause qu'on y a quelque esgard, mesmement à l'odeur: car si l'odeur est bōne, elle peut profiter au cerueau, au cœur, à la matrice: & au contraire, si l'odeur est mauuaise, elle peut nuire. Mais és choses qu'on prend par la bouche, on a bien plus de regard à la couleur, mais sur tout à la saueur: comme nous l'auons amplement discoursu en nostre liure de la methode de composer les medicamens.

Entre les simples qui entrent és emplastres, on a accoustumé de mettre les racines, bois, fueilles, tiges, fleurs, & semences, seches & puluerisees ensemble; ou avec les autres: & les y met-on  
presque

presque toutes les dernieres , lors que l'emplastre est quasi cuit , comme aussi la Sarrafine, la Gentienne, & la Camomile, lesquelles on y met lors que l'emplastre est hors du feu, selon l'enseignement de Galien. Il est bien vray que si quelques vnes de ces choses entrent en la composition , lors qu'elles sont fresches & encores verdes, ou il les faudra faire cuire en quelque humeur, puis les passer , pour puis les mesler avec le reste: ou bien si elles ont du suc, on en tire le suc, apres les auoir pilees: & se sert on de ce suc pour cuire les autres choses , & les fait-on tout confumer, n'y laissant rien que sa vertu ou faculté: cōme on le peut voir en l'emplastre de lanua, qu'on dit aussi de Betonica: ce qu'on observe aussi és mucilages. Vray est q̄ à cause de leur viscosité, elles ne se confument pas tant que les sucs.

Quant au miel & à l'huile , il en demeure encores beaucoup, encores que l'emplastre soit parfait.

Des sucs solides & endureis, comme sont l'Aloes, l'hypocistis, le suc de Regalisse, l'Acacia, le Glaucium, le Lyciū, l'Elasterium, & le Meconium , si quelcū entre en la cōposition de l'emplastre, & il est

il est encores recent & frez, il le faudra dissoudre & destremper en quelque humeur propre à nostre intention, lequel neantmoins il faudra faire consumer à force de cuire, auant que le mesler en composition, où bien faire cuire toute la compositiō iusques à la consomptiō d'un tel humeur. Mais si ces sucs sont bien secs, non pas tellement toutesfois qu'ils ne soyent encores biē malaisez à mettre en poudre; il faudra chauffer le pilon à fin de les faire secher, & par ce moyen les piler, sinon q̄ ce fust quelque suc assez aisé à esmier, comme sont l'Aloes, la Scāmonée, tant le suc que la liqueur. Or il faut noter q̄ tous ces sucs dōt nous auōs parlé, veulent estre mezlez en l'emplastre, lors qu'il cōmence à refroidir, ou qu'il à desia la consistance d'un Cerat, si nous voulons que tant la substāce que la faculté du suc, demeure en la cōposition de l'ēplastre. Mais quāt aux sucs qui sont fort secs, cōme ils entrent bien peu souuent en la cōposition des emplastres, aussi au cōtraire les liqueurs, gōmes, resines, & simples metaliques, y entrent ordinairement. Quant aux liqueurs, cōme sont le Galbanum, l'Opopanax, le Sagapenum, & l'Ammoniac,

niac , on les fait tréper & dissoudre en vin-aigre, en vin, ou en q̃lque autre humeur propre: estans dissous, on les coule, & les fait-on cuire iusques à ce que l'humeur soit consumé, & qu'ils ayent la consistance d'emplastre, & lors on en prend la quantité q̃ l'ordonnance porte: mais si dās vn mesme emplastre entre deux, 3. ou 4. de ces liqueurs : mais en diuerse quantité, comme on voit, en l'emplastre Diuinū, il faudra faire tremper, dissoudre, couler, cuire chacune liqueur à part soy, afin de prendre le pois & quantité de chacune qu'il faut: ce qu'on ne peut faire sans le couler premierement, à cause des esclats de bois, des semences, & autres ordures qui se trouuent ordinairement parmy ces liqueurs: q̃ si on en trouuoit qui fussent bien nettes, ou qu'on les peust biē nettier avec vn cousteau, on les pourroit biē peser tout au commencement, puis les dissoudre ensemble, les couler, puis les mesler avec l'emplastre, & le faire cuire iusques à la cōsompitiō de l'humeur meslé Mais si les sucz sont desia dissous coulez, pesez, & cuits à part, tellement qu'ils ayent la consistance d'emplastre, cōme i'ay dit cy-deuāt, il ne faudra que  
les

les adiouster à la cōposition, lors que l'emplastre est cuit, ou peu s'ē faut. Aucuns toutesfois les destrēpent avec vn peu de tormentine, encores qu'ils ayēt esté cuits auparauāt auant que les mettre avec le reste, voire si en la composition entre de la Tormentine.

Le Galbanum se met quelquefois avec le reste de la composition, l'ayant ostee de dessus le feu, apres estre premierement pilé avec vn pilon de bois d'autrefois, on le fait cuire vn biē peu; mais il aduiert bien peu souuent qu'on le face beaucoup cuire. Quant à l'Ammoniac, le plus souuēt on le fait beaucoup cuire, ou à part, ou avec l'emplastre, quelquefois neantmoins on le fait cuire vn peu moins. Il aduiēt aussi parfois, qu'on le remolit seulement entre les doigts, au pres du feu, ou à la chaleur du Soleil, & puis quand le reste de l'emplastre est retiré du feu, on le met dedans, iusques à ce qu'il soit fondu.

Si on met l'Ammoniac tout seul es emplastres, il les rendra secs & arides, pourtāt il faut qu'ō y mette de cire, ou de resine, ou qlque autre chose qui soi propre pour donner forme & consistē<sup>t</sup> ce emplastique à la composition.

Mais



Mais le vin , le vin-aigre , & autres semblables, il les faut tous faire consumer en cuisant , tellement qu'il ne demeure en la composition, sinon la vertu & faculté, cōme i'ay dit, selon la diuerse nature du vin , ou du vin-aigre : car le vin-aigre cōposé & fait de quelque vin brusc & rude, n'est pas de telle vertu cōme celuy qui est fait d'un vin puissant. Dauantage vn vin-aigre subtil , pur, & blanc , sera bien de plus grande vertu pour subtilier & penetrer, q̃ ne sera pas vn autre de contraire nature. Parquoy on demande souuent diuers vins, selon la diuersité des medicamens: quelquefois on ordōne de prendre de quelque vin rude & aspre, cōme quād c'est pour vn emplastre epulotique, c'est à dire qui sert à consolider ou cicatrifer vne playe: d'autresfois on demande vn vin puissant , comme seroit le vin falerniē, à cause qu'il est beaucoup meilleur quād il faut resoudre & digerer. Il faut donc que le medecin se dōne bien garde de distinguer ces choses, en ses escripts & ordonnances.

La fin pour laquelle on met l'huile es emplastres , est premierement afin qu'il serue pour les faire cuire: secōde-

ment

mēt afin de les rendre sedatifs de douleur, resolutifs, ou remolitifs: afin aussi que la faculté acre, ou austere des medicamens, soit aucunement radoucie & diminuee.

L'Huile commun entre és emplastres pour y seruir de matiere: tellement que l'huile fondu avec la cire, sont cōme le corps de l'emplastre, dās lequel on met l'Euforbe, ou les autres choses.

Il aduient neantmoins bien souuēt, que l'huile sert pour faire cuire les choses metaliques, & le met-on quelquefois tout seul, quelquefois avec eau, ou vin, ou vin-aigre. On le met tout seul avec graisse, en la composition de Diachalciteos, afin de faire cuire le Litharge, & la Chalcitis.

Bien souuēt aussi on fait cuire le Litharge, apres l'auoir mis en poudre fort desliée: & le fait-on cuire, ou tout seul, ou bien avec les liqueurs dont à esté parlé cy-deuāt, selō la doctrine des Anciens, iusques à ce qu'il ait la cōsistence de bouë ou fange, y meslāt apres quelques autres metaliques, cōme sont l'Escaille de bronze, & la Ceruse, quelquefois au cōmencement, q̄lquefois apres selon la diuersē intention du medecin.

Quant à l'huile vieil, encores qu'il serue aussi de matiere, neantmoins il y sert principalemēt pour resoudre:mesme tant plus il sera vieil tant plus aura-il de vertu pour ce faire.

Séblablement l'huile Omphacin, ou vn autre huile qui ait semblable vertu de restraindre, entre és Emplastres, afin de refroidir & restraindre:& l'huyle lauē, afin de refroidir & blanchir.

Tous huiles composez, & tous onguents aussi, peuvent entrer en la composition des Emplastres, non pas seulement pour y servir de matiere, mais aussi pour y laisser leur faculté & vertu.

L'huile y sert aussi quelquefois, pour corriger la trop grande siccité des resines, par trop seches, ou de la cire trop seche de vieillesse: ce que n'est pas besoin és resines fresches, car elles mesmes seruent à cela.

On ne met pas si grande quantité d'huile en esté, en la cōposition de quelques Onguents, Cerats, & emplastres, comme on fait en hyuer: à cause que la chaleur de l'esté fond & rend liquide la composition: & au cōtraire la froidure de l'hyuer rend le Cerat, Onguent, ou Emplastre, beaucoup plus dur & solide,

de, faisant geler l'huile. Il y a mesme raisonnés resines liquides, mais non pas tâtés seches, & en la cire aussi: comme pour exéple, Galien dit qu'il faut mettre la quarte partie d'un Cotyle d'huile en hyuer, & la huitiesme partie de la mesme mesure en Esté: quelquefois le mesme autheur, met en vne composition, quatre Cotyles d'huile en hyuer, & trois en Esté. Vray est que quant à la resine & à la cire, tant plus elles seront grasses, humides, & recentes, tât moindre quantité y en faudra-il mettre, soit en hyuer ou en esté: observât toujours que la quantité soit encores moindre en esté qu'en hyuer.

Le Miel entre en la composition de l'emplastre surnommé Panacix, & de quelques autres emplastres, afin de réduire la cōposition emplastique, afin aussi de desecher, mondifier, digerer, & preserver de pourriture.

La cire ne sertés emplastres, sinon de matiere, sans qu'elle adiouste ou diminue rien à la faculté & vertu, non plus que fait bien souvent la resine: vray est que la cire & la resine n'entrent pas en la composition de tous les

emplastres, car il y en a, qui ont assez d'autres choses en leurs compositions, qui leur seruent de matiere: comme en la composition de Diachalciteos, il n'y entre ny cire ny resine: car la Chalcitis, le Litharge, & la graisse mondée de ses peaux, & cuite avec l'huile, luy seruēt assez pour luy donner corps. Pareillement les emplastres où entre le Ladaum, mesmement quād il y en a bonne quantité, il leur sert au lieu de cire, tellement qu'il n'est ia besoin d'y en mettre.

Au reste, où la Cire est recente, & par consequent grasse & plus giuante, de laquelle il faut mettre moindre quantité en Esté, comme aussi de l'huile, & au contraire plus grande quantité de l'un & de l'autre en hyuer, comme aussi de poix & des resines, pour mesme raison. Mais quand la Cire est fort seche, soit qu'elle soit telle naturellement, ou de vieillesse, il ne la faudra pas cuire si longuement: mesme bien souuent il la faut humecter avec de l'huile, ou avec quelque resine plus liquide. Il faut aussi noter, que bien souuent on met la cire blanche es emplastres, afin qu'ils en soyēt plus blâts, soit  
que

q̄ la cire soit blāche naturellement, ou  
 qu'elle soit blanche à force de lauer. La  
 Propolis a la mesme consistance que la  
 Cire, mais elle a vne fort grande vertu  
 d'attirer: laquelle faculté n'est pas en la  
 cire, ou pour le moins bien petite. Vray  
 est qu'elle a quelque peu de vertu de di  
 gerer. Mais il y a quelque differēce en  
 tre digerer & attirer, comme Galiē dit  
 au commencement du septieme liure  
 compos. pharm. gener. Parquoy on met  
 le plus souuent la Propolis es empla  
 strēs, lors que l'emplastre est hors de  
 dessus le feu, à fin que sa vertu attracti  
 ue ne se perde & esuanouisse.

Il n'y a rien qui entre plus souuent es  
 Emplastres composez par les Anciens  
 Grecs, que la gomme d'Encens: la Myr  
 rhe & la Sarcocolla y entrent bien aussi  
 souuent: le Bdellium & le Stirax y en  
 trent par fois: les autres choses y en  
 trent bien peu souuent, hormis que les  
 Arabes & les modernes mettent bien  
 souuent le Camfre, & quelques autres  
 choses en leurs compositions.

Davantage on met bien souuent l'en *Comme au*  
 cens es Emplastres, à fin de rabatre la *5. liure de*  
 violence des autres choses plus violentes *la Meidro.*  
 tes: quelquesfois aussi à fin de leur

donner & faire auoir forme emplastique , principalement quand il est recēt & bien gras:quelquefois aussi à fin qu'il cuise la cause de la maladie , & qu'il di-

*C'est la manne des Grecs.* gère quelque peu. On y mesle pour les mesmes raisons la manne d'Encens , & outre ce à fin de restreindre quelque peu.

Toutes les autres Gommess, entrent pour la pluspart és emplastres , à fin de leur donner quelque faculté & vertu: & les met-on en la composition , vn bien peu auant qu'y mettre les résines, à cause qu'elles ont leur substance plus aquee & crasse, & au contraire les Resines sont plus aërees, & plus tenues , cōme nous l'auons monstré és simples. Que si les Gommess sont liquides & recentes , & que nous ayons desir, qu'vne bonne partie de leur humidité & vertu demeure en l'emplastre, il ne les faudra gueres faire cuire : ce que doit estre aussi obserué és sucss, liqueurs, résines, & plusieurs autres : à cause que si on les fait cuire longuement , elles en deviennent plus seiches , & perdent leur force & vertu.

Les Gommess, les liqueurs, & les sucss seichez, veulent tousiours estre mis sur

la fin de la composition: que si on les veut premierement dissoudre en quelque humeur, il les faudra cuire iusques à tant que l'humeur soit consumé, puis les mesler avec le reste, lors que l'emplastre commencera à refroidir.

Les sucz liquides qui sont en la composition de l'emplastre de Ianua, veulent estre cuits en huile. Les herbes verdes, en la composition de l'emplastre de gratia Dei, veullent estre cuittes en vin, iusques à tant que le vin soit consumé.

On fait cuire les emplastres en huile comme l'Apostolicum, Ceroneú, Oxy-croceum, Diuinum, contra rupturam, Diachylon ou ex succis, & de Ianua: ou en vin, cōme l'emplastre de gratia Dei.

Quant au Vitriol apres qu'il est dissous en vinaigre, on le messe en la composition, lors qu'elle est retiree du feu, se prenant bien garde qu'il ne bouille, suyuant l'aduertissement de Galien.

L'Erain bruslé, le Verdet, le Calcitis, l'Aimant, le Boliarmeni, la terre Lemnienne, le Souffre, l'Orpin, & les autres choses qu'on peut mettre en poudre, veulent estre mis en la cōposition tous les derniers, lors que la composition



est retiree du feu.

Les graisses on les met quád la composition est encores sur le feu, les remuant tousiours.

Le Saffran, on le dissout en quelque humeur, & puis on le met en faisant les Magdaleons, & le Musc pareillement.

*Des Resi- nes.* Quant aux Resines de Lentisque, de Terbentin, de Meleze, de Pin, de Pesse, de Sapin, & de Ciprez, on les mesle bien souuent és emplastres, pour leur donner consistance, ou pour leur seruir de matiere, & leur donner corps avec le reste, quelquefois à fin de les rendre gluants & emplastriques, car les autres choses ne rendent point l'emplastre gras, ny propre à adherer à quelque partie, mais plustost aisé & facile à choir. Quelquefois aussi on les y met, à fin de doner à l'emplastre quelque vertu & faculté, comme de digerer, mundifier ou dessécher, ou quelque autre vertu que la Resine peut auoir en soy, comme ie l'ay enseigné, quand i'ay parlé de la faculté de chacune, en mon traité des simples. Nous enseignerons cy aprez en son lieu, combien il faut mettre de chacune, & quand il les faut mettre en la composition. Encores que la

Tormen

Tormentine ait vertu d'amollir, d'eschauffer, & digerer, beaucoup plus grande que la Cire, si est ce qu'on la met bien souvent es emplastres, seulement pour les rendre gluants, & non pas pour leur donner quelque nouvelle faculté, ou pour augmenter celle qu'ils ont desia. Il en est de mesme des autres Resines, qui sont ainsi grasses.

Mais quand en la composition entre de Tormentine, & quelques liqueurs ou sucz seichez aussi, on fait premierement dissoudre ces liqueurs, ou sucz, en quelque humeur propre, les couler, & les faire cuire iusques à ce que l'humeur soit consumé, & apres on les destrempé avec la Tormentine, puis on les mesle ensemble avec la composition de l'emplastre, lors qu'il est presque cuit & retiré du feu, à fin que la Tormentine ne sente point de feu, ou bien peu, soit toute seule, ou avec autre: comme es emplastres Diachilon magnum, de Melilot, & de Mucilaginibus.

Les metaliques qu'on met es emplastres, doyuent estre diligemment & exactement pilez, & passez par vn crible bien deslié, à fin qu'ils soyent plustost fondus, s'ils se peuvent fondre: ou à fin

*Des metaliques qui entrent es emplastres.*

qu'ils ne soyēt fascheux par leur aspre-  
té, s'ils ne se fondent, encores qu'ils se  
pourroyent bien fondre.

Quant à ceux qui se peuuent fondre  
& liquesfier, il en a esté parlé au liure  
precedent, quand nous auons parlé de  
la maniere de fondre & liquesfier les me-  
dicamens.

Le Litharge se peut fondre en eau,  
en huile, en vin, en vinaigre, ou mettât  
quelques vns de ceux cy avec de l'hu-  
ile : vray est qu'il les faudra faire consu-  
mer en cuisant, mais aussi ils sont cau-  
se que le Litharge est plustost fondu,  
comme il sera dit cy apres.

Si on fait cuire vn bien peu, en temps  
cler & serain, à vn feu cler, vne liure de  
Litharge, & autant de Ceruse, mellez  
avec vne liure d'huile, & autant d'eau,  
on fera vn emplastre bien blanc : mais  
pour le rendre emplastique & gluant, il  
y faudra adiouster vn peu de Tormen-  
tine, ou de quelque autre Resine sem-  
blable. Si on y adioust de Molybdena,  
l'emplastre sera de couleur cendree : si  
le Litharge & l'huile sont lauez, l'em-  
plastre en sera beaucoup plus blanc.

Outre ces choses, il y en a des autres  
qui rendent les emplastres blancs com-  
me

me sont la Cire blanche, l'huile blanche à force de lauer, la Poinpholix, le Spodium, la Chaux, les Os bruslez, & la Farine des Coquilles de poissons bruslees, que si en la composition de l'emplastre on y met dauantage de Ceruse que de Litharge, l'emplastre en sera plus blanc, mais il ne sera pas si gluant.

Si on met le Verdet tout crud en quel que Cerat, il rendra la composition de couleur verte: mais il est beaucoup meilleur de broyer plusieurs iours le verdet, au Soleil, avec fort vinaigre, car par ce moyen ce qui y est de mordant, est aucunement adoucy. Mais si on fait cuire mediocremēt le Verdet, avec les autres choses, dès le commencement, l'emplastre sera de couleur de Coing: si on le fait cuire dauantage, il sera entièrement roux. La Chalcitis bruslee, l'Orpin, la Sandaracha, la Poix noire, le Bitume, le geyet, & quelques autres simples qui sont noirs auant qu'estre mis en la composition, rendent les emplastres roux & bruns, mesmes si on les y met en assez bonne qaantité, l'emplastre en sera noir. On rendra aussi vn emplastre de couleur de coing, si on melle du Verdet parmy le Litharge, lors qu'il est cuit iusques

*Gagates.*

iufques à eſtre eſpez, puis qu'on les face recevoir, iufques à ce qu'il deuienne roux à force de bruſler.

La Cadmie des fourneaux, comme auſſi toutes autres choſes pierreuſes, eſtans longuement pilees & broyees en vin, ou autre liqueur propre, ſont rendues meilleures, & plus propres & aiſées à fondre.

On met quelquefois la Ceruſe és emplaſtres, pour reſroidir & deſſeicher: quelquefois auſſi, pour les rédre blâcs: quelquefois on la met comme pour ſeruir de matiere propre à faire emplaſtres, comme en la compoſition de l'emplaſtre Heræ des deux Sarraſines.

Si quelcun veut faire vn emplaſtre blanc, il faut faire cuire vne liure de Litharge lauë, & autant de Ceruſe, en neuf onces d'huile: mais il ne le faut pas faire cuire longuement, à cauſe du peu de liqueur (car ſi on le fait cuire long temps, il en deuient noir) il eſt bien vray que l'emplaſtre n'en eſt pas ſi gluant, ny ſi adherent à vne partie: mais pour le rendre tel, aucuns y adiouſtent de Tormentine, ou de Reſine Colophonienne bien luiſſante, à fin de ne rien changer, ny en la couleur, ny en la faculté

culté de la composition: d'autres y mettent de Cire blâche, pour la mesme fin.

Or tout ainsi que la Ceruse entre en la composition de plusieurs emplastres à fin de les rendre blancs, aussi les Anciens auoyent accoustumé d'y mettre le Minium sinopicum, pour les rendre rouges, comme Galien l'enseigne au sixieme liure comp.pharm.gen. Mais pour rendre vn emplastre de couleur brune, il faut mettre d'escaille de bronze, & faire le feu avec de torche de Pin, que les Latins appellent Teda, au lieu d'autre bois, comme il est dit au mesme lieu.

Quelquefois on fait cuire le Litharge seul avec huile, iusques à ce qu'il soit assez espez, & lors on y met la Ceruse en poudre, à fin de rendre l'emplastre blanc. On peut aussi mesler la Ceruse dès le commencement, comme aussi le sel, & les autres metaliques & terrestres, & les faire cuire avec le Litharge, à sçauoir lors qu'on ne se soucie pas de la blancheur, & qu'on ne les y met sinõ pour y seruir de matiere, vray est que tant plus la Ceruse est cuitte, tant plus a elle de vertu de deseicher: pareillement le Litharge, & les autres metaliques

ques & terrestres.

Le Litharge donc a double vsage en la composition des emplastres, car s'il n'est pas fondu, il y sert seulement de matiere : mais s'il est fondu avec ce qu'il rend la composition plus gluante & visqueuse, il desseiche aussi, & tant plus il sera cuit tant plus il desseichera, & la composition en sera aussi plus gluante.

S'il faut faire cuire le Litharge en huile, & qu'en la mesme composition entrent des mucilages, il faudra premierement vn peu nourrir le Litharge hors du feu, avec l'huile : & apres le mettre sur le feu, y adioustant vn peu de mucilage, comme environ deux onces, car cela gardera que l'huile & le Litharge ne se brusleront point : que s'il n'y faut point de mucilage, il les faudra cuire longuement à petit feu.

Si on fait cuire le Litharge avec le double d'huile, l'emplastre en sera assez gluant & visqueux, encores qu'il n'y ait point d'autre simple des especes de Resines, ou de nature de Cire : mais il le rendra encores beaucoup plus gluant, s'il y a trois fois autant d'huile que de Litharge.

Si en la composition de l'emplastre entre du Litharge & de la Ceruse, il les faudra premierement nourrir hors du feu avec vinaigre, eau, huile, ou quelque autre humeur liquide, dans le mortier avec le pilon : apres il les faut faire cuire à petit feu, iusques à ce qu'ils ayent prins corps qu'on appelle, & qu'ils soyent rendus gluants. Car il faut faire cuire longuement le Litharge en quelque humeur, si on veut qu'il réde l'emplastre plus dessicatif & plus gluant : pareillement tous les autres metaliques & terrestres, sont rendus plus secs si on les fait longuement cuire, mais ils n'en sont pas plus gluants pourtant, horsmis ceux qui se peuvent fondre : mesme les choses, qui estoient gluantes au paravant, comme sont les liqueurs, les gommés, les Resines, la Cire, & le Miel, en perdent leur viscosité.

Mais l'huile, qui est visqueux, non pas toutesfois tant à cause de son humidité, est rendu plus gluant & visqueux par la coction, comme aussi par l'antiquité. Avec ce que faisant fondre le Litharge & l'huile ensemble, l'huile en est rendu plus visqueux beaucoup : tant à cause de ce qu'il ne reuiet iamais à sa premiere



premiere durté, comme aussi pource que par sa siccité, il consomme l'humidité de l'huile. Tellement que le Litharge sans estre fondu, mais seulement pilé bien deslié, demeslé longuement avec vne mediocre quantité d'huile, se rendra en forme d'emplastre, principalement si on le demesle au Soleil, ou en quelque autre lieu chaud.

Au contraire, on fait cuire longuement le verdet, la Chalcitis, l'escaille de Bronze, & semblables, à fin que leur trop violente qualité soit aucunement adoucie & rabatue. Quât au Ladanum, Galbanum, & Propolis ou Cire vierge, & plusieurs autres, ils n'ont pas leurs qualitez si fortes, qu'elles ayent faute d'estre adoucies, aussi ne les fait-on point cuire, ou bien peu.

*La quantité.*

Il faut faire cuire trois liures de Litharge, quatre Onces de Chalcitis, avec trois liures d'huile, & deux liures de graisse : vray est qu'il est beaucoup meilleur de mesler toutes ces choses dans le mortier, deuant que les faire cuire dans le chauderon. Si on fait cuire le Litharge & la Ceruse en pareille quantité d'huile & d'eau, la composition sera fort fraisse, & ne se pourra

prendre

prendre contre la peau: mais si la quantité des choses liquides est plus grande, & qu'a cause de ce on les face aussi plus longuement cuire, la cōposition en sera gluante & visqueuse. Le Litharge fondu avec eau & huile en bonne quantité, feront vn emplastre benin, gluant, & blanc.

Vne liure de litharge, cuitte en deux liures de vinaigre, & autant d'huyle, iusques à tant qu'il soit fondu, font vn emplastre fort gluāt: mais encore sera-il plus gluāt si on y met trois liures de vinaigre & autant d'huyle: mesme qui le feroit cuire toute vne iournee, l'emplastre deuiendroit noir & resplendissant: Semblablement si on le fait fondre avec bonne quantité de vin & d'huyle. Toutesfois il acquiert des facultez biē diuerses, selon qu'on le fait cuire plus ou moins, & selon la diuerse nature du vinaigre, du vin, de l'eau, ou de l'huile, & pourtant le medecin doit specifier en ses ordonnances, la diuersité de chacun. Mais la composition en sera bien plus exquise, si on broye le litharge, en vne ou plusieurs ensemble, de ces liqueurs, quinze iours durant, en esté à la chaleur du Soleil, le remuant longuement tous les iours.

La quantité de l'huile doit estre plus grâde en la cōposition des emplâtres, en hyuer qu'en esté, d'autât q par la chaleur de l'Esté l'emplastre est rendu plus mol, estât cōme à demi fondu, cōme au contraire il est rendu plus dur, estât cōgelé par la froidure de l'hyuer: il en est de mesme des resines liquides, ou pour le moins qui ne sont gueres seiches, & de la cire. Tant la resine que la cire, tât plus elles seront grasses, humides, & recentes, tant moindre quantité en faudra-il mettre, soit en hyuer ou en esté,

Si on veut faire vn medicament semblable aux onguents qu'on fait pour oster les lassitudes, & aux cerats liquides il faut mettre quatre fois autât d'huile que de cire: mais si on le veut faire dur & solide, en forme d'emplastre, il faut mettre pareille quantité d'huile & de cire, principallemēt si la cire est vieille & seiche: car quand elle est recente & grasse, il y en faut plus grâde quâtité q non pas d'huile, si on veut que le Cerat ait consistance d'emplastre, mesmemēt en esté. Comme si on veut faire le Cerat Diaeuphorbiu, il faut mettre six drachmes de cire, six drachmes d'huile, ou biē cinq, & vne drachme d'euforbe: mais si pour rendre la cōpositiō plus

gluante & visqueuse on y veut mettre de resine, il faudra diminuer la quantité de l'huile: car la cire pour rédre vn medicamēt liquide, a besoin de bōne quantité de choses grasses: mais les resines quād elles sont seiches, n'en demādet pas beaucoup: & si elles sont liquides, elles ont plustost besoin de quelque chose seiche, si on les veut reduire en forme d'emplastre. Pour sçauoir cōbiē il faut mettre de resine en vn cerat, l'experience nous en pourra rendre sages: prēs donc trois parties de resine, & vne partie de cire, & les melle, puis aduise si la composition sera assez solide pour vn emplastre, que si elle est trop dure & seiche, il faudra augmenter la quantité de resine: & si elle est trop molle, il faudra diminuer la quantité de resine, ou augmenter la quantité de cire. Il y a mesme raison au propolis ou Cire vierge, qu'en la cire, car si elle est grasse & recente il en faudra mettre moindre quantité, pour faire vn emplastre, que si elle estoit vieille & seiche.

Si la composition a desia la consistence d'un Cerat, & qu'on en vueille faire vn emplastre, il y faudra adiouster seulemēt la tierce ou la quarte partie de Ci-

re: q̄ si on y veut aussi mettre de graisse, & qu'elle soit fort humide, il y faudra mettre la moitié de cire.

Qui mesleroit de cire avec d'huile en pareille quantité, on fera vn emplastre de bonne consistance, pourueu que l'aer soit temperé: mais si la cire est par trop vieille, & seiche, & que le temps soit froid, il y faudra vn peu plus d'huile que de cire: & au contraire, si la cire est fresche & grasse, & le temps chaud, il y faudra vn peu moindre quantité d'huile que de cire: comme en vne livre de cire grasse, douze onces d'huile, mais si la cire est seche, il faudra treize onces d'huile, plus ou moins, selon que la cire sera seche, & selon la quantité d'icelle, & que le temps sera chaud, ou froid: Afin aussi que la composition soit gluante, on à acoustumé d'y mettre de resine, principalement de Tormentine liquide, & y en met on ordinairement la tierce ou la quarte partie autant que de cire.

Il est bien vray que quand on melle parmy la cire, q̄lque chose qui se peut fondre, mais estant refroidie elle s'enlève. *Tetra-* durcit, il n'y faut pas si grande quantité de cire: cōme en la composition du *Basilicum Tetrapharmacum*, on met de

cire, de resine simple colophonienne, *pour ce qu'il*  
de poix, de suif de Taureau, *mesme qu'il est composé*  
tité de chacun. Dauantage quand on de quatre  
melle des choses seches parmy la cire, *simples.*

côme sont les Metaliques en poudre, &  
les farines, on n'y en met pas beaucoup:  
côme en l'emplastre de semence de lin,  
qui est composé d'huile vieil, deux li-  
ures: de cire 20. onces: de resine colo-  
phoniene, & de graisse de porc, de cha-  
cun vne liure & demie: de litharge, vne  
liure: de ceruse, & de mucilage de semē-  
ce de lin, de chascun six onces: d'Encēs,  
quatre onces: de farine bien delicee, vne  
once. Paulus fait cuire les mucilages  
des semences de lin, de Fenail, des ra-  
cines de guymauue, en huile, en la cō-  
positiō du diachilō, iusques à tāt qu'el-  
les ne bouillissent plus, c'est à dire iusq's  
à ce q' les mucilages soyent cōsumees.

Les emplastres qu'on fait des choses  
metaliques, si on y adionste peu de cho-  
ses liquides avec, ils s'endurcissent in-  
continēt bien fort, parquoy il n'en fau-  
dra pas faire grande quantité mesme-  
ment si on les compose en hyuer.

Quant à la cōsistence que pourront  
auoir la Cire, l'huile, les graisses, les  
mouëlles, gommes, resines, le beurre,

les choses liquides recentes, & les gluâtes, quâd on les messe avec des choses seches, nous ne faisons pour le cōmencemēt, que le coniecturer, cōsiderans la quātité & la cōsistēce de chacune, sans que pour lors nous puissiōs cognoistre exactement quelle consistet, ce la composition pourra auoir estant faite: mais quand le tout est meslé, lors on voit biē si la compositiō est trop claire & liquide, ou trop dure, ce qu'il faut bien remarquer, afin que quâd on fera vne autre fois la mesme composition on se puisse souuenir quelle doit estre la quātité de chacune chose qu'y entre.

On pourra coniecturer quelle doit estre la quantité de l'huile, qui entre en vne compositiō, si on regarde aux choses avec lesquelles on le veut mesler, & combien de temps on le veut faire cuire, & quelle est la disposition de l'aer lors qu'on le cuit: car les choses metalliques veulent estre cuittes plus longuement, quand nōstre intention est de descicher sans aucune mordicatiō, & que nous voulons aussi qu'ils soyent plus gluants: parquoy aussi lors il y faut mettre plus grande quantité d'huile: que si la quantité de l'huile est plus petite,

tite, il ne les faudra pas faire cuire si longuement, & si seront frailes, ou on les conioindroit avec quelque resine. Que si on fait cuire vn emplastre avec huile & vin-aigre, ou vin, tant plus il y entrera de vin-aigre ou d'huile, tant plus sechera l'emplastre.

Les emplastres ou entre du Ladanū, n'ont point besoin de Cire, & au contraire, il faut de la cire ou il n'y a point de Ladanum: car le Ladanum a la mesme faculté de ioindre & incorporer les medicamēs, que la cire. Si on met beaucoup de cire en vne composition, cela diminue la vertu du medicament.

Quand la cire est fort recente, fort molle, & fort grasse, elle n'a pas besoin de beaucoup d'humeur huileux.

Il n'est pas bon ny vtile de faire cuire. *Le moyē de re tous emplastres d'une mesme façon, cuire les en mesme bien souuent la coction chāge plastres, & non seulement la couleur, mais aussi la de l'ordre faculté & vertu: car on pourra bien faire qu'on y doit re cuire la Ceruse des le cōmencement tenir.* avec le litharge, mais par la longue coction elle perdra sa blācheur, son astiction, & sa vertu refrigeratiue: comme elle sera plus desicative si on la melle



toute crüe en l'emplastre: & au cōtraire, elle fera toutes ces actions mediocrement, si on la met en la composition lors que le litharge est desia cuit, iusques à la cōsistence de miel. Il faut aussi se prendre garde que cependant qu'on fait cuire le litharge & les autres metaliques, il les faut tousiours remuer avec vne spatule de fer, afin qu'ils ne bruslent, à cause qu'ils vont tousiours au fons par leur naturelle pesanteur.

*Il faut en-  
tēdre la mā-  
ned' Encēs.*

Quand le litharge est cuit iusques à auoir consistance, il y faut adiouster les graisses, resines, gommes, la manne, & la cire: & lors q̃ ces choses sont cuittes tellement qu'elles ne souillent plus les mains, il y faut mettre le galbanum, le verdet, l'opopasax, la sarratine, la racine de panax, la racine de Chameleon, la Gentienne, & la Myrrhé. Quand le litharge est fondu avec l'huile, on y mesle la cire, & la Tormentine: & quand ils sont cuits de façon qu'ils ne souillent plus les mains, on eslargit & amollit entre les doigts l'Ammoniac, & le met on dedans, & puis apres la laine avec son suyn bruslee. Vray est que si en la composition avec le litharge, entre du suif, & de la manne d'Encens, il les faudra mesler,

mesler, auant que mettre la cire, & les  
 remuer cōtinuellement: & quand ils se  
 ront changez & fondus, on y mettra la  
 cire, la poix seche, & la Tormentine:  
 quād ils ne souillerōt plus les mains, il  
 faudra y adiouster le galbanū: & puis le  
 verdet & l'opopanax dissous en vinaig-  
 gre. Le litharge estant cuit en huile, il  
 y faut adiouster de la crasse biē deliee,  
 la remuant continuellement: apres la  
 Chalcitis, luy ayant toutesfois osté pre-  
 mieremēt son acrimonie, avec du vin,  
 ou bien pilee avec du vinaigre, & la  
 faut mesler peu à peu.

Si on veut mesler avec le litharge, du  
 Bitume, de la poix, de la Cire, de resine,  
 ou de Propolis: il les y faudra mettre  
 lorsqu'il sera desia trespessé: & quād ceux  
 la seront fondus, il y faut mettre le ver-  
 det, & la pierre Pyritis: & quand la cō-  
 position sera ostee de dessus le feu, &  
 qu'elle sera vn peu refroidie, il y faut  
 mettre l'Alum, le Galbanum pestri &  
 amolli, & la Manne.

La Myrrhe, le Bdellium, l'Encens, &  
 l'opopanax, veulent estre broyez avec  
 vinaigre, quelquefois la Colle de pois-  
 son aussi hachee menu: la poudre de  
 laine ensuyee, la Manne & le Galbanū,

veulent estre mis en la composition hors du feu.

La Tormentine, & la cire, y veulent estre mis, quand le litharge est cuit iusques à auoir cōsistēce: puis apres l'Ammoniac amolli entre les doigts, & lors on y peut mettre aussi le verdet & l'escaille de bronze: apres ceux la, l'Érain brulé, la resine de Pin & la cire: & finalement les metalliques.

*La fin de  
la cōction.*

Les emplastres sont lors assez cuits, quand nous sommes paruenus au but auquel nous pretēdions: asçauoir quād ils ont la consistance qu'ils doyuent auoir, la vertu & faculté qu'on en espere, la couleur requise, & l'odeur aussi. Or pour cognoistre s'ils sont de bonne consistance, asçauoir solide, espesse, gluante, & propre à adherer à quelque partie, il ne faut que prendre vne petite portion de la composition, & la laisser refroidir sur du cuyure, sur du marbre, sur quelque metal, dans de l'eau, ou en quelque autre façon, & si lors elle ne souille point les doigts, & qu'on voye que le tout soit bien incorporé, la composition sera assez cuite: mesme si elle n'est point fraisle, mais gluante, maniable, malaisée à rompre, ayāt la durté de  
la

la cire quand elle est vn peu amolie au feu, ou par quelque autre chaleur.

Mais pour cognoistre si l'emplastre a la faculté qu'il doit auoir, il faut considerer si les vertus q̃ le Medecin vouloit demeurer en leur entier, y sont demeurees, sans estre aucunement diminuees par le feu: & si ceiles qu'il desiroit estre acreuës, ou diminuees, le sont aussi, ce que tu pourras aucunement cōiecturer, tant par la lōgueur ou briefue-té de la coction, cōme aussi par la mixtion des autres simples: mais la vraye & certaine espreuue est l'experience, laquelle estât cogneuë par le medecin qui l'aura mis en vsage, il t'en pourra rendre certain. Or la diuersité du feu, non pas seulement en ce qu'il est grād & violent, ou petit & foible, mais mesme la diuersité de la matiere dequoy on fait le feu, & la lōgueur de la coctiō, changent la faculté de la composition: car si le feu est trop violent, il brusse & noircit, comme aussi quād on les y laisse trop longuement, & qu'il y a de la fumee, comme est communement le feu de Torche de pin, & d'autres matieres, qui à cause de la grande abondāce de resine qu'elles en font vn feu fort fumeux,

fumeux, ou bien quand on fait la cōposition en tēps nebulieux & en aer trouble & grossier : & au contraire, le feu cuit plus mediocrement, quand il est fait de bois sec, qui ne fait point de fumee, mais rend vn feu cler & pur, & qu'on fait la composition en aer pur & ouvert.

On fait cuire le Litharge quelquefois avec grand feu cler, & d'autrefois à petit feu.

L'Emplastre Diachylon de Nicolas Alexandrin est lors assez cuit, quād on voit des petites bouteilles s'esleuer au dessus, & y demeurer, comme dit le mesme autheur au chap. 104.

*De la gar  
de des em-  
plastres.*

Les vns se gardent en boittes rouges, d'autres en boittes de bois, d'autres on les enuoloppe de peau : toutes-fois aujourd'huy pour la pluspart, on fait des magdaleons lesquels on enuoloppe de papier, suyuans en cela l'exemple de Democrates, comme il en est parlé au 5. de comp. pharm. gen.

*On l'appel  
le autre-  
ment em-  
plastre  
blanc.*

L'Emplastre Diachylon commune, selon que Mesues l'a descript, se fait en la maniere qui s'en suit. Il faut ptendre de Litharge, qui ne tien ne riē du Plōb ni de crasse ou ordure, & qui soit pilé biē delié, vne once & demie : & d'huile vieil  
bien

bien cler, trois onces, & les broyer & demes-  
 ler longuement ensemble en vn mortier de pierre, avec vn pilon de fer: apres cela il les faut  
 faire cuire à petit feu, les remuant tousiours  
 avec vne spatule, iusques à ce que le Litharge  
 soit espeSSI & lors il les faut oster de dessus le  
 feu, & les laisser refroidir peu à peu. Ce pen-  
 dant, il faut faire vn bien peu bouillir trois on-  
 ces de mucilage extraicte des semences de lin  
 & de fenugrec, & des racines de malue: & estât  
 vn bien peu bouillie, la faut mesler peu à peu  
 parmi le Litharge & l'huile les incorporant  
 tresbien avec vn pilon de bois: finalement il  
 faut cuire le tout ensemble, iusques à ce qu'il  
 soit de bonne consistance & espeSseur.

Pour le faire Ireatum, il ne faut sinon met-  
 tre d'huile de Glayeul ou flâbe au lieu de l'huile  
 cōmun, ou bien mettre de poudre d'Iris ou  
 Glayeul vne once pour chasque liure. Si on y  
 adioust vñ peu de mucilage de semence de  
 Melilot il en sera plus sedatif de douleur.

Auiourd'huy nous le preparons cō-  
 me il à esté dict: aucuns toutesfois, font  
 tremper trois iours, les semences de  
 lin & de fenugrec nettiees de toutes  
 ordures, & les racines de Malue mon-  
 dees & concassees, en eau sur les cen-  
 dres chaudes, & apres cela les font cui-  
 re iusques à la moitié, les remuant  
 tousiours, & les coulent: Cela fait ils  
 font cuire quelque espace de tēps vne  
 liure de ceste coulature, avec l'huile;  
 & apres

& apres ils adioustent le Litharge en poudre , & le remuent continuellement avec vne espatule , pendant qu'il cuit, & le font cuire iusques à ce qu'il ne iette plus de bouteilles , & qu'il ne meine plus de bruit en cuisant : ou bien iusques à ce que prenant vne goutte & la mettant sur vn marbre , ou dans de l'eau froide , pour la faire refroidir , on voye qu'elle est de bonne consistance.

Si l'huile & le Litharge estoyent diligemment lauez , la composition en seroit plus blanche beaucoup.

Selon Nicolas Alexandrin ceste composition se fait d'huile vieil quarante deux onces: de Litharge, trente six onces: de Racines de malue sauuage , de Guymauue, de semences de fœnugrec & de lin, de chacun douze onces: Il faut donc faire tremper les racines & les semences en trois phioles d'eau, trois iours entiers , & les faire apres cuire iusques à la moitié , & les couler: vne liure de l'expression veut estre apres cuite quelque temps avec l'huile , & en icelle faut mesler le Litharge en poudre, & le faire cuire iusques à ce qu'il soit assez, le remuant iours: &  
quand

quand il sera parfaitement cuit, à sçavoir quand il iettera de petites vescies & bouteilles, qui demeureront, il le faudra retirer du feu, & l'ayant laissé refroidir, le faut serrer.

J'en ay veu qui demesloyent longuement le Litharge avec l'huile, dans vn mortier de Bronze, avec vn pilon de fer, & par ce moyen il estoit blanc, mais incontinent qu'il sentoit le feu, il deuenoit fort noir, ce qui estoit du tout mal conuenable au Diachylon.

Il faut donc mettre le Litharge, dās le vaisseau qui est dessus le feu, & y mettre l'huile peu à peu, les meslant tousiours avec vn pilon de bois, & quand ils seront bien meslez & incorporez ensemble, il y faut mettre vne bonne partie des mucilages, & les faire cuire: & quand elles seront consumees, il y faudra mettre le reste, les remuant continuellement.

Pource que le Litharge est fort suiet à brusier, il est besoin de le remuer tousiours avec vne espatule bien large, à fin de garder qu'il ne touche au fons du vaisseau: il faut aussi que le feu ne soit pas trop violent, & si y faudra mettre les mucilages, comme il à esté dit.

Il sera



Il sera bien aussi plus blanc, comme on demande qu'il soit, si on y met bien petite quantité de mucilage extraicte de la semence de fenugrec: car quand il y en à beaucoup, la composition en est iaune: aucuns adioustent vn peu de sel au commencement qu'ils veulent extraire les mucilages, à fin qu'il en soit plus cler & plus blanc. Pareillemēt le Litharge bien laué en eau cōmune, ou en eau salee, est cause qu'il est beaucoup plus blanc, comme aussi quand on le cuit mediocrement: car quand on le fait cuire longuement & presque brusler, il en deuient iaune, ou rouge, ou noir: mesme si il y à grand feu & violent, le litharge deuient incontinent noir.

*La propor-  
tiō de l'huile  
& du li-  
tharge, est  
semblable  
qu'en la  
compositiō  
precedēte.*

L'Emplastre Diachilon surnommé grand, selon Mesués, est composé de litharge pur, & pilé & cassé, douze onces: d'huile de flambe, d'Anet, & de Camomile, de chacun huit onces: de Mucilages de semences de lin, de fenugrec, & de racines de Guymauue, de figues grasses, & de raisins secs, de suc de Glayeul, de Squille, de Suyn de laine, & de Colle de Poisson, de chacun douze drachmes & demie: de Tormentine, trois onces: de Resine de Pin, & de Cire iaune, de chacun deux onces: & faut faire ceste composition comme le Diachilon commun.

Il faut

Il faut extraire les mucilages comme nous auons dit cy deuant, & si faut nourrir le Litharge avec l'huile, dans le mortier ou dans le vaisseau, où on veut faire la composition, longuement auât que le faire cuire, le remuât tousiours: cela fait il le faut faire cuire à petit feu, & quand il commécera à s'espessir, il y faut mettre peu à peu les mucilages: & quand elles seront presque consumées, il faudra oster l'emplastre de dessus le feu, & y adiouster les suc de Glayeul & de Squille, & la mucilage de la Colle de poisson, extraicte en vin & eau meslez ensemble & cuits: & apres que ces choses seront consumées l'emplastre sera assez cuit, & y pourra on mettre la cire en petits morceaux, & la resine de Pin: lesquelles estans fondues, il faut retirer la compositiō hors du feu, & y mesler la Tormentine, & le Suyn de laine, car ces choses ne veulent estre cuittes aucunement.

L'emplastre de mucilages bastard est composé de mucilage de semence de Lin, de Fenugrec, de Guimaue, & de la moyenne escorce d'Orme, de chacun quatre onces & demie: d'huile de Lis, d'Anet, & de Camomile, de chacun vne once: d'Ammoniac, de Calbannum, d'Opo-

ponax, de Sagapenum, de chacun demie once: de cire neufue, vingt onces: de Tormentine, deux onces: de Saffran, deux drachmes: Formez vostre emplastre.

Il faudra extraire les mucilages en la façon que nous auons dit cy deuant, ayant premierement bien pilé l'escorce d'Orme: il faut aussi faire consumer ces mucilages en l'huile en cuisant, & laisser rasseoir les huiles pour les nettier, ou bien il les faudra couler par vn linge, sans les rien exprimer: & puis il faut mettre la Cire en petites pieces, avec l'huile, & la faire fondre: & quant aux quatre liqueurs, à sçauoir l'Ammoniac. le Galbanum, l'Opoponax, & le Sagapenum, il les faut dissoudre en vin aigre, & les couler aussi par vn linge, & estans coulees les mesler avec l'huile & la cire fondues & chaudes: finalement quand la composition sera hors du feu, il y faut mettre la Tormentine, & mesler tresbien le tout ensemble, se prenant bien garde que rien ne se mette en grumeaux & morceaux. Quant au Saffran, il le faut piler, & l'estendre sur le marbre, quand on formera les magdaleons, & par ce moyen le mesler en la composition.

*Ou en decoction de  
Camomile,  
& Melilot.*

L'empla

L'emplastre de Melilot de Mesues , se fait de Melilot, six onces : de fleurs de Camomille , de semence de Fenugrec, de racines de Guimaue, d'Aluine, de Mariolaine, de bayes de Laurier, de chacun trois drachmes : de Cardamome , de Souchet, de Glayeul, de Cannelle, de Spica nardi, de semence d'Ache, d'Ammi, & d'Anis, de chacun deux drachmes & demie : d'Ammoniac dix drachmes : de Stirax , de Bdellium , de chacun cinq drachmes : de Tormentine , vne once & demie : de Figues grasses , au nombre de douze : de suif de Bouc, de Resine, de chacun deux onces & demie : de Cire, six onces : d'huile de Mariolaine , & de Spica, autant qu'il en faudra pour infuser & estendre le tout.

Le suif de Bouc estant coulé, & la Resine & la Cire, veulét estre fondus dans *Comme en-* les huiles : les Figues grasses , ou bien *viron vne* vn peu humectees & trépees, il les faut *once de cha* bien piler, & les passer par vn linge , ou *cun.* par vne estamine , ou par vn tamis de soyes de cheual , & les mesler avec les autres : apres il faut dissoudre l'Ammoniac & le Bdellium en vinaigre , & les couler, & les y mesler aussi, puis la Tormentine : finalement estant refroidy, il y faut mettre les poudres des racines sechées , des herbes , des fleurs , & des choses aromatiques, & avec ceux là, le Styraz pilé à part exactement.

Si la quantité des figues n'estoit petite,

& la quantité des poudres grande, & qu'il ne les faut rien fasser, on les pourroit bien hacher menu & les piler avec le reste. Quant aux bayes de Laurier, il faudra oster l'escorce de dessus.

Aucuns trouuent meilleur de faire dissoudre l'Ammoniac & le Bdellium, en l'eau de la decoction de Melilot, de Camomille, & de Fenugrec, estimans que par ce moyen l'emplastre est rendu plus remolitif: mais il est beaucoup plus mal-aisé de les dissoudre en ceste eau, que non pas au vinaigre, à cause que le vinaigre est de plus subtiles parties & penetre mieux, & les fait plustost fondre.

L'emplastre Ceroneum de Nicolas, est composé de Poix prise des natures coulee, de cire, de chacun deux onces & trois drachmes: de Sagapenum, deux onces: d'Ammoniac, de Tormentine, de Colophonienne, de Saffran, de chacun vne once & trois drachmes: d'Aloës, d'Encens, de Myrthe, de chacun vne once: d'Opopanax, de Styrax, de Galbanum, de Mastic, d'Alun, de Fenugrec, de Styrax rouge, de Bdellium, de chacun trois drachmes: de Litharge, vne drachme & demie.

Le Sagapenum, le Galbanum, l'Opopanax, & l'Ammoniac, veulēt estre rompus

pus, ou bien plustost coupez, & mis  
tremper en vin qui les couure, toute  
vne nuit: apres cela il les faut faire  
cuire, iusques à ce que le vin soit à de-  
my consumé, & les couler: lors il y faut  
adiouster la poix coulee, & la remuer  
tousiours avec l'espatule, & la poix es-  
tant fondue, on y pourra mettre la  
Cire: la Cire estant fondue il y faut  
mettre la Colophonienne coulee: & a-  
pres tu y pourras adiouster le Styrax pi-  
lé & mis en pieces avec vn pilō chaud:  
& quant au Mastic, l'Encens, la Myrrhe,  
le Bdeillum, il les faudra piler & sasser,  
& les y mettre quelque peu de temps a-  
pres: & puis la Tormentine, l'Alun, le  
Litharge, & le Fenugrec: & quād l'em-  
plastre sera cuit, il le faut ietter dans de  
l'eau froide, & apres l'auoir retiré, le  
faut fort exprimer avec les mains, à fin  
d'oster toute l'eau, & avec la poudre  
d'Aloës, esparse sur vn marbre engrais-  
sé d'huile Laurin, le faut fort pestrir, &  
avec le saffran en poudre formez les  
magdaleōs, engraisant les mains avec  
le mesme huile.

Vray est que Nicolas Alexandrin,  
fait cuire le Litharge pilé bien delié a-  
uecl'huile, iusques à ce que ce soit as-

sez, & apres il y adioust la poix:laquel  
le estant fondue,il y met la Cire:& icel-  
le fondue, il y adioust les larmes cou-  
lees,l'Ammoniac,le Sagapenum,l'Opo-  
panax,le Galbanum, les deux Styrax,&  
la Tormentine, & les demesse bié avec  
l'espatule : apres il y met la Colopho-  
nienne,l'Encens, le Bdellium,l'Alun,la  
Myrrhe, & le Fenugrec en poudre , les  
mellant peu à peu: & quand il est cuit,il  
le jette dans l'eau.

On appelle cest emplastre Ceroneum ,  
mais Ceroma à parler proprement, si-  
gnifie l'huile duquel les luitteurs s'en-  
graissent.

La façon qu'on a aujourd'huy de fai-  
re cest emplastre est beaucoup meilleu-  
re que les precedantes, car on fait fon-  
dre la poix & la Colophonienne , & les  
coule-on & fait-on fondre la cire avec:  
& quant au Sagapenum , l'Ammoniac,  
le Galbanum,l'Opopanax,& le Bdelliū,  
on les dissout en vin,& les coule-on, &  
apres les auoir fait cuire iusques à ce  
que le vin soit quasi tout consumé, on  
les messe petit à petit avec le reste:a-  
pres on y met la Tormentine, & finale-  
mēt la poudre de toutes les autres cho-  
ses bien deliee & sasse:mais le saffran,

on

on ne le met sinon'en pestriſſant la compoſitiō ſur le marbre, il ſe faut biē auſſi ſouuenir de ſ'engraiſſer les mains avec huile, à fin que l'emplatre ne ſe prenne aux doigts.

Mais pluſtoſt les liqueurs eſtans cuites comme i'ay dit, on y meſle particulierement la cire, la reſine, & la colophonienne fondues: ou bien on meſle à part la cire avec ces liqueurs, laquelle eſtant fondue on y meſle les autres deux, apres les auoir fait fondre petit à petit: & par ce moyen elles ſ'aſſemblēt mieux & plus ſoudain, en vn corps. Mais ſi on pēſe mettre tout en vn coup les liqueurs dans la cire, dās la poix, ou dans la Colophonienne: ou ceux-cy, dans les liqueurs on peut eſtre aſſeuré que les liqueurs iront incontinent au fond, à cauſe de leur peſanteur, & qu'elles ſe bruſſeront: d'autant auſſi qu'ils ſont aigueux, il ſera fort mal-aiſé de les meſſer avec les autres choſes graſſes, qui vont touſiours au deſſus à cauſe de leur legereté, de ſorte que deuant qu'on les puiſſe meſſer, les liqueurs ſeront bruſſees, ou peu ſ'en faudra.

Il ſe faut bien auſſi prendre garde diligemment que l'Aloës ny la Myrrhe



ne se bruslent, & qu'elles ne rendét l'emplastre grumeloux.

D'autres comme pour vn secret, font dissoudre le Sagapenum, l'Ammoniac, le Galbanum, l'Opopanax, & le Bdelium en vin, puis les font cuire, iusques à ce qu'ils ayent la consistance d'emplastre: & apres cela ils y meslent la tormentine, & la remplissent peu à peu, sans point de feu ( ce qu'ils obseruent non pas seulement en la compositiō de cest emplastre Ceroneum, mais aussi en l'emplastre precedent de Meliloto, & autres ) & apres ils font fondre la cire & la poix ensemble avec la Colophonienne, & les meslent: & finalement les autres choses.

L'emplastre Oxicroceum, selon la description de Nicolas, est composé de poix nauale, de safran, de Colophonienne, de cire, de chacun quatre onces: de tormentine, de Galbanum, d'Ammoniac, de Myrthe, de Mastic, d'encens, de chacun vne once & trois drachmes.

Il faut faire tremper le Galbanum & l'Ammoniac en vin-aigre toute vne nuit, lendemain il les faut faire fondre sur le feu, & les couler, & puis les faire cuire derechef, iusqu'à ce qu'une partie du vinaigre soit cōsumee: & lors  
il y

il y faut adiouster la poix nauale coulee, laquelle estant fondue, on y met la cire, & apres qu'elle sera liqueficee on y mettra la Colophoniéne, & puis la Tormentine: quelque temps apres, y faut mesler le mastic, l'encens & la myrrhe, les meslant tousiours avec l'espatule. Estans cuits il les faut ietter dedans de l'eau froide, & les exprimer bien fort avec les mains, & sur vn marbre engraisé d'huile, avec la poudre de safran bien delicee former les magdaleons.

D'autres fondent la poix nauale coulee, la Colophonienne, & la cire, & lors que ces choses sont encores chaudes, ils y meslent le Galbanum, & l'Ammoniac, apres les auoir dissous en vinaigre & coulez. Ces choses estans cuites, ils y mettent le mastic, l'encens, & la myrrhe, & finalement la tormétine: & quand il est desia refroidy, ils y meslent le safran en poudre, pestissant le tout avec les mains dessus le marbre: vray est qu'en hyuer on y peut adiouster vne once d'huile, à cause de la siccité de l'emplastre.

Nicolas Alexandrin fait cuire la poix avec vne partie de vinaigre, en vn pot

neuf, iusques à la consommation du vinaigre, & avec l'autre partie, l'ammoniac: & quant à l'encens il le pile & le dissout dans le mortier, puis les fait cuire, les remuant tousiours, se prenât bié garde que le vinaigre ne s'en aille. Quand le vinaigre est consumé, il y adiouste le Galbanum, la myrrhe, & le mastic: & apres que ces choses ont bouilly, il y adiouste peu à peu le saffran en poudre, & apres il le iette dans le mortier, & forme les magdaleons: mais pour dire ce que m'en semble, les autres façons de faire me plaisent plus.

Cest emplastre est appellé Oxicroceum, à cause du vinaigre, avec lequel il faut tremper & dissoudre le Galbanum & l'ammoniac, & du saffran qu'on y met en bonne quantité: car il y en entre quatre onces, & au Ceroneũ n'y en entre qu'une once & trois drachmes. Dauantage en la composition du Ceroneum, on dissout les liqueurs en vin, quant au reste ils sont fort semblables: vray est que le Ceroneum est plus vertueux, & l'Oxicroceum est plus cher à cause de la quantité du saffran, laquelle on amoindrit diuersement, car pour le rédre à meilleur marché, on n'y met  
 aujour

aniourd'huy que deux onces de saffra. Mais la tromperie n'est pas fort grãde, car le saffran ne luy donne pas plus de vertu qu'au Ceroneum, de sorte que ie ne voy point de raison pourquoy on a mis si grande quantité de saffran en ceste composition, sans qu'il soit beaucoup necessaire, & sans qu'il luy donne grande vertu.

L'emplastre de Ianua de Nicolas, est composé de suc d'Ache, de Plantain, de Betoine, de chacun vne liure: de Cite, de Poix, de Resine ter bentine, de chacun vne liure & demie: & formez vostre emplastre:

Il faut cuire les trois derniers dans les suc, à petit feu, & les remuer continuellemēt, iusqu'à ce que les suc soyēt cōsumez: & y ayant mis la tormētine, il leur faut faire, faire vn bouillon ou deux. D'autres font cuire la tormentine avec les choses dites, & puis meslent l'autre partie hors du feu, à fin de corriger la siccité des autres, & par ce moyen ils font que l'emplastre est de meilleur forme. Mais quant à moy, j'aimerois beaucoup mieux faire cuire les suc à part, iusques à estre espessis comme vin cuit, & puis faire fondre les autres, &  
les

les mesler ensemble: ie ne trouue point ny en l'vn ny en l'autre Nicolas, la composition de cest emplastre, ny des trois suyuantz auec, mais seulement entre tous ceux cy, i'ay trouué le Ceroneum, l'Oxicroceum, & l'Apostolicum.

L'emplastre de gratia Dei de Nicolas, est composé de Tormentine, demie liure: de Resine, vne liure: de Cire, quatre onces: de Mastic, vne once: de Verueine, de Pimpinelle, de Betoine, de chacun vn manipule.

Il faut concasser ces herbes, & les faire cuire en bon vin blanc & puissant, iusques à ce que la tierce partie du vin soit consumée, puis les couler, & ietter là le marc des herbes: & dans la colature, il faut faire cuire la Cire, & la Resine, & le Mastic, iusques à ce que la composition ait vn corps & consistance conuenable, & lors le faudra retirer de dessus le feu, & y adiouster la Tormentine, les remuer tousiours avec l'espatule, & former l'emplastre.

Il faut prendre toutes ces herbes fresches & recentes, les hacher menu, & les piler, puis les faire cuire en bon vin blanc & puissant, iusques à ce que les herbes soyent dissoutes, & lors les  
faudra

faudra couler, & dans la reste du vin qui sera coulé, il faut faire cuire la Cire & la Resine, iusques à ce que la coulature soit presque consumée : & lors il y faudra mettre le Mastic, & finalement la Tormentine, & les faire bouillir vn bouillon, puis les retirer du feu : & quād il sera refroidy mettez vostre cōposition en Magdaleons.

D'autres font cuire la Resine seulement dans la coulature, & quād la coulature est presque consumée, ils y adioustent la Cire, & finalement la Tormentine, lors que la composition est hors du feu, & quand elle commence à se refroidir, ils y meslent le Mastic en poudre. L'vne & l'autre de ces deux dernieres façons, est meilleure que non pas celle de Nicolas, car le Mastic ne peut pas souffrir la coction, à cause de la ténuité de sa substance.

Auiourd'huy pour le rédre plus blāc, on y met vn peu plus grande quantité de Tormentine, & puis on le tire comme on faict les Penides.

L'emplastre qu'on fait contre les hernies selon Nicolas, est composé de poix naualle, d'Aloës, de chacun trois onces: de Litharge, de Cire rouge, de Colophonienne,

phoniéne, de Galbanum, d'Ammoniac, de chacū deux onces : de Guy de Chesne, six onces : de Boliarmeni, des deux Simphitum ou Consoulde, de Gy ou Plastre, des deux Sarrafines, de vers de terre, de Noix de Galle, de chacun quatre onces : de Myrrhe, d'Encens, de chacun six onces : de Tormentine deux onces : de sang humain, vne liure. Il faut donc prendre la peau d'un mouton, incontinent qu'il est escorché, & la faire cuire vingt & quatre heures, & apres auoir exprimé la peau, & l'auoir ietté là, il faut mettre dans la decoction le Guy de Chesne, & apres l'auoir fait cuire longuement il les faut retirer du feu, & y adiouster la Tormentine, le Litharge, la Colophonienne, & quelque peu apres le Mastic, l'Encens, la Myrrhe, le Galbanum, l'Ammoniac, & les vers de terre : & vn peu apres les deux Consouldes, le Gy, le Boliarmeni : & lors il les faut remettre sur le feu, & y adiouster le Sang humain, la Sarrafine longue, & la rôde : finalement l'Aloës, les remuant tousiours avec la Spatule : puis il le faut verser sur vn marbre oinct avec huile violat, & le bien pestir avec les mains : & derechef il le faut piler continuellement  
deux

deux ou trois iours, dans le mortier.

Quand on a fait cuire les Bayes de Guy de Chesne, iusques à ce qu'elles soyent dissoutes, en la decoctiō de peau de Mouton recente, dont nous auons parlé, il les faut couler & exprimer, puis ietter le marc, & y adiouster le Litharge, vn peu apres la Cire, la Poix, & la Colophonienne, lesquelles il faut tousiours remuer en cuisant, à fin que elles ne bruslent: quād ces choses sont cuittes, & que l'eau est quasi toute consumee, il y faut adiouster le Galbanum, & l'Ammoniac, dissous en vin, & passez par l'estamine, la Myrrhe & la Tormentine, il les faut mettre quand la composition est hors du feu, & estant encores chaude, il faut mettre l'encens, & le mastic, & quant aux vers de terre, il les faudra bien lauer en vin, & les faire cuire en d'autre vin à part. Cest emplastre s'endurcit fort avec le temps, si on n'y met point d'huile.

D'autres apres auoir coulé le Guy, mettēt hors du feu la Cire, la Colophonienne & la Tormentine: quelque tēps apres ils y mettent les liqueurs dissoutes, coulees & cuittes, cōme il a esté dit souuent: finalement le Litharge, le Gy,  
l'Encens,



l'Encens, la Myrrhe, le Boli armeni, le Sang humain, & les autres choses qui se peuuent piler & mettre en poudre.

*Ce qui se fait bien tost à cause de la petite quantité d'huile.*

L'Emplastre qu'on nomme Diuinum selon Nicolas, est composé de Galbanū, de Myrrhe, de chacun vne once & deux drachmes: d'Ammoniac, trois onces & trois drachmes: d'Opopanax, de Mastic, de Sarrafine longue, de Verdet, de chacun vne once: de Litharge & d'huile commun, de chacū vne liure & demie: de Cire neufue, huit onces: d'Encens vne once & vne drachme: de Bdellium, deux onces: d'Aimant trois onces: meslez le tout comme il appartient,

Il faut nourrir long temps deuant que faire la composition, le Litharge avec l'huile, & puis le faire cuire iusqu'à ce qu'il soit espeffi: & lors y faut adiouster la cire en petites pieces: laquelle estant fonduë, il les faut retirer du feu, & y adiouster le Galbanū, l'Ammoniac, l'Opopanax, le Bdellium (s'il est mol) dissous en vin-aigre ou en vin, coulez & cuits: apres cela il faut mettre la poudre de Myrrhe, & de Bdelliū (quand il est sec) de Mastic, d'Encens, de Sarrafine, & d'Aimant: finalement le Verdet, de peur que s'il cuit trop longuement la composition ne deuienne rouge, il faut bien toutesfois que la compo

cōposition soit encores biē chaude, ou autremēt à cause de sa durté & solidité, il seroit mal-aisé de mesler le tout. Si tu veux que la composition soit de couleur fauve, il y faut mettre le Verdet à demi brulé, ou bien le rendre tel en cuisant: si tu la veux rouge (comme on l'estime estre bonne en Languedoc) il faudra mettre deux ou quatre drachmes de ce verdet, lors que le litharge commence à cuire, & le reste du verdet le faut mettre à la fin: que si tu ne le veux pas de ceste couleur, il le faudra tout mettre en la composition sur la fin & le dernier.

On reduit aujourd'huy en forme d'emplastre à force de cuire, longuent Triapharmacū, & l'onguent de Ceruse. *De Mar-*

L'Emplastre appellé Apostolicum de Nico-  
*las, est composé de Litharge six onces: de cire selon Nico*  
 de Mauritanie, de Colophonienne, de chacun *las Alexā.*  
 deux onces: de Propolis, de Guy de Chesne, de *lequel s'ac*  
 chacun vne once: d'Ammoniac, de Cadmie en *corde en*  
 pierre, de chacun six drachmes: de Mastic d'en-  
 cens, de chacun vne once, & demie: de Tormē- *tout le re-*  
 tine, de Bdelium, d'Opoponax, de Galbanum, *ste, hormis*  
 de Myrrhe, de Sarcocolla, d'Erain brulé, d'es- *qu'il est*  
 caille de Bronze, de Verdet, de Diâ, de Sattrasi- *tout diuers*  
 ne ronde, de Mumie, de chacū trois drachmes.

Après qu'on a nourri longuement *au pois.*

le Licharge avec l'huile, on les fait cuire, les remuant tousiours, iusques à ce qu'ils ayent la consistance d'emplastre, ou bien iusques à ce que les mettât en vne escuelle, ils soyent amassez en façõ de miel ou de cire: & lors il y faut faire fondre la Cire, la Colophoniène, le Mastic, l'encens, la Myrrhe, le Bdelium, la Propolis, & le guy de Chesne, au mesme ordre que nous les auons ici mis: ceux-la estans fondus, il faut retirer la composition hors du feu, & y adiouster peu a peu, afin qu'ils ne bouillent, les liqueurs, L'Ammoniac, L'Opopanax & le Galbanum, dissous en vin-aigre ou en vin, coulez, & cuits iusques à la consommation du vin-aigre ou du vin, comme il à esté dict, puis les faut faire cuire derechef: finalement il faut y adiouster les poudres de Sarcocolla, de Cadmie en pierre, de verdet, d'Escaille de Bronze, d'Erain brulé, de Dictam, & de Sarrafinc: & quand il sera entierement cuit (asçauoir quand il s'endurcit si on en met vne petite portion en de l'eau froide, & qu'il ne souille point les mains quand on le manie, & ne se préd aux doigts) il faut ietter toute la composition

position en de l'eau froide : & quand il sera refroidy, il le faut tirer hors de l'eau , & s'engraisser les mains avec huile Laurin, & former les Magdaleons.

Nicolas Alexandrin apres avoir fait cuire le Litharge & l'huile iusques à la cōsistence d'emplastre , il y adioutte la Cire, le Galbanum, la Tormentine, la Propolis , & la Colophonienne, l'une apres l'autre & chacune à part, en bien peu de temps: & apres il met l'Erain brulé & la Cadmie , les faisant tousiours bien bouillir: apres cela il met l'Opopanax, l'Ammoniac, le Bœcilium, le Guy, la Myrrhe, l'Encens , le Mastic, la Sarcocolla & l'escaille de Bronze pilée & broyée dans le mortier avec vn peu de vin-aigre, & reduitte en forme de lait: & fait cuire le tout les remuant & demellant ordinairement avec l'espatule.

L'emplastre de Vigo est composé d'huile de Camomille, d'Aneth, de Spica, de Lis , de chaque deux onces: de graisse de porc, & de veau, de chacun vne livre : d'Euforbe, cinq drachmes: d'Encens, dix drachmes: d'huile laurin, vne once & demie : de graisse de viperes , deux onces & demie: de Grenouilles toutes viuantes,

au nombre de six : de vers de terre lauez en vin trois onces & demie : de suc des racines d'yebles, & d'Aunee, de chacū deux onces : de Schennātos, de Stechas, de Matricaria, de chacun vne poignee : de vin odorant, deux liures, faites cuire le tout ensemble iusques a ce que le vin soit consumé, coulez le, & en la coulature adioustez y de litharge d'Or, vne liure : de Tormentine clere, deux onces : & avec de la cire blanche, faites en vn Cerat, ou vn onguent : y adioustant à la fin du Stirax calamite, vne once & demie, & l'ayant osté de dessus le feu, remuez le tresbien avec le pilō, iusques à ce qu'il soit tiede, & lors adioustez y d'argent vif esteint en de la salieue humaine, quatre onces, & le demeslez longuement avec le pilon.

Je n'auois pas deliberé de mettre la composition de cest emplastre, à cause de l'argent vif qu'y entre, l'vsage duquel i'ay en horreur sur tout, à cause des inconueniens que les Anciens ont dit en pouuoir aduenir, & que les modernes n'ont que trop souuent experimentez, & plus qu'ils ne voudroyent : mais d'autant qu'il est en commun vsage, cela à esté cause que ie ne l'ay point voulu laisser : & avec ce le loz que Pierre Grosselius iadis mon compaignon en l'estude de medecine, & maintenant Medecin fort expert & excel

excellent, luy attribue , à esté cause en  
 partie que ie l'ay icy mis, car il dit auoir  
 souuent experimenté avec heureux  
 succez, qu'il est fort propre és douleurs  
 des iointures, & autres parties nerueu-  
 ses , aussi bien en celles qui viennent  
 comme de pere à fils , & qui sont here-  
 ditaires, comme en celles qui viennent  
 & qui accompaignét le mal de Naples,  
 és corps charneux.

Au reste il ne m'a pas semblé neces-  
 saire, de mettre icy plus grand nombre  
 de compositions, pource que entre cel-  
 les qui se trouuent és auteurs , il y en  
 a plusieurs qui ont mesme faculté, par-  
 quoy il semble qu'elles sont vaines &  
 qu'il y en à assez d'une : avec ce qu'un  
 homme docte , y en pourra adiouster  
 des autres , ou en oster de celles qu'y  
 sont, ou pour le moins les changer, afin  
 qu'elles soyent cōposees de plus grand  
 nombre de simples, ou de moindre nō-  
 bre , ou pour le moins qui n'ayent pas  
 mesme vertu & faculté. Et avec ce il  
 sera bien aisé à qui voudra, d'en tirer de  
 Mesues, & de Nicolas Alexandrin, plus-  
 tost que de Nicolas Salernitan , quand  
 on en aura affaire. Nous nous sommes

contentez pour le present d'essayer par ce petit labeur, ce que nous pourrons faire & entreprendre vne autre fois, touchant ceste matiere. Parquoy nous auons mis seulement quelque peu d'exemples de chacun & fort briefuemét, encores que nous eussions peu amener beaucoup plus d'exemples, mais cela n'eust esté que descourager les nouices & les rendre confus. Or cecy ne sont que comme les gros traits & vn proiet de ce que ie pretens d'escrire cy apres: mais il me faut peu à peu façonner & diuise les Apoticairez à choses meilleures, afin qu'ils ne fuyent pas apres les choses plus grandes. Car ie sçay bien que parmy ce grand nombre il y en à plusieurs du tout ignorans, & qui n'ont cognoissance d'aucune chose, gens hebetes, & qui plus est, meschans, & sans doute plustost empoisonneurs qu'Apoticairez, qui ne s'espargneront point de vituperer ce mien labeur cōme inutile, voire comme s'il estoit nuisible, car ils diront (mais ce sera fausement) que il auoit esté assez biē pourueu aux pources malades, par les auteurs Arabes. Mais tels personnages s'aperteu-  
ront

uront bien tost, cōbien leur condition  
 à esté miserable iusqu'icy, & vœillent  
 ils ou non ils seront cōtrains de se ran-  
 ger sous les preceptes que nous auons  
 icy mis, afin que le prouerbe ne soit ve-  
 rifié en eux, qu'ayans trouué de bonne  
 viande, ils ont mieux aimé se tenir au  
 gland. Cependāt pource que tels pour-  
 ceaux ne sont pas dignes des bonnes  
 senteurs, comme dit le prouerbe, i'ay  
 escrit ces choses pour ceux qui sont  
 desirieux de la vertu, & de la cognois-  
 sance de la Pharmacie, & encores que  
 ce soit biē peu de chose, ie les prie tou-  
 tesfois qu'ils le prennent de bōne part  
 & gracieusement, considerans combiē  
 il est malaisé de mettre la main & d'in-  
 uenter vne chose à laquelle personne  
 n'auoit encores mis la main. Ceux la en  
 pourrōt iuger qui ont quelquefois mis  
 de leurs escrits en lumiere, car ils sça-  
 uent bien combien de diligēce, d'estu-  
 de, de trauail & soucy, & de labeur il y  
 a falu employer : mais ceux qui ne mi-  
 rent iamais rien en lumiere ne sçauent  
 que c'est, & ne peuvent iuger combien  
 nous y auons trauaillé, voila pourquoy  
 ils ne sçauent sinon que calomnier, mais



qu'y feroit-on? ce sont tousiours telles  
plantes qui produisent calomnies &  
produirôt à tousiours, & à la verité c'est  
mal fait de s'essayer de faire service à  
telles gens comme disent les poëtes.  
Mais toy debonnaire lecteur, pren de  
bonne part, & sans estre ingrat, ce mié  
petit aprentissage, ce pendât que nous  
sommes apres à faire comme vn chef  
d'euure, touchant ceste partie de  
medecine, lequel sera bien  
plus beau, plus ample, &  
plus digne d'estre  
laissé à la po-  
sterité.

*Fin du dernier liure.*

T A B L E



TABLE DES MATIÈRES CONTENUES EN CETTE OEUVRE.

Liure premier.

<b>D</b> Es marques des simples , prises de la quantité.	pag.9
Des marques des simples , prises de la qualité.	12
Des marques des simples , prises de la figure.	17
De l'élection des simples prise de la situation & lieu.	20
Du choix des simples, prins du temps.	28
Temps de cueillir les racines.	37
Du choix des racines étrangères.	44
Ty s	

# T A B L E.

<i>Du choïs des herbes.</i>	61
<i>Du choïs des fleurs.</i>	65
<i>Du choïs des semences.</i>	75
<i>De l'elec̃tion des fruĩts.</i>	78
<i>De l'elec̃tion des bois.</i>	95
<i>Du choïs des escorces.</i>	100
<i>Du choïs des suc̃s.</i>	103
<i>Du choïs des liqueurs.</i>	117
<i>De l'elec̃tion des Resines.</i>	110
<i>Du choïs des Gomm̃es.</i>	119
<i>Du choïs des metaliques &amp; terrestres.</i>	

127

<i>Du choix des simples , prins des parties des animaux.</i>	139
--	-----

<i>Des simples , ausquels est besoin de se prendre garde de pres, quand on les choisit.</i>	146
---	-----

<i>De la sophistication des simples , &amp; de ceux qui ont mesme denomination.</i>	148
---	-----

<i>Des medicamens substituez, ou, qui pro quo.</i>	159
--	-----

Liure

T A B L E.  
Liure second.

<b>Q</b> ue c'est que preparation, & des diuerses façons de preparer les medicamens.	pag. 173
Des façons de piler les simples.	182
Façon de piler les racines.	186
Maniere de piler les herbes.	188
Façon de piler les fleurs.	189
Pour piler les fruiets & les semences.	193
Pour piler les sucs, gommes, & resi- nes.	198
Pour piler les bois & escorces.	205
Façon de piler les metaliques & ter- restres.	206
Pour piler les simples prins des par- ties des animaux.	208
De ceux qui veulent estre pilez à part, ou avec autres.	210
Qui veulent estre pilez doucement ou avec force.	223
Qui peuvent estre pilez longuement,	228

# T A B L E.

<i>ou brièvement.</i>	227
<i>Qui veulent estre pilez grossieremēt,</i> <i>ou delié.</i>	234
<i>D'aucunes façons de preparation qui</i> <i>seruent à piler, ou qui tiennent son</i> <i>lieu.</i>	244
<i>La façon de cribler.</i>	251
<i>La maniere de dissoudre.</i>	259
<i>Façon d'amollir.</i>	268
<i>Maniere d'endurcir.</i>	270
<i>Façon de fondre ou liquesfier.</i>	271
<i>Façon d'eschauffer.</i>	274
<i>Maniere de deseicher.</i>	277
<i>Façon d'humecter.</i>	285
<i>Maniere d'infuser.</i>	287
<i>Façon de nourrir les medicamēs.</i>	298
<i>Façon d'exprimer ou pressurer.</i>	303
<i>Façon de frotter les medicamens.</i>	305
<i>Façon d'extraire ou tirer les sucs.</i>	310
<i>Maniere de distiler.</i>	327
<i>Maniere de cuire les medicamēs.</i>	331
<i>L'usage &amp; façon d'escumer.</i>	357
<i>L'usage &amp; maniere de clarifier.</i>	363
<i>L'usage</i>	

<i>L'usage &amp; façon de couler.</i>	368
<i>L'usage &amp; maniere d'aromatizer.</i>	
375	
<i>L'usage &amp; façon de coulourer les medicamens.</i>	378
<i>L'usage &amp; façon d'incorporer les medicamens.</i>	381
<i>L'usage &amp; façon de former les medicamens.</i>	384
<i>L'usage de sceller &amp; marquer les medicamens.</i>	387
<i>L'usage &amp; maniere de les serrer pour garder.</i>	390
<i>La maniere de bien garder &amp; conseruer les medicamens.</i>	397
<i>L'usage &amp; maniere de confire.</i>	401
<i>L'usage &amp; façon de farcir.</i>	405
<i>L'usage &amp; façon de faire pourrir les medicamens.</i>	407
<i>L'usage &amp; maniere de les frire &amp; rostir.</i>	410
<i>L'usage &amp; maniere de les brusler.</i>	416
<i>L'usage &amp; façon d'amortir ou esteindre.</i>	



dre.

437

*L'usage & maniere de les parfumer.*

438

*L'usage & fason de les nettoyer.* 440*L'usage & maniere de les lauer.* 449*Des medicamens qui demãdent plusieurs & diuerses sortes de preparation tout à la fois.*

466

Liure troisieme.

**D**E la composition des condits & confitures. pag. 479*La cõpositiõ des resinez & sirops.* 495*De la cõpositiõ des sirops cõposẽz.* 518*La composition des Eclegmes.* 539*Des Apozemes & Infusions.* 543*Des Antidotes ou Electuaires.* 544*Des Pilules.* 576*Des Trochisques.* 593*dres.* 597*les.* 598*uents.* 608*plastres.* 628

Fin de la Table.







